




III. VII. 43.

11 83

M







PRINCIPIA
TOTIUS
THEOLOGIÆ
MORALIS ET SPECULATIVÆ,
EX
S. SCRIPTURA, CONCILIIS,
SANCTIS PATRIBUS,
MAXIME
S. AUGUSTINO

Et aliis probatis Auctoribus compendiosè
deprompta,

AUTHORE



FLORENTIO DE COCQ.

Ecclesiæ S. Michaëlis Antverpiæ Ord. Præmonstr. Canonico
ac ibidem S. Theologiæ Lectore.

TOMUS SECUNDUS.



COLONIÆ AGRIPPINÆ,

Sumptibus BALTHAZARIS AB EGMOND, &
Sociorum. M. DC. LXXXII.

Cum Approbatione.



THE
JOURNAL OF THE
ROYAL ANTHROPOLOGICAL INSTITUTE
OF GREAT BRITAIN AND IRELAND
VOLUME 18. PART 1. 1888.

CONTENTS.
PAGES.
The Human Skeleton of the Cave of Vache, near
Villeneuve-la-Guyon, France. By M. G. S. P. 1

The Human Skeleton of the Cave of Vache, near
Villeneuve-la-Guyon, France. By M. G. S. P. 1
The Human Skeleton of the Cave of Vache, near
Villeneuve-la-Guyon, France. By M. G. S. P. 1

The Human Skeleton of the Cave of Vache, near
Villeneuve-la-Guyon, France. By M. G. S. P. 1
The Human Skeleton of the Cave of Vache, near
Villeneuve-la-Guyon, France. By M. G. S. P. 1

The Human Skeleton of the Cave of Vache, near
Villeneuve-la-Guyon, France. By M. G. S. P. 1
The Human Skeleton of the Cave of Vache, near
Villeneuve-la-Guyon, France. By M. G. S. P. 1

I N D E X

R A C T A T U U M , C A P I T U M E T S E C T I O N U M .

T R A C T A T U S I V .

C A P U T P R I M U M .

D E Fide Theologicâ.	fol. I
SECT. I. <i>Quid sit fides , & quotu- plex.</i>	ibid.
. <i>De origine Fidei Theologicæ.</i>	3
I. <i>De actu voluntatis ad fidem requisito.</i>	5
V. <i>De fide latè dictâ.</i>	7
. <i>De objecto formali fidei.</i>	10
I. <i>Quanam revelatio sit objectum formale fidei.</i>	12
II. <i>An Deus possit revelare sive testari falsû</i>	14
III. <i>An testimonium , quod solum existima- tur esse à Deo , possit esse objectum formale fidei.</i>	16
X. <i>An revelatio ad fidem requisita possit esse evidens.</i>	18
. <i>De evidentiâ credibilitatis rerum fidei</i>	19
CI. <i>De signis credibilitatis.</i>	22
CI. <i>Quod fides sit certior quâvis scientiâ na- turali.</i>	25
Tom. II.	*2 XIII.

I N D E X.

<u>XIII. De objecto materiali sive articulis fidei, an semper fuerint planè iidem.</u>	<u>27</u>
--	-----------

CAPUT SECUNDUM.

<u>D E Necessitate Fidei Theologica.</u>	<u>29</u>
<u>I. An fides sit ad salutem necessaria, ibid.</u>	<u></u>
<u>II. De necessariis creditu ad salutem necessitate precepti.</u>	<u>35</u>
<u>III. De precepto eliciendi actum fidei.</u>	<u>42</u>
<u>IV. An sola fides sufficiat, aut umquam suffecerit ad salutem.</u>	<u>44</u>
<u>V. Quid requiratur ut actus Fidei sit meritorius.</u>	<u>46</u>
<u>VI. An sit necessaria externa fidei confessio.</u>	<u>47</u>
<u>VII. Quinam habeant veram fidem.</u>	<u>52</u>
<u>VIII. An qui discredet uni articulo fidei, discredat omnibus aliis.</u>	<u>53</u>

CAPUT TERTIUM.

<u>D E Romano Pontifice.</u>	<u>55</u>
<u>I. De Potestate Romani Pontificis. ibid.</u>	<u></u>
<u>II. De infallibilitate Pontificis.</u>	<u>59</u>
<u>III. An sit de fide Innocentium XI. esse verum Pontificem.</u>	<u>62</u>
<u>IV. An Pontifex possit esse hæreticus.</u>	<u>64</u>
<u>V. De Conciliis.</u>	<u>66</u>
<u>VI. De autoritate Concilii generalis comparata ad Pontificem.</u>	<u>69</u>
<u>VII. Quid sit Ecclesia, & quinam in eâ sint</u>	<u>71</u>
	<u>VIII.</u>

I N D E X.

III. De proprietatibus vera Ecclesia.	74
X. De infallibilitate Ecclesia res fidei attestantis.	77

C A P U T Q U A R T U M.

De vitiis fidei oppositis.

SECT. I. DE infidelitate & hæresi.	79
II. An, & in quibus liceat cum Hæreticis communicare.	82
III. De lectione librorum Hæreticorum.	86
IV. De disputatione cum Hæreticis.	90
V. An liceat ab Hæreticis accipere Sacramenta.	92

A P P E N D I X.

An Episcopi omnes, & maxime Episcopi Belgii possint absolvere ab hæresi.	93
--	----

C A P U T Q U I N T U M.

De Spe.

SECT. I. Quid sit spes.	95
II. De objecto formali & materiali spei.	98
III. Cui & in quo liceat sperare.	99
IV. De subjecto spei.	100
V. De præcepto spei.	102
VI. De dono timoris.	103
VII. De desperatione.	105
VIII. De presumptione.	107

I N D E X.

C A P U T S E X T U M.

De Charitate.

SE. I.	Q uid & quæstuplex sit Charitas.	109
II.	e objecto charitatis.	118
III.	An, & quomodo Charitas possit augeri, minui & deperdi.	113
IV.	An omnis charitas justificet.	114
V.	An sine charitate possit esse vera virtus.	116
VI.	De charitate sui ipsius.	118
VII.	An, & quomodo diligendus sit proximus.	120
VIII.	An debeamus diligere proximum actu in- terno, an verò sufficiat datâ opportunitate ex- hibere illi externa dilectionis officia simul non odio illum habendo.	123
IX.	An teneamur omnes homines aqualiter di- ligere.	126
X.	De dilectione inimici.	128
XI.	An, & quomodo magis se debeat diligere homo, quam proximum.	130
XII.	De præcepto dilectionis Dei.	133
XIII.	Quomodo & quando diligendus sit Deus.	136
XIV.	De Eleëmofynâ.	140
XV.	De quibus danda sit eleëmofyna.	142
XVI.	Quando danda sit eleëmofyna,	144
XVII.	Quinam ad dandam eleëmofynam sint obligati.	146
XVIII.	Quibus danda sit eleëmofyna.	150
XIX.	An de injustè acquisitis possit dari eleë- mosyna.	155
		XX.

I N D E X.

XX. *De intentione quâ debet dari eleëmofyna.* 156

C A P U T S E P T I M U M.

De Correptione fraternâ & scandalo.

SECT. I. **D**E correptione fraternâ. 157

II. *Quinam corripere debeant,* 160

& quinam corripi.

III. *Conditiones requisitæ ad debitam correptionem.* 162

IV. *Ordo correptionis fraternæ.* 163

V. *Quid, & quotuplex sit scandalum.* 167

VI. *De variis, qui coöperantur malo alterius.* 170

VII. *Referuntur falsi pretextus, peccatum scandalum permittendi.* 173

C A P U T O C T A V U M.

De Duello & Bello.

SECT. I. **Q**UId sit bellum & quotuplex. 176

II. *Quenam in bello sint observanda.* 179

III. *De Represaliis.* 183

IV. *Quibus liceat bellum gerere.* 185

V. *An peccent milites, qui rusticos hospites & viatores molestant & gravant.* 186

VI. *Quid duellum & quotuplex.* 187

VII. *De vitiis aliis charitati oppositis, ac prius de odio.* 189

VIII. De

I N D E X.

<u>VIII. De Acediâ. Invidiâ & Discordiâ.</u>	191
<u>IX. De contentione & schismate.</u>	192

TRACTATUS QUINTUS.

CAPUT PRIMUM.

De Virtutibus Cardinalibus.

SECT. I.	D E Prudentiâ.	194
H.	Quid sit justitia , & quotu-	
	plex.	197
III.	Inter quas personas possit esse justitia.	199.
IV.	De fure & Dominio.	201
V.	De Filiis familias , Religiosis , & Clericis non Religiosis , eorumque Dominio.	203.
VI.	An Clerici saculares sint Domini fructuum & maximè eorum qui ex beneficio honestam sustentationem excedunt.	212

A P P E N D I X.

<u>De peculio , sive redditibus annuis Religioso-</u> <u>rum.</u>	207
<u>VII. De rebus , quæ cadunt sub Dominium</u> <u>hominis.</u>	219
<u>VIII. De modis acquirendi Dominium illa-</u> <u>rum rerum , quæ sub nullius sunt dominio ,</u> <u>vel sub eo esse desierunt.</u>	220
<u>IX. De Prescriptione & usufructu.</u>	223
<u>X. An usus distingui possit à dominio , in</u> <u>rebus quæ unico usu consumuntur.</u>	225

CAPUT

INDEX.

CAPUT SECUNDUM.

De Injuriâ & Restitutione.

SECT. I.	Q uid iniustitia, injuria & cui illa fiat.	228
II.	De restitutione.	230
III.	Quandonam Confessarii teneantur ad restitutionem ex culpâ commissâ in suo officio.	234
IV.	An possimus negligere res alienas, si propria res sint in periculo pereundi.	235

CAPUT TERTIUM.

De Occisione & mutilatione.

SECT. I.	A n & quo casu liceat alterum occidere.	240
II.	De occisione alterius innocentis.	246
III.	De homicidio sui ipsius.	248
IV.	De mutilatione sui ipsius.	250
V.	De restitutione faciendâ per homicidium vel mutilationem.	252
VI.	De restitutione faciendâ per stuprum & adulterium.	254

CAPUT

INDEX.

CAPUT QUARTUM.

De Furto & Rapinâ & coöperantibus
ad illa.

- SECT. I. **Q**uid sit furtum, quid rapina,
& quale peccatum. 258
- II. An liceat rem sibi debitam occultè surri-
pere, sive an licita sit occulta compensatio. 261
- III. De coöperantibus ad furtum aut aliam in-
justitiam. 262
- IV. De restitutione rei furto ablata. 267
- V. De quibus & cui facienda sit restitutio. 270

CAPUT QUINTUM.

De detractiōe & contumelia.

- SECT. I. **Q**uid sit detractio & quid con-
tumelia, & quale peccatum. 273
- II. An, & quando liceat se ipsum infamare. 277
- III. An, & quale peccatum sit audire detra-
hentem. 279
- IV. De aliis vitiis detractiōi affinis. 280
- V. De restitutione fame 281

CAPUT

INDEX.

CAPUT SEXTUM.

De Contractibus.

SECT. I.	Q uid & quoruplex sit con- tractus.	283
II.	Quinam contrahere possint.	286
III.	De promissione & donatione.	287
IV.	De emptione & venditione.	288
V.	De deposito, commodato, & locatione.	290
VI.	De mutuo & usura.	292
VII.	De montibus pietatis.	297
VIII.	De cambio & censibus.	305
IX.	De testamentis & legatis.	308
X.	De negotiatione & contractu societatis, ludo & sponsione.	311
XI.	De affecuratione, fideijussione, pignore & hypothecâ.	313

CAPUT SEPTIMUM.

De Judiciis.

SECT. I.	D e Judio temerario, an & quâ- le sit peccatum.	315
II.	Quenam requirantur ad debitum judi- cium.	317
III.	Quomodo possit judex reum subjicere tor- tura.	319
IV.	De accusatore, & testibus in judicio ad- hibendis.	323

I N D E X.

V. De Reo & Advocato.	325
VI. Quomodo Confessarius cum reo agere debeat.	32

C A P U T O C T A V U M.

De distributione onerum & beneficiorum

SECT. I. Quid modo distribuenda sint officia.	330
II. De tributis & vectigalibus imponendis.	331
III. De collatione beneficiorum Ecclesiasticorum.	333
IV. De conditionibus requisitis, ut censeatur quis aptus beneficio.	337
V. De pluralitate beneficiorum.	339
VI. De residentiâ beneficiorum Ecclesiasticorum.	347
VII. De habitu & tonsura Ecclesiasticorum.	350

C A P U T N O N U M.

De Simonia.

SECT. I. Quid sit simonia, quale peccatum & quo jure prohibita.	352
II. An sit simonia aliquid accipere, vel exigere ab illis, qui ingrediuntur religionem.	356
III. De permutationibus beneficiorum simonicis.	359

CAPUT

INDEX.

CAPUT DECIMUM.

De Religione.

ECT. I.	Q uid sit religio & qualis sit virtus	361
	De Oratione.	363
I.	An & quale præceptum sit orandi.	365
I.	De horis canonicis.	366
	De iis, qui ad horas recitandas sunt obligati.	369
I.	An regulares omnes, & potissimum moniales teneantur ad horas in conscientia.	371
II.	De usu breviarii & missalis.	373
III.	De Cantu Ecclesiastico.	375
I.	Quenam à lectione horarum excusent.	378
	Quid, cui, à quo sit aliquid rogandum.	379
I.	De Decimis.	382
II.	Quinam decimas dare debeant, quibus, quando & quâ de causâ?	387
III.	Quomodo decima sint exigenda.	392

CAPUT UNDECIMUM.

De Voto.

ECT. I.	Q uid sit votum, & quæ obligatio ejusdem.	396
	Quisnam possit votare.	398
I.	Quisnam possit vota commutare, in iis dispensare &c.	399

I N D E X.

IV. An sit laudabile votere castitatem perpetuam in saeculo.	401
V. De statu Religioso, & voto solemni.	402
VI. Ad quid teneatur Religiosus ex vi votorum, ac primò de voto paupertatis religiosa.	403
Quandonam violatio paupertatis sit gravis.	410
Quomodo cesset obligatio voti paupertatis religiosa.	411
An, & quando teneatur Religiosus restituere ob violatum votum paupertatis religiosa.	414
VII. Quid requiratur ad professionem religiosam.	420
VIII. Quid sit iuramentum.	421
IX. De divisione Juramenti.	425
X. Quomodo obligatio iuramenti possit tolli.	427

CAPUT DUODECIMUM.

De Superstitionibus.

SECT. I. Quid & quotuplex sit superstitio.	428
II. De Magis & maleficio.	431
III. De cultu falso, & superfluo.	434
IV. De Pietate, Observantiâ, & obedientia.	435
V. De gratitudine & veritate.	438

I N D E X.

CAPUT DECIMUM TERTIUM.

De Fortitudine & annexis.

ECT. I.	Q	<i>Uid sit fortitudo & ejus officia.</i>	443
		<i>Quid sit temperantia, & in quo sita.</i>	446
I.		<i>De abſtinentiâ & ſobrietate.</i>	448
I.		<i>De jejuniſ Eccleſiaſtico.</i>	454
		<i>De luxuriâ, ejusque ſpeciebus.</i>	459
I.		<i>De aliis ad luxuria vitium pertinentibus.</i>	462
II.		<i>An in materiâ luxuria detur parvitas materia.</i>	466
		<i>Item.</i>	
		<i>detur ignorantia invincibilis fornicationis pollutionis, &c.</i>	ibid
III.		<i>An teneantur iterare confeſſiones illi, qui ob ignorantiam ſe de pollutionibus & ſimilibus antea non accuſaverant.</i>	470

A P P E N D I X.

<i>meretricia publica poſſint permitti in republicâ Chriſtianâ.</i>	472
---	-----

TRACTA-



De Fide Theologica.

SECTIO PRIMA.

Quid sit Fides & quomplex.

DICENDUM primò , Fidem varie usurpat *Quid Fi-*
Scriptura Sacra. Primò, pro *Fiducia*, ut Ja-
cobi 1. *postulet in Fide nihil hæsitans.* 2. pro
fidelitate, unde S. Aug. Epist. 19. *Fides*,
ait, *appellata est in Latina lingua ex eo, quod fit, quod*
dicitur. Ita habet Eccles. 22. *Fidem posside cum amico.*
3. Pro objecto veræ Fidei, quomodò dicitur Act. 6.
Multa turba obediebat Fidei. 4. Sumitur aliquando fi-
des pro *Conscientia* dictante aliquid esse licitum aut illi-
citur, unde dicitur quispiam bonæ aut malæ Fidei
possessor: ita varii intelligunt hoc Rom. 14. *Omne quod*
• *non est ex Fide, peccatum est.* 5. Sumitur pro assensu
præstito sive ob rationem, sive auctoritatem, sive
assensus ille sit evidens sive inevidens, sive certus si-
ve incertus. Denique, famosè, & in hac materia
propriè sumitur pro actu vel habitu mentis sive in-
tellectus quo firmiter iis assentimur, quæ proponun-
tur credenda, idque ob auctoritatem dicentis. Hinc,
si auctoritas illa, propter quam quis credit, sit hu-
mana, erit & fides humana: si sit divina, erit fides
Theologica sive divina.

Dicendum 2. Fides divina, est virtus divinitus infusa, qua intellectus firmiter assentitur iis, quæ à Deo revelata sunt, & credenda proponuntur ab Ecclesia.

Tom. II.

A

Aliter ^{CA}

Definitio Aliter eamdem definit Apostolus dicens, eam esse
Fidei ab *substantiam sperandarum rerum, argumentum non apparen-*
Apostolo *tium.* Per *substantiam*, intellige basim seu fundamen-
tata, tum sperandarum rerum, cum nemo speret aliquid-
 quod non credit. Per *Argumentum non apparen-*
 tium, significatur, fidem ostendere res absconditas sive non
 apparentes, puta quas oculus non vidit, nec auris au-
 divit.

Fides a- Dicendum 3. Fides illa aliquando est actualis, ali-
ctu & quando habitualis. *Actualis* est, actus intellectus,
habitua- quo assentimur rebus Fidei propter divinam veritatem
lis, revelantem. *Habitualis* est, habitus Fidei qui in ju-
 stificatione cum aliis animæ donis infunditur animæ
 per Spiritum Sanctum. An autem sit verus habitus
 agnoscendus, & quousque, dixi in materia de justi-
 ficatione sect. 3.

Fides in- Alia quoque dicitur fides interna, alia externa juxta
terna & illud Rom. 10. *Corde creditur ad justitiam, ore autem*
externa, *confessio fit ad salutem.* Unde, *interna* est actus intelle-
 ctus Fidei in animo latens, nec ulteriori signo ex-
 terno manifestatus. *Externa* autem est assensus Fidei si-
 gno aliquo exteriori manifestatus, puta verbis aut
 aliis signis religionis.

Implicita Dividitur ulteriùs Fides in implicitam & explicitam:
& expli- *Implicita* est, quâ generaliter credo quidquid Eccle-
cita, sia credendum proponit, sicut de nullo articulo Fi-
 dei in particulari cogitem. *Explicita* Fides est illa,
 quâ in particulari credo alicui Fidei articulo, v. g.
 Deum esse trinum & unum.

Mortua Denique dividitur Fides in Fidem vivam & mor-
& viva, tuam, formatam & informem. Fides *viva* est Fides,
 cui opera, quæ Fides dicat, correspondent. Hinc
 Jac. 2. *Fides sine operibus mortua est.* Fides *mortua* est
 Fides, cui opera Fidei non correspondent. Sicut enim
 actio est signum vitæ in agente: ita opera Fidei sunt
 signum Fidei vivæ sive viventis; & opera Fidei ad
 praxim deducuntis.

Fides *formata* est, quæ conjungitur Charitati per-
 fectæ,

Ætæ, unde perfectè unit cum Christo, vivum ejus
embrum efficit & hæredem regni. Dico *Perfectæ*: *Formata*
ia omnis vera Fdes requirit adjunctum amorem *& informi.*
ei, saltem imperfectum, cum necessariò exigat affe-
ctum voluntatis erga divinam veritatem revelantem,
e quo mox plura.

Fides *informis* est illa, quæ à Charitate perfecta se-
paratur, qualis est in peccatoribus, Carechumenis se-
ad justitiam disponentibus, de quibus agit Conc. Trid.
es. 6. c. 6.

SECTION II.

De Origine Fidei Theologica.

DICENDUM primò, cum Fides sit virtus Theo- *Fides ex*
logica & supernaturalis, sequitur eam prove- *Dei gra-*
nire à Dei gratia. Probat hoc Scriptura Sacra Joan.
6. ubi dicitur: *Hoc opus Dei, ut credatis in illum, quem*
nusit ille. Et ad Philip. 2. *Vobis donatum est, pro Chri-*
sto, non solum ut in eum credatis, verum etiam ut patia-
mini pro eo. Denique ad Eph. 6. *Charitas cum Fide*
à Deo Patre & Domino Jesu Christo. His Scripturæ
locis, fatetur S. Augustinus sese couictum l. de
prædest. SS. c. 3. ut crederet Fidem non esse ex
nobis.

Hujus quoque evidens advenit ratio, quòd Fides
sit initium justificationis, quod in se comprehendit
piam voluntatis affectionem in primam veritatem,
quæ nihil est aliud, quam imperfecta Charitas:
Deinde, quòd de se sit formaliter assensus rerum
supernaturalium & consequenter ipsa supernatura-
lis: Ex quibus clarè patet, fidem esse ex Dei gratia,
cum omnis Charitas Dei propter se sit talis, uti & om-
nis scientia practica rerum supernaturalium, uti con-
stat ex dictis in materia de gratia. Fundamentum hoc
clarè probat S. August. l. de prædest. SS. c. 3. ubi

ait: *Credere & velle bonum Dei est, quia ipse præparat voluntatem.* Et c. 9. *Fides igitur inchoata & perfecta Dei donum est.*

*Et ex li-
bero arbi-
trio.*

Dicendum 2. sic tamen Fides est ex Dei gratia, ut tamen concurrat & liberum arbitrium: Fides enim est actus liber, quo fit, ut rebus Fidei propositis & intellectu per Dei gratiam collustrato, possit homo non credere, & luci divinæ oculos cordis occludere. Hinc ait dato loco S. August. c. 3. *Credere & velle bonum Dei est, quia ipse præparat voluntatem: Et utrumque nostrum, quia non fit, nisi volentibus nobis.*

Ex quibus omnibus refellitur Pelagii, Vitalis, Cœlestii, &c. Hæresis quâ docent, gratiam Dei ad credendum non esse necessariam, sed satis esse, quòd Verbum Fidei prædicator proponat, quo factò voluntatis est, velle credere & Fidei obedire. Refellitur quoque Semipelagianorum error docentium initium Fidei esse ex nobis, in quo errore ante Episcopatum degit Augustinus. Vide dicta in materia de gratia. Sect. 2. & 3.

*Error alio
rum.*

Dicendum 3. Graviter quoque errant, qui docent Dei gratiam omnium corda ad credendum pulsare & excitare, adeò ut solummodò gratiæ dictæ sit consentiendum, quo fit ut unus ex duobus æquali gratiâ præventis consentiendo gratiam acceptet, alter non acceptet. Hunc errorem ex professio refutat S. Aug. l. de prædest. SS. c. 8. ubi docet Dei gratiam efficere ipsum *Credere & velle.* Ex nolentibus facere volentes: auferre cor lapideum & dare carneum, &c. Deinde Constantissime docet S. Pater, Dei gratiam, non tantum nobis dare posse bonum agere & posse bonum velle, sed & dare ipsum velle, sese attemperando libero arbitrii nostri agendi modo, quo sensu dicit ibidem S. Aug. *Facile namque Deo est, aversas & adversas in fidem suam convertere hominum voluntates.* Denique Dei gratia est quæ fidelem discernit ab infideli, quod hic tribuitur voluntati. Vide dicta de gratia, & prædestinatione,

Dicen-

Dicendum 4. Quòd unus credat, alter non credat, *Fides est ad arcana Dei judicia est referendum, qui gratiam donum Dei.* Fidei quibus dat, misericorditer tribuit, quibus negat, justissimè negat.

Porro, etsi fides ita dependeat à Dei gratia, rectè *Quomodo Fides fit in nostra potestate.* tamen dicitur esse in nostra potestate. Cum enim illud in potestate sua quisque habere dicatur, quod cum vult, facit, si non vult, non facit, ut ait S. Aug. l. de Spiri. & lit. c. 30. sequitur fidem esse etiam in nostra potestate, cum credat volens, sive cum vult, vel ut ait Augustinus, *quia non fit, nisi volentibus nobis.* Quòd tamen velimus credere, à Deo est, qui voluntatem præparat, & intellectum illuminat; Dominus enim illuminat cæcos: Non autem voluntatis.

Dicendum 5. Frustra fidem prædicari audientibus, *Deus cor aperit ad fidem dandam iis qua prædicantur.* nisi divina gratia assensum fidei procuret, intellectum illuminando, & voluntatem pie afficiendo. Declarat illud S. Scriptura Act. 16: quæ tradit Deum aperuisse cor Lydiæ, ut intenderet his quæ dicebantur à Paulo. Deinde, *neque qui plantat est aliquid, neque qui rigat, sed qui incrementum dat Deus.* Unde appositè S. Gregorius l. 11. mor. c. 5. *Mutum est omne os quod loquitur, si ille interiùs in corde non clamet, qui adspirat verba, quæ audiuntur. Nisi enim Dominus edificaverit domum, in vanum laborant, qui edificant eam.*

SECTIO III.

De actu voluntatis ad fidem requisito.

DICENDUM primò, ad Fidem Theologicam requiritur actus voluntatis qui assensum fidei impetret. Cum enim res fidei non ita clarè à Deo revelentur, lumen fidei non ita efficaciter hominem convincit, ut absolutè credere debeat: Sed opus est voluntatis electione, quæ intellectum ad credendum moveat & determinet, plus tribuens divinæ veracitati,

tati, quam humanis ratiunculis in contrarium obstantibus. Hinc dicitur fidelis *intellectum suum captivare in obsequium fidei* 2. cor. 10. & ad Rom. 10. *corde creditur ad justitiam*, cor autem voluntatem passim significat in Scriptura. Quare causam incredulitatis Judæorum, in voluntatem eorundem refundit Joan. 12. ad quod S. August. tract. 26. in Joan. dicit : *Judæos non potuisse credere, quia volebant.*

Deinde, quod ad fidem necessarius sit actus voluntatis, clarè patet ex eo, quod fides sit actus liber, ad quem necessarius est actus voluntatis. Unde rectè Ambrosius in c. 4. Epist. ad Rom. *credere ait, aut non credere voluntatis est. Neque enim cogi quis potest ad id quod manifestum non est : Sed invitatur, non extorquetur, sed suadetur.*

*Voluntas
illa est
Charitas*

Dicendum 2. Actus ille sive pia affectio voluntatis, nihil est aliud quam charitas imperfecta : Est enim bona voluntas, quæ bene afficitur divinæ veracitati aliquid revelanti, & actum fidei imperat. Omnis autem bona voluntas est charitas, ait S. Aug. l. de grat. Christi c. 21. hac de causa frequens est S. Patri distinctio, quâ distinguit fidem dæmonum à fide Christianorum, quod *dæmones credunt & contremiscunt*, ut ait Jacobus c. 2. Christiani amando. Hinc ulterius, si Hæreticus quispiam timore pœnæ, amore pecuniæ, honoris, &c. convertatur ad Fidem & rebus Fidei credat, & in obsequium Fidei eo motivo intellectum suum captivet, si desit pia hæc erga divinam veritatem voluntatis affectio, non verè sit fidelis sive verè credit, *Quia talis non fieri, sed vult potius fingere fieri fidelem*, ait in simili S. Aug. de Catech. rud. c. 5.

*Fides an
possit esse
sine chari-
tate.*

Ex quibus facilis est responsio, ad quæstionem, quâ quæritur an fides possit esse sine charitate : potest enim esse fides sine charitate perfecta, uti patet in peccatoribus, Catechumenis, &c. sese ad justitiam præparantibus. Non potest tamen esse fides, sine charitate imperfecta, sive pia affectione voluntatis erga divinam veritatem revelantem.

Sequi.

Sequitur ulterius, quo sensu sæpè fides dicatur *Cognitio affectiva*, sive quæ affectum voluntatis habet *annexum*, idest charitatem; adeò ut lumen ejus non suspendatur in intellectu, sed à voluntate imperetur & descendat & accendat voluntatem: sic & Apostolus 2. 1. Thessalonic. 2. v. 10. vocat fidem, *Charitatem veritatis*: de quibus videri potest Exim. D. Fromondus in 1. Joan. 2. 3. 13. & c. 3. 6. c. 4. 6. 8. & alibi.

S E C T I O I V.

De Fide Latè dictâ.

U L T R A dictam & explicatam fidem Theologi- *Fides la-*
cam, adinvenit quorundam naturalis proclivi- *tè dictâ.*
tas extendendi cœli tramitem, novam quamdam &
abstrusam fidem, quam vocant *latè dictam*. Fides hæc
nihil illis est aliud, quam evidens notitia Dei, hausta
per scientiam ex creaturis, qualem olim habuerunt
Philosophi gentiles.

Hac fide primum docuit Origenes quempiam vita- *Origenes*
re posse damnationem, & honorem & gloriam ac-
quirere, etsi non salutem æternam, utpote quæ so-
lis verè credentibus reservatur.

Pelagius tamen ulterius egressus, docet naturali *Pelagius*
tali cognitione Dei, hominem potuisse consequi sa- *Swingli-*
lutem æternam, ad quam vires naturæ sufficere as- *us.*
ferebat. Idem docent Swinglius & Erasmus, dum *Erasmus.*
Catonem, Socratem, Ciceronem & alios gentiles
Philosophos in cœlo collocant, eo quòd naturali illà
cognitione, sive fide latè dictâ Deum agnoverint:
Unde Erasmus sese continere vix valet, quin exclam-
et *S. Sacraes ora pro nobis*, uti patet ex Dialogo,
convivio Religioso nuncupato.

Lutherus tamen, Paulò hic scrupulosius, docet *Luther*
hanc Swinglii opinionem esse Pelagianam, & merito:

Unde mirum est, quosdam scriptores Catholicos & Religiosos idem tradidisse.

Fides latè dicta non est Fides.

Dicendum ergo 1. Fides illa latè dicta non sufficit ad salutem. Probat, quia sine vera fide non est obtinenda salus; atqui illa fides, quam latè dictam vocant, non est vera fides, ergo. Constat minor ex eo, quod fides vera, sit substantia & argumentum rerum non apparentium; hæc apparentium. Verà fide captivatur intellectus in obsequium fidei, hanc fide convincitur aliquis ad assensum. Fides vera vocatur fides Christiana, hæc gentilis, Aristotelica, & infidelium, & consequenter fides latè dicta, est fides minimè fides, ut bellum minimè bellum.

Sola ergo Apostoli sententia data ad Hæbr. 11. *Impossibile est sine fide placere Deo*, destruit aliorum dogma de sufficientia hujus fidei ad salutem, quamvis idem faciat aliis locis quamplurimis.

Obijciunt alii, per Fidem hinc intelligere Apostolum, uti & aliàs, Fidem latè dictam: Resp. cum D. Augustino Enchiridii c. 8. *Meliùs hanc appellamus Fidem, quam divina eloquia docuerunt, earum scilicet rerum, quæ non videntur.* Intelligenda enim hinc est Fides illa, quam intelligit communis Ecclesiæ, & SS. Patrum sensus, non quam intelligit quorundam ingeniorum petulantia, quam taxat in exponenda Sacra Scriptura S. Trid. Synodus Sess. 4.

Porrò Concilium illud Sess. 6. can. 1. ita definit: *Si quis dixerit hominem suis operibus, quæ vel per humanæ naturæ vires, vel per legis Doctrinam fiant, absque divina per Jesum-Christum gratia posse justificari coram Deo, anathema sit:* Fides autem latè dicta indubiè haberi potest per humanæ naturæ vires, quâ tamen hominem salvari posse prætendunt aliqui. Unde Tiletanus Academiæ Lov. Doctor Trid. adversum Kemnitium in Apologia Tridentini Concilii, docet citando dictum Concilii Canonem, ibidem damnatam esse Doctrinam, quam Catholicis affingebat Kemnitius, scilicet Philosophos salvatos esse sine vera Fide

e Evangelii, puta solâ cognitione naturali unius Dei.

Objiciunt ulteriùs: Durum videtur illos damnari defectu Fidei supernaturalis, qui naturaliter ea quæ legis sunt faciunt, nec adsit ipsis, qui Fidem proponat; quomodò enim audient sine prædicante? Et quomodò credent in illum, quem non audierunt, rogat Apostolus? Resp. hîc veneranda esse judicia Dei, qui est terribilis in Consiliis super Filios hominum: neque hoc durius videri debet, quam quòd Deus pueros sine Baptismo discedentes plectat damnatione perpetuâ: Deinde, quomodò hoc durum erit, qui omnes homines in statu lapso, relinquere potuisset justissimo suo iudicio in massa damnata? Non est ergo homo, qui hîc respondeat Deo, & solùm cum S. Augustino considerata est altitudo Consilii divini, super salute generis humani. Denique Fides donum, est primum gratiæ donum & beneficium, quod quibus datur misericorditer datur, & quibus negatur, justissimè denegatur.

Objicies ultimò: Justinus in sua Apologia c. 28. Socratem salvum esse docet, imò vocat eundem *Martyrem*, cùm ob causam Fidei Christianæ sit passus. Resp. Ex Laërtio in vita Socratis patet eum 280. sententiis ad mortem esse condemnatum, inter alias quòd juvenes corrupisset, dæmoniorum cultum inveharet, &c. dicitur tamen *Martyr*, eo quòd quoque damnatus sit, quòd doceret esse solummodò unum Deum, neque plures, uti docebant gentiles.

Nec quispiam hîc opponat, quæstionem jam de Fidelatè dicta decisam, nihil momenti habere ad præxistinens. Cùm ab ea dependeat Christianæ vitæ norma, & salutis negotium. Hinc pastores, Catechistæ, &c. Sollicitè coguntur instruere greges sibi subjectos, de Fidei essentia, & veram Fidem à falsa segregare: Nihil enim proficit structura ædificii, ubi deest fundamentum veræ Fidei non Fidei Gentilium aut Philosophorum. Hinc damnata est ab Ecclesia hæc propositio:

Fides

An Socrates sit martyr.

Quæstio de Fide laice dicta est maxime momenti ad præxistinens.

Fides latè dicta ex testimonio creaturarum similiye motivo ad justificationem sufficit.

SECTIO V.

De objecto formali Fidei.

*Objectum
formale.*

OBJECTUM formale est idem, quod ratio credendi, sive motivum quod hominem ad credendum inducit. Unde

Dicendum primò; objectum formale Fidei, non esse rationem humanam. Hinc Apost. 1. cor. 2. *Predicatio nostra, non est in persuasibilibus humane sapientiæ Verbis.* Deinde ad Heb. 10. Fides dicitur *Argumentum non apparentium.* Idem docet S. August. contra Manichæos l. de utilit. credendi. & S. Bern. Epist. 190. Contra Abailardum.

Quomodo se habeat ratio humana ad fidem.

Dicendum 2. etsi ratio humana non sit objectum formale Fidei, potest tamen suo modo ad assensum Fidei concurrere: Ratio est, quia ut intellectus prudenter credat, requiritur ratio credibilitatis: Deinde quando res Fidei ratio comprobatur, facilius ad assensum Fidei inclinatur intellectus.

Objectum formale Fidei est divina veritas revelans.

Dicendum 3. objectum formale Fidei est, divina veritas revelans, sive Deus aliquid revelans. Sicut enim in humanis ideo inducimur ad credendum, quia alterius referentis nos movet autoritas, quæ quo major est, eo assensus credendi erit firmior: Ita in fide divina, idè credimus, quia Deus ipsa veritas aliqua revelat, quæ quia falli nequit aut fallere, firmissimè ad assensum fidei nos inducit.

Quid importet divina veritas.

Hæc autem divina veritas duo importat, infinitam sapientiam quâ fit, ut falli nequeat: & infinitam bonitatem, quâ fit, ut fallere non possit. Si enim falli quidem nequeat, sed possit fallere, aut è contra si fallere quidem nequeat, sed possit falli, non erit infallibilis, nec infallibilem meretur assensum.

Propter

Propter hanc Dei veracitatem, credimus etiam fide divinâ Deum esse veracem, adeò ut Dei veracitas sit objectum materiale, simul & formale: Neque hoc ridiculum erit, attento quòd divina veracitas sit tantæ autoritatis & infallibilitatis, ut eidem credi debeat attestanti sese esse infallibilem.

Dicendum 4. Revelationem integrare objectum formale fidei. Revelatio autem illa nihil est aliud, quam Dei locutio, quâ res fidei nobis manifestat, prout aliquando fecit per Angelos, Prophetas, Apostolos, Pastores, imò aliquando immediatè, uti Petro revelavit Christum esse Messiam. Cum enim ideò quis credit, quia hoc à Deo per hominem testificatum est, sequitur revelationem illam esse rationem formalem credendi.

Quid revelatio.

Pro quo notandum est, revelationem illam non posse considerari, ut actionem hominis testificantis res fidei, sed ut testificationem Dei, qui res fidei per eosdem ut sua instrumenta revelat, sicut ut revelatio illa censeatur participare suam autoritatem à Deo ut principaliter ad assensum fidei inclinante, quamvis revelatio illa per homines facta verè moveat credentem, non quia ultimatè homini acquiescit, sed Deo per hominem attestanti. Unde Apost. 1. Thessal. 2. cum, ait, *accepissetis à nobis verbum auditis Dei, accepistis illud, non ut verbum hominum, sed sicuti verè est, verbum Dei, qui operatur in vobis, qui credidistis.* Et rursum Joannes Epist. 1. c. 5. *Si testimonium hominum accipimus, testimonium Dei majus est.*

Ex quo consequitur primò, revelationem Dei non esse tantummodò conditionem sine qua non, idest sine qua res fidei nobis non innotescerent, sed quòd verè nos moveat simul ad credendum.

Revelatio Dei nos movet ad fidem.

Sequitur secundò sollicitè à Pastoribus edocendum esse, non debere credi, merè quia aliquid à Pastore assertum est: Sed quòd Deus aliquid per Pastorem asserat aut revelet.

Dicendum 5. Autoritas Ecclesiæ non pertinet ad ratio-

*Authori-
tas Eccle-
siæ an ad
fidem spe-
ctet ?*

rationem formalem Fidei. Ratio est, quòd Ecclesiæ autoritas, etsi sit infallibilis, non tamen est testimonium Dei, unde Ecclesiæ autoritas non excedit certitudinem Fidei humanæ. Quamvis enim credant res Fidei, quia Deus verax est & eas revelat, & rursum credant Deum veracem esse & illud revelasse, quia Ecclesia hoc asserit & testatur: Tamen ultimò illi acquiescunt, non ut rationi formali & motivo credendi, sed applicandi: Unde ultimò resolvitur Fides in auctoritatem Ecclesiæ tamquam applicationem ultimam objecti, non itidem ut causam aut objectum formale credendi.

Clarè illud patet ex eo, quòd Ecclesiæ autoritas, ad credendum non semper sit necessaria, uti sit quando alicui res divina immediatè relevatur: Objectum autem formale Fidei, in omni Fide divina necessariò concurret

Collige ergo, quo sensu verum sit illud S. Augustini l. cont. Epist. fundam. 3. ubi ait: *Evangelio non crederem, nisi Ecclesiæ Catholice me commoveret auctoritas*: Non quasi Ecclesiæ autoritas sit objectum formale Evangelio credendi: Sed solùm regula applicans & dictans quales libri Evangelici sint legitimi, quales spurii.

S E C T I O VI.

Quanam Revelatio sit objectum formale fidei.

*Revelatio
divina.*

DICENDUM primò, objectum formale fidei, non est solummodò fundandum in interna & privata revelatione, quâ Deus cuique inspirat quid sit credendum, adeò ut privatus cujusque spiritus sit rerum credendarum Judex & arbiter, uti volunt nostri temporis Hæretici. Ratio hujus est, quòd sufficiat ad credendum revelatio publica facta Apostolis, nobis per Ecclesiam patefacta: Quamvis fatendum sit,

fit, quòd revelatio privata alicui facta ad credendum possit sufficere, cum planè ad fidem per accidens sit & indifferens an res fidei sint publicè, an privatim revelatæ, dummodò certò constet eas esse revelatas. Unde Apostoli, Deipara, & alii varia crediderunt, quæ tantum privatè sibi erant revelata.

Objicies: Fides Catholica id est universalis, debet habere rationem credendi universalem. Deinde, dicimur super ædificati super fundamentum Apostolorum & Prophetarum, ergo fides nostra innititur revelationi publicæ illis factæ. Resp. Fides nostra est universalis, quod omnibus omninò credenda proponatur, & per totum orbem sit diffusa, & quòd primum ejus objectum sit publicè revelatum cum quo rectè consistit, aliqua fidei nostræ privatim esse revelata. Deinde, de facto quidem innititur fides nostra Apostolis & Prophetis, & revelationibus illis factis; sed inde non sequitur, quòd privata revelatio ad fidem non sufficiat, cujus contrarium mox ostendi.

Dicendum 2. Revelatio virtualis sive mediata, quando aliquid in aliquo alio est revelatum, non sufficit ad fidem, si assensus ille tendat in objectum virtualiter revelatum propter consequentiam, quam habet cum alio formaliter & in se revelato. Ratio hujus est, quia fides innititur divinæ veritati, non autem consequentiæ, divina enim veritas est infinita, infinitè superans quamlibet certitudinem naturalem.

Si verò assensus fidei tendat in aliud, quod virtualiter est revelatum, non ratione consequentiæ, ut objecti formalis; sed solùm ut est conditio applicans & dictans revelationem virtuales contineri in formali, sufficere poterit ad fidem, cum hoc casu credatur propter divinam veritatem, non propter consequentiam ut motivum formale. Hinc, si quis fide divinam crederet huic, *Omnis homo est rationalis*, credere posset eadem fide huic virtualiter in ea contentæ, *Petrus est rationalis*.

Obj-

Qua ratione fides nostra sit Catholica & universalis

Revelatio virtualis.

Objicies: etsi de fide sit hæc: *Omnis hostia legitimè consecrata continet verum Christi Corpus*: Non tamen hæc in eo virtualiter contenta: *Hæc hostia* quam v. g. elevat Sacerdos adorandam, *Continet verum Christi Corpus*. Resp. illa ultima non continetur in priori, sed hæc, *Hæc hostia legitimè consecrata continet verum Christi Corpus*, quæ etiam de Fide est, cum de Fide sit, omnem omninò hostiam legitimè consecratam, continere Corpus Christi. Hæc tamen, *Hæc Hostia est consecrata, hæc Hostia continet verum Christi Corpus*, non sunt de Fide, cum illas non credamus Fide divinâ, sed morali certitudine dumtaxat, quæ sufficit, ut juxta illam, debitum Deo cultum exhibere quis debeat. Idem dic de hac: *Innocentius XI. est caput Ecclesia*, scilicet eam non esse de Fide, etsi de Fide sit, *Omnis Pontifex legitimè electus, est verè caput Ecclesie*, cum non constet Fide divinâ eum esse legitimè electum. De quo postea.

S E C T I O VII.

An Deus possit revelare, sive testari falsum.

*Deus non
potest
mentiri.*

DICENDUM primò, Deum neque potentiâ ordinariâ, neque extraordinariâ posse mentiri, ergo nec testari falsum. Quòd non possit mentiri, ipse probat ad Hæb. 6. ubi per Apostolum ait: *Impossibile est mentiri Deum*. Ubi to *impossibile*, tollit omnem omninò potentiam; quod enim potentia extraordinaria Deus potest, absolutè potest: Uti potest absolutè condere novum Mundum. Deinde si mentiri posset, corrueret fides nostra, quæ à nobis exigit assensum firmissimum, qualis non debet exhiberi illi, qui fallere & falli posset.

*Idem est
Deo falsum
dicere
& men-
tiri.*

Quamvis autem aliquis dicere possit falsum, sic ut non mentiatur, si bonâ fide putet se verum dicere; in Deo tamen hoc locum non habet: Cum enim Deus sit

fit summè sapiens, scit semper se dicere falsum, si falsum diceret, adeòque mentiretur loquendo & eundo contra mentem. Ratio ergo totius dictæ sententiæ est hæc, quòd Deus mentiri non possit, cùm sit intrinsecè malum, ut alibi probabitur.

Hoc tamen notandum est, quamvis Deus nec per alios mentiri possit, tamen aliquibus aliquando objicere res aliquas, ex quibus alii vel suâ malitiâ, vel imprudentiâ capient occasionem mentiendi aut decipiendi. Deinde, dicitur aliquando Deus aliquem deducere in errorem, non positivè inducendo, sed solum permittendo, uti in simili diximus de peccatis, ad quæ Deus homines movere dicitur. Denique, plurima quæ Deus prædixit futura, postmodum facta non sunt, nec idè falsum dixit aut decepit alios; quia vel hoc non prædixit absolutè, sed solum sub conditione, vel solum comminatoriè, minando quid fieret, nisi resipiscant, uti patet in Prophetia Jonæ & aliis.

Dicendum 2. Non potest Deus alicui infundere assensum falsum, sive errorem: Tam enim implicat Deum esse causam erroris, qui sit summa & infinita sapientia, quam implicet infinitæ bonitati esse causam malitiæ. Dico *causam erroris*, cùm possit esse erroris *occasio*, uti mox ostendi: Verùm error ex tali occasione natus, non potest Deo, sed debet homini adscribi; cùm suâ malitiâ aut imprudentiâ in errorem ruat, & de cætero Deus habeat causam justissimam aliquid ponendi, ex quo alter sumit occasionem erroris.

*Quomodo
Deus a-
lium de-
ducit in
errorem.*

*Non potest
Deus alicui infundere habi-
tum erro-
ris.*

Dicendum 3. non potest Deus alicui infundere habitum erroris seu habitum falsum, uti nec potest infundere habitum vitiosum. Et si enim habitus ille in se non sit malum morale, sed physicum, est tamen causa mali moralis, in quod habitus ille directè inclinatur: Repugnat autem summæ & infinitæ sapientiæ infundere alicui principium aliquod aut causam, quæ directè tendit & deducit alterum in errorem, sicut eâ de causâ repugnat summæ bonitati.

ti

ti infundere habitum vitiosum, de se inclinantem in peccatum.

Non potest Deus uti verbo in obvio sensu falsis. Ex dictis collige, non posse quoque Deum uti verbis ambiguis, de se & obvio sensu falsis: Uti neque veris, sed ita occultatis, ut humanâ conjecturâ colligi id nequeat: Cùm his casibus, Æsset Deus moralis causa erroris & deceptionis securæ, quod absolute fieri nequit, ut mox ostendi.

Neque facere miracula de se confirmativa falsa Fidei. Deinde colligi potest, Deum non posse facere Miracula, quæ moralis estimatione censerentur facta in confirmationem doctrinæ falsæ. Si enim Deus id posset, frustra Catholici ad miracula confugerent, tamquam signa certissima veræ Fidei, uti & fecit Elias 3. Reg. 18. Hinc etiam Deus, Dæmonem conantem suis prodigiis homines ad falsam Fidem pertrahere, ejusdem fraudem & falsitatem detexit, in Symone Mago, Elyma, coram Pharaone, &c.

SECTIO VIII.

An Testimonium, quod solum existimatur esse à Deo, possit esse objectum formale Fidei.

STATUS quæstionis est hic: An sit fides divina, quâ quis assentitur alicui propositioni, quam putat à Deo esse revelatam, sic ut revera ab eo revelata non sit. Hinc

Assensus ob testimonium Dei putativum non est fides vera sed putativa. Respondeo primò assensum illum non esse fidem divinam. Ratio est, quòd objectum formale fidei divinæ, in quod ferri debet fides divina, est testimonium Dei, non apparens solum, sed revera existens & subsistens, sicut habitus scientificus non tendit in objectum apparenter verum, sed quod à parte rei est tale. Ratio hujus ulterior est, quòd aliàs fidei posset subesse falsum, quod mox rejecimus. Hinc si quando Episcopus aut Pastor proponat aliquid ut à Deo revelatum, v. g. quando tempore S. Cypriani propositum fuit

fuit in Concilio Carthaginensi, ab Hæreticis Baptizatos, esse rebaptizandos, quod ut punctum fidei à Populo credebatur: Non credebatur illud fide divinâ, sed humanâ duntaxat.

Objicies: Ille, qui invincibiliter putat aliquid esse præceptum, & actum præcepti exercet, ponit actum veræ obedientiæ: Ergo qui invincibiliter æstimaret aliquid à Deo esse revelatum, & illi assentiretur, poneret actum veræ fidei. Resp. Negando conseq. ratio disparitatis est hæc, quòd actus voluntatis recipiant suam bonitatem ab objecto, non ut in se est, sed ut ab intellectu voluntati proponitur: Actus autem intellectûs, non accipiunt suam rectitudinem ab objecto, uti æstimatur, sed ut in se ipso est: Unde actus intellectûs tendens in objectum à parte rei falsum, quod tamen putat esse verum, revera est falsus.

Objicies 2. qui discredere articulo, quem putat esse de Fide, qui tamen de Fide revera non est, esset hæreticus, ergo qui tali crederet, haberet Fidem divinam. Resp. talis non esset perfectè hæreticus, defectu veri objecti formalis Fidei, revera existentis: Esset tamen ille in voluntate hæreticus, quatenus quantum est de se, nollet subjici authoritati primæ veritatis.

Objicies 3. Fides dictat Hostiam à Sacerdote elevatam esse adorandam: Pote est autem fieri, hostiam illam non esse consecratam. Resp. Fides dictat hostiam verè consecratam esse adorandam, non item præcisè hanc, quam morali certitudine scit esse consecratam.

Dicendum 2. Defectu veri objecti formalis fidei, sæpè erratur in revelationibus privatis, dum quas à Deo provenire autumant, vel à Dæmone, vel proprio cerebro dimanant, adeò ut aliquando pro revelationibus obtrudantur somnia. Ut autem falsitas talis revelationis à veritate dignoscatur, videndum est ad personam, cui revelatio contingit, num sit debilis cerebri, & humidioris, quâ ratione mulieribus in hac parte æquo magis illuditur: num sint probæ vitæ, non

Revelationes privatas sæpè fallunt.

hypocritæ, turpem quæstum ambientes, &c. Num sint sanæ in fide : num ad pia & religiosa revelatio conducat, & talia revelet, de quibus plura dicam de superstitione.

SECTIO IX.

An revelatio ad fidem requisita possit esse evidens.

Fides de se obscura.
Potest fides consistere cum clara cognitione.
DICENDUM primò, quòd quamvis fides de se & ex natura sua debeat esse obscura & inevidens, tamen verior apparet sententia quæ docet, quòd tantum revelatio, quam res revelata possit esse clarè & evidenter cognita, adeòque quòd fides naturaliter consistere possit, cum clara cognitione naturali circa idem objectum. Probatur 1. Quia Deipara & Apostoli credebant Christum incarnatum, quod & clarè videbant : Deinde Philosophus noscens ex effectibus existentiam Dei cognitione naturali, veniens ad fidem idem credit fide divinâ, cum *accedentem ad Deum oportet credere, quia est.* Denique juxta aliquos Paulus in raptu clarè vidit Deum, quo casu non est verosimile eum amisisse fidem.

Objicies, fides est argumentum non apparentium, & juxta August. & Greg. fides est credere quod non vides, & quæ apparent, fidem non habent, sed agnitionem, &c. Deinde fides humana non potest consistere cum evidentia & cognitione clara. Resp. Ad hæc & similia, nihil aliud importari similibus loquendi modis, nisi fidem quantum est de se, & de suo tendendi modo, versari circa obscura & non apparentia, si ve quòd objectum formale fidei, de se non causet, nisi assensum inevidentem. Hinc rectè SS. PP. docent, aliquid credi non posse sub ea ratione, qua apparet, cum sub ea ratione non habeatur ratio formalis fidei, quæ de se obscura est & inevidens. Deinde, aliud est in fide humana, aliud in fide divina scientiæ conjunctis : Scientia enim fidem humanam destruit,

struit, quia in se habet omnem omnino perfectionem fidei humanæ, non item fidei divinæ: Licet enim scientia fidem divinam superet evidentiam, non tamen eandem superat certitudine, quâ fides omnem cognitionem naturalem superat, unde intellectus perfici potest, tam scientiâ, quam fide divinâ.

Dicendum 2. Idem actus potest esse fides, scientia, & opinio. Ratio est, quia idem actus potest tendere in objectum idem, sed sub diversa ratione formali, quarum una est ratio formalis fidei, alia scientiæ, alia opinionis. Neque ideo erit idem actus evidens & inevidens, clarus & obscurus: quia talis actus erit absolute evidens & clarus, etsi possit dici non clarus & inevidens, quatenus substat rationi formali fidei aut opinionis. Denique motivum unius non elidit aut extinguit motivum alterius, motivum scientiæ motivum opinionis, uti majus lumen offuscat minus: quia rationes illæ formales, retinent suam movendi vim, & afficiunt intellectum.

SECTION X.

De evidentia credibilitatis rerum Fidei.

DICENDUM primò, quandoquidem voluntas bene affecta primæ veritati revelanti, non inclinat intellectum cæco & temerario modo ad assensum, sed prudenter; sequitur, quòd res fidei quibus quis vult assentiri, debeant esse fide dignæ, & habere rationes, ob quas quis prudenter eis assentiri posset. Hinc in omni actu fidei divinæ requiritur judicium prudentiæ, quo quis res fidei propositas, deliberato animo perpendit, de eisdem judicat, ac tandem rationibus perpensis, actum fidei imperat, si nihil obstare contingat, puta inordinatum erga oppositum animum, animi pertinaciam, &c. Et hæc est serpentina prudentia ad actum fidei requisita, defectu cujus dicitur Eccli. 19. *Qui cito credit levis est corde.*

Credens Dicendum 2. Huic serpentinx prudentiæ conjun-
debet esse gi debet Columbina simplicitas, quâ quis caveat,
humilis & ne nimium innitatur prudentiæ suæ, neque nimis in-
simplex hæreat proprio judicio, sed sese simpliciter captivet in
ausmo. obsequium fidei. Si enim nimium illis indulgeat, ma-
 gis erit pertinax, quam prudens, & voluntas primæ
 veritati piè affecta assensum fidei imperare non pote-
 rit. Hinc S. August. docet cont. Epist. Manich. c. 6.
Quodd Mater omnium Hæreticorum sit Superbia. Ex hac
 denique simplicitate oritur securitas in credendo, nam
 ut ait idem S. Præsul. l. cont. Epist. fundament. c. 4.
Turbam non intelligendi vivacitas, sed credendi simplicitas
tutissimam facit.

Dicendum 3. ut rebus fidei prudenter assentiamur,
 requiritur, ut sint evidentis credibilitatis, sive quòd
 evidenter constet, eas posse prudenter credi. Hinc
 Psalmo 92. dicitur: *Testimonia tua credibilia facta sunt*
nimis. Tam evidentia enim sunt credibilitatis signa in
 fide nostra, ut cum Richardo Viêt. l. 1. de Trin. c. 2.
 eadem considerante, dicere quis posset: *Domine, si*
error est, à te decepti sumus: nam ista nobis sunt tantis si-
gnis & prodigiis confirmata, & talibus, quæ non nisi per
te fieri potuerunt. Ratio prædictæ conclusionis est,
 quòd actus fidei debeat esse prudens, & firmissimus,
 qualis non erit, si assentiatur modo firmissimo, iis
 rebus, quas non judicat evidenter esse credibiles.

Probabi- Dicendum 4. Imprudenter procedit, qui assentitur
litas non rebus propositis, pro quarum credibilitate, solum sup-
sufficit ut petit motivum probabile. Ratio hujus est, quòd qui
res Fidei probabiliter solum judicat, aliquid esse credendum,
reddat e- possit postea sine culpa abjicere tale judicium & fi-
videnter dem ex illo positam, cum rationes probabiles pro
credibiles. alia parte possint postmodum tale judicium varia-
 re & extinguere, si magis appareant plausibiles &
 probabiles. Deinde, qui cum judicio merè probabili
 rebus si lei credit, non est moraliter certus quòd cre-
 dendo non erraret aut possit errare, cum sola probabi-
 litas secum teneat errandi periculum. Denique, aliàs
 rectè

rectè & prudenter procedet hæreticus, qui ob rationes etiam sibi minùs probabiles sectæ suæ pertinaciter perseverat credere, quod est damnatum in hac:
Ab infidelitate excusatur infidelis non credens, ductus opinionem minùs probabili.

Dicendum 5. Signa credibilitatis, quæ sufficiunt ut unum ad prudentem assensum fidei inducant, non sufficiunt ut alium ad id inducant. Doctioribus enim plerumque signa credibilitatis fortiora necessaria sunt, quam indoctoribus, cum illis plures in contrarium rationes in credendo soleant apparere, quas credibilitatis signa debent extinguere & superare. Indoctoribus tamen, pro eorundem captu proponenda sunt credibilitatis signa, adeò ut, nulla prudens de contrario illis relinquatur dubitatio: ad quod cumprimis parochorum currit obligatio, ut oves suas in sanâ fide confirmet, ne vacillantes ad aliorum sectam declinent, quod in partibus Hæreticorum vicinis strictius constringit.

Dicendum 6. Iudicium credibilitatis, sive quo iudico rebus fidei propositis esse credendum, est super-naturale. Probat hoc Cælestinus Papa Epist. 1. c. 9. ad Episc. Galliæ, ubi docet, sanctam cogitationem, *supernaturale* pi-
 pium consilium ex Deo esse. Idem docet Conc. Milæv. & Arausic. hoc quidem can. 7. dicit; *Si quis per naturæ vigorem, bonum aliquod, quod ad salutem pertinet vitæ æternæ, cogitare ut expedit, aut eligere, sive salutare, id est Evangelicæ prædicationi consentire affirmat, absque illuminatione & inspiratione Spiritûs Sancti, Hæretico fallitur Spiritu.* Illud autem c. 4. Valdè, ait, impium est, ut credamus ad eam, quæ inflat, nos habere gratiam Christi: ad eam, quæ aedificat, non habere, cum sit utrumque donum Dei, & scire quid facere debeamus, & diligere, ut faciamus.

Idem docet S. August. variis locis, signanter l. de dono persev. c. 8. ubi ait: *Dens dat cordi humano cogitationes piæ, per quas habent fidem, quæ operatur per dilectionem.*

*Omni vol-
litis exi-
git cogni-
tionem si-
bi propor-
tionatam.* Ratio ejusdem est, quòd omnis volitio requirat co-
gnitionem sibi proportionatam, naturalis naturalem,
spiritualis spirituales, &c. Cùm ergo voluntas cre-
dendi sit supernaturalis, uti in anterioribus probatum
est, sequitur quòd judicium hoc credendi, volunta-
ti illi correspondens, sit supernaturale.

*Non om-
ni appre-
hensio fi-
dem præ-
cedens est
superna-
turalis.* Notandum tamen ideò non esse agnoscendas omnes
apprehensiones fidem præcedentes esse supernatura-
les, tum quòd ad illud statuendum non appareat suf-
ficiens fundamentum, tum etiam quòd tales apprehen-
siones naturaliter in omnibus exsurgant ad res fidei
propositas: Unde aliud est de dicto credibilitatis ju-
dicio.

SECTIO XI.

De Signis credibilitatis.

*Spiritus
privatus
est fallax
& vagus.* DICENDUM primò, signa credibilitatis fidei no-
stræ aut cujuscumque, non possunt consistere in
spiritu privato, quo fit, ut illa sit vera fides, quæ pro-
batur privato spiritu. Sic fidem suam stabiliunt Hære-
tici, ex quo deinceps tot fides, quot capita. Hinc in
libello honorario Regio Calvinistæ Batavo inscripto,
pagina 84. recensentur Hæreses 180. spatio quinquen-
nii in Anglia exortæ. Deinde fides illa privato spiritu
probata meritò rejicitur ab iis, quibus proponitur,
dum fides vera dicitur, non ex notis credibilitatis, sed
ex complacentia privati spiritus.

*Conformi-
tas Fidei
cum recta
ratione.* Dicendum 2. Varia sunt credibilitatis signa, quibus
Ecclesiæ fides innixa, meritò quempiam inducit ad
prudentem assensum. 1. Est conformitas fidei nostræ
cum rectâ ratione: de Deo enim nihil sapit absurdi;
mores omnes ad rectam rationem conformat, ubi aliæ
sectæ varia de Deo sentiunt absurda: Mores perversos
permittunt, puta statuendo Deum authorem pecca-
ti, docendo fidem Ecclesiæ datam non esse servan-
dam.

dam in votis, &c. Ut faciunt Calvinistæ, & alii circa alia.

2. Est sanctitas & virtus fidei nostræ, in qua recens-
semus viros adversariorum quoque professione sanctos, v. g. Augustinum, Bernardum, &c. Assignant quidem alii Lutherum & Calvinum, Petrum Martyrem, &c. Quorum vita Doctrinæ eorundem quædravit, vota infringendo, homines pervertendo, Deum ut crudelem traducendo, &c. Si expetas, quo ducat eorundem Doctrina, audi eorundem testimonia : Lutherus quidem in postillâ domesticâ Lenæ impressâ conc. 2. Domin. 1. adventûs, ita ait : *Mundus ex hac Doctrina (à se datâ) quotidie redditur deterior : jam homines singuli septenis Diabolis obsidentur, cùm antea tantum unico obsessi fuissent. Diabolus jam catervatim in homines ingreditur, ut nunc in tam splendida Evangelii lucè sint avariores, callidiores, injustiores, crudeliores, proterviores, quam prius in papatu fuerant.* Sanctitas,
Quo ducat
Hæretica
Doctrina:

Audi Calvinum in cap. 11. Daniël. v. 34. *In exiguo illorum numero, qui se ab idololatris papatis subduxerunt, major pars plena est perfidiâ & dolis. Præclarum quidem zelum simulant, si tamen intus excutias, reperiēs plenos esse fraudibus: Ex quo collige, quòd quamvis aliqui sectariorum externâ specie sanctitatem simulent, interiùs tamen illâ maximè esse destitutos: Quòd si aliqui juxta naturæ legem, probè vivant, hoc non est eorundem fidei & Doctrinæ adscribendum, quæ de se non tendit, nisi ad perfidiam & improbitatem.*

3. Signum sunt miracula in confirmationem fidei nostræ facta. *Signa enim eos qui crediderint hæc sequentur, in nomine meo dæmonia ejicient, linguis loquentur novis, serpentes tollent.* Marci ult. hoc autem in confirmationem fidei nostræ varios sanctos fecisse, narrant historici plerique & SS. Patres, quos ut falsarios traducere, summæ infanix est, aut nequitix. Si verò, ut quondam Pharisei, facta illa opidæmonis adscribant, ut faciunt sectarii; præfatos Historicos & SS. Patres falsitatis arguunt, dum quod illi divinæ potestati, Miracula.

testati, hi dæmoniis adscribunt. Quocirca tam sollicitè pro verâ fide confirmandâ, tam in V. T. quam novo recursum est ad miracula, ut 3. Reg. 18. ab Elia; imò ab ipsis sectariis, ut sectas suas hac notâ adeò evidenti confirmarent: Debeo tamen, & ut ait Tertull. l. de præscript. c. 30. *volo eorum virtutes proferre: Nisi quod agnosco maximam virtutem eorum, quâ Apostolos in perversum amulantur: Illi enim de mortuis vivos faciebant, isti de vivis mortuos faciunt: Notum est hujus rei exemplum in Calvino, quando Joannem Bruleum de vivo suscitavit mortuum.*

Antiquitas.

4. Signum est Antiquitas fidei nostræ, concordia & continuatio ejusdem. Nulla enim secta, quin ejusdem ortus recens queat ostendi: Nulla hæresis, quin ut orta, varia sortita sit capita & divisiones. Nulla denique, quin ut orta, statim evanuerit, etsi perdurare videatur. Hinc S. August. contr. Epist. fundam. c. 4. *Tenet me, ait, in Ecclesiâ consensus populi atque gentium, tenet authoritas Miraculis inchoata, spe nutrita, charitate aucta, vetustate firmata.* Hinc Lutherus ipse l. de abrogandâ Mîsâ, ita ait: *Protestor adversus eos, qui adversum me sunt clamaturi, quòd contra statuta Patrum, contra receptissimum usum docuerim.* Et Calvinus l. 4. instit. *Sed enim, qui sic faciunt (Catholici) habent veteris Ecclesiæ exemplum, fateor, verum in re tantâ nihil tutius, quam veritatem (dixisset falsitatem) sequi.*

Modus propagationis Fidei.

5. Signum est, modus propagationis fidei, quam per paucos piscatores confirmavit. Huc reflexit D. August. l. 5. comment. in Lucam, ubi ait: *Adverte Cæleste consilium: Non sapientes aliquos, non divites, non Nobiles, sed piscatores & publicanos, quos dirigeret, elegit: Ne traduxisse prudentiâ, ne redemisse divitiis, ne potentie nobilitatisque authoritate traxisse aliquos ad suam gratiam (fidei) videretur: Ut veritatis ratio, non disputationis gratia prævaleret.*

Alia: autem sectæ & hærefes, non nisi viâ humanâ & dabolicâ propagantur, aut vi armorum, ut Mahumet-

Mahumetismus : carnali propagatione , ut Judaismus , cum vix ad Judaismum deflectant aliqui , quin ex Judæorum propagine sint oriundi : Aliæ denique sectæ , aliis mediis & fraudibus sese alibi ingesserunt , & etiamnum ingerunt.

Plura rem hanc concernentia qui desiderat , adeat opus singulare Bosii de notis Ecclesiæ.

SECTIO XII.

Quod fides sit certior quâvis scientiâ naturali.

DICENDUM primò , certitudo nihil est aliud , *Certitudo Fidei.*
quam firmitas assensûs , quâ intellectus objecto firmiter cognito , modo infallibili inhæret. Ad hunc assensum , requiritur 1. ut sit verus : assensu enim falso nihil certi cognoscimus , sed erramus. 2. ut modus cognoscendi sit infallibilis , puta utendo medio infallibili modo infallibili ; quod addo , quia etsi Hæretici in suâ fide falsâ adhibeant medium infallibile , scilicet Dei testimonium , non utuntur illo , modo infallibili , uti deberent , puta per applicationem Ecclesiæ , sed per spiritum privatum : Unde eorundem fides nequit esse certa.

3. Requiritur , ut assensus ille sit firmus , quo firmiter objecto suo intellectus adhæret. Firmitas autem illa oritur , vel ex evidentia objecti , quâ intellectus ad assensum inducitur , nisi fortior in contrarium ratio occurrat : Vel ex Imperio voluntatis , quæ bene alteri affecta , assensum fortiter imperat , uti fit in fide divinâ.

Dicendum 2. Ex dictis requisitis ad certitudinem patet , fidem Theologicam esse certiores quâvis *Omnibus scientiis est fides certior.*
scientiâ naturali. Inprimis enim impossibile est , assensum fidei esse falsum , uti probavimus : Deinde medio utitur infallibili , idque modo planè infallibili , scilicet autoritate Divinâ ejusque testimonio , quod nobis

nobis modo infallibili applicatur per Ecclesiam, quæ est Columna & firmamentum veritatis, & cum suis notis evidentis credibilitatis: quibus notis, etsi secundum se absolute possit subesse falsum, tamen prout substant providentiæ divinæ, implicat easdem fallere: Cum enim Deus à nobis exigit fidei assensum firmissimum, ad Deum quoque pertinet res fidei modo infallibili nobis proponere. Adde, quòd Deus ipse has fidei notas nobis assignet, unde si illæ fallerent, Deus ipse nos interpretativè censeretur fallere.

Denique, assensus ille est firmus, cum voluntas piè affecta veracitati divinæ assensum fidei fortiter imperet & præcipiat, maximè attentis signis illis credibilitatis, & infallibilitate motivi.

*Vna implicancia
est aliâ
major.*

Objicies, nihil potest esse certius, quam id quod implicat, esse falsum, qualis est conclusio demonstrationis. Resp. in primis dici potest, unam implicanciam esse majorem alterâ: implicat lineam 2. pedum, manente eadem extensione & eodem loco pertingere ad rem 20. pedibus distantem, quamvis magis implicet eam extendi ad rem mille pedibus ab eâ distantem. Sic magis quoque implicat Deum mentiri aut testari falsum, quam cognitionem naturalem falli. Deinde, quantum est ex modo tendendi demonstrationis, poterit talis conclusio esse absolute falsa. Sic olim Philosophi, ex eo, *Quòd quæcumque sint eadem uni tertio, sint eadem inter se*, demonstrabant tres personas esse realiter inter se easdem, ratione unius naturæ, in quo tamen crasse errabant.

Notandum tamen D. Thomam 2. 2. q. 5. a. 8. sub finem dicere, quòd si les sit certior quâvis cognitione naturali, sed incertior secundum quid; ex eo scilicet, quòd si les, etsi sit certissima: de se tamen sit & maneat obscura, & possit habere secum adjunctam rei inevidentiam, qualem de se exigit; quæ inevidentia aut etiam obscuritas non arguit continuò minorem certitudinem, uti in hac sectione demonstratum est.

SECTIO

SECTIO XIII.

De objecto materiali sive articulis Fidei, an semper fuerint planè iidem.

DICENDUM primò, cùm semper fuerit eadem fides ab initio nascentis Ecclesiæ, & usque ad consummationem sæculi futura sit eadem, sequitur quòd habuerit idem planè objectum materiale fidei. Unde communiter dicitur articulos fidei non crevisse *quoad substantiam*, sed solùm *quoad explicationem*. *Eadem semper fuit fides.*

Dicendum 2. Uni & eidem Ecclesiæ, pro diversitate temporis congruit diversus modus proponendi res fidei. Hinc Apostolis ad gentes convertendas destinatis, congruebat gentibus proponere res fidei immediatè sibi à Deo revelatas, signis & virtutibus confirmare; succedentibus autem Ecclesiæ rectoribus, quæ non novis, sed antiquis revelationibus innititur, congruit res fidei dudum propositas explicare, suâ autoritate confirmare, à difficultatibus vindicare, &c. Hinc uti Deus res omnes primò creatas postmodum conservat: ita res fidei primitus per Apostolos quasi fatas & creatas, postmodum per succedentes Ecclesiæ pastores conservat, primitivâ fide semper quoad substantiam manente eadem. *Modus proponendi res Fidei est diversus.*

Dicendum tertio: Numquam igitur articulus fidei, quicumque successione temporis advenire videtur, dici potest novus, non magis quam fides dici possit nova, quamvis novi dici possint quia de novo credendi proponuntur. Pro quo notandum est, res omnes fidei semper in semine & virtute fuisse revelatas, tamen perquam obscurè & non nisi paucis: in fide enim protoparentum omnes res fidei continebantur: varia tamen in illâ fide impliciter contenta, sæpè explicatius & clariùs proponere convenit, vel ratione hæresum exorientium, vel aliâ quâdam de causâ, uti in *Articuli fidei non creverunt quoad substantiam sed solum quoad explicationem aut propositam.*

Con-

Conciliis creberrimè fecit Ecclesia, & etiamnum sæpè facit: Unde crescunt res fidei quoad explicationem, non item quoad substantiam, uti etiam, quando Ecclesia proponit novum articulum, non facit de novo illum articulum pertinere ad fidem, qui antea ad illam non pertinuit, sed eundem antea revelatum proponit, & facit de fide obligante. Hinc rectè Vincentius Lyrinensis: *Quodcumque in Ecclesiâ fide Patrum satum est, hoc idem filiorum industriâ decet excolatur, observetur, proficiat, & perficiatur. Accipiant licet prisca dogmata, evidentiam, lucem, distinctionem: sed retineant necepsè est plenitudinem, integritatem, proprietatem.*

Hinc rursus tam sollicitè in rebus fidei discernendis, in investigandâ verâ fide & à spuria secernenda, ad antiquam fidem recurrunt Concilia & SS. Patres, cui si quid non conveniat, fides nova est, & eo solo titulo si les falsa.

*Apostoli
in rebus
fidei magis
quam
ceteri illi
luminati:*

Falsum quoque est sectariorum dogma, quo docent Ecclesiam jam non adeò edoctam, quam fuerit tempore Apostolorum, imò quod præ senio Ecclesia tandem delirabit, uti delirant ipsi: ubi tamen semper eadem est Ecclesiæ fides, & semper idem spiritus veritatis assistit, quamvis & hoc fatendum sit, Apostolos & primos fidei satores magis fuisse à Deo illuminatos, eo quòd per eosdem fides vera per totum terrarum orbem esset propaganda. Hos ergo edocuit omnia, Spiritus Sanctus Apostolis à Christo promissus, adeò ut res omnes, quæ modo ad fidem spectant, spectaverint ad fidem Apostolorum.

*Symbolum
fidei.*

Articulos fidei redegit Ecclesia in quoddam compendium sive symbolum concinno admodum ordine, ne rudiores præcipua fidei capita ignorare contingeret ob prolixitatem: quod symbolum, dicitur symbolum Apostolorum, de quo S. Augustinus Enchiridii c. 7. *Facile, ait, est, ut dicatur quid credendum. Nam ecce tibi est Symbolum. Quid brevius auditur? Quid facilius memoriæ commendatur?* Hoc S. Ambros. Epist. 8. &

Serm.

Ultra hoc Apostolorum Symbolum, est & aliud, quod dicitur *Nicenum*, sub Constantino Magno contra Arium celebratum, quodque pariter cum Concilio est authoritatis. De hoc Symbolo agunt plerique Græci SS. Patres. Aliud insuper est Symbolum Constantinopolitanum, contra Macedonium ab universali Concilio editum, & quod in missâ recitatur. In hoc additum est *to Filioque* contra Græcos, de quo alibi de processione Spiritûs Sancti actum est. Aliud denique est Symbolum *Athanasii*, quo utitur Ecclesia *ad primam*: est & hoc Symbolum pariter cum aliis prioribus authoritatis, non ratione authoris, sed quod ab Ecclesiâ receptum sit & confirmatum, de quo Nazianz. oratione in Athanasium.

An Fides sit ad salutem necessaria.

DICENDUM primò , vera fides Theologi-
ca necessaria est ad salutem , nec sufficit
fides latè dicta , de quâ c. 1. sect. 4. cùm
impossibile sit , sine verâ fide placere Deo:
Unde *Latè dicta* sufficere fortè posset ad placendum
Deo *Latè dicto* , aut Paradisum *Latè dictum* assequen-
dum. Vide locum citatum. Di

*Necessitas
fidei.*

Dicendum 2. fides Theologica fuit ad salutem omni tempore necessaria. Clarissimè hoc exposuit Conc. Trid. Sess. 6. c. 7. ubi dicens Baptisma esse *Sacramentum Fidei*, expressè addit: *Sine quâ nulli umquam contigit justificatio*. Et c. 8. *Fides*, ait, *est humanæ salutis initium, fundamentum, & radix omnis justificationis, sine quâ impossibile est placere Deo, & ad Filiorum ejus consortium pervenire*. Hinc S. Aug. Serm. 38. de temp. *Ad veram beatitudinem pervenire volentibus, primò omnium Fides est necessaria*.

*Non suffi-
ciat fides
in voto in
disto loco.*

Dicunt aliqui, his locis solùm significari, fidem in re vel in voto esse necessariam, sicuti Baptisma. Resp. Hoc omninò gratis dici, nullibi enim baptismo tantam tribuit Scriptura Sacra aut SS. PP. necessitatem, ut dicant sine baptismo impossibile esse placere Deo, nulli umquam contingere sine illo justificationem, &c. Sicuti tribuunt & dicunt de fide. Deinde, si ad hoc sufficeret fides in voto, sufficeret quoque charitas in voto, quod nemo admittet, cum fides & Spes in justificatione & in ordine ad salutem præcedant charitatem.

*Necessitas
medii &
præcepti.*

Dicendum 3. Dupliciter aliquid dicitur necessarium ad justificationem aut salutem. Semel necessitate medii, idest, quando aliquid ita est necessarium, ut sine illo finis haberi non possit, undecumque etiam contingat illud non haberi. Alio modo necessitate præcepti, quando aliquid ita necessarium est, casu quo haberi possit; unde ignorantia invincibilis & impotentia hîc excusant. His positis ulteriùs dicendum est, necessariam esse necessitate medii fidem unius Dei, omni prorsus statui ad salutem: Unde Apostolus ad Heb. 11. *Accedentem ad Deum oportet credere, quia est, & quòd inquirentibus se remunerator sit*. Nec solùm requiritur cognitio Dei quâcumque ratione considerati, sed sub aliquo motivo, in quo à creaturis differt, v. g. ut omnipotentis, omnium factoris, &c. aliàs non habebitur verus de Deo conceptus.

*Fides in
Christum.*

Dicendum 4. Post Adæ lapsum, omni tempore neces-

necessaria fuit necessitate mediï, fides in Christum Redemptorem. Probatur ex Sacrà Scripturâ act. 4. *Non est in alio aliquo salus: Nec aliud nomen sub Cælo datum est hominibus, in quo oporteat nos salvos fieri.* Deinde nemo venit ad patrem, nisi per Christum: Rursum, *Est unus mediator Dei & hominum, Christus JESUS.* Hinc iterum dicitur esse *agnus occisus ab origine Mundi*, Apoc. 13. eo quòd vi meritorum Christi in quem omnes credebant, omnes omninò justificabantur. Audi S. August. in Psal. 104. *Præter istam fidem, quæ est in Christum JESUM, sive ante ejus incarnationem, sive post eam, non est quisquam reconciliatus Deo, cum sit ab Apostolo veracissimè dictum: Unus mediator Dei & hominum, homo Christus JESUS.* Ratio quoque idem dictat, eo quòd nos non salvemur nisi hâc fide: ergo nec alii quicumque, cum sit semper eadem fides.

Dicendum 5. fides illa in V. T. non fuit adeò Tempore explicita, quam in N. T. nec tamen illis sufficiebat L. V. credere, Deum provisurum homini lapsò mediis sibi cognitis, cum hoc sine mediatore & salvatore fieri potuisset, culpam condonando, &c. Unde fides eorùm implicita credebatur Deum missurum liberatorem, qui modo sibi cognito Mundum redimeret. Et sic docet S. August. quod fides tempore l. v. velabatur, quæ modò revelatur, quia jam apertè & distinctè credimus, quod antea confusè & indistinctè.

Alii tamen docent, fidem explicitam Messia in V. T. necessariam fuisse necessitate præcepti majoribus, idest Sacerdotibus & Legis Doctoribus, quibus incumberebat noscere significata sacrificiorum, libaminum, &c. Quæ Christum venturum & sacrificandum significabant: Et si non tam distinctè, ac in lege novâ exigitur eadem cognoscere.

Dicendum 6. Dicta implicita fides mediatoris, sufficiebat adhuc post adventum Christi, antequam In adven- fides satis esset promulgata, cum lex non obliget ante tu Christi sufficientem ejus promulgationem. Hinc cum pro-
mulgatio-

mulgatione fidei in Christum natum, comitabatur obligatio explicitæ fidei in eundem.

*Post Evan-
gelii pro-
mulgatio-
nem.*

Post sufficientem autem fidei promulgationem, explicita fides incarnationis omnibus ad salutem est necessaria, non tantum necessitate præcepti, sed & necessitate medii. Probant hoc Sacræ Scripturæ loca, quæ docent eum esse judicatum qui non credit in nomine JESU: ut Joan. 3. Deinde Athanasius in Symbolo: *Sed necessarium est ad æternam salutem, ut incarnationem quoque Domini nosiri JESU Christi fideliter credas.* Denique sequeretur, quod quis in hoc statu posset salvari in lege Moysaicâ, qui fidem Evangelicam invincibiliter ignoraret, cum haberet implicitam Christi fidem, in V. T. inclusam.

*Iustitia
Cornelii.
Act. 11.*

Objicies potissimum circa conclusionem 4. 1. quidem quod actorum 11. dicatur Cornelius *justificatus*, *Religiosus ac timens Deum*, item *justus*, idque ante fidem mediatoris. Resp. In primis dato quod fuisset justificatus, non poterit probari, quod non habuerit fidem confusam mediatoris. Secundò ita argumentatur S. Aug. l. 1. de prædest. SS. c. 7. *Si posset sine fide Christi esse salvus (Cornelius) non ad eum ædificandum mitteretur Architectus Petrus.* Unde patet quod Cornelius ante instructionem & Baptisma à Petro receptum non fuerit justificatus.

Deinde ita de Cornelio scribit S. Gregorius in Ezech. l. 2. hom. 19. *Cornelius enim centurio cujus eleemosynæ ante baptismum Angelo testante laudatæ sunt, non operibus venit ad fidem, sed fide venit ad opera. . . . si enim Deum verè & ante baptismum non crediderat, quid orabat? Vel quomodo hunc omnipotens Deus exaudierat, si non ab ipso se in bonis perfici petebat? Sciebat igitur creatorem omnium Deum, sed quod ejus omnipotens filius incarnatus esset, ignorabat: Neque enim poterat bona agere, nisi ante credidisset. Scriptum namque est, sine fide impossibile est, placere Deo. Fidem ergo habuit, cujus operationes & eleemosynæ placere potuerunt. Bonâ autem actione promeruit, ut Deum perfectè cognosceret, & incarnationis*

carnationis

Incarnationis ejus Myſterium crederet, quatenus ad Sacramentum Baptiſmatis perveniret. Per Fidem ergo venit ad opera, ſed per opera eſt ſolidatus in Fide.

Quod autem dicat Sacra Scriptura eum eſſe Religioſum, timenſem Deum, juſtum, &c. Nihil officit, cum dicatur talis, ab operibus externis ſive officiis illarum virtutum, quæ in Cornelio ab aliis observabantur: Quæ officia non adferunt ſe ſolis remiſſionem peccatorum aut juſtificationem. Denique dicitur Juſtus, non quòd fuerit juſtificatus, ſed quòd juſ ſuum cuique tribueret, quod eſt officium proprium virtutis juſtitix. Sic etiam dicitur ibidem quod Cornelii eleemoſynæ & orationes à Deo exauditæ ſint, & iſdem meruerit, quod gratiam ſupponit: Sed notandum hîc ſolum inveniri meritum de congruo, ratione cujuſ talia ſunt à Deo exaudiri.

Objicies 2. Fieri poteſt, quòd multis gentibus defuerit omnis de mediatore notiſſima, quomodo autem credent ei, quem non audierunt? Reſp. Negant aliqui, ad aliquos non perveniſſe aliquam ſaltem imperfectam de mediatore notiſſimam, verum abſque fundamento: Cum Apoſtoli act. 16. à Spiritu Sancto prohibiti ſint loqui Verbum Dei in Aſia. Quare reſpondeo, verum eſſe, quosdam deſtitui veræ fidei gratiâ; inde tamen non ſequitur, quòd illis fides ſit impoſſibilis, cum poſſint credere per Dei gratiam ordinariam, quæ quibus datur, miſericorditer datur, quibus autem denegatur, juſtè denegatur. Docet quidem S. Thomas alibi, quòd Deus hoc caſu mitteret de Cœlo Angelum ad tales inſtruendos, ſi tales juxta naturæ legem viverent: Quod, eſi piè credatur, nullâ tamen firmâ ratione confirmatur; cum juſtiſſimè omnes ignorantix rerum fidei immerſos, potuiſſet relinquere; nec unum ex damnationis maſſa liberare, ſi voluiſſet, idque ob peccatum originale. Quibus ergo fides prædicatur, & fidei gratia donatur, miſericorditer donatur & prædicatur, & quibus eadem negatur, juſtiſſimè denegatur: Quod ſi tales

C.

damnen.

Fides cuſlibet eſt poſſibilis per Dei gratiam

dammnentur, non fiet hoc præcisè ob infidelitatem eorumdem negativam, sed vel ob peccatum originale, vel actuale commissum.

Objicies 3. Apostolus ad Heb. 11. dicit, ac tantùm requirit, ut accedentes ad Deum credant Deum esse, eumque esse remuneratorem, nullâ factâ mentione mediatoris. Resp. In primis dici posse, Apostolum hîc adferre, quod est necessarium, non quæ præcisè sufficiunt. Meliùs tamen dicitur, hîc contineri fidem mediatoris, quatenus dicitur *inquirentibus se*, id est, *per Christum*, Deum esse remuneratorem. Hinc S. Aug. in Psalm. 108. v. 7. *oportet inquit Apostolus, accedentem ad Deum, ut illuminetur justitiæ gratiâ, credere quia est & quòd inquirentibus se verâ viâ, hoc est per mediatorem Christum, remunerator sit.*

Objicies 4. Posset fieri, quòd Infans Baptisatus jam ad usum rationis perductus, antequam peccaret mortaliter, aut mediatoris notitiam haberet, discederet è vita. Item quòd quis habeat actum charitatis sine fide mediatoris. Resp. Casus illos juxta ordinariam Dei providentiam numquam futuros, uti Sacra Scriptura dicit, quòd impossibile sit sine fide placere Deo. Adde, quòd non omnis charitas justificet, uti patebit ex materia de Charitate.

Justificatio in I. V. & in L. N. Objicies contra 6. conclusionem: Ergo salus Christianorum erit difficilior acquisitu, salute fidelium V. T. in quo requirebatur sola fides implicita mediatoris, jam explicita. Resp. Si conferantur omnia onera L. V. apparebit contrarium. Deinde potuisset Deus à nobis ratione statûs perfectioris, plus exigere, quam ab aliis, quibus omnia in figuris contingebant. Denique jam suppetunt nobis remedia magis opportuna, puta Sacramenta, quibus etiam cum imperfecta Charitate Justitiam acquirere possumus, ubi requirebatur in V. L. Charitas perfecta, longè difficilior.

Fides Sanctissima Trinitatis.

Dicendum 7. Fides explicita Mystერი SS. Trinitatis, est etiam necessaria necessitate medii ad salutem pro hoc statu, & alio quoque post sufficientem Evangelii promul-

promulgationem. Ratio est, quòd sine fide hujus mysterii non possit haberi plena fides incarnationis : Deinde Trinitas est objectum principale fidei, quia quisque baptisatur & signatur signo Crucis, cum expressione hujus mysterii Trinitatis. Hoc tamen notandum est, non teneri rudiores hæc alta & abscondita mysteria ita expressè credere, ac si necessitate medii ea distinctè & plenè credere debeant & intelligere ; sed satis esse, si credant Patrem & Filium & Spiritum Sanctum esse unum in essentia Deum, trinum in personis ; ad quod non est necessaria ingenii vivacitas, sed intellectus in obsequium fidei captivatio & subjectio : Quamvis illi, quibus ex officio competit alios instruere in rebus fidei, distinctiorem eorumdem notitiam habere debeant. Unde colligi potest, quam arcta Pastoribus & aliis juventutis curam gerentibus injuncta sit obligatio, illam in his articulis quam citissimè & sollicitè instruere, sine quorum notitia, æterna salus non potest obtineri. Et quamquam contraria nobis sententia, quæ impliciâ prædictorum fide contenta est, censenda sit probabilis, in praxi tamen rejicienda est, & si ullibi, certè in hoc puncto sequendum est tutius, cum nihil hîc proderit probabilitas, si requisita desit veritas. Quomodò autem cum ignorantibus prædicta agat Confessarius, vide in materia de absolutione ex quo rectè colligi possit, quam meritò damnata sit hæc ab Ecclesia : *Non nisi fides unius Dei necessaria videtur necessitate medii non autem explicita remuneratoris.*

S E C T I O II.

De necessariis creditu ad salutem necessitate præcepti.

P R Æ N O T A N D U M, posse aliquem ad aliquid obligari, vel ratione sui statûs, vel ratione ipsius rei obligantis. Deinde, varios esse fidelium status, unde plura ab uno ex præcepto debent credi explicitè,

*Conditio
fidelium
varia.*

quam ab alio. Hinc solent aliqui in Ecclesia distinguere 3. status. Primi statûs, vocant *maiores*; secundi, vocant *medios*; tertii denique vocant *infimos*. *Majores* censentur Episcopi: *Medii* Pastores, Confessarii & Concionatores, & alii quibus ex officio competit instruere plebem: *Infimi*, sunt reliqua fidelium turba, his prænotatis

*Ab Ecclesia
solemnifata.*

Dicendum 1. Tenetur quilibet adultus, explicitè credere ex præcepto illa omnia, quæ ab Ecclesia solemnifantur & proponuntur: Addo & *proponuntur*, quia plurima ab Ecclesia solemnifantur, quæ tamen non debent ex præcepto explicitè ab omnibus credi, ut v. g. circumcisio, præsentatio D. Virginis, &c. Ut omnia sancti cujusdam merita, dum canonizatur. Debet ergo id, quod ab Ecclesia solemnizatur, ab eadem proponi credendum, ut Corporis Christi in Eucharistia præsentia, ascensio Christi, invocatio SS. &c.

*Symbolum
Apostolorum.*

Dicendum 2. Tenetur quilibet explicitè credere Apostolorum Symbolum, saltem quoad substantiam. Ratio est, quod illa quæ Symbolo continentur, sint prima fidei rudimenta: Unde Ecclesia strictissimè præcipit ministris suis, ut eadem subditos doceant, & in primitiva Ecclesia, recitatio talis Symboli requisita fuit ante & post baptismum, imò id observandum in adultis, docet nos Rituale Romanum. Ut enim quispiam censeatur esse alicujus Ecclesiæ, necesse est, ut sciat præcipua fidei illius mysteria, quibus fides illa, ab aliis sectis distinguitur, prout sunt illa, quæ in Symbolo continentur.

Dixi, *saltem quoad substantiam*, eo quod illa obligatio non currat, nec stringat rudiores quoad subtiliores & proprios conceptus. Hinc communiter docetur, quod non debeant illa perfectè scire v. g. quâ ratione filius sedeat ad dexteram Patris, in quo sit Sanctorum communio, &c. Deinde satis est sciri symbolum illud quoad substantiam, etsi non quoad propria verba.

Dubitant alii, an etiam expressè credi debeat de
scensio

Ascensio ad inferos, Sepultura Christi, Virginitas Deiparæ, Ecclesiam esse Catholicam, &c. Resp. Sepulturam Christi non esse expressè sub gravi obligatione credendam, cum sit circumstantia mortis Christi, quæ explicitè credi debet. Unde generaliter hîc notandum est, nullum symboli articulum hîc censerî minoris momenti ad credendum, nisi sit alterius circumstantia, qui debeat credi. Descensio ergo ad inferos credi debet explicitè, Virginitas Deiparæ, carnis resurrectio, Catholica Ecclesia, non nudè quod talis detur, sed quòd talis sit hæc Romana Ecclesia.

Dicendum 3. Tenentur omnes explicitè credere *Sacramen* Sacramenta N. L. omnibus promiscuè necessaria, *ta N. L.* qualia sunt Baptismus, Eucharistia & Pœnitentia. Duo priora quidem credi debent, ut eorundem obligationi & præcepto satisfieri possit: Pœnitentia verò credi debet propter assiduum labendi periculum, à quo per Pœnitentiam est resurgendum. Alia 4. Sacramenta non debent ita expressè credi, nisi ab iis qui eadem suscipere vel administrare debent, cum non sit universale præceptum eadem suscipiendi uti 3. priora.

Dicendum 4. Cum quilibet adultus (de quo semper loquimur) scire debeat quæ sint communiora *Præcepta decalogi,* juris naturæ principia, ut juxta eadem rectè vivat, sequitur quòd quilibet scire debeat præcepta decalogi, in quibus talia principia continentur. Hinc nisi de illis instructi sint Catechumeni, non admittuntur ad Baptisma.

Debent quoque scire Ecclesiæ præcepta, non item *Ecclesia præcepta,* ea credere, cum non sint à Deo revelata, sed solum ab Ecclesia præcepta: Ratio hujus est, quòd scire teneantur ea, quibus ab aliis alterius fidei distinguuntur fideles, qualia sunt illa, quæ Ecclesiæ præcepta præscribunt.

Sufficit tamen quòd sciant eadem quoad sensum etsi non quoad verba: Quamvis consultissimum sit

rudioribus eadem memoriter quoad verba scire & posse recitare, qui ferè nihil memoriâ retinent, nisi verbotenus calleant. Ad quem casum respexisse videntur quædam statuta synodalia, quæ prædictorum omnium verba memoriter addiscenda statuerunt, prout fert communis Ecclesiæ sensus, & piorum praxis.

Oratio Dicendum 5. Oratio Dominica sub gravi culpa
Domini- sciri debet, cum ut dicitur in Concilio Rhemensi c.
ea. 2. *Orationem Dominicam, nulli ignorare licet.* Accedit
Ave Ma- & ratio, cum enim sæpè sit necessitas orandi, mo-
ria. dus autem orandi hæc oratione continetur. Idem ex
Signum praxi Ecclesiæ & sensu fidelium docent plurimi de
Cruci. salutatione Angelica, & magis de forma crucis, quod proprium est fidelium testimonium & signum.

Majores Dicendum 6. *Majores*, idest Episcopi, uti & *Medii*,
ad quorū idest Pastores, Confessarii & Concionatores & alii,
scientiam multò plura scire debent quam alii infimi de quibus
sint obli- jam actum est. Hinc non sufficit iisdem, prædicta ex-
gati. plicitè credere & scire, & eadem populo proponere, sed necesse est, ut de iisdem populum sciant instruere, & eos qui contradicunt arguere. Quo spectat illud S. Greg. exordium curæ suæ Pastoralis: *Nulla ars doceri præsumitur, nisi intentâ prius meditatione discatur. Ab imperitis ergo magisterium Pastorale suscipitur, in magnâ temeritate, quoniam ars est artium regimen animarum. Quis autem cogitationum vulnera, occulitora esse nesciat vulneribus viscerum? Et tamen sæpè, qui nequaquam spirituality præcepta cognoverunt, cordis se medicos profiteri non metuunt: Dum qui pigmentorum vim nesciunt, videri medici carnis erubescunt: Attendunt hæc Confessionibus audiendis & Pastoralis curæ sese ingerentes sine competenti scientia; sciant se suosque subditos æternæ damnationis periculo exponere, dum cæci cæcis ducatum præstant: Inscitia Pastoris & Confessarii, præsentissimum est ruinæ subditorum periculum, & fomentum audaciæ adversariorum. Quod & Concionatores cum primis concernit, qui de animarum vi-*
tis

tis & morbis verba promunt, quos ipsi ignorant, similes cymbalis tinnientibus, aut psittacis: quo fit ut quæ proclamant, sanâ fide defendere vix possint. Discendum primò est illi qui alios docet.

Dicendum 7. Obligationem Parochi, in dictis punctis luculenter confirmat Catechismus Parochorum seu Romanus, uti & aliorum, quæ hic ex eodem summatim annecto. In primis ergo p. 1. præfat. q. 10. docet, ut Parochi rectè suo munere fungantur, omnem suam Doctrinam eò debere primùm referre, ut omnes intelligant, quantum beneficium Deus humano generi per Christum præstiterit: quæ sint Dei & Christi mandata: opera, fidei esse jungenda: ut doceant Catholicos Deo per amorem debere adhærere, inò omnem Doctrinam Doctori Catholico ad charitatem esse dirigendam.

2. Incumbat in hanc curam Parochus, ut fideles communium miserationum & ærumnarum causam cognoscant: ut ait art. 2. §. 2. idest peccatum originale; nam ut ait, S. August. in eo consistit summa vitæ Christianæ, ut diximus agendo de peccato orig. 1. 2.

3. Danda est opera, ut hæc mysteria, quæ ad Doctrinam nostram scripta sunt, infixæ animo & mentibus fidelium hæreant; primum quidem, ut tanti beneficii (incarnationis) commemoratione aliquam gratiam ejus auctori referant: Deinde, ut eximium hoc & singulare humilitatis exemplum eis ante oculos ad imitandum proponat. Ita idem Catechism. art. 3. §. 11.

4. Parochus hujus articuli (Passionis Christi) Historiam non prætermittet, quæ diligentissimè à SS. Evangelistis exposita est; ut saltem summa ejus mysterii capita, quæ ad confirmandam fidei nostræ veritatem magis necessaria videntur, fideles cognita habeant. Hoc enim articulo veluti fundamento quodam, Christiana Religio & fides nititur, eoque posito, reliqua omnia rectè constituta sunt. Ita art. 4. §. 5. porrò hujus articuli expositio ita necessariò est populo proponenda, ut nullo respectu sit omittenda. Cum enim ab aliquo tempore quidam

expedire judicarent, hanc hujus articuli expositionem omittere illis, qui in China ad fidem Catholicam instruebantur, ne ob ignominiam crucis resilirent: congregatio de Propaganda Fide desuper Consulta à Patribus Dominicanis & Franciscanis ab una parte, & Jesuitis ab alia parte, ita statuit, nullâ prudentiâ aut prætextu differendam esse Doctrinam Passionis Christi post Baptisma, sed omninò præmittendam, idque sub excommunicatione. Id statuit 1645. & adhuc nuper.

5. Debet Parochus sæpè proponere judicium extremum, *Quia hujus articuli veritas Fide concepta, maximam vim habet, ad pravas animi cupiditates atque à peccatis homines abstrahendos...: ac profectò vix quisquam adeò præceptis in scelera feretur, quem illa cogitatio ad pietatis studium non revocet.* Ita idem art. 7. §. 11.

6. Scribens in articulum 9. *Sanctam Ecclesiam Catholicam*, ait, quòd summa diligentia eum exponere debeat Parochus, eò quòd circa illum plures soleant oboriri errores, & qui hanc veritatem firmo animo conceptam habuerit, facilè horrendum hæresis periculum effugiet.

7. *Parochi in erudiendis fidelibus numquam intermitteant præmiis æternæ vitæ propositis eorum animos accendere.* Initio ad art. 12.

8. Ex Apostolo deducit, Doctrinam de Baptismo sedulò esse populo Christiano proponendam, *Ex quo deinde fiet, ut unusquisque iis rebus admonitus, quæ in alio geri videat, secum recordetur, quâ se sponsione Deo obligarit, cum Baptismo initiatus est: simulque illud cogitet, an vitâ & moribus se talem præbeat, qualem Christiani nominis professio pollicetur.* Ita p. 2. c. 2.

9. Naturam & efficaciam confirmationis itidem exponi præscribit, tum tempore Pentecostes, tum etiam maximè, quando occasio sese offert illud administrandi. p. 2. c. 3.

10. Doctrinam Augustissimi Sacramenti & missæ, ut debitâ reverentiâ hæc divina mysteria frequentent. p. 2. c. 4.

11. Docet idem Catechismus c. 5. Parochos in explicatione poenitentiae numquam adeò diligentes futuros, ut satis videri possit: cujus rationes ibidem addit. Maxime tamen dictos articulos exponere oportet, dum ratione festi instat occasio confitendi vel communicandi.

12. Debet quoque sæpè exponere Doctrinam de extrema unctione, Cum Parochi admoneantur, nullum tempus prætermittendum esse fidelem populum cohortandi, ut in assidua mortis meditatione versetur.

13. Natura matrimonii & vis explicanda est: Nam cum vitia sæpè honesti similitudinem gerant, cavere oportet, ne fideles falsa matrimonii specie decepti, turpitudinis & nefariis libidinibus animam commatulent.

14. Cum decalogus sit totius legis summa, pastores oportet in ejus contemplatione die noctuque versari: non ut vitam suam modò ad hanc normam componant: sed etiam ut populum sibi creditum in lege Domini erudiant. Nam labia Sacerdotis custodiunt scientiam, & legem requirent ex ore ejus.

15. Maxime tamen oportet exponere 3. præceptum de die festo sanctificando, Cum hoc præceptum hujusmodi sit, ut fructum & admirabilem utilitatem adferat: & quemadmodum fideles tale præceptum meminisse debent; sic Pastoris est, in eorum memoriam illud & monendo & docendo sæpè redigere.

Hæc sunt potissima, quæ sedulò fidelibus vult proponi à Pastoribus Catechismus Romanus. Quibus adde, & Doctrinam de præceptis aliis decalogi, ad quæ quilibet ex natura constringitur. Tanta autem horum est obligatio, ut audeat Emmanuel Saë Societatis in Aphorismo confess. V. Parochus, dicens: negligentia magna Parochi in docendo ad salutem necessaria, nempe symbolum, decalogum, & pater noster, mortalis est: ubi passim magnus est abusus eorum, qui contenti docuisse symbolum latine, non explicant populo rudi mysteria fidei, præsertim Trinitatis & incarnationis, tantopere ad salutem necessaria: Væ Parochis: Væ Episcopis: Væ Prælati.

Vide

Vide quæ dicturus sum de sanctificatione festi, in materia de Eucharistia in fine.

SECTIO III.

De Præcepto eliciendi actum Fidei.

Fides est in præcepto. **D**ICENDUM primò, Datur verum fidei præceptum, cum *Qui non crediderit condemnabitur* 2. Deinde cum fides necessaria sit ad salutem, quilibet ad tam necessarium medium conquirendum ex obligatione constringitur. Hinc ab Alexandro VII. Anno 1665. hæc est condemnata: *Homo nullo umquam vitæ tempore tenetur elicere actum Fidei, spei & charitatis ex vi præceptorum divinarum ad eas virtutes pertinentium.* Et Innocentio XI. Hæc: *Fides non censetur cadere sub præceptum speciale & secundum se.* Et illa: *Satis est, actum Fidei semel in vita elicere.*

Est negativum.

Dicendum 2. Præceptum illud prout est negativum prohibens dissentiri illis, quæ à Deo revelata sunt, est juris naturæ, cujus est non inhonorare Deum, quod fit tali dissensu. Idem est, prout est affirmativum, præcipiens assensum iis, quæ revelata sunt. Dum enim Deus aliquid revelat, intendit alterum ad assensum incitare, unde non assentiri, aut etiam assensum suspendere, eederet in Dei contemptum morali æstimatione.

Quando nam obliget.

Dicendum 3. Obligat præceptum fidei, quando fides alicui est sufficienter proposita. Quando nam autem censeatur esse sufficienter proposita, variant & excedunt aliqui; quamquam fatendum sit, hic prudenti judicio, ut in aliis moralibus, opus esse. Videtur tamen, tunc sufficienter alicui esse proposita, quando cum suis signis credibilitatis alicui proponitur, cum illa sint tam solida, ut res fidei faciant evidenter esse credibiles. Unde, si talis, cui ita fides nostra proponitur, vel pertinaciâ ingeni, aut affectûs malitiâ credere renuat, infringit præceptum fidei.

Turpiter

Turpiter tamen errant, qui docent Hæreticos, *Propositio*
 quamdiu suam sectam judicant probabilem, & *fides suf-*
 æquè credibilem, non teneri ad credendum, eò quòd *ficiens.*
 hoc casu non censeatur illis fides esse sufficienter pro-
 posita. Imò addere alii non verentur, id verum esse,
 etsi fides proposita videatur ipsis probabilior; hoc
 dogma tradunt audacter, qui docent probabilitatem
 solam excusare etiam in materia fidei. Quod si ve-
 rum: quis umquam Hæreticus obligabitur ad cape-
 scendam sanam fidem, cum cuilibet pro sua secta
 suppetant rationes plausibiles, quibus etsi proponan-
 tur & opponantur rationes convincentes in contra-
 rium, judicare tamen possit, ab aliis, talibus rationi-
 bus responderi posse, etsi ipse eisdem convincatur;
 hoc enim ad probabilitatem statuendam, statuunt ali-
 qui ut sufficiens. Deinde, qui iisdem fidei punctis ex
 animo obstinato & pertinaci credere renuit, facile ex-
 cusabitur, cum aliquæ tantummodò pro sua secta
 suppetunt rationes suo cerebro plausibiles. Gravius
 exorbitant, qui docent hoc quoque verum esse in ar-
 ticulo mortis.

Dicendum 4. Urget etiam præceptum si lei, quan- *Obligatio*
 do actus aliquis præcepti sine exercitio fidei poni non *fidei per*
 potest: v. g. dum quis obligatur ad actum Spei & *accidens.*
 Charitatis, qui sine actu fidei fieri non possunt: dein-
 de, quando quis ad justificationem se præparat: dum
 occurrit occasio fidem exterius confitendi: Denique
 quando ad Eucharistiam aut aliud Sacramentum ac-
 ceditur, quod fidem prærequirit: Uti etiam in arti-
 culo mortis, cum eo tempore quilibet teneatur sese,
 quam poterit maximè seriò & sollicitè præparare ad
 salutem, ad quam fides est in primis necessaria: quo
 casu non tantum urget si lei præceptum ratione Spei
 & Charitatis tunc obligantis, sed etiam ratione sui.

Dicendum ultimò, poterit dari ignorantia invinci- *Datur*
 bilis rerum fidei, quæ non continentur in jure naturæ, *ignorantia rerum*
 prout sunt illæ, quæ in decalogo continentur. Hinc *fidei qua*
 docet S. August. Tract. 89. in Joannem: eos, ad quos *fit invin-*
 non *cibilis.*

Invincibili. non pervenit Christus, vel per se vel per alios prædicatores, habere excusationem de peccato suo, *non quidem* ait, *de omni peccato suo, sed de hoc peccato, quod in Christum non crediderunt.* Hoc tamen notandum est, aliquando ignorantiam mysteriorum fidei esse vincibilem, maximè apud Catholicos, qui seriò ad instructionem aut Catechismum conferre se negligunt, dum etiam commodè possunt; cuius defectum satis frequentem advertunt Parochi, tum urbani, tum suburbani.

Falsum tamen est, nullam dari posse ignorantiam invincibilem mysteriorum fidei, eo quòd Psalm. 78. dicat Psalmista: *Effunde iram tuam in gentes quæ te non noverunt*: Et Apostolus ad Rom. 10. de omnibus dicat: *Sed numquid non audierunt? Et quidem in omnem terram exivit sonus eorum, & in fines orbis terræ verba eorum*, scilicet Apostolorum. Quia hæc & similia, vel sunt intelligenda de vincibili ignorantia, vel quòd ira Dei effundi debeat in gentes, non præcisè ratione ignorantix, sed ob alia scelera contra jus naturæ, idololatrias, &c. Deinde loquitur Apostolus de loquela & prædicatione Cœlorum & aliorum visibilium, quatenus quilibet per ea quæ facta sunt, deduci faciliè possit in cognitionem conditoris. Adde, Sermonem Apostoli dirigi ad Romanos, quibus Christi fides jam satis erat annunciata: Denique alii docent eum loqui propheticè, quòd fides Catholica per totum terrarum orbem, sit diffundenda.

SECTION IV.

An sola Fides sufficiat, aut umquam suffecerit ad salutem.

Fides sine operibus ad salutem est insufficientis.

DICENDUM est primò, numquam ad salutem sufficit sola fides sine operibus. Unde Scriptura Jac. 2. apertè docet, fidem sine operibus mortuam esse, & Rahab meretrix dicitur ex operibus justificata,

ta. Sic etiam Apostolus ad Galat. 5. dicit, *in Christo JESU, neque circumciso aliquid valet, neque præputium, sed fides, quæ per dilectionem operatur*: Denique dum dicit Rom. 4. Galat. 3. *Credidit Abraham Deo, & reputatum est ei ad justitiam*, non intelligit nudam fidem, sed quæ sit obedientiæ, spei & aliarum virtutum operibus conjuncta.

Dicendum 2. Multò minùs se solâ ad salutem sufficit inanis Hæreticorum fiducia, quâ credunt sibi per Christum remissa esse peccata, se esse Filios Dei, hæredes regni, &c. Fundant se in quibusdam Sacræ Scripturæ locis, quæ justitiam soli fidei adscribunt, seu potius adscribere videntur, quæ omnia intelligenda sunt, vel de fide viva, idest, bonis operibus conjuncta: vel, quòd fides sit initium justitiæ, & radix, non quòd se solâ sufficiat ad illam. Deinde, dicimur aliquando justificari gratiâ Dei per fidem, non ex operibus, uti dicitur ad Ephes. 2. quò significatur, nos non posse justificari operibus legis veteris, vel operibus solis naturæ viribus ortis, vel denique operibus quibuscumque, quæ fidem salutis initium præcedunt. Quinimò, talem fidem seu potius fiduciam non posse admitti, dictat ipsa æquitatis ratio. Primò quidem, quòd juxta hæreticorum placitum nihil credi debeat, quod in Scriptura credendum non proponitur: Dic sodes, ubi Scriptura dicit, alicui in particulari remissa esse peccata, aliquem esse Filium Dei, &c. quod tamen hæc sua fide credunt? Rursum nonne implicat, credere remissa esse peccata, & per illam fidem remitti & deleri? Intricata semper & se confundens est falsitas.

Dicendum 3. Ultra Fidem requiruntur ad salutem bona opera, juxta illud Math. 17. *Si vis ad vitam ingredi, serva mandata*. Fides enim sine operibus mortua est, sterilis & infructuosa ad salutem. Unde absit, quòd fides ad salutem se solâ ducere possit, quin potius se solâ condemnabit plurimos, quòd opera fidei contraria commiserint, uti dicitur quòd Regina austri surget

*Inanis
Hæretico-
rum fidu-
cia.*

*Se se con-
fundunt
& de-
struunt.*

*Fidei ad-
desse de-
bent ope-
ra bona.*

get

get in iudicio & condemnabit illos, quibus Christus Fidem prædicavit, miraculis eam confirmando. Matth. c. 12. unde Conc. Trid. Sess. 6. c. 9. & Can. 9. docet & dicit anathema iis, qui dicunt, solâ fide impium justificari. Neque dici potest, quòd quodcumque Scriptura Sacra exigit opera ultra fidem, ad salutem necessaria, tantummodò velit, opera bona esse signa veræ fidei; quasi verò vera fides remanere non possit in impiis & peccantibus.

S E C T I O V.

Quid requiratur, ut actus Fidei sit meritorius.

Fides meritoria.

DICENDUM primò, certum est, actum Fidei esse meritorium. Probatur, quia est actus bonus, procedens à gratiâ, liber, & Deo gratus, quæ conditiones ad actum meritorium requiruntur & sufficiunt. Hinc fides dicitur *corda purificare*: act. 15. per fidem nos placere Deo, Heb. 11. &c. Cùm Deo gratum sit captivare intellectum in obsequium fidei; & ratione piæ voluntatis affectionis erga divinam veritatem ad actum fidei necessariò requisitæ, procedat à gratia, adeoque sit supernaturalis.

Porrò, etsi actus Fidei sit semper de congruo meritorius, non tamen de condigno, cùm possit vera fides reperiri in peccatore, qui tamen de condigno mereri nequit.

Dicendum 2. etsi, actus Fidei à iusto procedat, non erit tamen de condigno meritorius, nisi virtualiter saltem à Charitate procedat. Clarissimè id patet, ex data Doctrina de merito sect. 8. ubi ex D.

Omni Fidei actus non est meritorius, nisi Fides per dilectionem operetur. Adde, hoc speciale esse in actu Fidei, quòd actus veræ fidei non sit, nisi adsit aliqua Dei Charitas, puta pia voluntatis affectio actum fidei imperans: Unde assidue additur à San-

à Sanctis Patribus, & sæpè à Sacra Scriptura, quando fidei fructum boni operis assignant & dicunt, *Fides quæ per dilectionem operatur*. Vide plura prædictâ sectione.

SECTION VI.

An sit necessaria externa Fidei Confessio.

DICENDUM primò; Externa Fidei Confessio est *Fides externa est* sub præcepto. Duplex autem est præceptum *sub præcepto* fidei externæ: Unum affirmativum, quo pro loco & tempore debito obligamur externo signo fidem profiteri. Unde non obligat ad semper, sed solum pro occurrentibus circumstantiis. Aliud præceptum est *Negativum præceptum non negandi fidem*, quo obligamur numquam fidem negare, quod semper obligat, & ad semper, ut cætera præcepta negativa. De priori præcepto dicit Scriptura ad Rom. 10. *Corde creditur ad justitiam, ore autem confessio fit ad salutem*. Et S. Aug. l. de Fide & Symb. c. 1. *Fides officium à nobis exigit, & cordis & linguae*. De posteriori autem dicit Scriptura Lucæ 9. *Qui me erubuerit, hunc Filius hominis erubescet, cum venerit in Majestate sua*. Hinc, hoc negativum externæ fidei præceptum obligat etiam cum periculo vitæ, cum obliget pro semper, adeò ut martyres potius elegerint mortem, quam vel apparenter fidem negare. Ex quo ulterius colligi potest, quâ poenâ digni sunt, qui alio motivo minori v. g. propter officium, bona temporalia, fidem abnegant aut perversam simulant. Ratio hujus ex eo desumi potest, quod sit summè irreverens, quod servus erubescat confiteri Dominum, creatura creatorem, à quo totum habet, quodcumque habet: Qui se erubescensem, meritò quoque erubescet Dominus.

Censetur autem, ut ait S. Aug. Tract. 103. in Joan. *se esse Christianum, Pa-* non solum abnegare Christum, qui dicit eum *pistam,* non *se esse,* nosse Christum, sed ille etiam, qui cum sit, negat

se esse Christianum. Hoc enim casu, censetur talis negare se subesse Christo, ut suo capiti, & consequenter eundem censetur erubescere. Aliud esset si foret in illis circumstantiis, in quibus vox *Christianus*, *Papista*, &c. Non significaret subjectionem religionis Christo aut Papæ, sed solum civilem, puta nationem aut exercitum, quo casu hoc negando, non censeretur erubescere Christum, sed solum nationem aut exercitum.

Negans se esse religiosum. Quicumque autem se negat esse Sacerdotem, Religiosum, &c. Non censetur abnegare fidem, sed solummodò statum Sacerdotis, Religiosi, cum qua negatione Fides Christiana opumè consistit, ut sit in Laico. Erratamen mendacium officiosum desit, nisi adsint circumstantiæ tales, ratione quarum oriretur ex tali abnegatione scandalum, damnum aut aliud inconveniens graviter perniciosum. Etsi autem aliquando persecutio gentilium acriùs oppugnarit Ecclesiæ rectores, puta Episcopos, Sacerdotes, &c. Qui mori elegerunt potius, quam Sacerdotium negare, &c. Nihil dictis obstat: Cùm sit laudabile, etiam pro veritate mortem oppetere; deinde aliquando tales circumstantiæ occurrere potuerunt, ut censerentur fidem abjurasse, negando se Sacerdotes, quod non semper necessariò evenit cùm sana fides cum abnegatione statûs Religiosi, Sacerdotalis, rectè possit consistere.

Non possumus erubescere si deno. Dicendum 2. sicut non licet externè fidem negare, ita nec eandem ita simulare, ut moraliter loquendo censeatur quis fidem erubescere. Ratio est, quia præceptum non negandi fidem, non tantum obligat ne verè & exterius fidem negemus, sed etiam ne illud fiat secundum apparentiam externam. Hinc etiam Ecclesia graviter punivit libellaticos, idest qui à Magistratu emebant libellum, quo dicebatur eos fidem abjurasse & Cæsari satisfecisse, ne ulterius ad fidei abjurationem compellerentur. Hinc rursus milites illi apud Euseb. l. 8. c. 3. sollicitati, ut saltem finge-

fingerent se aliquid agere in honorem Idoli, liberè dixerunt, *Nec sacrificavi, nec sacrificabo*: Hoc est, nec agam aut fingam me sacrificare. Sicut ergo æqualiter noceo alterius famæ, sive apertè, sive solum simulatè alteri detrahā, ita etiā æqualiter noceo divinæ auctoritati, sive apertè, sive solum quoad externam apparentiam fidem divinam abnegem.

Unde & condemnavit hanc Sanctiss. P. Innoc. XI. *Si à potestate publica quis interrogetur, fidem ingenuè confiteri, ut Deo & Fidei gloriosum consulo, tacere ut peccaminosum per se non damno.*

Objicies 4. Reg. 10. laudatur Jehu, qui ut deciperet Sacerdotes Baäl, dixit se velle colere Baäl. Item Apost. 1. cor. 9. dixit se factum Judæis tamquam Judæum. Resp. Laudatur Jehu quòd jussu Domini deleverit domum Achab & Sacerdotes Baäl: Non item quòd voluerit colere Baäl, in quo peccavit. Apostolus autem factus est Judæis tamquam Judæus, imò omnibus omnia, *Non mentientis astu, sed compatiētis affectu*, ut ait D. Aug. Epist. ad Hieron. *Nec simulatione fallaciæ, sed compassione misericordiæ. Dicit enim, quis infirmatur & ego non infirmor? &c.*

Ex dictis colligi potest, non esse licitum uti verbis æquivocis, quæ obvio sensu fidèi negationem aut erubescētiā significant: Non esse licitum, fingere se dubitare de vera fide: Non esse licitum adhibere talia externa signa quæcumque, quæ falsa fidei professionem aut veræ fidèi abnegationem significant. Nam ut ait S. Amb. l. 10. in Lucam de negatione Petri: *Non satis est involuta confessio: Et quid prodest verba (signa, &c.) involvere, quando videri vis desinasse?* Aliud est, si ejusmodi signa v. g. vestes, &c. Non essent distinctiva fidei qua talia, sed solum distinctiva nationis, quo casu adhibendo illa signa, non tam alterius fidem, quam nationem censeremur profiteri. Varia huc concernentia videri possunt c. 4. de communicatione Catholicorum cum Hæreticis. sect. 2.

Non licet uti verbis ambiguis qua obvio sensu fidèi negationem aut ejus erubescētiā significant.

*An liceat
Catholicis
aliquid
solvere ha-
reticis, ne
disturban-
tur.*

Dicendum 3. Licitum esse in partibus Hæreticis aliquam pecuniæ summam solvere Hæreticis, ut quietè possint Catholici res divinas peragere. Contra illud olim valde debachatus est Tertullianus jam in præceptis actus, accusans Catholicos, qui oblatâ pecuniâ vexationem redimebant, prout colligitur ex ejus libro de fugâ in persecut. c. 12. & 13. id tamen licitum esse constat exemplo Jasonis act. 17. & aliorum Apostoli Pauli Discipulorum, qui datâ pecuniæ summâ sese redimebant à vexatione gentilium & Judæorum Thessalonicensium, secundum quod dicitur prov. 13. *Pretium redemptionis animæ hominis, propriæ divitiæ.*

Objici tamen posset, quòd Libellatici ab Ecclesia sint damnati, idque ex eo quòd solutâ certâ pecuniæ summâ libellos securitatis à Magistratu impetrarent. Resp. Tamen magnam inter illos & hunc casum esse disparitatem. 1. enim Libellatici vel per se vel per alios privatim fidem abnegabant. 2. obtento tali libello habebantur tamquam qui fidem abnegassent, adeoque ratione scandali id Ecclesia justè prohibuit, uti etiam ob negatam privatim fidem. Hoc casu verò, nulla est fidei negatio, nec scandali occasio, sed sola vexæ redemptio.

*Quando ob-
liget præ-
ceptum fi-
dei affir-
mativum.*

Dicendum 4. Præceptum affirmativum fidei tunc obligat, *Quando per ejus omissionem, subtraheretur honor Deo debitus, & etiam utilitas proximo impendenda: Puta si quis interrogatus de fide taceret, & ex hoc crederetur, vel quòd non haberet fidem, vel quòd fides non esset vera, vel alii per ejus taciurnitatem averterentur à fide.* Ita d. Th. 2. 2. q. 3. a. 2. Quando nam autem illæ circumstantiæ concurrant, morali judicio debet judicari. Per se tamen hoc præceptum obligat, quando quis ad visibilem Ecclesiam venit, quando ejus fidem visibiliter profiteri debet. Item quando fides in aliis periclitatur, & confessione fidei periculum illud extinguere possum, tunc etenim ommissio confessionis fidei, contineret gravem inhonorationem fidei & authoris ejusdem. Hinc rogati à tyranno publicam authoritatem

tem obtinente de fide nostra, apertè eam profiteri constringimur, adeò ut silentium hîc abnegationi æquivaleat. Aliud est, si talis rogans foret privatus, cui responsio nulla debetur, nec ex omissione ejus, censeamur fidem ab negare, aut etiam dicendo, *quid ad te? Nihil tua interest*, &c. Et si autem publica tyranni potestas non se extendat ad res fidei indagandas, tamen eâ positâ, exsurgit Lex Christi, ut cum steterimus ante Reges & præfides, liberè Christum confiteamur, nec quidquam faciamus, unde Christum censeamur morali judicio erubescere: Quale præceptum, positiâ privatâ rogatione, non agnoscit Ecclesiæ sensus aut fidelium praxis.

Dicendum 5. Confessio externæ fidei, obligat ulterius, ratione statûs, aut virtutis. Ratione statûs juxta *Obligatus quis fidem professus ratione statûs.* Trid. Sess. 24. reform. c. 12. Tenentur eam profiteri, qui provisi sunt de Canonicatibus, dignitatibus Ecclesiasticis in Cathedrali Ecclesia, uti & provisi de beneficiis curam animarum annexam habentibus. Item, qui in publica Academia aut Religione in Magistros & Professores sunt eligendi, qui Medicinam, jus civile aut Canonicum publicè vel privatim doceant, uti statuit Pius V. quam tamen constitutionem non esse ubivis receptam docet Sanchez & testatur experientia.

Ratione virtutis, obligat externa fidei professio, ratione obedientiæ in dicto casu, ratione veracitatis, si sit periculum mendacii, &c.

Dicendum 6. Licitum aliquando est sine periculo abnegationis fidei in persecutione fugere, aliquando illicitum. Licitum erit, si ex remansione non sequeretur notabile commodum fidei aut proximis, & è-*Quando liceat in persecutione fugere.* contra ex morte, quæ timetur, sequeretur notabile detrimentum. Quo casu, ex lege Christiana Matth. 10. fugiendum est de una civitate ad aliam: uti & Apostolus in sporta demissus effugit manus Judæorum, ipse Christus, Herodis, &c. Hoc tamen notandum est ex Eusebio l. 5. Histor. c. 15. ipsos Marcioni-

stas eisque cognatos Montanistas, qui docebant illicitum esse tempore persecutionis fugere, ipso illorum hæresis exordio, ne vel levem persecutionem Christianitatis causâ sustulisse, sed vel ingenti pecuniæ vitam redemisse, vel fugâ sibi consuluisse, adeò ut quod in Catholicis condemnabant, in se ipsis admittebant.

Si verò præsentia alicujus sit necessaria fidei & religioni conservandæ, aut proximis adjuvandis, tenetur quispiam remanere in persecutione, nisi aliter possit periculum ejus compensare. Sic Pastor qui solus residet, nec alius haberi posset, tenetur in persecutione remanere; nisi ex ejus morte gravius timeretur incommodum.

Indubio autem, anteneatur aliquis fugere an remanere, prudenti consilio opus est, potius alieno quam proprio, cum amor proprius, proprium consilium in similibus soleat depravare.

S E C T I O VII.

Quinam habeant veram fidem.

*Subjuncta
fidei An-
geli, Ada-
mans.*

DICENDUM primò, Angeli in via, item protoparentes in statu innocentie habuerunt veram fidem. Cum enim erant viatores, debebant ambulare per fidem in ænigmate, debebant accedendo ad Deum credere, quia est, &c. Deinde, *sine fide impossibile est placere Deo*: ad Heb. 11. unde S. Amb. l. 3. Epist. 33. ita Adamum compellat: *Agnoscis te esse nudum, quia bona indumenta fidei perdidisti*. Denique, etsi alibi S. Augustinus dicat Angelos à Domino numquam fuisse peregrinos, solum vult, Angelos non esse Peregrinos per modum exilii, uti nos quamdiu sumus in corpore: quamdiu tamen ad patriam beatitudinis admissi non erant, Peregrinabantur & Angeli.

Dicem-

Dicendum 2. Nihil obstat ; quominus in beatis *Beati.* sit vera Fides. Potest enim Fides consistere cum clara visione , & cum evidentia attestantis. Sic juxta multos Fides mansit in Paulo & Moyse videntibus clarè Deum. Verum quidem est , quòd in patria evacuabitur id quod ex parte est ; Quod ibidem apparebit in specie, quòd hìc in ænigmate, &c. Tamen cum etiam certum sit , quòd beati Deum non comprehendant, possunt credere illud , quod ipsos semper latet , nec clarè patet. Deinde corporis resurrectionem futuram credere possunt propter autoritatem Dei revelantis quæ res ipsis de se obscura est , etsi revelans ejusque infallibilitas ipsis clarè pateat.

Animæ quoque in purgatorio existentes habent ve- *Anima in Purgatorio.* ram Fidem , cum adhuc sint peregrini , credentes se per Deum liberandas , ex qua Fide habent tolerantiam passionum, spem beatitudinis, &c. Dicuntur tamen illæ non esse viatores , eo quòd sint extra statum proprium meriti & demeriti.

Dicendum 3. Dæmones & damnati non habent *Dæmones.* Fidem. Ratio est , quòd propter continuam voluntatis obdurationem & obstinationem , voluntas eorum affici piè nequeat divinæ veritati , quam abominantur , quæ tamen affectio ad fidem essentialiter est requisita. *Credunt* tamen & *contremiscunt* ait , Jacob. 2. non quòd verà fide credant & intellectum suum in obsequium fidei captivent , sed ut ait S. Aug. l. 9. de civit. c. 21. cognoscunt res fidei , *non lumine sed dei , sed efficaciam signorum.*

S E C T I O VIII.

An qui discredet uni articulo fidei , discredat omnibus alijs.

D I C E N D U M primò , sicuti in peccatoribus habi- *Potest manere fides imperfecta in eo , qui* tus charitatis perfectæ extinguitur per peccatum mortale , etsi adhuc in iisdem remanere possit actus *charita-* *mus atia-*

*culo dis-
quedit.*

charitatis imperfectæ: ita etiam, qui discrediti uni articulo fidei satis proposito, quamvis aliis credat, et si perdat habitum fidei perfectæ, retinere tamen potest veram fidem circa alia objecta, saltem imperfectam. Hinc Judæus, qui ante ortum Christi credidit Deum esse unum, adveniente Christo, quem recipere non vult, retinet illam fidem, cum eodem motivo & eadem firmitate illa credere pergat. Unde de tali dicit S. Aug. cont. Petilianum c. 5. *tene fidem resurrectionis mortuorum, sicut tenebas: sed crede jam Christum resurrexisse à mortuis, quod non credebas.*

*Vnde hoc
possit eve-
nire.*

Dicendum 2. Quod salvâ fide imperfectâ possit quis verâ fide credere uni articulo fidei & non alteri, fieri potest ex eo, quod quis bene afficiatur primæ veritati in una materia & non in alia; item quod alicui in una materia proponantur majora argumenta & efficaciora signa credibilitatis, quam in alia: item quod quis vincatur ab affectu erga divinam veritatem in una materia & non vincatur ab eadem in altera, &c.

*Talistas-
men non
est fidelis.*

Dicendum 3. Talis tamen, etsi possit retinere veram fidem, etsi imperfectam, non tamen ideò denominari potest aut dici absolute fidelis. Ratio est, quod esse fidelem, sit bonum aliquod, quod oritur ex integra causa, adeò ut debeat credere omnibus punctis fidei. Poterit tamen dici esse fidelis respectu ejus puncti, quod credit.

Conc. Trid

Quando igitur docet Conc. Trid Sess. 6. c. 15. Per infidelitatem amitti fidem, solum vult, uti addit, quod sicut per quodlibet peccatum mortale amittitur perfecta Charitas, non tamen omnis alia etiam imperfecta, ita per infidelitatem amittatur perfecta fides, etsi non continuo amittatur omnis alia. Etsi fatendum sit sæpè in talibus omnem fidem amitti, dum qui pertinaciter non vult se subicere primæ veritati in una materia, non vult se quoque illi subicere in alia, dum ubique eadem motiva credendi concurrunt

Dicen-

Dicendum 4. Etsi hæretici habitum fidei retinere non possint, nihil tamen implicat aut obstat quominus, aliquando gratiâ divinâ accendatur eorum voluntas piè circa divinam veracitatem, & intellectus eorum illustretur, adeò ut aliquando imperfectæ fidei actus elicere possint. Colligi potest hujus ratio ex hucusque in hac sectione dictis. Plura huc concernentia dabimus in materiâ de infidelitate, hæresi, &c.

*Hæretici
possunt ali-
quando
bene affic-
tari.*

000070 000000 000000 000000 000000 000000 000000 000000
000000 000000 000000 000000 000000 000000 000000 000000

CAPUT TERTIUM.

De Romano Pontifice.

SECTIO PRIMA.

De Potestate Romani Pontificis.

DICENDUM primò, cùm Christus Ecclesiam suam N. T. fundasset, nec eidem corporali præsentia assistere & eam regere semper posset, visibilem in terris sui officii Vicarium elegit cui & Ecclesiam suam commisit gubernandam. Primus hujus muneris constitutus est à Christo S. Petrus, dum eidem à Domino dictum est Matth. 16. *Tu es Petrus, & super hanc Petram edificabo Ecclesiam meam: Et tibi dabo Claves Regni Cælorum*, &c. Ubi Petrus ponitur Ecclesiæ caput & fundamentum, & simul Ecclesiæ claves offeruntur, quod est signum traditæ plenæ potestatis. Unde sicuti Christus hic in terris erat summus Ecclesiæ Princeps & rector, juxta illud Joan. 13. *Vocatis me Magister & Domine, & benedicitis: Sum etenim*: Ita Vicarius Ecclesiæ suæ Constitutus erat Petrus Ecclesiæ Princeps & rector. Hoc enim exigit regimen Monarchicum, quale est regimen Ecclesiæ. Idem

*Rom. Pon-
tiffex Chris-
tus in Ter-
ris Vica-
rius, pri-
mus co-
rum S. Pe-
trus.*

patet ex Joan 21. ubi Christus Petro dicit : *Pasce oves meas* : ubi & majorem à Petro exigit dilectionem , quam ab aliis Apostolis.

*Alii A-
postolisunt
suo modo
funda-
mentum
Ecclesia.*

Dicendum 2. Alii Apostoli rectè dicuntur fundamentum Ecclesiæ , cum etiam suo modo Ecclesiæ fundamenta jecerint , Ecclesias suas particulares erexerint , omnes ad ejusdem fidei propagationem sint coöperati , &c. Verùm potestas hæc non erat summa & universalis , ut erat potestas Petri , sed solum qualis datur Legatis Plenipotentariis , & dependenter à superiori , scilicet Petro. Sic etiam S. Cyprianus l. 2. de unit. Eccles. rectè dicit : *Hoc erant ceteri Apostoli , quod erat Petrus , pari consortio præditi honoris & potestatis* , Eo quod omnes pares erant in ratione Apostolatûs , non item in omni alia. Sic quoque dicitur Christus ipse Fundamentum Ecclesiæ juxta illud 1. Cor. 3. *Fundamentum nemo aliud potest ponere præter id quod positum est , quod est Christus* JESUS : Quatenus est Fundamentum Ecclesiæ primum ac principale , quod Ecclesiam fundat effusione Sanguinis sui , morte & Passione.

Neque huic S. Petri primatui umquam contrarii fuerunt SS. PP. in quibus tamen hoc notandum est , eos aliquando cautè esse Legendos in hæc materiâ , dum aliquando super omnes Apostolos Ecclesiam dicunt esse fundatam : omnibus Ecclesiæ claves esse datas , &c. Quo loquendi modo nihil aliud innuunt , quam omnes Apostolos ad foundationem Ecclesiæ suo modo collaborasse , etsi Ecclesiæ regendæ primatus Soli Petro sit à Deo collatus. Ita intelligi potest S. Hieron. l. 1. contra Jovin. ubi ita scribit : *at dicis : Super Petrum fundatur Ecclesia , licet id ipsum in alio loco super omnes Apostolos fiat : Et cuncti Claves Regni Cælorum accipiant , & ex aquo super omnes Ecclesiæ fortitudo solidetur.*

*Data sunt
Petro Cla-
ves Eccle-
siae immo-
bilis.*

Dicendum 3. Petro immediatè datæ sunt Claves Ecclesiæ à Christo , non item mediatè puta per Ecclesiam. Clarè illud patet ex hoc Matth. 16. *Tu es Petrus ,*

¶ *Super hanc Petram edificabo Ecclesiam meam* : Ubi vox Petrus & Petra sumitur pro eodem : Ridiculum enim esset dicere , *Tu es Petrus , & super hanc Petram* (Ecclesiam) *edificabo Ecclesiam meam*. Deinde , dicitur Petro : *Pasce oves meas* , &c. Ex quibus clarè patet , Petrum ab ipso Christo immediatè accepisse suam potestatem.

Objicies S. Augustinum , qui alibi dicit , & maximè l. cont. Donatistas , Christum dedisse Claves suas Ecclesiæ. Resp. Illis locis non agit S. Doctor de clavibus jurisdictionis , sed coöperationis & impetrationis ; tradit enim , quòd in Sacramentis non tantùm concurrat Christus Dominus & dispositio suscipientis , sed & merita sanctorum , eorum orationes , &c. Unde & addit , tales claves , dari solis justis , non raptoribus & fæneratoribus , ubi tamen claves jurisdictionis dari possint non justis. Clarè enim alibi contrarium docet , & signanter Serm. 26. de divers. ubi ait : *Petrus multis locis Scripturarum apparet , quòd personam gesserit Ecclesiæ , maximè illo in loco , ubi dictum est : Tibi dabo Claves Regni Cælorum , numquid istas Claves Petrus accepit ? & Paulus non accepit & ceteri Apostoli , aut non sunt istæ in Ecclesia claves , ubi peccata quotidie dimittuntur ? Sed quoniam in significatione personam gestabat Ecclesiæ , quòd illi uni datum est , Ecclesiæ datum est*. Ubi clarè mentem suam aperit S. Doctor si alibi contrarium sentire videatur , scilicèt , quòd dicantur Claves dari Ecclesiæ , quando dantur Petro , dum dicit : *Quòd illi uni datum est , Ecclesiæ datum est*.

Dicendum 4. Potestas hæc Petro collata , derivatur ad omnes Romanos Pontifices : Cùm enim Ecclesia Christi sit duratura in finem sæculi , sequitur , quòd visibile caput & Doctor semper agnoscendus sit , qui eandem regat & gubernet. Derivationem hanc agnoverunt à primis Ecclesiæ temporibus Sancti Patres unanimiter , adeò ut S. Amb. Epist. ad Timoth. dicat : *Domus Dei est Ecclesia , cujus hodie rector est Parmasus*. Vide S. Bern. ad Eugenium. Deinde potestas clavium

*Claves
impetra-
tionis &
jurisdicti-
onis.*

*Potestas
Petro da-
ta tran-
scendit ad
Romanos
Pontifices.*

clavium fuit privilegium reale , quod non expirat morte privilegiati. Adde , quòd eadem ratio , quare in initio debuerit Ecclesia habere rectorem universalem , etiamnum militet , imò eo magis , quo plures sunt fideles , neque cessare possit Pastoris officium , quamdiu sunt oves.

Quòd autem potestas illa ad solum Pontificem sive Romanum Episcopum derivetur , abundè patet , ex summa jurisdictione ejusdem in alios Episcopos , in totum Christianum orbem , quòd ubivis Vicarios constituat , &c. Adeò ut nullus umquam ausus sit assumere titulum Successoris Petri. Potest quidem Episcopus Antioch. dici Petri successor , sed solum quoad particularem illam Cathedram , & particularem potestatem illi annexam , non itidem , quoad universalem Ecclesiæ universalis jurisdictionem. Denique quando D. Greg. noluit se appellari *Episcopum universalem* , dicens nomen illud esse *prophanum* , solum abjicit , se ita esse Episcopum universalem , ut alii Episcopi non maneant quoque veri Episcopi , quod alii sibi imaginabantur.

Petrus Ecclesiam suam fundavit Romanam.

Dicendum 5. Quòd S. Petrus Romæ Ecclesiam fundaverit ut universalis ejusdem rector & fundamentum , probat constantissima omnium traditio. Ipse enim Petrus 1. Epist. 4. ita scribit : *Salutat vos Ecclesia , quæ est in Babylone collecta*. Ad quod D. Hieron. de viris illust. de Marco. *Petrus* , ait , *in Epistola prima sub nomine Babylonis figuratè Romam significans* , &c. Ex quo insulsè inferunt Hæretici è Babylone , idest Ecclesia Romana discedendum esse : Aliud enim est , Romana civitas , aliud Romana Ecclesia : Illa , cum omnibus dominaretur gentibus , omnium serviebat erroribus ; hæc omnibus gentibus prædominans , omnium errores rejicit , & in obscuro lucet supra candelabrum posita. Deinde , Petrum Romæ obiisse clarissimè patet , ex omnium Historicorum & SS. PP. consensu : Ex sepulchro ejusdem Romæ existente , ad quod omni tempore peregrinationes usitatissimæ
idem

Idem declarant. Denique, ut ait D. Hieron. l. de viris illust. *Petrus Romæ 25. annis cathedram Sacerdotalem tenuit.*

Dicendum 6. Ratione hujus potestatis, potest ex toto tetrarum orbe ad Romanum Pontificem appellari. Probat id perpetua Ecclesiæ praxis. Sic S. Athan. Alexand. & Paulus Constantin. Episcopi, à Concilio depositi, ad Julium Pont. appellaverunt, & suæ sedi restituti sunt, uti refert Sozom. l. 3. c. 7. idem clare patet ex variis similibus, quos referunt controvertistæ. Porro, etsi maximè congruat, ut negotia, ubi oriuntur, ibi & finiantur, varia tamen concurrere possunt, quæ contrarium suadeant; imò ad illud idem necessariò impellunt, ut puta alicujus judicis suspecta ignorantia, malitia, insufficientia, &c. Neque appellatio illa ullis incommodis est abnoxia, cum optimè illis obviari soleat, delegando ubique terrarum varios, qui de re controversa informantur, & Pontificem informant, uti solet in omnibus appellationibus, in quibus appellatur ad tribunaia longiùs distita: Etsi jure merito frequentior similis appellationis usus aut potius abusus à S. Bernardo taxetur l. 3. de consid. c. 2.

Licet ex toto orbe appellare ad Pontificem.

SECTION II.

De infallibilitate Pontificis.

SUPPONENDUM primò, Pontificem considerari posse ut privatam personam aut particularem Doctorem: Alio modo, considerari potest ut est Ecclesiæ Doctor & rector universalis, dum aliquid decernit aut definit.

Supponendum 2. Alias esse quæstiones fidei, id est quæ ad fidem spectant; alias esse quæstiones morum, quibus mores Christiano necessarij definiuntur, aut aliquid eosdem concernens. Aliæ rursum sunt

Quæstiones variae.

sunt quæstiones facti, ubi de facto quæritur & decernitur. Aliæ denique quæstiones mediæ inter quæstiones fidei & morum, qualis est Canonizatio SS. His positis.

Ut Caput Ecclesiæ sic Pontifex est infallibilis. Dicendum 1. Romanum Pontificem definientem aliqua ut Ecclesiæ Caput, esse prorsus infallibilem. Cum enim ut talis sit Ecclesiæ fundamentum, si errare contingeret, corrueret ædificium tali fundamento superpositum, cujustamen contrarium promisit Salvator, & pro quo rogavit, ne deficiat fides Ecclesiæ Capitis. Hoc autem quam maximè verum est, in discernendis quæstionibus fidei, & morum, in quibus Pontificem Romanum Spiritus Sanctus docuit omnem veritatem.

Ut persona privata sic potest errare. Dicendum 2. Potest Romanus Pontifex errare ut privatus Doctor in quibusvis quæstionibus, sive juris, sive facti. Sic Joannes XXI. erravit in docendo, animas non visuras Dei essentiam ante resurrectionem mortuorum: Cœlestinus juralicando, quòd matrimonium per hæresim dissolveretur, &c. Ut talisenim, tam est fallibilis, quam quivis alius particularis Doctor.

Quando definit ex Cathedra. Censetur autem definire aliquid ut Doctor Ecclesiæ universalis, non autem ut particularis, vel ut alii dicunt, censetur definire ex Cathedra, quando aliquid asseveranter dicit, solitâ formâ Pontifici consuetâ in definiendo: Aut etiam, quando aliquid universaliter toti Ecclesiæ proponit sequendum aut omittendum, credendum, &c. Ubi nota, non omnia illa definiri ex Cathedra, quæ principali asserto adduntur: adduntur enim aliquando tali asserto varia, quæ non sunt satis certa, imò aliquando falsa, eo quòd sint ratio principalis asserti, aut sint illa, quæ ut privatus Doctor, Pontifex proponit. Sic Nicolaus Pontif. respondens ad consulta Bulgarorum, addidit privatam suam sententiam de valore Baptismi in nomine solius Christi: Sic aliquando definitum est Angelos esse pingendos, eo quòd sint corporei, quæ ratio est clarè falsa. Di-

Dicendum 3. Potest pontifex ut talis etiam, errare in quæstionibus facti: Est sententia Catholicorum communis teste Bellarmino, Baronio, Turrecremata, & aliis. Potest autem error ille oriri ex variis capitibus. Primò, quòd ex falsis informationibus & allegationibus, ex quibus quæstio facti solùm penderet, persuadeatur Papæ aliquem esse hæreticum, qui talis non est. Sic 6. Synod. ex falsis informationibus judicavit Honorium esse Monothelitam. 2. si tali medio persuadeatur Pontifici aliquem esse Catholicum, cum sit hæreticus: Sic Zozyms erravit declarando Cælestinum & Pelagium esse viros Catholicos, eosdem persequentes Africanos Patres acerbis litteris perstringens & objurgans: Idem de aliis multis docent controversistæ, & præcipuè Bellarm. l. 4. de Pontif. c. 8.

Hanc fallibilitatem in quæstionibus facti professi sunt ipsi Romani Pontifices, uti fecit Alexander 3. in rescripto ad Archi-episc. Ravennat. capt. *Si quando de rescriptis, ubi ait: Si quando aliqua tue fraternitati dirigimus, quæ animum tuum exasperare videntur: Turbari non debes, qualitatē negotii, pro quo tibi scribitur, diligenter considerans, aut mandatum nostrum reverenter adimpleas, aut per litteras tuas, quare adimplere non possis rationabilem causam præendas: Quia patienter sustinebimus, si non feceris, quod prava nobis fuerit insinuatione suggestum.* Deinde idem constat ex retractationibus sententiarum & censurarum summorum pontificum: Sic Benedictus 2. Scripta Juliani Præfulis Toletani, quæ primùm incautiùs lecta improbavit, ut dicitur in Synodo Toletana 15. habita anno 688. postea pro Orthodoxis agnoscere non erubuit: Idem Eugenio IV. evenisse dicunt circa quasdam propositiones Abulensis sive Toftati.

Denique idem confirmat S. Aug. l. 2. de Baptismo contra Donatist. c. 5. ubi ita loquitur: *Et ipsa plenaria concilia, sæpè priora per posteriora emendant: Cum aliquo experimento aperitur, quod clausum erat, & cognoscitur.*

cognoscitur quod latebat : Hoc autem de quæstionibus facti intelligendum esse, patet ex eo quod præcipua quæstio de qua hîc agit S. Augustinus, esset hæc, an Cæcilianus libros SS. tradidisset hostibus Ecclesiæ.

infallibilis est in quæstione media, in Canonisatione SS.

Dicendum 4. Pontifex quoque infallibilis est in quæstionibus mediis inter quæstiones facti & morum, puta in canonizatione SS. beatificatione, &c. nimia enim ex fallibilitate orirentur in Ecclesia incommoda, quæ divina providentia evenire non sinet. Quid autem Canonizatio importet, videri potest de beatitudine sect. 4.

Desinant tamen alii hanc Doctrinam nostram censurare, quasi summi Pontificis authoritati inimicam, quam tamen ex animo suscipimus & veneramur. Certè vellem illud alii attendant, quod scribit Melchior Canus l. v. de locis c. 5. ubi ita ait : *Nunc illud breviter dici potest, qui summi Pontificis omne de re quacumque iudicium temerè & sine delectu defendunt, hos Sedis Apostolicæ authoritatem labefactare, non fovere : evertere, non firmare. non eget Petrus mendacio nostro, nostrâ adulatione non eget.*

SECTIO III.

An sit de Fide Innocentium XI. esse verum Pontificem.

Nullibi revelatum est Innocentium XI. esse verum Pontificem.

DICENDUM primò, non est de Fide, Innocentium XI. esse verum Pontificem. Probatur : quia non est de Fide, quòd sit baptisatus, quod requiritur, ut sit capax pontificatûs. Deinde, Deus hoc nullibi revelavit ; Denique licet de fide sit, omnem ab Ecclesia legitimè electum esse Pontificem : Non tamen de fide est, hunc hominem v. g. esse legitimè electum : Aded ut, qui negaret Innocentium XI. v. g. esse summum Pontificem, non foret hæreticus.

Di-

Dices, ergo non erit de fide, quòd aliquis ex præcedentibus Pontificibus fuërit verus Pontifex. Item quòd quando definit aliquid, sequetur illud idem non esse etiam de Fide. Resp. ad primum, Verum esse quod prætendit objectio, de S. Petro tamen constat; ad aliud Resp. hoc minimè sequi; Quamvis enim illud quod Pontifex definit, debeat credi Fide divinâ, tamen non ideò Fide divinâ credi debet, quòd illa à legitimo Pontifice sint definita: Sufficit enim ut prudenter rebus Fidei ab alio propositis verâ Fide assentiar, quòd morali certitudine sciam res illas legitimè proponi credendas: Uti fit in hoc casu, cum sit moraliter certum, hunc Pontificem esse legitimum, dum ab universali Ecclesia ut talis recipitur, & cujus contrarium impedire spectat ad divinam providentiam: Quæ certitudo, non est certitudo Fidei, etsi sufficiat, ut prudenti & firmo assensu fidei credamus rebus Fidei à Pontifice propositis ad credendum.

Dices 2. varia Concilia generalia agnoverunt Pontifices pro veris Pontificibus, ergo. Resp. Aliud est *Aliud est agnoscere, aliud definire.* agnoscere, aliud definire: Agnoscunt etiam omnes fideles Innocentium XI. esse verum Pontificem, etsi illud non credant Fide divinâ. Agnoverunt ergo Concilia illa varios Pontifices esse veros Pontifices, non itidem definierunt.

Dicendum 2. Quòd Concilium Tridentinum v. g. *Non est de fide quod Concilium Tridentinum sit verum Concilium.* fuerit legitimum, non est de Fide: Ita docet Bellarm. de Conc. l. 2. c. 9. Quamvis sit moraliter certum, quòd sit legitimum, dum ab universali Pontifice fuit indictum, ex omni parte Orbis Christiani Catholicæ Episcopi convenerunt, &c. addita sint, quæ ad legitimum Concilium requiruntur: quæ applicata fuisse constat nobis morali certitudine, quæ sufficit, ut res fidei ab illo Concilio definitas fide divinâ credamus, & ut credamus res ab illo definitas à Deo aliquando esse revelatas.

Dicendum 3. etsi non sit de Fide divinâ Concilium *Est tamen moraliter & summè certum.* certum.

lium aliquod œcumenicum aut Romanum Pontificem esse legitimum, tamen summâ certitudine illud est tenendum, dum moraliter constat, illa ut talia ab universali Ecclesia recipi. Credendum enim est, illud spectare ad Providentiam divinam, ne rector Ecclesiæ illegitimus illam regat, ex quo innumera & gravissima Ecclesiæ orirentur incommoda. Dixi dum moraliter constat, &c. Quia aliquando fieri posset, quòd Pontifex aliquis vi vel fraude esset intrusus, ut constitit de Petro Leonis sæculo undecimo. ad quem deponendum cum S. Bernardo S. P. N. Norbertus Romam est acersitus.

S E C T I O I V.

An Pontifex possit esse hæreticus?

Non potest Pontifex ut persona publica esse Hæreticus.

Benè tamen ut est privata.

D ICENDUM primò, Pontifex ut talis, sive ut est universalis Ecclesiæ rector, non potest deficere à Fide, cum ut talis ne quidem possit errare. Ut tamen est persona privata, verius videtur, quòd possit à Fide deficere, etsi contrarium piâ probabilitate gaudeat. Probatur prius, ex actis Episcoporum & aliorum circa damnationem Honorii, qui indubiè supponebant Pontificem esse posse hæreticum. Hinc dicit Innocentius III. Serm. 2. de consecrat: Papæ: propter solum peccatum, quod in Fide committitur, possem ab Ecclesia judicari. Idem dicit Adrianus in Synodo 8. act. 3. capt. Si Papæ dist. 40. ubi ait: Papa à nemine est judicandus, nisi deprehendatur à Fide devius.

Probatur ulteriùs: Quia eo non obstante, verosimile apparet, quòd Christus rogaverit non solum pro Petro ut personâ privatâ, ut non deficiat ejus fides, sed pro omnibus ejusdem successoribus ut talibus, quod etiam ad providentiam divinam videtur attinere.

Dicen-

Dicendum 2. Nullus Pontifex, etiam ut privata *Nullus Pontifex a fide defecit.* persona defecit à fide. Cum enim hæc sit quæstio facti, ab aliis probandum est contrarium, cum quilibet debeat præsumi bonus, donec probetur malus. Unde refutanda sunt quæ de aliquibus Pontificibus opponunt adversarii.

1. De S. Petro, volunt eundem à fide defecisse, S. Petrus, dum Christum abnegavit.

2. Honorius defecit ad Monothelitas statuentes in Christo unicam voluntatem. *Honorius.*

3. Marcellinus idolis sacrificavit, ut de eodem legit breviarum. *Marcellinus.*

4. Formosus & alii erraverunt à fide, putantes ordinatos à Pontifice Simoniaco esse reordinandos. *Formosus.*

Ad Hæc Resp. S. Petrum ab negasse Christum metu mortis, retentâ tamen fide in corde, imò etiam imperfectâ charitate, ut docet S. Augustinus.

Ad 2. Resp. Honorium à fide non defecisse: cum solummodò pacis studio dixerit abstinendum esse à voce operationis unius vel duarum in Christo voluntatum. Deinde juxta alios solummodò negavit in Christo duas voluntates planè & efficaciter contrarias. Unde Ecclesia semper perseveravit in communicatione cum Honorio, nec umquam ab obedientia ejus se subtraxit. Hinc quando in sexta Synodo indicitur anathema Honorio, quod autoritate Agathonis Pont. factum esse constat, nihil omninò obest: Tum quòd in eadem Synodo expressè doceat contrarium Agatho Pontifex, dum dicit: *Apostolica Christi Ecclesia, per Dei omnipotentis gratiam, numquam errasse probabitur, nec hæreticis novitatibus depravata succubuit, secundum salvatoris pollicitationem: Ego pro te rogavi Petre, ut non deficiat fides tua.* Tum etiam, quòd solum permiserit Agatho anathema dici & continuari à legatis suis, si aliter Græcos ad concordiam revocare non possent.

Ad 3. Resp. Juxta nonnullos, Marcellinum in corde Fidem reservasse. Venim melius docent alii, crimen illud à Donauistis Marcellino fuisse injuriosè &

falsò impositum quod probari potest ex S. Aug. l. de Baptif. c. 16. ubi ait : *Quid jam opus est, ut Episcoporum Romanæ Ecclesiæ, quos incredibilibus Calumniis insectatus est (Petilianus) objecta ab eo crimina diluamus? Marcellinus & Presbyteri ejus, &c. traditionis codicum divinorum & iherusalemensis ab eo crimine arguuntur, sed numquid ideo convincuntur, aut convitti aliquâ documentorum firmitate monstrantur? Ipse sacrilegos fuisse dicit: Ego innocentes fuisse respondeo, qui laborent probare defensionem meam, cum nec ille tenuiter probare conatus sit accusationem suam.*

Ad 4. Resp. Formosum & alios hîc non errasse in fide, docendo solum hujusmodi ordinationes esse nullas, quantum ad jus exercendi tales functiones ordinationi proprias. Quod si reordinarint aliquos, reordinatio illa non fuit Sacramentalis, sed solum ceremonialis, idest restitutio potestatis, cum character maneat etiam in degradatis: Possunt enim omnia ad Sacramentum requisita adhiberi, puta materia & forma, sic ut ex intentione Ecclesiæ & ministri Sacramentum non conficiatur, sed solum alia ceremonia. Sic conjuges possunt repetere essentialia Sacramenti Matrimonii coram Parocho & testibus, nemo tamen dicet, quod repetitio illa sit Sacramentum. Idem est in renovatione professionis Religiosæ, quæ si fiat de novo debitâ formâ, erit merè ceremonialis.

Alios Pontificum aliorum errores objiciunt adversarii, qui vel errarunt ut persona privata, nec tamen à fide deflexerunt, vel erroris injuriosè & falsò sunt accusati ab hæreticis: De quorum vindictis, videri potest Bellarminus & alii controversistæ.

SECTIO V.

De Conciliis.

*Concilium
Generale
Provincia
le, &c.*

DICENDUM primò, Concilium est congregatio præsulum Ecclesiasticorum legitima autoritate convocatorum, ad res fidei graviores disjudicandas.

Aliud

Aliud est *œcumenicum* sive *generale*, ubi ex toto orbe Episcopi congregantur, Pontifice per se vel per legatum præsidente. Aliud est *nationale*, ubi Episcopi regionis alicujus à Patriarcha vel primatu convocantur. Aliud est *provinciale*, ubi Episcopi & Prælati Diœcesis alicujus convocantur ab unius Provinciæ Metropolitano. Denique aliud est *Diœcesanum*, ubi Prælati unius Diœcesis ab Episcopo ejusdem convocantur, & concilium illud vocari solet *Synodus*.

Dicendum 2. Ad Concilium generale non requiritur, ut omnes fideles nec ut omnes Episcopi totius orbis Christiani cò conveniant & congregentur, cum hoc sit moraliter impossibile: Etsi Episcopi omnes ad illud obligentur ex juramento, & convenire debeant, nisi sint legitimè impediti. Nullus quoque Laïcorum hic convenire necessariò debet, ut judicet de rebus Concilii, etsi aliquando convocati sint, ad interponendam suam auctoritatem, ad res fidei propagandas, &c. Sufficit ergo ad Concilium generale, quòd saltem aliqui Episcopi ex majori parte orbis Christiani convocentur, adeò ut convocatio sit tam generalis, ut omnibus Christianorum, saltem majoribus innotescat, adeòque censeatur Congregatio universalis Ecclesiæ.

Dicendum 3. Pontifex debet Concilia generalia convocare, authoritativè, cum jurisdictione in Episcopos, & omnes qui convocantur: Quod addo, quia subinde Imperatores convocarunt Concilia generalia, ad idem cohortando, & adjuvando executionem Conciliorum, non tamen per modum jurisdictionis in eos, qui convocantur: sicut enim Ecclesiastici aliquando compelli possunt brachio sæculari, ita etiam ad Concilia celebranda eodem brachio convocari & compelli possunt Episcopi, sic tamen, ut tota illa jurisdictio ab Ecclesia brachium sæculare adhibente proveniat.

Dicendum 4. Sicuti Pontificis est convocare Concilia generalia, sic ejusdem est eisdem præsidere, sive

Quomodo omnes Ecclesia præfules convocari debent ad Conc. Generale.

Pontificis est Concilia Generalia convocare.

Item isdem præsidere.

per se, sive per suos Legatos. Ratio est, quòd ipse solus sit caput Ecclesiæ, in Concilio congregatæ, & in convocatos habeat authoritatem & jurisdictionem. Leguntur tamen aliquando etiam præfuisse Imperatores, non authoritativè, sed solùm adjuvando Concilia, interponendo suam authoritatem, &c.

Concilia Generalia infallibilia. Dicendum 5, Concilia generalia & particularia à Pontifice confirmata, sunt infallibilis veritatis. Ratio est, quòd Pontifex ut universalis Ecclesiæ rector in decernendis rebus fidei & morum, sit infallibilis. Hinc in generali Concilio attribuitur decisio rerum fidei, spiritui Sancto, dum dicunt, *visum est Spiritui Sancto & nobis.*

Si verò Pontifex non confirmet Concilium etsi per Legatos à se instructos Pontifex præsideat, non erit infallibilis veritatis. Dicunt tamen alii: Si tale Concilium non esset infallibile, non apparet quare Pontifex non deberet personaliter præsidere. Deinde, Concilia illa etiam ante confirmationem Papæ definiunt res fidei, dicunt anathema, &c. Unde etiam vocantur *æcumenica*, sive generalia Concilia. Ad quæ tamen respondetur, non requiri ad Concilium generale personalem Papæ præsidendam, sed omnia, quæ defectu ejus oriri possent incommoda, satis caventur instructione Legatorum præsidentium. Deinde dicunt aliquando anathema ejusmodi Concilia, sed quæ vim suam habent, accessu confirmationis Pontificiæ: Sic etiam Provincialia Concilia dicunt aliquando anathema. Denique vocantur *æcumenica* illa Concilia, quia sunt generalia quoad Corpus, non item quoad caput quod infallibile est, nec infallibilitatem illam dare & communicare potest alteri Legato.

S E C T I O VI.

De Authoritate Concilii generalis comparata ad Pontificem.

DICENDUM primò , Romanus Pontifex est supra Conciliū generale. Pontifex enim immediatè à Christo accepit claves Ecclesiæ , uti probavimus sect. 1. & claves illæ per Pontificem derivantur in Ecclesiam , ergo Papa superior est Concilio generali Ecclesiam repræsentante. Deinde Papa est caput Ecclesiæ , rector ejusdem , Pastor Pastorum : caput autem est superius corpore , Rector & Pastor ovibus , &c.

*Pontifex
est supra
Conc. Ge-
nerale.*

Quæret quispiam , quid ergo remedii Ecclesiæ supererit , si habeat Pontificem perversum , dum illo est inferior ? Resp. Christus qui Ecclesiæ suæ aderit usque ad consummationem sæculi , eandem quoque semper proteget mediis sibi notis , etiam sine Concilii generalis authoritate. Sic sæculo 10. quando fuerunt Pontifices satis perversi , dedit Ecclesiæ Sanctos Reges & Principes , qui defectui Pontificum obviarent , adeò ut sine miraculo vix fieri potuerit , ut eodem tempore Principes Christiani à Fide non defecerint , ut notat Baronius. Deinde Ecclesiæ licitum erit tales Pontifices fraternè corripere , imò si vim inferant , vim vi repellere , servato debito inodamine.

*Deus pro-
videt Ec-
clesia dum
caput , &
groat.*

Dices : Pontifices aliquando suas definitiones miserunt Conciliis examinandas , ut fecit Leo Concilio Calcedonensi , mittendo Epistolam suam ad Flavianum. Resp. Etiam Reges mittunt aliquando Parlamento suo decreta examinanda , unde tamen non sequitur , Parliamentum esse supra Regem. Deinde Leo Pont. illam Epistolam misit , non ut de illa judicaret Concilium , sed ut juxta eandem sese regularet , quâ

re à Concilio factâ, idem Concilium laudat Leo, & sibi gratulatur, de ejusdem Concilii obedientia.

Quando autem objicitur Calcedonense Concilium judicasse de Romano Pontifice, verum est, loquendo de judicio, quo judicabat quisnam haberet præferentiam in toto orbe, & signanter quisnam eandem haberet, Patriarcha Constant. an Alexandrinus & Antioch.

Deinde, dicitur aliquando Romani Pontificis decreta posse à Conciliis emendari, non quòd Concilium sit Pontifice Superiùs, sed quòd postea Concilium de quæstionibus tacti meliùs possit informari, planiùs rem decernere, &c.

Caput est ergo totâ Ecclesiâ est minor. Resp. etsi Ecclesia sit major solo capite, quantitate molis, non tamen quantitate virtutis & autoritatis, cum Caput communitatis sit majus autoritate totâ communitate. Sic Rex est caput regni, major quidem potestate, sed minor mole.

Dices, Generalis ordinis est caput ordinis, ubi tamen non est superior toto ordine simul congregato. Resp. hoc ideò, quia generalis ille accipit suam potestatem ab ordine, Pontifex à Christo.

Conc. Constantinense. Objicitur ulteriùs: Quòd Conc. Constant. & Basiliense definierint, quòd Concilium generale sit supra Pontificem. Resp. juxta aliquos solum definit prius Concilium, quòd tempore schismatis sit illius Concilii definire, quisnam sit verus Pontifex. Alii dicunt sessionem illam esse illegitimam, cum Joan. 23. jam discessisset, & plurimi alii. Verum quidem est, quòd Martinus 5. approbaverit postea Concilii illius acta, non quidem omnia, sed solum ea, quæ concernebant condemnationem Wiclef & Hus.

Conc. Basiliense. Quod vero ad aliud attinet: Resp. Concilium illud quidem legitimè fuisse inchoatum, sed non absolutum. Initio enim S. Sedis Legatus cum multis aliis Episcopis abiit, in cujus locum alii remanentes constituerunt

tuerunt Cardinalem quemdam Arelatensem præfidentem, & Monachos loco Episcoporum qui discesserant, adeò ut dicatur fuisse Concilium magis Monachorum quam Episcoporum, magis conciliabulum, quam verum concilium. Postmodum tamen illud Concilium approbatum fuit à Nicolao Pont. quoad censuras Ecclesiasticas & beneficia dumtaxat, uti ex ejus bulla huic Concilio annexa sufficienter constat.

Ex quibus omnibus patet, Pontificem non obligari legibus Concilii generalis, nisi quoad vim directivam dumtaxat, cum sit illo superior. Item quòd Concilium generale possit transferre de loco in locum, in aliud tempus differre, illud dissolvere, &c. Nec illi posse subjici Pontificem, quo sensu verum est, sedem Romanam à nemine judicari.

*Quomodo
Pontifex
obligetur
Concilii
Generalis
statutis.*

SECTIO VII.

Quid sit Ecclesia, & quinam in ea sint.

DICENDUM primò, *Ecclesiæ* vocabulum à Græcis mutuatum significat convocationem seu cœtum vocatorum, adeò ut quævis rationalium creaturarum convocatio *Ecclesia* dici possit, hinc sumitur aliquando vox *Ecclesia* in malam partem, ut Psalm. 25. *Olivi Ecclesiam malignantium*. Alio modo significat Pastores & Rectores Ecclesiæ, ut dum dicitur Matth. 18. *dic Ecclesiæ*. Alio quoque modo sumitur pro loco, quo homines convocati conveniunt. Rectissime tamen ac propriè dicitur *Ecclesia*, fidelium cœtus per totum orbem dispersus. Vocatur autem illa in Sacra Scriptura aliquando *Domus Dei*, *sponsa Christi*, *uxor Christi*, *Templum Dei*, *columba*, &c. ad designandas varias proprietates Ecclesiæ, & excellentias.

*Quid sit
Ecclesia.*

Porro, alia est Ecclesia militans, alia in cœlis triumphans. Hæc est cœtus eorum, qui de mundo victores in cœlis beati triumphant. Illa est cœtus eo-

*Militans
& triumphans.*

rum, qui in h. c. mundo cum eodem militant & luctantur. Hæ duæ Ecclesiæ tamquam partes unicam Ecclesiam constituunt, quarum una alteram subsequitur, nemo enim Deum habiturus est in cælis Patrem, qui Ecclesiam, hic in terris noluit habere Matrem.

*Ecclesia
Hæretico-
rum.*

Aliter definiunt Ecclesiam hæretici. Novatiani volunt eam esse cætum fidelium illorum, qui nunquam in graviora scelera sunt lapsi. Teste August. de hæres. c. 69. Pelagiani, cætum fidelium perfectorum, nullum peccatum habentium. Lutherani, hominum verè credentium & Deo obedientium. Calvinistæ duas assignant, unam ex solis prædestinati constantem, & soli Deo cognitam: aliam visibilem omnibus fidelibus etiam impiis constantem. Unde plerique illi homines, fideles malæ vitæ ab Ecclesia remouent, cujus contrarium constabit ex dicendis.

*Quinam
sint in Ec-
clesia.*

Dicendum 2. hæretici non sunt de Ecclesia, cùm illi teste Apostolo 1. Tim. 1. circa fidem naufragarint. Deinde hæretici Deo credere non censentur, nam ut ait S. Aug. l. 17. cont. Faustum *Qui, quod vult credit, & quod vult, non credit, non Deo, sed iudicio suo credit.* Et rursus l. de unitate Eccles. c. 4. *Non utique sunt in Ecclesia, qui non credunt.* Quomodo tamen discredens uni fidei articulo, non necessario discredat & aliis, vide antea demonstratum sect. 8. c. 2. Porro, etsi hæretici non sint de Ecclesia, ab eadem tamen ut desertores puniri possunt & castigari.

Hæretici.

*Hæretici
interni.*

Hæretici interni verò, sunt in Ecclesia secundum externum fidelium nexum, puta secundum externam fidei confessionem, Sacramentorum communionem, &c. Sunt verò extra Ecclesiam secundum nexum internum, scilicet animo & voluntate, fide. &c. De his agit Apostolus Evangelista. Ioan. 1. Epist. c. 2. dicens: *Ex nobis exierunt, sed non erant ex nobis.* Quomodo ex nobis, si non erant ex nobis? Quia eos *inuis fuisse carne, sed foris Spiritu*, dicit S. Augu-

Augustinus l. 3. de Baptif. c. 18. & l. 4. c. 16.

Dicendum 3. Catechumeni, excommunicati, schismatici sunt extra Ecclesiam. De Catechumenis dicunt SS. PP. eos nihil cum fidelibus habere commune, fideles dici non posse, comparant eosdem *Catechumeni, excommunicati, schismatici, &c.* fœtui concepto sed nundum nato, &c. Excommunicati etiam ab Ecclesia segregati sunt, omni commercio spirituali privati, dati satanæ, & cum Ecclesiam audire noluerint, sunt fidelibus, ut ethnici & publicani. Schismatici verò, sese ab Ecclesiæ capite scindentes, non magis sunt de Ecclesia, quam ramus abscissus, est pars vitis; manus abscissa, pars hominis: hinc S. Cypri. 4. Epist. 9. *Ecclesia*, ait, *est grex suo Pastori adunatus, qui cum Episcopo non sunt, in Ecclesia non sunt; extra eam sunt, qui se ab ejus unitate diviserunt.*

Dicendum 4. Imperfecti, & malæ vitæ, sunt *Improbæ.* etiamnum in Ecclesia. Omnes enim imperfecti sumus, dum septies in die cadit justus, & omnes rogant: *Dimitte nobis debita nostra.* Hinc rursus Christus in Ecclesia sua *Hædos* agnoscit *Ovibus* permixtos, *Taleam Tritico*, Matth. 3. & 25. Apostolus 1. cor. 5. in Ecclesia agnoscit *Incastuosum*, & sæpissimè fideles criminosa vitæ arguit & admonet. Hinc generaliter notandum, quod quando alibi innuitur Ecclesiam constare solis justis & electis, solummodo intelligendum esse, vel de superna Cœli Ecclesia, vel de particulari Ecclesia, ad quam vocantur illi, qui justificantur & glorificantur, vel etiam de justitia & Sanctitate Ecclesiæ, quam de se continet & confert, etsi alii suâ malitiâ eâdem abutantur. Ita intelligi debet, quod aliqui de Ecclesia dictum volunt cant. 4. *Tota pulchra es, & Sine ruga & macula.*

SECTIO VIII.

De Proprietatibus veræ Ecclesiæ.

*Ecclesiæ
vera est
visibilis.*

DICENDUM primò, Vera Christi Ecclesiæ est visibilis, adeo ut quilibet eam videre possit ex ejus notis & proprietatibus, quòd sit vera Ecclesiæ. Hinc est, quod Scriptura eam comparet, *Monti, Aree, Soli, &c.* Adeò ut S. Aug. Tract. 2. in Epist. Joan. roget: *Quid amplius dicturus sum, quam cæcos esse, qui tam magnam montem non viderint, qui contra lucernam in candelabro positam oculos claudunt?* Quamvis autem præcipui effectus & ornatus Ecclesiæ sint ab intus, de foris tamen est in vestitu deaurato, circumamicta varietate, cum internus ille ornatus exteriorem producat & adferat. Eo tamen non obstante, & videmus & credimus Christi Ecclesiæ, sicuti Apostoli quem videbant, credebant & Christum.

Fuit autem omni prorsus tempore visibilis vera Christi Ecclesiæ. Non enim possunt veri fideles in unam fidem coalescere, nisi externis signis & externâ professione. Sic Cain & Abel sacrificasse docet Scriptura Sacra, quos omnes alii deinceps sunt imitati, usque ad Noë virum justum & perfectum, quem deinde in veri Dei cultu ac Fide imitati sunt Sem, Japhet, Melchisedech, Abraham, &c. Quo tempore circumcisione verus Dei populus ab aliis distinguebatur, donec tandem per Christi adventum Fides Christiana annuntiata sit per orbem universum, & tot Ministris ubique sit facta conspicua, ut cæcus sit, qui eam non videt.

Indefectibilis.

Dicendum 2. Vera Christi Ecclesiæ deficere nequit, cum Deus fundaverit eam in æternum, nec portæ inferi possint prævalere adversus eam. Deinde, Christi promissione, idem aderit Ecclesiæ suæ usque ad consummationem sæculi. Hinc neque deficit

um.

umquam Synagoga nisi quando Christo advenienti eadem cedere debebat & extingui. Neque etiam tempore Antichristi deficiet Ecclesia, sed solum aliqui de illa, uti omni tempore aliqui de eadem deficiunt. Idem dicendum est, de Synagoga, quod etsi plurimi variis temporibus ab ea defecerint, semper tamen habuerit suos fideles, uti ex Sacra Scriptura constat. Unde etiam si immanissima aliquando in Ecclesiam sævierit persecutio, numquam persecutione defecit aut deficiet, cum ut ait Hilarius l. 9. de Trinit. *Ipsa est, quæ dum persecutionem patitur, floret: Dum opprimitur, crescit; dum arguitur, intelligit: Tunc stat, cum superari videtur: & Tertull. in Apolog. Plures, ait, efficiamur, quoties metimur: Semen est Sanguis Martyrum, grana multiplicata in agro Dominico resurgunt. Aded ut merito D. Bern. Serm. 79. in cant. Nec verbositate Philosophorum, nec cavillationibus hæreticorum, nec gladiis persecutorum potuit Ecclesia, vel aliquando poterit superari.*

Dicendum 3. Vera Christi Ecclesia est una: *Unitate* scilicet animorum, aded ut credentium omnium sit cor unum & anima una. *Una*, unitate capitis Christi & ejusdem in terris Vicarii; *Una* unitate spei, dum sumus vocati in una spe vocationis nostræ, Eph. 4. *Una* denique unitate eorundem Sacramentorum, Fidei, rituum & Doctrinæ. Hæc unitas Ecclesiæ ejusdem indefectibilitatem stabilit, cum *Omne Regnum in se divisum desolabitur*, Matth. 12. Si verò aliquando in Doctrina dissentiant fideles, vel solum accidentaliter ad Fidem illa pertinent, vel se summo Pontifici plenè in omnibus subjiunt, & consequenter in idem iudicium ultimarè conveniunt.

Porro, etsi varia hinc inde in Ecclesiis variis sint Ecclesiæ capita; omnia tamen primario & principaliori sunt subordinata, & ut ait S. Leo Serm. 3. de ordinatione sua: *Licet universa Ecclesia distinctis ordinata sit gradibus, ut ex diversis membris sacrati corporis integritas subsistat: nos tamen omnes, sicut ait Aposto-*
lus

lus, in Christo JESU unum sumus, nec quisquam ab alterius ita divisus est officio, ut non ad connexionem pertineat capitis cujuslibet humilitas portionis. Vera ergo veræ Ecclesiæ nota est, si à Christo per Apostolos descendat, quod successione summorum Pontificum Romana ostendit Ecclesia.

Est Sancta.

Dicendum 4. Vera Christi Ecclesia debet esse Sancta eo quòd caput ejus sit Sanctum, Spiritus assistens sit Sanctus, Sacramenta ejus sanctitatem contineant & conferant, Sancta sit in Doctrina & præceptis, quæ bonos mores & Sanctitatem edocent & præscribunt. Unde appositè optatus Milev. contra Parmen. initio : *Sanctitas Ecclesiæ* ait, *de Sacramentis colligitur : Sancta est Ecclesia in votis, Sancta in Sacrificiis, Sancta in Ministeriis, Sancta in ceremoniis, Sancta in omnibus & singulis observationibus, quæ ad Dei cultum ab ea usurpantur.* Denique Sancta dicitur ex eo, quòd omni tempore viri Sancti in eadem sint inventi.

Est Catholica & Apostolica.

Dicendum 5. Vera Christi Ecclesia debet esse Catholica & Apostolica. Debet esse Catholica idest universalis, cujus fides annuntiatur in universo Mundo, hoc enim Catholicum dicitur, quod ab omnibus, ubique & semper creditum est.

Apostolica verò, eo quòd à Christo per Apostolos fundata & ad nos debeat esse derivata. Hinc Tertull. de præscript. c. 32. ita Hæreticos compellat : *Edant origines Ecclesiarum suarum : evolvant ordinem Episcoporum suorum, ita per successionem ab initio decurrentem ut primus ille Episcopus aliquem ex Apostolis vel Apostolicis viris habuerit authorem & anecessorem.*

Ex quibus præcipuis Ecclesiæ veræ signis & proprietatibus Colligi manifestè potest, quàm veræ sint Hæreticorum Ecclesiæ, quæ vix ortæ in varias divisæ sunt sectæ, vix uno aut alio regno concluduntur, vix à 200. annis ortum duxerint, quæ dogmata maxime absurda, Deo injuriosa complectuntur, &c.

S E C T I O IX.

De Infallibilitate Ecclesiæ res Fidei attestantis.

DICENDUM primò, res Fidei nobis per Ecclesiam tamquam signum infallibile proponuntur credendæ. Cùm enim Deus à nobis exigat Fidem firmissimam rebus à se revelatis; easdem semper viâ infallibili nobis proposuit: Sic in lege naturæ eas revelavit per Angelos, & primogenitos familiæ: In lege scripta per Moysen, Prophetas & Sacerdotes: In lege gratiæ per Christum ejusque Apostolos & Apostolorum successores. Unde, quando res Fidei per illorum instructionem nobis innotescit, æquè firmiter eisdem est assentiendum, cùm semper illis assentiamur propter authoritatem primæ veritatis res illas per eosdem revelantis. Semper enim est idem modus credendi, etsi diversus sit modus res fidei addiscendi. Quare ipse Christus idem confirmat dicens Lucæ 10. *Qui vos audit, me laudit, qui vos spernit, me spernit*, &c. Ideò etiam Paulus Thessal. 2. assèrit verbum suum, esse verbum Dei. Hinc denique Apostoli dicuntur *adjutores Dei*, tamquam Legati *Legatione fungentes pro Christo*.

Ecclesia infallibilis.

Vox Ecclesiæ est vox Dei revelantis & loquentis.

Sequitur ergo ex dictis vocem Ecclesiæ res Fidei attestantis aut determinantis esse infallibilis veritatis, cùm eadem Deus tamquam medio & instrumento utatur ad res Fidei proponendas, adeò ut, Ecclesiâ in illis errante, error in Deum redundaret. Hinc dicit Salvator se Ecclesiæ adfuturum usque in consummationem sæculi; Hinc rursus dicitur, *Columna & Firmamentum veritatis*, Unde in rebus Fidei semper ad Ecclesiam tamquam ad judicem infallibilem & lapidem lydiū recurrerunt fideles.

Dicendum 2. Sequitur ulteriùs, voci Ecclesiæ res Fidei aut morum determinanti esse acquiescendum cum

Ecclesia voci est acquiescendum.

cum sit vox Dei & testimonium assistentis Spiritus Sancti. Unde Chrysost. hom. 58. in Joan. *Sacerdos ait, Angelus Domini est, nihil ex se ipso loquitur: Si despicias, non illum despicias, sed Deum.* Et alibi. *Deus omnia facit: Sacerdos manum & linguam præbet.* Hinc etiam admonet salvator dicens Matth. 23. *Omnia quæcumque dixerint vobis facite.* Aliud est in eis rebus, quæ merè ab informationibus pendent, in quibus patienter audit Ecclesia opponi & debito respectu contradici, quando aliquid Ecclesiæ pravâ fuit informatione suggestum: Vide sect. 2. conclus. 3.

*Quinta
authorita-
tis sint re-
velationes
aliquæ.*

Dicendum 3. Varias circumferri variorum revelationes, & prophetias, quibus tamen aliquando nimia fides à quibusdam adhibetur. Præcipuæ & famosæ sunt revelationes S. Brigittæ & Mathildis, ex quarum revelationum libris aliqui pro suâ Doctrinâ magnam sumunt auctoritatem. Notandum tamen est, quod scribit Spondanus ad annum Christi 120. num. 7. *Quod vero insuper adducunt ex SS. Frigidæ sive Brigittæ atque Mathildis revelationum libris: Veneror quidem (ut par est) Sanctas illas & colo: Sed de revelationibus eis factis, vel potius ipsarum nomine ab aliis promulgatis, ea dumtaxat recipio, quæ Ecclesia Catholica recipit, quam scimus non potuisse ea probare, quæ sunt tum inter se pugnantia, tum divinæ Scripturæ repugnantia.*



CAPUT QUARTUM.

De vitiis fidei oppositis.

SECTIO PRIMA.

De Infidelitate & Hæresi.

DICENDUM primò, Infidelitas negativa, *Infidelitas*
 quâ quis nihil de fide credit, eo quòd ni- *negativa,*
 hil de eadem audierit, vel audire moraliter
 potuerit, non est peccatum. In illis enim
 ignorantia rerum fidei, in qua infidelitas illa propriè
 consistit, est invincibilis: Hinc damnata est hæc sub-
 sequens propositio: *Infidelitas purè negativa in his, in*
quibus Christus non est prædicatus, peccatum est.

Infidelitas autem contraria, quâ alii fidem sibi pro- *Contraria,*
 positam rejiciunt & impugnant, sine dubio est pec-
 catum: juxta illud, *Qui non crediderit, condemnabitur,*
jam judicatus est. Marci ult. Infidelitas privatiua, quâ
 quis ex culpâ propriâ res fidei suscipere renuit, est pec-
 catum, cum sit culpabilis, uti supponitur.

Dicendum 2. Hæresis est error intellectûs volun- *Quid Hæ-*
 tarius, cum pertinacia, contra aliquam veritatem *resis.*
 fidei Catholicæ prius susceptæ. Sicut enim Fides est
 in intellectu & imperatur à voluntate, ita & Hære-
 sis ei contraria est in intellectu & à voluntate impe-
 ratur. Ad pertinaciam autem ad hæresim requisi- *Pertinacia*
 tam, non requiritur, ut quis Fidem suam quam te- *ad eam re-*
 net, putet esse erroneam, uti neque, quòd contra- *quisita*
 dicat dogmati alicui, quod putat esse verum, cum
 contrarium in plerisque hæreticis constet: Sed per-
 tinacia illa consistit in voluntate resistendi doctrinæ
 quam novit esse Ecclesiæ Catholicæ. Declarat id S.
 Aug. l. 4. de Baptis. c. 16. ubi ait: *Constituamus ali-*
quem

quem id sentire de Christo, quod Photinus opinatus est; existimantem ipsam esse Catholicam Fidem, istum nondum hæreticum dico, nisi manifesta sibi Doctrina Catholicæ fidei resistere maluerit, & illud quod tenebat, elegerit. Ex quo sequitur, quod si quis paratus sit desistere ab errore suo, si sciret esse contrarium Catholicæ fidei, non esse Hæreticum, nam ut ait idem S. Doctor Epist. 162. *Qui sententiam suam quamvis falsam & perversam, nulla pertinaci animositate defendunt, præsertim quam non audaciâ præsumptionis suæ pepererunt, sed à seductis atque in errorem lapsis parentibus acceperunt, quærent autem cauta sollicitudine veritatem, corrigi parati, cum invenerint: nequaquam sunt inter hæreticos deputandi.* Sequitur ulterius, cum non esse formaliter Hæreticum, qui assentiri renuit propositioni incertæ, quam tamen plurimi Doctores docent esse de Fide, eo quod non constet eam Catholicæ fidei adversari.

Quæ ignorantia ab Hæresi excusat.

Dicendum 3. Ignorantia antecedens quæ sit causa operis, excusat à formali hæresi, quæ si abesset, vellet cum Ecclesia Catholica sentire. Unde S. Thom. super Epist. ad Tit. 3. lect. 2. *Eligens, ait, Si non est pertinax, sed est paratus corrigi secundum Ecclesiæ determinationem, & sic non ex malitia, sed ex ignorantia, non est Hæreticus.*

Ignorantia crassa, etiam excusat à formali Hæresi, si sit equidem paratus determinationi Ecclesiæ acquiescere, licet non adhibeat debitam diligentiam in investigandis rebus Fidei. Idem probabilius dicitur de ignorantia affectata, ut liberiùs quis vivat, vel quia tædiosum est ea addiscere, quæ credenda proponit Ecclesia; cum illa enim ignorantia stare potest, quod quis sit paratus acquiescere constitutioni Ecclesiæ in rebus Fidei. Aliud esset, si illâ ignorantia affectarem aliqua nescire, ut liberiùs in fide errem, ne iudicium meum deponere teneam, &c. In quo pertinacia ad hæresim requisita includitur.

Dubius in fide infidelis est.

Dicendum 4. Ille qui verè & positivè dubitat in fide, est infidelis. *Fides enim, ait, Bern. l. 5. de confid.*

c. 2. *Ambiguum non habet, etsi habet, fides non est.* Unde & capt. de hæret. 1. *Dubius in fide infidelis est.* Fides enim requirit assensum firmum, & intellectum captivatum in obsequium fidei, non autem renuit fidei acquiescere, uti facit ille, qui verè & positivè dubitat, dum judicat propositionem Ecclesiæ esse insufficientem, cum hoc judicando judicet Ecclesiam non esse infallibilem, aut à Deo per eandem res fidei proponi. Debet autem dubitatio illa esse vera & positiva, non verò negativa, aut improvisa & subitanea circa res fidei, & ut primo prima: Deinde debet esse dubitatio de rebus fidei sufficienter propositis, & de ipsis rebus fidei, non de propositione rerum fidei, v.g. an propositio aliqua sit de fide.

Dicendum 5. Frequenter in partibus hæreticis deest formalis hæresis, eo quòd res fidei non sint illis propositæ, aut ita dumtaxat propositæ, ut ne quidem habeant speciem probabilitatis, unde provenit quòd sint solum materialiter hæretici. Etsi enim varia de fide Catholica audiant à parentibus, Ministris, &c. Tamen ita ridiculè & mendaciter illa proponuntur, ut ab illa ut diabolicà deterreantur, Pontificem sibi dæmonem imaginentur & Antichristum, Religiosos ut Diabolos averfentur, adeò ut iis pejus sit, ac si de Fide illa numquam audivissent: Ex quo capite multi rudiores in illis partibus ignorantia magis laborant quàm pertinaciâ, quare & ab excommunicatione, formali hæresi annexâ, immunes sunt plerumque tales, quod in partibus nostris sollicitè est notandum.

Dicendum 6. tales tamen rudiores, qui hæretici habentur, non tamen pertinaciter sunt tales, absolvi non possunt, cum non habeant veram fidem, ubi tamen motus Fidei ad justificationem est necessarius; ut docet Conc. Trid. sess. 6. c. 6. neque sufficit hîc Fides habitualis acquisita in Baptismo, sed requiritur motus Fidei, idest actualis.

Si tamen tales ad fidem redeant, possunt absolvi

*Hæretici
idiotæ.*

*Absolutio
illorum
ad
fidem re-
deunt.*

à quolibet confessario, etiam non gaudente Privilegio absolvendi à casibus reservatis, cum non fuerint formaliter hæretici, defectu insufficientis propositionis, & pertinaciæ, quales solum excommunicatio fecit. Unde non ita à formali hæresi reducuntur ad fidem, quam ab ignorantia reducuntur ad notitiam fidei. Quomodo verò Confessarius aget cum Hæreticis, vide in materia de absolutione in Sacramento Pœnitentiæ.

S E C T I O II.

An, & in quibus liceat cum Hæreticis communicare.

*Quinam
Hæretici
sint ex-
communi-
cati.*

DICENDUM primò, Hæreticos formales & veros, idest tam internâ quam externâ Hæresi infectos, esse excommunicatos ipso facto, patet ex Bulla Cœnæ & aliis multis. Et si enim Apostolus ad Tit. 3. dicat: *Hæreticum hominem post unam & secundam correptionem devota*; Ex quo videri posset, non esse hæreticum ipso facto excommunicatum: Tamen hoc solum intelligendum est, de excommunicatione lata ab homine, non item à jure, quæ ulteriorem correptionem hæretici non requirit.

*Marti-
nus V.*

Hinc sequitur Hæreticos ut tales esse fugiendos: Hoc tamen notato, quòd quamvis primitus omnis omninò cum Hæreticis communicatio Catholicis fuerit interdicta: Postmodum tamen à Martino V. in Conc. Constant. ejusmodi interdictum est limitatum, dum ita loquitur prædictus Pontifex: *Ad evitanda scandala, & multa pericula, subveniendumque conscientiis timoratis, statuitur quòd nemo deinceps à communione alicujus in Sacramentorum administratione vel receptione, aut aliis quibuscumque divinis, vel extra, prætextu cujuscumque sententiæ aut censuræ Ecclesiasticæ, seu suspensionis aut prohibitionis, ab homine vel à jure generaliter promulgatæ teneatur abstinere, vel aliquem vitare, aut interdictum Ecclesiasticum observare, nisi sententiæ, prohibitio, suspensio*

suspensio vel censura hujusmodi fuerit contra personam, Collegium, Universitatem, Ecclesiam aut locum certum à judice publicata vel denunciata specialiter vel expresse. Unde patet, quòd illi tantummodò vitandi sint, qui sunt publicè denunciati hæretici.

Dicendum 2. Et si soli publicè denunciati sint vitandi, ut excommunicati, ex alio tamen fundamento omnes promiscuè in familiaritate vitandi sunt. *Hæreticorum consortium.* Sermo enim hæreticorum ut cancer serpit, pusillos imperceptibiliter inficit, & res est periculi plena: Quod maximè verum est, quoad hæreticos illos, quibus familiare est, Catholicos irridere, Catholicorum ritus & Sacramenta contemptibiliter traducere, &c.

Dicendum 3. Hæreticorum concionibus interesse, eisdem audire, per se non est illicitum, nisi adsit periculum perversionis: Imò doctiores aliquando utiliter eas adeunt, ut promptiùs eorum fraudes retorqueant & detegant. Si verò quis adsit eisdem, vel ex curiositate, vel ex dubio in propria fide, vel ut aliis aut sibi suâ præsentia eveniat periculum perversionis, omninò erit illicitum eis interesse. Deinde, si præsentia illa censeretur professio sectæ hæreticæ, sub mortali vetitum erit eis interesse, adeò ut nec metu mortis quidem ad eas liceat convenire. Sic Anglo-Catholicis anno 1606. gravissimis pœnis à Rege convocatis ad conciones hæreticorum, expresse Paulus V. illis prohibuit, tali Regis jussui obedire, & addit: *Hæc facere non licet sine detrimento divini cultus ac vestræ salutis.* Illicitum quoque est, interesse precibus, aut aliis hæreticorum ritibus, adeò ut censearis esse unus ex istis, flectendo dum flectunt illi, Psalmos concinendo, &c. Multò magis vetitum erit eorum cœnæ interesse, panem benedictum ab hæreticis sumendo, quod maximum foret sacrilegium. Spectare tamen eandem cœnam, ut comædiam, non foret per se illicitum, si absit perversionis periculum. Famuli verò & ancillæ Catholicæ, inservientes Dominis hæreticis licitè eosdem comitantur ad conciones hæreticas, si absit per-

Famuli versionis periculum, nec ad illud à Dominis cogantur
Hæretico- in odium Religionis. Quia tamen plerumque aliquale
tum, periculum famulis & famulabus utpote rudioribus im-
 minere potest, ex cohabitatione & obsequio hæreti-
 cis Dominis debito, obligantur ejusmodi dictos Do-
 minos deferere, & alia obsequia prætere apud Ca-
 tholicos, etiam cum aliquali damno ratione minoris
 stipendii, cui damno periculi prædicti cautela est præ-
 ponenda.

Conforma- Dicendum 4. Licitum est in partibus hæreticis, Ca-
tio Catho- tholicis sese conformare in ordinationibus hæretico-
licorum rum civilibus, si illæ ordinationes non sint introductæ
in Hæreti- in odium Religionis, neque observantia illius censea-
corum or- tur illius sectæ professio. Sic licitum est Catholicis
inationi- claudere officinas diebus rogationum hæreticarum,
bue. easdem aperire diebus festis, nisi prævalens Catholi-
 corum consuetudo aliud introduxisset. Morali enim
 judicio, censetur observantia contraria Catholicis im-
 possibilis, ad quam proinde Ecclesiæ lex non cense-
 tur eosdem constringere. Aliud esset, si observationes
 illas cogerentur Catholici ab hæreticis adimplere ex
 odio fidei nostræ aut Religionis. Deinde observantia
 eorum non censetur moraliter esse professio alterius
 Religionis, sed solum conformatio merè civilis; sic
 etiam licitum est Catholicis comitari funera hæretico-
 rum, eorundem nuptiis interesse, &c. Eo quod so-
 lum sint signa amicitiae civilis & actus humanitatis,
 cognitionis, &c.

Obire of- Dicendum 5. Licitum est Catholicis inter hæreti-
ficia in cos degentibus exercere talia munia, quæ sunt merè
partibus civilia, nec ad eorum sectam fovendam aut ejus pro-
Hæreticis. fessionem significandam obeuntur. Sic licitum erit
 imò aliquando utile, quod Catholicus officium ali-
 quod civile obeat, quo possit promptius fidem Ca-
 tholicam fovere & protegere. Sic etiam licitè im-
 pendunt Catholici hæreticis operam, in mæchanicis,
 artibus liberalibus, &c. Hoc tamen singulari-
 ter notandum, prædicta omnia, uti & alia his simi-
 lia

lia esse omninò illicita, si sint ratione talis officii aut operæ hæreticis impensæ, moralis causa coöperans aut favens propagationi sectæ hæreticæ: Sic erit illicitum bibliopolæ suscipere officium bibliopolæ ordinarii ac jurati apud hæreticos, eo quòd sese unà obliget ad eorumdem errores excudendos, Catholicorum impugnationes imprimendas & consequenter hæresim eorum promovendam. Sic ulterius illicitum erit Catholico agere organistam ordinarium, ædium templi hæretici, eo quòd similes ludendo ad Psalmos, pulsu campanæ, hæreticos ad ritus suos convocando, censeantur coöperari ritibus hæreticorum, & hæresim promovere.

Ex dictis sequitur ulterius, licitum esse Catholicis mercaturam exercere in partibus hæreticis, sic tabus Hæreticis exercere mercaturam, ut ejusmodi singulariter sibi caveant, dum hæreticorum consortio frequentius & familiarius est utendum, Econtrà licitè etiam in partibus Catholicis permittuntur hæretici mercatores, v. g. Romæ, Venetiis, Antverpiæ, &c. Quamvis superiores Catholici in illis partibus potissimum invigilare debeant ut Catholici ibidem in Fide firmius intruantur, & omne perversionis periculum caveri debeat, ne sub prætextu mercaturæ, hæresis sese ingerat & incautos decipiat & corrumpat.

Dicendum 6. præcepta Ecclesiæ etiam obligant in partibus hæreticis, si absque gravi detrimento observari possint. Hinc tenentur Catholici in Hollandia, Anglia, &c. existentes observare jejunia Ecclesiastica, cum ibidem illud sine gravi incommodo observare possint. Item etiam audire Sacrum diebus festivis, confiteri annuè, &c. Si verò ex observatione illorum esset periculum gravioris damni, v. g. mortis, bonorum confiscationis, &c. Non essent tali lege Ecclesiastica constricti, cum leges Ecclesiæ cum gravi detrimento non obligant. Ratione tamen damni levioris, irrisionis v. g. aut alterius similis, legum Ecclesiasticarum obligatio non cessat:

unde transeuntes partes hæreticorum vix dum excusati sunt ab observantia jejunii, auditionis Sacri, &c. cum sine damno graviore illa observare promiscuè possint; imò caupones in Anglia & Hollandia pisces carnibus miscere solent, dum mensam diebus jejunii proponunt; deinde rogati pisces humaniter accommodant, nec quidquam graviore damni promiscuè hîc formidandum: Deinde occasio Missæ audiendæ ibidem satis opportuna.

SECTIO III.

De Lectione Librorum Hæreticorum.

*Leſio li-
brorum
Hæreſico-
rum in-
ſardiſta.* **D**ICENDUM primò, juxta antiquiſſimam praxim libros hæreticos eorumque lectionem rectè condemnat Eccleſia. Sic act. 19. *Multi ex iis, qui fuerant curioſa ſectati contulerunt libros & combuſſerunt coram omnibus.* Sic libri Arii in Conc. Nicæno, in Epheliſino libri Neſtorii, &c. deleti ſunt. Scripta enim opportuniùs & præmeditatè magis diſpoſita ſunt, ad decipiendum incautos, quam verba; unde ſi Sernio hæreticorum ut cancer ſerpat, multò magis eorundem ſcripta.

*Calliditas
Hæreſico-
rum.* **D**icendum 2. Etiam condemnat Eccleſia libros hæreticorum, eſſi multa habeant fidei noſtræ conformia & alia doctiſſima contineant. Hæc enim eſt hæreticorum aſtutia, ut ſub ſpecie Doctrinæ Hæreſim intrudent, & opportuniùs ſub ſpecie raritatis earum edoceant. Permittit tamen Eccleſia ab omnibus legi aliquorum hæreticorum libros, quorum hæreſis ſufficienter eſt extincta, nec illius ſuper-eſt periculum formidandum ex illorum lectione. Sic permittit legi libros Origenis, Tertulliani, Judæorum aliquorum, &c.

*Qui libri
Hæreſici
condem-
nati.* **D**icendum 3. Libri, qui ab Eccleſia ſub excommunicatione prohibentur legi, ſunt illi qui ſunt hæreticorum

rum libri qui hæresim contineant aut de Religione tractent, ut legantur scienter, aut ita retineantur, imprimantur aut defendantur, idque sine legitima auctoritate. Hinc sequitur, non prohiberi lectionem librorum Ethnicorum, Judæorum, &c. Imò nec Catholicorum errorem continentium, eo quòd non sint hæretici.

Sequitur etiam, non esse prohibitos libros hæreticorum, qui non continent hæresim aut de Religione non tractant, ut sunt aliquando Historiæ prophanæ, libri litterarii, &c.

Sequitur ulterius, requiri scientiam in eo qui legit, imprimit, &c. Librum esse hæreticum, adeò ut ignorantia etiam crassa hinc excuset, nisi sit tanta ut scientiæ moraliter æquivalet, v. g. si fama publica aut vir fide dignus attestetur de prohibitione libri, cui tamen si sem negat, ut liberius legat.

Dicendum 4. Datur in lectione libri hæretici parvitas materiæ. Quantitas autem ejus, ut censuram quis incurrat, prudentis judicio est determinanda: Aliquantum enim una pagina plus periculi continet, quam reliqua libri Folia. Imò aliquando ratione unius folii totus hæretici liber proscribitur & prohibetur.

*Datur in
lectione li-
bri Hære-
tici parvi-
tas mate-
ria.*

Dicendum 5. Non tantum legentes, sed audientes legi tales libros prohibitio dicta concernit. Hinc si quis jubeat famulum sibi librum hæreticum prælegere, & ipse scienter audiat, prohibitionis reus est: *Qui enim facit per alium, est perinde, ac si faciat per se ipsum*, Ut ait regula juris 72. in 6. neque de eo dubitari potest, quin talis sit prohibentis intentio, cum alias in fraudem prohibitionis quilibet facile posset audire, quod legere non posset. Adde, quòd lectio prohibita, partim etiam si a se in perceptione rei quæ legitur, non tantum in nuda lectione & sono Litterarum.

*Audientes
legi etiam
pœna sub-
iacent.*

Dicendum 6. Qui legitimâ auctoritate libros hæreticos legit, si id faciat ex sola curiositate, etsi peccat, non tamen censuram incurrat. Quòd talis peccet, probatur ex eo, quòd sua potestate abutatur, nec ad hunc

*Legitima
auctorita-
te legens
ex sola
curiosita-*

finem potestas illi concessa sit, quæ solum conceditur ad refutandas hæreses, ut litteræ talem auctoritatem concedentes, apertè addunt. Non ideò tamen censuram incurrit talis, eo quòd veram retineat in legendo auctoritatem, etsi eàdem abutatur. Hoc tamen notandum, aliquos Religiosos habere facultatem, dandi suis pœnitentibus auctoritatem legendi libros prohibitos, qui tamen non sunt editi ad stabi- lienda dogmata hæretica, quales sunt illi, qui non ex professo hoc agunt, ut hæresim probent aut intro- ducant, sed aliud argumentum tractant: Hoc tamen addito, quòd pœnitentes admonendi sint, quibus conceditur ejusmodi facultas, ut errores occurrentes deleant.

*Libros Hæ-
reticos re-
tinentes.*

Dicendum 7. prædictis pœnis subjiciuntur illi, qui sine legitimâ auctoritate libros hæreticos retinent aut imprimunt. Retentio autem illa debet esse aliquo tempore protracta, quod tempus morali judicio est determinandum. Prohibetur autem omnis retentio, quocumque respectu vel causâ fiat, sive ad refutan- das hæreses, sive gratiâ ornamenti bibliothecæ, sive alia de causa. Si autem retineantur, donec habeatur licentia retinendi, quam jam quæstisti, vel etiam donec occasionem nactus sis eosdem ablegandi, non erit vetitum eos retinere, cum omninò velis libros non retinere, vel solum retinere cum debita licentia.

*Imprimen-
tes.*

Eidem pœnæ subjacet impressor libri hæretici, & omnis ille, qui impressioni coöperatur, ut Typogra- phiæ Dominus, servi chartas prælo disponentes, lit- teras deducentes, &c.

*Index li-
brorum
prohibito-
rum.*

Prædictæ constitutioni bullæ cœnæ affinis est in- super alia Pii IV. & Sixti V. quæ jubet observari Constitutiones & Regulas præfixas Indici librorum prohibitorum ad finem Concilii Trid. constituto, id- que sub excommunicatione, sed Pontifici non re- servatâ. Bulla autem illa obligat illos ubi est publi- catâ, de cujus publicatione in aliquibus Belgii urbi- bus constat: Usus tamen contrarius in aliquibus par- tibus

tibus contrarium docet, idque à tempore immemoriali, unde per contrariam consuetudinem legitime inductam videtur in aliquibus locis Lex illa abrogata.

Dicendum 8. ille, qui hæreditate accepit libros *Venditiq*
hæreticos, aut ad fidem conversustales retinet, etsi *librorum*
laudabiliter eosdem igni tradat, si opesferant, etiam *Hæretico-*
cum aliquali damno; Tamen, si cum aliis libris Ca-
tholicis commutet, vel hæretico bibliopolæ diven-
dat, ne grave damnum aliàs incurrat, non videtur
graviter peccare, & posse hoc à Confessario dissi-
mulari, maximè si similium librorum copia ibidem
sit sufficiens, eo quòd tali venditione causam Ca-
tholicorum non faciat multò deteriore, & de cæ-
tero non censetur facere rem ex natura sua illicitam
ut damnum evitet.

Hoc autem, quod diximus de constitutionibus *Libri solum in-*
prædictis, intelligendum est de lectione, impressio-
ne & retentione librorum hæreticorum, non item de
lectione Epistolæ, concionis, aut edictorum hæreti-
corum, quæ non sunt *Libri* propriè dicti, etsi alia de
causa eorundem lectio vetita sit ob periculum per-
versionis, quòd talia continent, aliquando etiam
majus, quam contineat liber hæreticus.

Dicendum 9. Dictâ Constitutione Pii IV. Vetatur *Lectio Bi-*
omnibus lectio Bibliorum in vulgari lingua, nisi de *bliorum*
Consilio Parochi. Quæ constitutio prudens est & ju-
sta, non quòd Scriptura Sacra mala sit, aut quid *in vulga-*
mali contineat: Sed quòd in Scripturis *ri lingua*
Sint plurima
difficilia intellectu, quæ indocti & instabiles depravant.....
ad suam ipsorum perditionem, ut ait S. Petrus 2. Epist.
c. 3. unde S. Hieronym. Epistola ad Paul. ita de suo
sæculo loquitur: *Sola Scripturarum ars est, quam sibi*
passim omnes vendicant, hanc garrula anus, hanc delirius
senex, hanc Sophista Verbosus, hanc universi præsumunt,
lacerant, docent antequam discant. Hoc idem in partibus
nostris hæreticis experimur, quibus omnibus etiam de
plebe mulierculis Scripturæ lectio, explanatio &
studium

studium est maximè familiare, cui confidentiùs insudant aliquando, quam Rhombo aut Girgillo.

In Belgio cum aliis quibus dissimulatur. Hoc tamen dissimulatione potiùs, quam concessâ licentiâ in partibus Belgii invaluit, ut quidam libri Historici, Regum v. g. Tobiaë, &c. vulgari idiomate quilibet legantur, imò pueris ad legendum in scholis puerilibus proponantur. Idem dici potest de Epistolis & Evangeliiis dominicalibus, quæ omnium manibus teri permittuntur aut dissimulantur. Quamvis & promiscuo illi usui obistere consultum esset Pastoribus & Confessariis, maximè cùm aliquando tota Biblia assumant, dum partis lectionem sibi licitam putant, tum quod sæpè tales partes corruptâ versione legant aut retineant, unde non nisi de Consilio Parochi hæc legere, foret consuluissimum.

SECTION IV.

De disputatione cum Hæreticis.

Disputare cum Hæreticis quando licitum.

DICENDUM primò, nemini licèt ita disputare publicè de condicito, nisi ex speciali Sedis Apostolicæ licentiâ vel nisi in mora esset periculum & necessariò Fidei status id exigeret. Ita quondam censuit S. Congregatio de Propaganda Fide Anno 1644. Deinde personis Laicis illud interdictum est olim ab Alexandro 4. cap. *Quicumque* §. de Hæreticis in 6. ubi sic habetur: *Inhibemus quoque, ne cuiuslibet Laica personæ liceat publicè vel privatim de Fide Catholica disputare: qui verò contra fecerit excommunicationis laqueo innodetur.* Ratio dictarum constitutionum est hæc, quòd iuxta Apostolum 2. Tim. 2. ad nihil utile plerumque sit (disputare) nisi ad subversionem audientium: &

Disputationis cum Hæreticis suu raro utilis aut consultus.

ur ait S. Aug. l. 13. contra Faustum c. 12. *Non amant disputare Hæretici, sed quoquo modo superare impudentissimâ pervicaciâ, ut congregent, quæ non pepererunt.* Huic testatur experienciâ Malderus, numquam ferè ex disputat-

sputatione cum illis spem esse eos convertendi, sed potius timorem periculi pro parte Catholica. Cùm enim ut ait Tertul. de præscript. c. 15. *Scripturas ob- tendant, hâc suâ audaciâ statim quosdam movent, in ipso verò congressu firmos quidem fatigant, infirmos capiunt, medios cum scrupulo dimittunt.*

Dicendum 2. Dictis legibus inhiberi solùm disputa- tionem formalem, non item materialem, quæ fiat exercitiî causâ, quæ non tantùm aliquando non erit illicita, sed aliquando præcepta, v.g. si sit periculum, quòd aliqui ex taciturnitate alicujus respondere capaci, à Fide declinabunt, aut de eadem dubitabunt; deinde aliquando licitum erit in locis ubi Catholici Hæreticis permixti sunt, in quibus partibus alibi per consuetudinem contrariam lex illa est abrogata: Denique: si Laïci sint docti in controversiis, licitum erit iisdem disputare dum occasio se offert, si privatim siue in consortio itinerario, si sperari posset utilitas ex disputatione, qualis sæpè sperari potest, dum pars Hæretica videt ab hominibus plebeis sua argumenta facili negotio elidi & falsificari.

Dicendum 3. Cavendum est, ne quis vel materia- liter disputet ex dubio, quod de Fide Catholica in animo fovet, cùm dubius in Fide sit infidelis: Deinde, cavendæ sunt Verborum contentiones, scom- mata & diçteria, in quæ disputatio cum Hæreticis sæpè dēfinit, adeò ut ille haberi velit in disputando superior, qui convitiis apparet instructior. Cæterùm videndum in hoc negotio ad spem fructûs & timorem periculi, quod ex disputatione secuturum prævideri potest.

*Quamvis
disputatio
sit valer-
dilla.*

*Non licet
de Fide
disputare
ex dubio.*

S E C T I O V.

An liceat ab Hæreticis accipere Sacramenta.

Hæretici qui retinent tam potestatem ordinis quam jurisdictionis. **D**ICENDUM primò, cùm juxta prædicta sect. 2. Hæretici quidam ab Ecclesia tolerantur, & cum iisdem permittatur communicatio, & insuper Hæretici illi retineant potestatem ordinis, si quam habuerunt, & jurisdictionis dum eosdem Ecclesia tolerat, sequitur, quòd aliquando licitum sit ab iisdem Sacramenta suscipere; dicitur enim ibidem de talibus à Martino V. Bulla ad evitanda scandala, &c. *Statuitur quòd nemo deinceps à communione alicujus in Sacramentorum administratione aut receptione, aut aliis quibuscumque divinis, prætextu cujuscumque sententiæ aut censuræ Ecclesiasticæ, &c. Teneatur abstinere.* Quâ Constitutione permittit Pontifex Catholicis, cum Hæreticis toleratis idest non publicè denuntiatis communicare, etiam recipiendo Sacramenta, Addi tamen oportet, cavendum esse eo casu scandalum & perversiōis periculum: Deinde non esse ab ejusmodi Hæreticis Sacramenta suscipienda sine necessitate, & ubi ab aliis eadem commodè suscipi possunt, cùm sine debita dispositione alii Sacramenta illa soleant administrare.

Sacramenta Hæreticorum sunt plerumq; illicita et si valida. Unde notandum, quòd quando dicunt SS. PP. extra Ecclesiam non esse vera Sacramenta, vera sacrificia, &c. Intelligendi sint de veritate quoad debitam administrationem, non item quoad valorem. Vide dicenda de ministro Sacramentorum.

Hæretici possunt intendere facere quod facit Ecclesia. Objiciet tamen hîc obiter: Requiritur ad valorem Sacramenti in ministro intentio faciendi quod facit Ecclesia, quam intentionem habere non potest, qui non credit in Ecclesiam, qualis est Hæreticus. Resp. Intentio Ecclesiæ est eadem cum intentione Christi in conficiendo Sacramentum: Et si ergo Hæreticus non credat in Ecclesiam, cùm tamen velit facere quod Christus

Christus instituit, virtualiter vult facere, quod facit Ecclesia. Quin imò, etsi Hæreticus ille putet nihil operari Sacramentum, nihil obest hoc hæretici iudicium: nam ut ait D. Th. 3. p. q. 64. a. 9. *Non obstante infidelitate potest intendere facere, quod facit Ecclesia, licet æstimet, id nihil esse*: plura de hac re videri possunt de ministri intentione, uti etiam quænam Sacramenta ab ipsis liceat suscipere, de qua re agendum est de quolibet respectivè Sacramento.

APPENDIX.

An Episcopi omnes, & maximè Episcopi Belgii possint absolvere ab Hæresi.

DICENDUM primò, omnibus omninò Episcopis data fuit facultas à Concilio Trid. Sess. 24. reform. c. 6. absolventi ab hæresi occultâ, sive quæ necdum deducta esset ad forum contentiosum, quam tamen facultatem expressè denegat & excipit Episcoporum Vicariis. Hanc tamen facultatem Concilii Trid. revocavit Bulla cœnæ, quæ ita habet: *A prædictis sententiis (egerat etiam de Hæresi) Nullus per alium, quam per Rom. Pontificem, nisi in mortis articulo constitutus, absolvi possit, etiam prætextu quarumcumque facultatum & indultorum, quibuscumque personis Ecclesiasticis, secularibus, &c.* Ubi absolutè revocatur facultas illa data Episcopis à Concilio Trid. dum dicitur, *Etiam prætextu quarumcumque facultatum & indultorum, quibuscumque personis, &c.*

Hæc tamen non obstante, docuerunt plurimi, etiamnum Episcopos gaudere facultate illâ absolventi ab Hæresi occultâ, eo quod lex generalis posterior, ut est dicta Bulla Cœnæ, debeat limitari per priorem particularem, si expressis terminis non contradicat, uti habetur L. *Sed & posteriores ff. de legibus*. Hinc lex Bullæ Generalis posterior, ita juxta illos limitari poterit,

terit, ut solummodò revocet facultatem absolvendi ab Hæresi, quando ea est manifesta: & consequenter non obstante Bullâ Cœnæ possunt adhuc Episcopi absolvere ab Hæresi occultâ in vim dicti Privilegii à Concilio Trid. concessi. Ita illi.

Verùm sententia illa est improbanda, dum hanc sententiam condemnavit Alexander VII. anno 1665. 24. Sept. & est num. 3. *Sententia asserens Bullam Cœnæ solum prohibere absolutionem Hæresis & aliorum criminum, quando publica sunt, & id non derogare facultati Tridentini, in quâ de occultis criminibus Sermo est, anno 1629. 18. Julii in Consistorio Sacræ Congregationis Emin. Cardinalium, visa ac tolerata est.* Unde sequitur prædictam confirmationem non esse admittendam.

Dicendum 2. Dictâ facultate Concilii Trid. non solum gaudebant Episcopi Belgii, sed & insuper aliâ speciali datâ à Gregorio XIII. ad instantiam Philippi II. Regis Catholici, concedente dictis Episcopis facultatem absolvendi etiam ab Hæresi manifestâ, etiam post relapsum, & ab omnibus Casibus Papæ reservatis, etiam in Bullâ Cœnæ: Insuper, quod possint eam facultatem delegare cuicumque Sacerdoti idoneo, uti videre est in Bullâ datâ anno 1576. 25. Feb. & incipit: *Nuper sub die 30. Aprilis, &c.* Data autem erat sub hâc clausulâ, *donec ac quousque Germania inferior in pristinâ Regis Philippi obedientiâ plenariè restituta esset.*

Hinc aliqui sustinuerunt, Episcopos Belgii etiamnum gaudere dicto Privilegio, cum Germania inferior necdum plenariè sit sub pristinâ Regis Catholici obedientiâ. Etsi enim Rex Catholicus cesserit juri suo, quod habere poterat ad partes Hæreticas, nondum tamen partes illæ sub obedientia Regis nostri sunt redactæ, ad sensum Pontificis, qui dictum privilegium concessit ob frequentiam Hæreticorum, qui passim occurrebant in partibus Belgii adhuc Regi subjectis: Unde erat quotidiana necessitas ab Hæresi absolvendi, qualis necessitas

fitas etiamnum durat, imò eo est frequentior, quo
modò est major & liberior communicato Hæretico-
rum cum Catholicis, quâ fit, ut Hæretici videntes
Fidei nostræ Sanctitatem ac veritatem, ad fidem
nostram sæpè convertantur. Ita aliqui.

Verùm pàriformiter, per bullam cœnæ indultum illud esse revocatum, constat ex verbis bullæ supra citatis, imò majori jure, quam indultum Concilii omnibus omninò Episcopis concessis. Unde in vim dicti indulti Episcopi Belgii non possunt ampliùs absolvere ab Hæresi manifestâ, neque ab occultâ. Quia tamen in his partibus est frequens necessitas ab eadem absolvendi, hinc in litteris confirmatoriis sæpè solent dicti Episcopi dictam facultatem à S. Sede accipere, aut etiam specialiter obtinere. Imò hoc aliqui plausibiliter hîc addunt, quòd sæpè hîc uti possint Episcopi Belgii præsumptâ Pontificis facultate, dum sæpè hîc adest gravis necessitas eâ utendi & quasi moralis impossibilitas Pontificem adeundi, ratione paupertatis, infirmitatis, &c.

CAPUT QUINTUM

SECTIO PRIMA.

De Spe.

DICENDUM primò, *Spes* variè sumitur in S. Eloquio. 1. pro objecto Spei, uti dicitur ad Rom. 8. *Spes, quæ videtur, non est spes.* 2 pro eo, à quo, vel per quem aliquid speramus: Sic Psalm. 13. dicitur: *Dominus est spes ejus,* item D. Virgo dicitur *Spes nostra.* 3. sumitur contrariè, adeò ut idem sit, quòd *timere*: Sic Judith. 13. dicitur: *Sperabant eam jam non esse venturam.*

Proprie tamen est virtus divinitus infusa, quâ certâ ^{Quid sit}
eum ^{Spec.}

cum fiducia æterna bona exspectamus Dei auxilio consequenda. Quod sit virtus, patet clarè ex Apostolo, dum ad Heb. 10. ad eandem nos hortatur dicens: *Nolite amittere confidentiam vestram, quæ magnam habet remunerationem.* Quin imò, quod dicere audeat ad Rom. 8. *Spe salvi facti sumus.* Denique virtuosum est, & de se laudabile, expectare bonum illud, ad quod creati sumus, idque ut alterius auxilio obtinendum, cum ad illud assequendum, vires nostræ se solis non sufficient.

*Est virtus
Theologi-
ca.*

Adde, spem esse virtutem Theologicam; prout eam cæteris Theologicis annumerat Apostolus. Deinde, cum spes tendat immediatè in Deum, ut objectum formale & materiale (uti probabitur) sequitur quod spes sit virtus Theologica. Hinc Apost. ad Heb. 6. docet spem incedere usque ad interiora velaminis.

*Spes ne-
quis esse
sine amo-
re*

*Amor ille
est amor
amicitiæ.*

Dicendum 2. Spes Theologica sine amore esse nequit, imò amor ille, ex quo spes nascitur, est amor amicitiae. Prius probatur ex eo, quod generaliter nullà vera virtus, sine charitate saltem imperfecta esse queat, uti probabitur de charitate. Deinde secluso omni amoris actu, nihil in actu spei reperiri potest, quod non possit solis viribus naturæ attribui. Nam ut ait S. Aug. Ench. c. 8. etiam damnati beatitudinem appetunt, imò nihil ita naturæ nostræ proprium, quam sibi ipsi summum bonum concupiscere. Hinc naturam spei describens Conc. Trid. Sess. 6. c. 11. docet, nos rectè agere ob mercedem æternam, sed sollicitè addit: *Ut in primis glorificetur Deus.* Denique S. Aug. c. 8. Ench. apertè docet, spem sine amore esse non posse. Probatur posterius, quia spes ut recta sit, exspectat quidem Deum nobis, sed ultimatè, ut Deus ipse in æternum glorificetur. Primariò ergo Deum propter se diligimus, etsi secundariò ab eo mercedem exspectemus æternam. Si enim Deum diligas tibi ultimatè, Deum ad te ultimatè referendo, perversa & inordinata erit illa dilectio, dum quod altero est superius ordine & dignitate, ad aliud inferius refertur:

*Primario
quarendus
est Deus,
Deinde
merces.*

Quarendus est Deus, Deinde merces.

Quare

Omne enim, quod ad aliud referendum est, inferius est quam id, ad quod referendum est, ait S. Aug. l. 82. qq. q. 30. Hinc rectè notat Lensæus l. 7. de Charitate c. 19. amor mercedis necessariò advenire debere amorem Dei propter se, quo principaliter afficimur erga Deum, & nos amamus ex Deo, & in Deo. Aliàs erit quædam Simonix species, diligere Deum ultimatè propter nos, ut notat Joan. Gerson. Sicut enim Simonia res spirituales temporalibus adæquat, & ad temporales res ut finem ordinantur: ita quoque evenit, si æterna merces ad nos ultimatè ordinetur. Principaliter ergo diligendus est Deus propter se, secundariò autem merces æterna ab eo est expectanda, sic tamen, ut eàdem obtentâ Deus in æternum glorificetur à nobis.

Dicendum 3. Spes debet esse certa: Hinc ad Heb. 6. dicitur *Firma anchora*. Eàdem ratione docet Conc. Trid. Sess. 6. c. 13. ut *Nemo de perseverantia munere sibi certi aliquid absoluta certitudine polliceatur: Tamen si in Dei auxilio firmissimam Spem collocare & reponere omnes debeant*. Ubi Concilium primò perstringit eos, qui volunt spem ita esse certam, ut quilibet sibi certò persuadere possit, se esse Filium Dei, hæredem Regni, sibi remissa esse peccata, &c. Quam confidentiam ac persuasionem *Inanem fiduciam*, appellat Concil. Trid. aliud enim nos docet Scriptura, dum Eccli. 9. dicit nemini notum an odio an amore dignus sit, dum commendat, ut cum timore ac tremore salutem nostram operemur.

Alia proinde est certitudo spei, quæ in eo sita est, quòd bonum, quod speratur, certò subsit; quòd modo ac mediis infallibilibus in illud tendat, ac firmissimè objecto suo adhæreat, certa est certitudine Dei promittentis, qui potens sit, depositum speratum servare, in illum diem justus Iudex. Certissimè enim subsistat bonum speratum, in quo differt à spe mundana quæ hac ratione incerta est, & *Tamquam lanugo, quæ à vento tollitur, & tamquam spuma gracilis,*

Spes humana. quæ à procella dispergitur, Sap. 5. quo pacto à Philosopho spesilla dicitur, *Vigilantium somnus*, quod varia, ut certa sibi persuadeant eventura, quæ tamen revera non subsunt. Deinde fidelis est Deus in omnibus viis suis; denique mediis infallibilibus ad finem spei consequendum utitur Spes Theologica, adeòque firmissima est ac certissima spes nostra.

Certitudo spei in uno est. major quàm in alio. Porro, certitudo illa in uno est major, quam in alio. Prout enim quis minùs obnoxius est, peccatorum occasionibus, & quò magis bonis operibus incumbit, eò spes ejus est magis certa, qua ratione Apostolus Petrus 2. c. 1. admonet, ut per bona opera certam nostram fiduciam faciamus.

S E C T I O II.

De objecto formali & materiali Spei.

Objectum materiale spei. D I C E N D U M primò, Objectum materiale spei, est beatitudo æterna, sive eam velis esse formalem sive consecutionem summi boni, sive objectivam idest ipsum summum bonum. Idem enim est, sive quis dicatur sperare summum bonum, sive consecutionem ejusdem, cum summum bonum non habeat rationem objecti spei, nisi prout à nobis per Dei auxilium est possidendum. Unde idem est, sive dicatur avarus sperare pecunias, sive pecuniæ possessionem.

Bona creata quatenus sunt objectum spei. Dicendum 2. bona creata etiam sunt objecta materialia spei, prout ad beatitudinem conducunt, aut ex ea consequuntur. Hoc tamen notandum, bona creata supernaturalia majori jure esse objectum tale, quam bona naturalia, cum majorem cum objecto spei primario, idest salute æterna, habeant connexionem & viciniorem conjunctionem.

Deus est primarium spei objectum. Ex quo sequitur, quòd Deus ipse sit primarium spei objectum materiale, cum sit summum bonum, cujus

cujus Possessione sumus beandi. Hinc ait ipse Abraham Genes. 15. *Ego protector tuus sum, & merces tua magna nimis.* Et S. Aug. l. 22. de civitate c. ult. *Premium virtutis*, ait, erit ipse, qui virtutem dedit, & qui se ipsum, quo melius aut majus nil esse potest, promissu.

Dicendum 3. Objectum formale spei, est bonitas & omnipotentia divina; quâ vult nobis conferre beatitudinem. Sicut enim objectum formale fidei est veritas divina revelans, quæ partim sita est in summa sapientia, quâ falli nequit, partim in summa bonitate, quâ fallere non potest: Ita formale objectum spei est bonitas divina, unâ cum omnipotentia ejus, cum utraque sit ratio sperandi beatitudinem. Si enim Deus esset quidem bonus, non tamen posset dare beatitudinem, aut si quidem posset, non tamen haberet bonitatem quâ beatitudinem dare vellet, vacillaret spes nostra. Utrumque ergo tam Dei omnipotentia, quam Dei bonitas est ratio movens ad sperandum, adeoque objectum formale spei.

Sequitur ex dictis prædictorum confirmatio, scilicet spem esse virtutem Theologicam, cum pro objecto formali & materiali immediato habeat ipsum Deum.

SECTIO III.

Cui & in quo liceat Sperare.

DICENDUM primò, potest quis alteri sperare beatitudinem. Probatur, quia quatenus quis alteri unitur per amorem, ut sit quasi alter ego, potest alteri velle beatitudinem, non quatenus est alterius bonum præcisè, sed quatenus beatitudinem alterius reputat bonum proprium. Pro quo notandum est, quòd spei objectum semper dicat ordinem ad sperantem, etsi quoque sit alterius bonum: Quo sensu verum est, quod dicit S. Aug. Ench. c. 8. ubi ait: *Spes non nisi bonarum rerum est, nec nisi futurarum, & ad*

eum pertinentium, qui earum spem gerere perhibetur.

*Quomodo
sit speran-
dum in
sancto.*

Dicendum 2. Licitum erit sperare in Sanctis & aliis hominibus, quo sensu dicitur Deipara *spes nostra*. Hoc tamen notandum est, in nullâ creaturâ quantumvis Sanctâ Licitum esse sperare ut in causâ principali salutis nostræ, aut principali meritoria. Aliàs qui taliter spem ponit in homine, maledicitur à Scriptura Sacra 2. Paralip. 16. Psalmo 43. & 146. Solus enim Deus, est causa principalis nostræ beatitudinis, cæteri tantum causa ejusdem instrumentalis, unde in Sanctorum merita sperare licet, sed quæ totam suam impetrandi vim recipiunt à meritis Christi. Vide quæ in simili dixi de adoratione & invocatione SS. Hinc etiam

*Spes in
principes
hujus sa-
culi.*

Chrysost. Homilia 16. in Genesim, in illud, *Bonum est sperare in Domino, quam sperare in principibus*, to bonum non intelligit comparativè, sed adversativè, adeò ut in principibus sperare non sit bonum, sperare inquam in illis, ut in causa principali nostræ beatitudinis.

*Spes re-
cte respi-
cit meri-
ta.*

Rectè tamen speramus in merita nostra, quibus vocationem nostram certam facimus, cum in illud sperare liceat, quibus Deus mercedem suam repromittit, ut sunt merita nostra, quamvis, quòd illa eadem habeamus, ex Divina proveniat benignitate & misericordia. Hinc dicitur, spem nostram crescere ex meritis, etsi tamen semper cum timore & tremore salutem nostram operari debeamus.

S E C T I O IV.

De subjecto Spei.

*Spes est in
beatis.*

D I C E N D U M primò, in beatis esse spem: sperant enim gloriam corporis, quâ Deus modo perfectiori, idest, tam quoad corpus, quam quoad animam possidetur.

In Christo.

Dicendum 2, Christus speravit hinc corporis sui beatitudi-

titudinem, cùm illa haberet omnes conditiones ad objectum spei requisitas, erat enim bonum absens & arduum; cùm oporteret Christum pati, & ita intrare in gloriam suam, & adipisci exaltationem sui nominis. Actus autem ille erat actus virtutis Theologicæ, cum beatitudinem corporis desiderabat tamquam medium Deo perfectius fruendi, & consequenter implicite tendebat in Deum.

Dicendum 3. Animæ Patrum in limbo & animæ *In anima-*
in purgatorio habuerunt spem Theologicam. De pa- *bis Pur-*
tribus in limbo dicitur Sap. 3. *Spes tamen illorum immor-*
talitate plena est. Animæ quoque in Purgatorio, ex- *gatorii.*

pectant beatitudinem, quæ ipsis absens est & ardua ad acquirendum, puta per tormentum ignis. Unde falsum est, quod docent Hæretici nostri, quòd scilicet de sua salute desperent, quod dogma disponit ad negandum Purgatorium, prout postmodum Luther aggressus est.

Dicendum 4. Neque damnati, neque Hæretici ha- *Non in-*
bent spem Theologicam. Damnati enim sciunt salu- *damnatu.*
tem suam sibi esse impossibilem, quàm si quando de- *neque in*
siderant ex innato naturæ instinctu, quo quilibet appe- *Hæreticu.*
tit beatitudinem, tamen desiderium illud est inefficax. Quòd si aliqui damnati ad vitam legantur resuscitati, non idèò tamen in inferno data est redemptio, sed solum pro tempore pœna suspensa, postea pœnis inferni plectendi.

Hæretici verò non habent spem, cùm spei funda- *Spes potest*
mento scilicet Fide, sint destituti. Licet enim sperent *esse in pec-*
idem quod Catholici, puta beatitudinem, tamen *catoribus.*
deest certitudo ad sperandum requisita, cùm nec spe-
rent modo infallibili, idest, non sperent salutem per
bona opera, per veram Fidem, &c. Prout speranda est.

Dicendum ultimò, Spes Theologica potest esse in
peccatoribus, spes enim sæpè illis infunditur ante cha-
ritatem, nec quovis peccato mortali spes amittitur,
sed solà desperatione & infidelitate, quâ corrui-
des, quæ est spei fundamentum.

SECTIO V.

De Præcepto Spei.

*Præceptum
spei per se
obligat.*

DICENDUM primò, agnoscendum est verum spei præceptum, per se & directè obligans. Hinc Sacra Scriptura 1. Timoth. 6. jubet præcipi divitibus hujus sæculi sperare in uno Deo. Deindè Paralip. 10. dicitur fuisse maximum Saülis peccatum, quòd non speravit in Domino. Item Sapientiæ 2. Objicitur impiis, quòd non sperarint mercedem justitiæ: Unde contraria Doctrina damnata est ab Alexandro VII. in hæc: *Homo nunquam in vita tenetur elicere actum fidei, spei & Charitatis.* Denique attentâ fragilitate naturæ nostræ, moraliter fieri nequit, ut sine spe æternæ retributionis, superemus difficultates in exercitio virtutum occurrentes.

*Idque adeo
depro-
rati-
onem
usu.
Quando
qui con-
vertitur
ad fidem.
Dum ten-
tatur de-
speratio-
ne.*

Dicendum 2. Obligat præceptum spei, primò post adeptum usum rationis, quando Deus ut est finis nostræ ultimus, sufficienter est propositus. Quod tempus morali judicio est determinandum. Secundò obligat, quando quis ad fidem convertitur, cum tunc in hunc finem tota vita conversi sit dirigenda. Tertiò obligat, quando urget gravis tentatio circa spei virtutem, v. g. desperationis: Tenemur enim periculum peccati avertere mediis opportunis, aliàs *Qui amat periculum, peribit in illo.* Quarto obligat, dum quis susci-

*pere debet
Sacramen-
tum Baptis-
mi aut
pœnitentia
Dum quis
orat.
In articu-
lo mortis,*

pere debet Sacramentum Baptismi aut Pœnitentiæ, cum juxta Trid. Sess. 6. c. 6. ante justificationem requiratur motus spei. Quintò obligat, dum tenemur orare, aliàs absonum illud orare, quod non speratur. Sextò in articulo mortis, quando instat terminus spei. Unde ad actum hunc obligantur Confessarii Moribundis assistentes eosdem admonere, uti & ad actum aliarum virtutum Theologicarum.

SECTIO VI.

De dono Timoris.

DICENDUM primò, timor gehennæ est actus virtutis spei, cum sit ejusdem virtutis prosequi finem & odissè oppositum: Gehenna autem est beatitudini opposita. Unde patet actum timoris non esse malum, non facere hominem hypocritam & magis peccatorem, prout voluit Luther. Pro cujus intelligentia notanda est divisio timoris in filialem, initialem, servilem & mundanum.

Filialis est timor mali ut est offensa Dei, quia Deo displicet: Oritur enim ex affectu Dei, qui Filiis ejus est proprius, qui non acceperunt spiritum servitutis in timore, de quo etiam dicit S. Aug. conc. 25. in Psalm. 118. *Timore casto peccare timet charitas, etiam si sequatur impunitas.* *Timor filialis.*

Timor initialis est timor mali, partim quia dilecto displicet, partim quia pœnosum est timentis. Habet ergo timor ille quasi duos oculos, quorum uno culpam, alio pœnam respicit, quæ malum adfert, quod timetur. Porro, prout adjunctam habet formidinem pœnæ, imperfectus est, adeòque distinguitur à timore casto seu filiali, ut charitas imperfecta à charitate perfecta.

Timor servilis est timor mali, præcisè quia nobis est incommodum: Spiritus enim timoris, servis est proprius, qui à peccando abstinent formidine pœnæ. Timor ille secundum suam substantiam bonus est, etsi secundum suam servilitatem habeat quòd sit malus, ut ait D. Thom. rectè enim averfamur ea, quæ sunt naturæ nostræ contraria, prout facit timor servilis secundum suam substantiam. Servilitas tamen ejus mala est & timentem voluntatem inficit, quæ malum pœnæ, præcisè quia sibi pœnale est, averfa-

*Servilitas
in quo sita
sit.*

tur, nec quidquam de offensa Dei considerat, soli suæ cuti intenta, nec actum illum timoris ullatenus ad debitum finem dirigit. Hoc autem malum esse, & inordinatum sibi ipsi inhærere ut ultimo fini, jam alibi ostendimus.

*Utilis est
timor ille.*

Varias tamen timor ille habet utilitates; primò, quòd per timorem illum peccandi Consuetudo reprimatur; secundò quòd aptum reddat hominem ad ductum Spiritûs Sancti promptius recipiendum: Tertiò, quòd juxta Conc. Trid. homo per timorem disponatur ad considerandam Dei misericordiam; Quartò quod locum charitati præparet, unde S. Aug. timorem comparat setæ, quâ filium charitatis introducit.

*An servi-
lis timor
sit donum
Spiritûs
Sancti.*

Dicendum 2. timor servilis non est donum spiritûs Sancti sed solùm filialis & initialis. Timor enim servilis ex parte servilitatis habet, quòd sit malus. Sicuti enim fortitudo gentilium non est donum Spiritus Sancti, eo quòd illam cupiditas faciat: Ita nec timor servilis, qui ex eodem fonte procedit. Hinc de eo ita scribit S. Bonaventura de 7. donis Spiritûs Sancti c. 1. de dono timoris: *Timor dicitur servilis, quo quis magis timet pœnam, quam culpam: Qui secundum essentiam dicitur esse à Deo, non tamen sub ratione qua servilis est, quia principalius timet pœnam, quam culpam: Nec mutat voluntatem in bonum (N. B.) licet criminis impediatur executionem.* Prædicta confirmat S. Thomas 2. 2. q. 19. a. 9. ubi ita ait: *Ut aliquid sit bene mobile ab aliquo movente, primò requiritur, ut sit ei subjectum, non repugnans: Quia ex repugnantia mobilis ad movens, impeditur motus. Hoc autem facit timor filialis sive castus, in quantum per ipsum, Deum reveremur, & refugimus nos illi subducere.* Cui addi potest quòd timor initialis, in quantum considerando malum ut est offensa Dei, refugit illi se subducere & Deum reveretur.

*Timor
mundanus.*

Timor mundanus est timor, quo ita timemus malum temporale, ut propter illud declinandum parati simus Deum offendere. Timor ille absolute est malus,

malus, cùm sit implicita volitio peccati, quod necessarium putatur ad cavendum temporale incommodum quod timetur, prout efficax volitio finis, est implicita volitio medii. Timor ergo mundanus est summè imprudens, qui ut corpus fervet, corpus & animam perdit in gehennam. *Est malus, & quare.*

Dicendum 3. Datur timor permanens in patria, de quo ait Psalm. 18. *Timor Domini permanens in seculum seculi.* Beati enim præ summo amore, quo feruntur in Deum, averfantur peccatum, ut est offensa Dei & summæ bonitati contrarium. Alius quoque in beatis est timor, quem vocant *Reverentialem*, de quo dicitur Job. 6. *Quod Columnæ cæli contremiscunt & pavent ad nutum ejus.* Ad quod S. Greg. tremor, ait, *ille ne iis pœnalis sit, non timoris est, sed admirationis.* *Timor æternus.*
Beati enim ex consideratione summæ Majestatis & propriæ vilitatis, reverentiali timore afficiuntur, sic tamen, ut timor ille non causet quamdam anxietatem, ab illorum statu planè alienam, sed qui naturaliter ex tali consideratione nascitur. Hinc de illo timore ait S. Aug. l. 14. de civit. c. 9. *Si maneat in beatis timor, non est ille exterrens à malo, quod accidere potest, sed tenens in bono, quod amitti non potest.* Quare ab aliis dicitur *Timor securus.* *Timor reverentialis.*

S E C T I O VII.

De desperatione.

DICENDUM primò, quòd, sicuti spes consistit in efficaci volitione beatitudinis: ita desperatio consistat in quadam efficaci nolitione ejusdem quæ quis non vult prosequi beatitudinem. Ad hoc autem non requiritur, ut bonum illud, quod prosequi renuit, judicet impossibile, aut se illud non consecuturum, sufficit enim, quòd judicet illud esse valde difficile obtentu. voluptatibus, quas perditè amat, esse *In qua si sit desperatio.*

esse contrarium ; ratione cujus à prosecutione talis boni vult imposterum abstinere. Hinc quando dicitur, quòd desperatio supponat iudicium, quo bonum aliquod, circa quod versatur desperatio, iudicatur impossibile, intelligi potest de moraliter impossibili, seu valde difficili.

Potest esse sine infidelitate. Dicendum 2. Potest desperatio esse sine infidelitate, etsi infidelitati sit semper proxima. Probatur prius, quia stante iudicio, quo iudico in Ecclesia esse remissionem peccatorum, & me absolutè posse consequi beatitudinem : tamen illam prosequi absolutè possum nolle, eo quòd iudicem beatitudinem esse valde difficilem ad adipiscendum, ob perversam erga mundi delicias affectionem.

Est tamen desperans infidelitatis proximus. Probatur posterus, quia desperans facilè sibi format iudicium Hæreticum, puta quòd major sit iniquitas ejus, quam ut veniam mereatur, quòd salus alicui sit impossibilis, &c. Et hoc sensu verum est illud Chrysostomi Homil. de Fide, Spe & Charitate : *Fides & Spes sibi mutuà vice ita connexa sunt, ut altera sine altera stare non possit.*

Motiva desperandi. Dicendum 3. Varia sunt motiva & peccata, ex quibus oritur desperatio. Desperamus enim, quia iudicamus prosecutionem boni sperati esse inutilem : Quia voluptates mundi deferere renuimus & quia prosecutionem boni sperati iudicamus moraliter impossibilem. Potest desperatio oriri ex variis peccatis, prout variis quis est addictus, ratione quorum quis renuit prosequi beatitudinem : Sæpè tamen oritur ex infidelitate, qua quis credit peccata sua esse graviora, quam ut misericordiam Dei mereantur : sæpè etiam nascitur ex acedia, quando hominem tædet difficultates in prosecutione boni sperati occurrentes perfringere & superare.

Est de se peccatum mortale. Dicendum 4. Desperatio est de se peccatum mortale cæteris gravius, neque in ea dari potest parvitas materiæ. Probatur prius, quia grave crimen est, nolle beatitudinem prosequi. Deinde repugnât apertè spei

spei Theologicæ, quo casu magis à Deo avertit, quam cætera vitia, virtutibus moralibus opposita; levior tamen est desperatio odio & infidelitate, eo quòd hæc directè contrarietur veracitati divinæ, & faciat Deum mendacem: Illud autem contrariatur directè divinæ bonitati, adeoque maximam Deo infert injuriam; Desperatio verò non directè avertit à Deo nec à beatitudine secundum se, (cùm quilibet eam velit) sed solum à prosecutione ejusdem. Maximis tamen vitiis portam aperit desperatio, juxta illud Apostoli ad Ephes. 4. *Desperantes, semetipsos tradiderunt impudicitiae, in operationem immunditiæ omnis, in avaritiam.* Sic Cain desperans, profugus fuit super terram; Judas desperans laqueo se suspendit; idem videre est in aliis.

SECTIO VIII.

De Præsumptione.

DICENDUM primò, *præsumptio* est spes obtinendi à Deo beatitudinem & bona supernaturalia, aliis mediis, quam Deus illa obtinenda constituit. Cùm enim spes sit desiderium efficax consequendi beatitudinem & alia bona ad illam conducentia, idque per auxilium divinum; præsumptio illi opposita, est volitio illa conquirendi, sed per media indebita, seu inordinata.

Præsumptio igitur dicta, est grande crimen: Hinc dicit Deus Eccli 18. *Vidi præsumptionem cordis eorum, quia mala est.* Ratio ejus est, quòd velle bona supernaturalia aliis mediis, quam Deus statuit, sit divinæ providentiæ ac sapientiæ contraire: Unde nisi indeliberatio excuset, à mortali vix excusatur.

Dicendum 2. Varia potest esse præsumptio: Vel enim solis naturæ viribus gloriam adipisci quis sperat, & est præsumptio Pelagiana: Vel solâ Dei justitiâ, nulla.


nullatenus ex parte nostrâ merendo ; & est Lutherana : vel nimium de divinâ misericordiâ præsumendo , pœnitentiam ad ultimum vitæ differendo , quæ implicita est desperatio , cùm implicitè non velit adhibere media ad salutem consequendam necessaria , puta pœnitentiam , abstinentiam à peccatis , &c. Nec ille postmodum veniam meretur , cùm justum non sit , ut talis misericordiam inveniat , qui ex illa occasionem sumpsit gravissimè peccandi , & divinam misericordiam irritandi.

*Quanam
præsum-
ptio de-
struat spẽ.*

Dicendum 3. præsumptio Pelagiana & Lutherana destruit spem. Cùm enim illâ præsumptione amittatur Fides , corrumpitur & spes , quæ supra fidem est fundata. Non tamen omni præsumptione perit spes cùm possit quis aliis mediis tendere in beatitudinem quam Deus constituit , sic ut de cætero nullo fidei , errore formali laboret , puta nimium de misericordia divina præsumendo , de quo in alia conclusione actum est. Ut autem Sciatur an præsumptio hæresim annexam habeat nec ne , videndum est an falsitas ex qua præsumptio nascitur , sit contra articulum fidei aut Ecclesiæ propositionem nec ne , ad cujus considerationem de hoc casu est dijudicandum.

*Præsum-
ptio a-
lii.*

Dicendum ultimò , præsumptionis reus est , qui putat gentiliter vivendo , & interim Deiparam aut alios Sanctos colendo , se esse ex prædestinatorum numero. Deinde præsumptioni favent , qui voluntati partes tantas gratiæ efficacis adscribunt , quasi voluntas sit , quæ per consensum ad bonum opus se determinet. Ratio est , quòd salus æterna juxta divinum statutum , non sit obtinenda vitâ gentili , sed verâ fide operibus conjunctâ : Nec bona opera per voluntatis consensum principaliter , sed à gratia sint principaliter expectanda.



De Charitate.

Quid, & quomplex sit Caritas.

Uberius S. August. Epist. 29. charitatem dicit omnem omnino virtutem, dum ait : *Virtus est charitas*,
qua

qua id quod diligendum est, diligitur. Et Epist. 25. in hac vita virtus non est, nisi diligere, quod diligendum est.

Definitio Charitatis Propriè tamen Theologis, *Charitas est virtus divinitus infusa, quâ Deus propter se diligitur, proximus autem propter Deum.*

Actualis & habitualis. Dicendum 2. Variè dividi charitatem ac primò in actualem & habitualem. Divisionem illam innuit aliquoties S. August. nunc charitatem *virtutem* vocans, ut mox ostensum est: Virtus autem de se habitum importat: Nunc rursus eandem *cupiditatem boni* dicens, ut l. 2. ad Bonif. c. 9. nunc iterum *motum animi ad fruendum Deo*, ut l. 2. Doctrinæ Christ. quæ propriè & de se actum designant & important.

Perfecta & imperfecta. 2. Dividitur Charitas in perfectam & imperfectam. *Perfecta* unit perfectè cum Deo, Filium Dei constituit & hæredem Regni. De hac agit Apost. ad Rom. 5. & Concilium Trid. Sess. 6. c. 7. docens in ipsa justificatione cum remissione peccatorum, *Charitatem* cum fide & spe infundi. *Imperfecta*, est omnis omninò bona voluntas, etsi ad eam perfectionem non pertingat, ut Filios Dei constituat & hæredes Regni, & ut remissionem peccatorum infallibiliter conferat. Hæc est illa charitas, quæ in Catechumenis ante Baptisma, & in sese ad justitiam disponentibus reperitur juxta Concilium Tridentinum Sess. 6. c. 6., docens de iisdem, *Quòd Deum tamquam omnis justitiæ fontem diligere incipiant & Quam dispositionem justificatio ipsa consequitur* ut ait initio capitis sequentis. Dictam distinctionem quoque innuit censura lata à Pio V. in hanc sequentem propositionem num. 61: *Illà distinctio duplicis vivificationis, alterius quâ vivificatur peccator, dum ei pœnitentia & vitæ novæ propositum & inchoatio per Dei gratiam inspiratur: Alterius, quâ vivificatur, qui verè justificatur, & palme vivus in vite Christo efficitur, pariter commentitia est, & Scripturis minimè congruens.* Contra quem articulum scribens, facultas Theol. Lovan. c. 11. ita subdit. *In pœnitentia ane suam justificationem esse aliquem amorem justitiæ.* Talem

lem imperfectum amorem admittendum esse, probatur quoque ex eo, quod in peccatoribus sit vera spes & vera fides, quæ sine omni Charitate esse non possunt, uti probavi in antedictis. Idem innuit S. August. dum ait, quod *Inchoata Charitas, sit Inchoata justitia, & Perfecta Charitas sit Perfecta justitia, &c.* Notat tamen Lensæus l. 7. de Charitate c. 3. Charitatem imperfectam rectius vocari *Amorem* aut *Dilectionem* quam *Charitatem*.

3. Dividitur Charitas in naturalem & supernaturalem de quibus egimus de gratia.

4. Dividitur charitas in charitatem efficacem si-
Charitas
prædomi-
nans &
non præ-
dominans.
 ve prædominantem & inefficacem, prout cupiditatem contrariam efficaciter excludit, eique prædominatur, vel eandem non excludit.

Dicendum 3. Charitas hæc est virtus omnium excellentissima. Quod sit virtus clarum est, cum per charitatem rectè vivatur, juxta illud S. August. de moribus Eccles. c. 25. *Bene vivere est diligere illud, quod diligendum est*: Deinde nullus charitate malè utitur, cum charitas non agat perperam; unde S. Aug. l. 15. de civit. c. 22. *creator, ait, si veraciter ametur, hoc est, si ipse non aliud pro ipso, quod non est ipse, ametur, malè amari non potest.*

Quod verò sit virtus omnium excellentissima, patet 1. ex eo quod juxta Apostolum, *major horum* (id est virtutum Theologicarum) *sit charitas*. Ex quo sequitur, quod etiam sit excellentior virtutibus moralibus, quibus præstant aliæ virtutes Theologicæ.

SECTIO II.

De objecto Charitatis.

DICENDUM primò, objectum materiale primum, in quod tendit. Charitas, est ipse Deus.
Deus est
objectum
charitatis
primarium.
 Confirmat hoc Scriptura Sacra ad Rom. 5. ubi dicitur,

citur, quòd *Charitas Dei diffusa sit in cordibus nostris*. Ubi *Charitas Dei* dicitur, non tantum quòd à Deo sit, sed etiam quia in Deum tendit. Ratio est, quòd voluntas præcipue tendat in Deum, ratione suæ bonitatis infinitæ.

*Cætera
propter
Deum.*

Nec solum Deus est objectum materiale charitatis, sed etiam omne illud, quod propter Deum est amabile, quale est omnis creatura, cui quis potest vel le existentiam, ut in ea reluceat divina sapientia.

*Objectum
formale
Charitatis*

Dicendum 2. objectum formale charitatis est bonitas infinita, propter quam aliquid aliud diligimus. Per bonitatem intellige quamlibet perfectionem Dei, cum omnis Dei perfectio reddat Deum propter se amabilem. Unde S. August. Charitatem describens eam dicit *Amorem justitiæ divinæ, immutabilis sapientia, inflexibilis legis, &c.*

Unde sequitur, quòd charitas sit virtus, quâ volumus Deo bonum propter Deum, id est, quia ipse Deus in se bonus est, vel quia justus est & Clemens, &c. In quibus bonitas divina relucet. Hinc patet, quomodo à spe differat Charitas, quæ Deum vult nobis, seu quia nobis bonus est.

*Eadem est
charitas
Dei &
proximi.*

Dicendum 3. Eadem est Charitas, quâ diligo Deum, & proximum propter Deum. Apertè id docet S. Aug. l. 8. de Trin. c. 8. ubi ait: *Ex una eademque Charitate, Deum proximumque diligimus, sed Deum propter Deum, nos autem & proximum propter Deum.* Plura de hac re dicam in sequentibus, agendo de Charitate proximi. Porro varix sunt rationes, ob quas proximus est diligendus propter Deum, quia ejus dilectionem Deus præcepit, quia homo est *Opus Dei, agricultura Dei, Templum Dei, &c.*

S E C T I O I I I.

An, & quomodò Charitas possit augeri, minui & deperdi.

D I C E N D U M primò, quòd charitas possit augeri, & de imperfectâ possit fieri perfectâ. Innuit illud Ecclesia, dum rogat *Fidei Spei & Charitatis augmentum.* Idem confirmat S. Augustinus Enchiridii cap. penult. ubi ait : *Minuetur cupiditas, crescente charitate.* Adde, quòd quilibet actus charitatis, mereatur ulteriorem charitatis fervorem.

Dicendum 2. Verius videtur, quòd charitas minui possit per peccata venialia, ut cæteræ qualitates, sic tamen ut iisdem non possit deperdi. Rationem dat S. Aug. l. 83. qq. ubi ait : *Venenum charitatis est cupiditas; ubi autem magna cupiditas, parva charitas; & ubi nulla est cupiditas, perfectâ est charitas.* Idem probat alibi in confessionibus, ubi ait : *Minus te amat, qui tecum aliquid amat, quòd propter te non amat.* Sic Scriptura Sacra dicit, quòd abundante malitiâ refrigescet charitas multorum, idest, sensim à calore per teporem pertinget ad frigus cordis. Clarissimè autem id affirmat S. Fulgentius l. 2. ad Monimum, ubi ait : *Nam cum dona Spiritus Sancti sunt charitas, pax, gaudium..... & alia quæ commemorat, hæc tamen, inquit, omnia possunt in hominibus & augeri & minui.* Quomodò tamen charitas minui possit, non tamen deperdi per peccatum veniale, declarat Lensæus prædictæ sententiæ defensor, similitudine ductâ à lineâ, quæ minutissimis detractiunculis minui potest, sic ut numquam eisdem ad indivisibile contracta, quantitatis suæ rationem amittat, etsi aliâ viâ lineam interire posse, certum sit.

Ut ut sit, certum est, quòd peccata venialia dispositivè concurrant ad interitum Charitatis, quatenus disponunt ad mortale. Denique certum est, quòd

Charitatis fervorem destruant & deperdant, ut alibi dictum est.

*Peccatum
mortale
destruit
Charita-
tem.*

Dicendum 3. Charitatem deperdi per quodlibet peccatum mortale, definitum est in Conc. Trid. sess. 6. can. 23. de justificatione. Hinc etiam Christus admonet dicens: *Manete in dilectione mea*: Quod non admoneret, si charitas semel habita deperdi non posset. Hinc etiam Apostolus 1. Corinth. 6. docet, quod neque fornicarii, neque adulteri, neque molles Regnum Dei possidebunt.

*Idque de-
meritoriè
non item
Physicè.*

Cum vero quodlibet peccatum mortale gravissimam contineat offensam in Deum, adeoque mereatur rescissionem amicitiae divinae: Sequitur, quod demeritoriè Charitas expellatur per peccatum mortale, non item physicè, cum charitas cum actu mortalis peccati nullam habeat physicam repugnantiam: Potest enim Charitas consistere cum actu peccati mortalis indeliberato, aut primò primò, quocum æqualiter deberet repugnare, uti cum tali actu deliberato, si esset physica inter illa repugnantia, cum sit eadem ratio Physica peccati mortalis deliberati & indeliberati. Idem conformiter dicendum est de destructione virtutum aliarum per opposita vitia, quod scilicet solum demeritoriè destruantur per illa, non autem Physicè.

SECTIO IV.

An omnis Charitas justificet.

*Aliqua
Charitas
per se ju-
stificat.*

DICENDUM primò, ex dictis patet, dari aliquam charitatem per se justificantem, quæ hæredem Regni faciat & remissionem peccatorum infallibili lege conferat. Patet hoc ex Conc. Trid. quod Sess. 14. c. 4. docet, contritionem aliquando Charitate perfectam, hominem reconciliare, etiam priusquam Sacramentum actu suscipiatur.

Dicen-

Dicendum 2. Ex dictis quoque patet, non omnem charitatem justificare, uti patet in charitate quæ in peccatoribus reperitur. Defectu hujus orta sunt insulsa dogmata in re Theologicâ; uti quod status peccati mortalis conjungi nequeat cum charitate: quemlibet amorem mundi esse cupiditatem, aut laudabilem illam charitatem, quæ diffunditur in cordibus nostris per Spiritum Sanctum: quamlibet charitatem conferre remissionem peccatorum, & alia, quæ innitebantur his argumentis.

1. Quod quâlibet charitate tollatur aversio voluntatis à Deo, adeoque & peccatum, quod in tali aversione consistit.

Objectionum solutiones.

2. Quod, si quis per amorem se convertat ad Deum, Deus se quoque convertat ad ipsum: cum ipse dicat: *Ego diligentes me diligo.*

3. Quod Deus cor contritum & humiliatum per amorem non despiciat. Ad quæ respondetur, quod quidem per quamlibet charitatem tollatur aversio à Deo ex parte affectûs, sed non ex parte reatûs; sive quod idem est, affectus inordinatè per peccatum affixus creaturæ; tollitur per charitatem, non tamen idèò per illam tollitur aversio quoad reatum, neque omni charitate omnis culpa & pœna deletur.

Ad aliud Respondeo, quod non semper, quando se homo per amorem convertit ad Deum, Deus se convertat ad illum; ita ut peccata remittat, eumque justificet: Idem est de timore, quo juxta aliquos ad Deum se homo convertit; non tamen omnis timor idèò justificat. Unde quando se homo perfectè convertit ad Deum, etiam Deus ita convertitur ad eundem, ut simul peccata remittat. Ad confirmationem dico, quod Deus diligentes se diligit, tum quia dilectionem ipsis inspirat; tum quia diligentes perfectâ charitate, ita diligit, ut simul remissionem peccatorum infundat, eaque remittat.

Ad ultimum Respondeo, timore quoque cor contriti & humiliari, non idèò tamen timore remittantur

peccata; unde, si perfectè conteritur cor & humiliatur per amorem perfectum, Deus illud non despiciet, sed remittet peccata commissâ.

SECTIO V.

An sine Charitate possit esse vera virtus.

Non est vera virtus sine charitate.

DICENDUM primò, quòd ad omnem virtutem requiratur Charitas saltem imperfecta probatur ex alibi dictis, quòd ad actum unde quaque bonum requiratur, ut ex charitate saltem virtualiter procedat. Hinc ait S. Thomas 2. 2. q. 23. a. 7. quòd *Sine charitate possit quidem esse aliquis actus bonus ex suo genere, non tamen perfectè bonus, quia deest debita ordinatio ad debitum finem.* Idem dicit S. August. docens non esse veras virtutes, vel quæ voluptati inservirent, ut Epicureorum, vel humanæ laudi & gloriæ, ut Stoicorum, vel alteri cuivis fini, præter Deum ejusque gloriam. Audi S. Patrem l. 4. contra Jul. c. 3. ubi ait: *Cum non ad suum referuntur authorem dona Dei, hoc ipso mali his utentes efficiuntur injusti: Si quas habent virtutes, veras non habent.* Hinc & concludit: *Absit, ut veræ virtutes, cuiquam serviant, nisi illi, vel propter illum, cui dicimus: DEUS VIRTUTUM CONVERTE NOS.* Proinde virtutes, quæ carnalibus delectationibus, vel quibusque commodis & emolumentis temporalibus serviunt, veræ prorsus esse non possunt: Quæ autem nulli rei servire volunt nec ipse veræ sunt. Veræ quippe virtutes Deo serviunt in hominibus, à quo donantur hominibus.

Non fides, nec spes, nec 4 virtutes Cardinales.

Dicendum 2. Non posse fidem aut spem esse sine charitate, uti in anterioribus comprobatum est. De quatuor virtutibus Cardinalibus illud idem probat S. Augustinus, docens illas ipsas esse amorem, officio diversum. Lubet rursus audire S. Præfulem de moribus Ecclesiæ c. 15. illud, (inquit) *Quod quadriparsita virtus dicitur, ex ipsius amoris vario quodam affectu, quantum*

quantum intelligo, dicitur: Itaque illas quatuor virtutes, quarum utinam ita sit in mentibus vis, ut nomina in ore sunt omnium, sic etiam definire non dubitem, ut temperantia sit amor, integrum se præbens ei, quod amatur: Fortitudo amor facile tolerans omnia, propter quod amatur: iustitia amor soli amato serviens, & propter eam rectè Dominans: Prudentia amor, ea quibus adjutur, ab eis quibus impeditur, sagaciter seligens: sed hunc amorem non casu libet, sed Dei esse diximus, idest summi boni, summæ sapientiæ, summæque concordie. Vide eundem l. 6. de Musica c. 15.

Dicendum 3. Idem de Religione dicendum est, Nec Religi- quòd non possit esse sine charitate. Probat hoc idem⁵¹⁰. S. Doctor Epist. 29. ad Hieron. & rogat: Quid autem est pietas, nisi cultus Dei? Et unde ille colitur, nisi charitate? Uti etiam in Psalm. 77. ubi expressè ait: Hoc colitur, quod diligitur.

Dicendum 4. Ex dictis sequitur, quòd Charitas sit forma virtutum; quod verum est, quatenus per charitatem in debitum finem virtus ordinatur: Deinde, quatenus omnis virtus, de se eo tendit, ut Deo placeat, & operantem reddat Deo gratum, adeoque omnis virtus tendit in finem charitatis qui est Deo placere, ejusque bonum procurare.

Objici posset, quòd prædicta omnia damnata sint in hac: Non est vera legis obedientia sine charitate. Resp. per charitatem intelligebat author illius & aliorum articulo-^{Est vera}rum, charitatem perfectam, qualis tunc juxta^{virtus sine} receptum usum per charitatem intelligebatur, ut antea^{Charitate} ex Lensæo notavimus: Quo sensu indubiè falsa est^{perfecta.} dicta propositio. Quomodò tamen legem non impleat, nisi charitas, vide ex S. Augustino probatum in materia de legibus. Aliàs etiam dicta intelligendo de charitate imperfecta seu bona voluntate, vera est juxta dicta, objecta propositio. Aliàs in illa damnata erit illa Joan. 14. Qui non diligit me, sermones meos non servat. Unde stat firma hæc S. Aug. in Ps. 67. sententia, dum dicit: Ea quippe sola bona opera dicenda sunt, quæ fiunt per dilectionem Dei.

H 3 Quo-

Quomodò item non possit esse salutaris attritio sine charitate, dicam agendo de Sacramento Pœnitentiæ.

SECTIO VI.

De Charitate sui ipsius.

DICENDUM primò, juxta S. August. l. 1. de Doct. Christ. c. 23. & 26. *Quatuor ex charitate sunt diligenda. Unum quod est supra nos, idest Deus, ut summum nostrum bonum & ultimus finis, ad quem dirigenda sunt cetera. Deinde, aliquid quod nos sumus. Ad hunc sui amorem homo à natura satis inclinatur, quâ ratione, qui sibi nequam est, nulli bonus esse agnoscitur. Unde pro adagio usurpatum est, amor incipit à se ipso.*

Amor sui cuiuslibet naturalis. Quæret quispiam cum S. Augustino l. de moribus Ecclesiæ c. 26. videtur de homine ipso, idest, de amatore ipso nihil actum in charitatis mandato; verum respondet idem S. Doctor: *Parùm dilucide, qui hoc arbitratur, intelligit. Non enim fieri potest, ut se ipsum, qui Deum diligit, non diligat: imò verò solus se novit diligere, qui Deum diligit. Si quidem ille satis se diligit, qui sedulò agit, ut summo & vero perscrutetur bono.* Idem docet Epist. 52. Respondent alii, implicite satis amorem sui primo dilectionis mandato præcipi, dum amor sui ipsius assignatur pro regula, cui commensurari debet dilectio proximi, dum dicitur: *Et proximum sicut te ipsum.* Ex quo sequitur, etiam amorem sui esse præscriptum, primo dilectionis mandato: Et si de cætero à natura ad eundem satis inclinemur.

Dicit quispiam, si amor sui sit à Deo præscriptus, quomodò ergo sui amantes carpuntur ab Apostolo 2. Timoth. 3? Quomodò dicit S. August. Serm. 47. de divers. c. 2. ad illud Apostoli: *Prima hominis perditionis amor sui est, fuit amor sui?* Resp. Amorem sui carpit Apostolus si malus, & SS. PP. qui ita inordinatus sit, ut ex illo quis velit Deum

Deum mortaliter offendere. Deinde proscribitur ille amor sui, qui ad amorem Dei non refertur, qui non est charitas, sed cupiditas, *Quæ hominem habet auctoritatem, vel hominis deceptorem, non hominis creatorem*, ut ait S. Aug. l. de gratia Christi c. 20. *Charitas enim, juxta eundem S. Patrem, Est motus animi ad fruendum Deo propter ipsum, & se & proximo propter Deum.*

Dicendum secundò ; Non licet sibi appetere bona animæ, vel corporis, propter se ipsa. Et si enim bona illa, præsertim bona animæ hominem maximè deceant, si tamen propter se appetantur, hominem non perficiunt, sed inficiunt, nec iisdem utentem adjuvant, sed iis fruentem corrumpunt : *Potest enim res bona amari, amore non bono.* Debent ergo tum bona animæ, tum bona corporis appeti, ut iisdem obtentis Deus glorificetur. Unde scientia ne inflat, adjunctam habere debet charitatem, quæ ædificet : & ut ait S. Bern. de arte & scientia Serm. 36. *Tantum appeti potest ad ædificationem sui vel proximi*, aliàs turpis curiositas est, aut turpis quæstus.

Honor quoque appeti potest, cùm commendet salvator Matth. 5. ut luceat Lux nostra coram hominibus, sed sollicitè addit : *Ut glorificent Patrem vestrum, qui in Cælis est.* Idem est, de bonis corporis, quæ licet appeti possunt, si adsit debitus finis. Illa enim propter se appetere, incommutabilis lex inhibet; aliàs iis inhærere brutale est, cùm os homini sublime dederit, nec imis inhærere possit, sed spectare superna. De illis singillatim ita docet S. August. tract. 10. in Joan. salutem ait, corporis quæris? *Adhuc noli ibi manere quære illam, ne forte impediatur morbida valetudo, opera tua bona.* Ergo non est ibi finis, quia propter aliud quæritur quæris honores? *Fortè ad aliquid agendum quæris, ut peragas aliquid, ut placeas Deo.* Noli ipsum honorem amare, ne ibi remaneas. *Quæris laudem? Si Dei quæris, bene facis : Si tuam quæris, malè facis, remanes in via.* Hinc alibi amorem delectabilium, vocat spiritualium penarum viscum, si nos detineant, nec ad amorem Dei progredi sinant.

H + Quin

Bona animæ aut corporis non possunt ex peti propter se.

Quomodo scientia sit quærenda.

Quomodo honor.

Quomodo cetera.

*Quomodo
audienda
sit musica.*

Quin iundò, quòd spiritualem & Ecclesiæ cantum, propter se audire, perversum dicat, ut ait l. 4. contra Iul. c. 14. *Movetur, inquit, animus ad pietatis affectum, divino cantico audito: tamen etiam illic, si sonum, non sensum libido audiendi desideret, improbat.*

*Voluptas
propter se
appeti non
potest.*

Quòd verò voluptates propter se, etiam moderatè appeti sit vitium, vide ad longum comprobatum de matrimonio Concludo cum eodem S. Patre in mediat: suis, ubi ait: *Si ista diligis, ut subiecta dilige, ut famulantia dilige: ut arrham sponsi, ut munera amici, ut beneficia Domini. Sic tamen, ut memineris semper, quid illi debeas, nec ista propter se, sed ista propter illum, nec ista cum illo, sed ista propter illum, & per ista illum, & super ista illum diligas. Quibus hoc adde Laurentiū Iust. mihi fol. 19. ubi ait: Pudeat ergo hominem creaturis inharendo, non amare bonum, unde bonæ sunt.*

SECTIO VII.

An, & quomodò diligendus sit proximus.

*Dilectio
proximi
est praece-
ptum.*

*Est natu-
rale.*

Divinum.

DICENDUM primò, datur præceptum naturale divinum de diligendo proximo. Quòd sit naturale, declarat illud S. Gregorius l. 10. mor. c. 6 ubi scribit, quòd fundetur in his duobus dilectio proximi, Quod ab alio oderis tibi fieri, vide ne tu alteri facias: & per semetipsum veritas dicit: quæ vultis ut faciant vobis homines, & vos facite illis. Deinde, homo est de se animal sociale, quod suapte naturâ communicationem bonorum expetit & desiderat. Hinc rectè S. Basilii Orat. 1. de amore in Deum & proximum ita ait: *Etenim nihil naturæ nostræ tam est proprium, quam societatis ad invicem commercium, mutuumque in communicando auxilium, & fraterni amoris studium.*

Præceptum quoque illud divinum esse, confirmant lex & Prophetæ. Levitici 19. v. 19. dicitur: *Diliges*
amicum

amicum tuum, sicut te ipsum: ubi nomen amici æquivaleret proximo, ut vertunt septuaginta & alii. In lege autem novâ, nihil frequentius inculcatur, quam hoc dilectionis mandatum: In hoc, ait salvator, cognoscant omnes, quodd discipuli mei estis, si dilectionem habueritis ad invicem. Hinc vocat suum mandatum, ut se mutuò diligant, & mandatum illud discipulis suis testamentum reliquit.

Dicendum 2. Etsi licitum sit diligere proximum ob mercedem, tamen diligendus est amore amicitiae. Quodd licitum sit, eundem amare propter mercedem, clarè patet ex obligatione gratitudinis; item licitum est eundem amare ad eandem retributionem, ad quam omnes conditi sumus, sic tamen ut ultimatè semper diligatur propter Deum. Sic S. Bern. l. de modo bene vivendi, de charitate serm. 5. docet, quodd *Pari dilectione sit optanda vita æterna omnibus hominibus: omnes homines affectu charitatis debeamus diligere, scilicet ut Deo serviant, & salvi fiant. Non debet tamen proximus diligì ultimatè propter nostram utilitatem, & ut vulgus, quodd amicitias utilitate probat; sed ultimatè propter Deum: Tunc enim verè amicus amatur, si non pro se (nec pro amante) sed pro Deo amatur,* ait sermone 13. loco cit. Doctor Mellissus.

Diligi debet enim amicitia.

Vera dilectio proximi.

Quodd verò amari debeat amore benevolentiae sive amicitiae clarum est, cum bonum illi sit appetendum, quia illi bonum est, si ordinata sit proximi charitas. Deinde, amor Dei est amor benevolentiae, adeoque etiam amor proximi; cum sit idem amor, quo diligimus Deum & proximum propter Deum, cum habeant idem objectum formale, uti in anterioribus est probatum.

Dicendum 3. Proximus noster, est omnis creatura rationalis, quæ possit nobiscum particeps esse æternæ beatitudinis. Hinc non solum homines, sed & Angeli sunt nobis proximus. *Proximitas enim, ut ait Isidorus pelusiota l. 4. Epist. 123. Naturâ æstimatur, non virtute: substantiâ, non dignitate: compassione, non loco*

Quis sit proximus.

loco; curationis modo, & non loci propinquitate. Et ut ait S. August. in Psalm. 118. conc. 8. *Nulla est cogitanda longinquitas generis, ubi est natura communis.*

Dilectio proximi non potest esse sine dilectione Dei. Dicendum 4. Dilectio proximi, non potest esse sine dilectione Dei. Probatur 1. Quia proximus diligere debet propter Deum. Idem probat S. Augustinus l. 1. de Doctrina Christ. c. 22. ubi ait, *Quod quisquis rectè proximum diligit, hoc cum eo agere debeat, ut etiam ipse toto corde, totâ animâ, totâ mente diligat Deum: sic enim eum diligens, tamquam se ipsum, totam dilectionem sui & illius (proximi) refert ad illam dilectionem Dei, quæ nullum à se rivulum duci extra se patitur, cujus derivatione minuat. Deinde cum dilectio sui sit constituta regula dilectionis proximi, & dilectio sui non possit esse sine dilectione Dei, sequitur, quòd dilectio proximi quoque sine dilectione Dei esse non possit. Denique idem probant SS. PP. Dum docent, quòd proximi diligendi sint ad vitam æternam, idest ad amorem Dei; quòd proximi diligendi sint in Deo, & propter Deum, uti & alia his similia.*

Omnis dilectio debet fundari in dilectione Dei. Prædicta omnia, solidè more suo declarat Card. Bona in principiis Doct. Christ. ubi confirmatis iis quæ hucusque diximus, ita demum subdit §. 42. *Omnes homines naturali quodam instinctu aliis placere, & ab illis amari concupiscunt: sed hæc stabilis & sincera numquam erit, nisi divinus amor eorum animos simul connectat. Amicitia, quæ humanis dumtaxat officiis comparatur, mercaturæ quædam species est, tamdiu perseverans, quamdiu hinc inde aliquid utilitatis percipitur. Comitas & urbanitas, quam summo rigore ab amicis exigimus, ludus verborum est, & vanitas & mera deceptio. Etenim qui profusius & elegantius huiusmodi officia præstare solent, multa quidem spondent, sed cum aliquid ab illis petitur, tunc demum apparet, quæ minis fuerit ille verborum apparatus. Nihil in his verum, nihil solidum, nihil sincerum. Ita verum est, quòd quicquid non est ex Deo, dissolvetur, ac vanum est, uti quotidiana nos docet experientia.*

Dicea-

Dicendum ultimò, quòd tunc proximus diligatur, *Quid sit* sicut se ipse, cum diligitur eo modo ad similitudinem, *proximum* etsi non ad æqualitatem. To *sicut* enim non tantum *diligere si-* æqualitatem significat, sed & similitudinem, ut *cut seip-* quando dicitur; *Estote perfecti*, SICUT *pater vester cœ-* *lestis perfectus est*. Similitudo autem illa in eo sita est, *sum*. primò, ut ea quæ mihi velim, illa velim & proximo. 2. Ut sicut me diligo propter Deum, proximum quoque diligam propter Deum. 3. Ut eo affectu afficiar erga proximum, quo afficior erga memetipsum.

E C T I O VIII.

An debeamus proximum diligere actu interno, an verò sufficiat datâ opportunitate exhibere illi externa dilectionis officia, simul non odio illum habendo.

D ICENDUM primò, ut satisfiat præcepto diligendi proximum, non est satis ei exhibere signa externa dilectionis, simul eundem non habendo odio, *Externa dilectione proximi sola non* sed debet diligi actu interno. Probat 1. ex Scriptura *satisfit* Sacra ac primò ex 1. cap. 1. Petri Apostoli ubi ait : *præcepto dilectionis* *Animas vestras castificantes in obedientia charitatis: In fraternitatis amore simplici, ex corde invicem diligite attentius.* 2. Eccli. 37, admonemur : *Ne obliviscamur amici nostri in animo nostro.* 3. Matth. 5. ubi dicitur : *DILIGITE inimicos vestros, BENEFACITE his, qui oderunt vos.* Ubi internus actus dilectionis, significatus per diligite, ab externo importato per benefacite, sejungitur : Deinde dicitur præceptum dilectionis proximi *simile* præcepto dilectionis Dei : Deum autem actu interno diligendum esse per se constat. Rursùm diligendus est proximus, *sicut nos ipsi*; quis verò aded stolidus, ut se actu interno diligendum non esse dicere audeat? Denique idem confirmant alia Scripturæ loca, quæ dicunt proximum esse diligendum amore fraternitatis; *non*

nontantum verbo & linguâ : Sed opere & veritate :
Ex animo , in simplicitate cordis & alia hujusmodi.

*Ex Patri-
bus.*

Idem docent constanter SS. Patres. In primis S. August. variis locis id confirmat, & signanter exposcit : 6. in Joan. ubi ait : *Interroga cor tuum , & si ibi est dilectio fratris , securus esto.* Et expositione anteriori : *Nemo interroget hominem : redeat unusquisque ad cor suum , si ibi invenerit fraternam charitatem , securus sit.* Idem docet alibi idem Doctor Locis quam plurimis.

Consonat S. Bern. qui Serm. de Passione Domini c. 23. ita ait : *Sic sunt amandi amici , ut affectus amoris erga illos conservetur.* Affectus autem actum internum per se importat. Idem tradit S. Gregorius homilia 28. ubi ait. *Quid ergo nobis agendum est. Fratres , nisi ut veræ charitatis affectum impendamus fratribus ?* Idem docent plerique SS. Patres quorum testimonia brevitatibus causa prætereo.

A ratione

Accedit his & ratio , quod omnis proximus sit diligendus propter Deum , quod visceralem & internum affectum requirit : quod sit omnibus optanda vita æterna : quod proximus sit diligendus eo modo , quo dilexit nos salvator : Quod illud ipsa vox *diligo* requirit : Sola enim externa dilectionis signa , sunt tantum dilectionis cortex & umbra : Quod dilectio sit vera virtus , quæ internum actum necessàriò requirit : Quod ex verâ beneficentiâ sit proximus diligendus ; beneficentia autem est actus externus , quo alteri ex interno affectu benefacimus : idèò admonet Apostolus ad Coloss. 3. dum ait : *Quodcumque facitis , ex animo operamini , sicut Deo & non hominibus.* Et hæc est charitas de corde puro , quam Spiritus Sanctus in nobis operatur. Unde pro merito hæc damnata est ab Ecclesia : *Præcepto proximum diligendi satisfacere possumus per solos actus externos :* Item hæc : *Non tenemur proximum diligere actu interno & formali.*

*Aliud est
hypocriti-
cum.*

Dicendum 2. Qui solo externo opere absque correspondente affectu proximum diligit , hypocriti fa-

vet

vet ac pessimè de humano genere meretur, uti & illi, qui adversam nobis sententiam persuadere satagunt. Probatnr breviter, quia virtutem simulant, quam non habent, idest veram dilectionem, quæ vel potissimum in affectu consistit: Deinde, malè de humano genere merentur, eo quòd communem satis verborum & officiorum corticem pro vero amore divendere velint. Nota enim est hujus sæculi urbanitas, quæ omnes labiis honorare & amare satagit, ubi cor eorum longè est ab illis. Ex quo quid aliud, nisi innumeræ fraudes & simulationes poterunt expectari.

Dicendum 3. Internus hic dilectionis affectus omni superiori perquam est necessarius. Hinc monet S. Petrus, *Ut præsent, non ut dominantes in cleris, sed ut forma facti gregis* Ex ANIMO. Non enim subditorum animos devinciet sibi superior, quem constat solo verbo, sine correspondente interno affectu, subditos demulcere: Nec ad eundem subditi appellabunt ut ad Patrem, cujus affectus paternus non correspondet.

*Superiori
interna di
lectio om
nino neces
saria,*

Objici posset ad prædicta, quòd proximo debeamus solum amorem talem, quo possumus proximo prodesse, qualis non est amor internus: Hinc piorum praxis de interno amore vix solet esse sollicita. Ad quæ Resp. Quam maximè nos interno affectu proximis prodesse. Fit enim, ut ubi adest affectus internus, opus externum intensius & sæpius proximo exhibeatur. Talis erat in primitiva Ecclesia Christianæ fraternitatis amor & dilectio, de qua ait Scriptura act. 4. quòd non tantum sibi mutuò officia amoris impendebant, sed quòd eorum erat anima una & cor unum. Piorum verò praxis maximè de interno affectu est sollicita, dum sola amoris officia, ut ab interno amore correspondente sunt sejuncta, ut fucata & simulata rejicit & condemnat: Novit piorum praxis, veram dilectionem in interno affectu quam maxime consistere.

*Amor in
ternus pro
ximo pro
dest.*

*A piorum
praxi.*

SECTIO

SECTIO IX.

An teneamur omnes homines aequaliter diligere.

*Ordo proximum
amandi.*

DICENDUM I. cum S. Bern. l. de modo bene vivendi ferm. 5. *Non debemus aequaliter omnia diligere, sed alia magis, alia minus.* Et apologia ad Guilielm. *et si*, ait, *sit una (sponsa) in charitate, diversa tamen sit in ordinatione.* Expressius hoc declarat S. August. l. 1. Doct. Christ. c. 28. ubi ait, *Omnes homines æquè sunt diligendi, sed cum omnibus prodesse non possis, his potissimum consulendum est, qui pro locorum & temporum, vel quarumlibet rerum opportunitatibus, tibi quasi quadam sorte junguntur.*

*Omnes a-
què aman-
di.*

Ubi nota, quòd dicat S. Præsul, omnes homines æquè sunt diligendi, idest ad eundem terminum, scilicet beatitudinem; aut etiam æquè diligendi sunt omnes, idest omnes omnino, nullo excepto, uti dicitur, quòd Deo sit æquè cura de omnibus, non quòd æqualiter omnibus provideat, sed quòd nihil sit, quod ejus providentiæ non subjaceat.

*Ordo aman-
di, &
ordo sub-
veniendi.*

Dicendum 2. quò Conjunctio personæ nobis est proximior, eo cæteris paribus magis eidem est succurrendum. Pro cujus majori intelligentia, notandum est alium esse ordinem amandi, alium esse ordinem subveniendi: unde fieri potest, ut qui sit prior ordine amandi; sit posterior ordine subveniendi; uti ex dicendis constabit. Succurrendum ergo primò est iis, qui nobis sunt magis conjuncti. Unde primò cæteris paribus succurrendum est parentibus, utpote nobis cæteris conjunctioribus. An autem mater sit præferenda patri, non ita convenit inter authores: alii matrem præferendam volunt, eo quòd juxta illos sit principium nostræ generationis, & nostri causâ varia subierit incommoda, nos gestando utero, pariendo &c. Alii patrem præferunt, eo quòd sit principium

tipium principalius generationis, & ipsi principaliter cura nostri incumbat, æstimantes matrem non concurrere activè ad generationem, de quo disputent medici.

Nec etiam ita convenit, an ratione beneficij insignis, non liceat hic extraneos præferre Confanguineis: v. g. si pater filium voluisset occidere, & alter eum à nece liberasset. Neque desunt, qui eo casu affirmativæ sententiæ adhæreant: meliùs tamen alij docent, etiam eo casu, uti omni prorsus, gradum consanguinitatis præsertim primum, omni alteri conjunctioni esse præferendum.

Aliud est de ordine amandi, quo ordine res magis dignas amare oportet. Dignitas autem hæc, ex majori conjunctione cum summo bono est metienda, quæ quò major est, eo major currit amandi obligatio.

Dicendum 3. sollicitè providendum est, ne prætextu servandi prædictum ordinem charitatis, charitas ipsa violetur: quod sæpiùs usu venit in communitatibus, in quibus particularis dilectio, communem sæpè destruit charitatem; quæ familiaritates & amicitia, teste B. Terefia de via perfectionis c. 4. *Rarè eo tendunt, ut una alteram magis in Dei amore promoveat, imò verò idcirco eas à Damone induci credit, ut schismata & factiones in Religionibus excitet. . . . & id genus alias amicitias multas, ait, videre velim, ubi conventus multas alit personas. Hinc per amorem, ait, Dei vos rogo, à singularitatibus hisce, quantumvis ea sanctæ sint, abstinete. . . . si verò consanguinei invicem sint, longè etiam deterius est, atque adeo pestis terribilissima.* Plura habet de hac eadem re S. Basilius sermone 1. de Institutione Monachorum, & sermone sequenti, quem brevitati intentus prætereo.

*An alii
quandoli-
ceat hic
externos
Patri an-
teponere,*

*Particu-
lantes ami-
citiæ com-
munita-
tium pestes,*

S E C T I O X.

De dilectione Inimici.

Omnes tenentur diligere inimicos. **D**ICENDUM primò non tantùm perfecti, sed omnes omnino ex precepto tenentur diligere inimicum : neque solùm in legè novà , sed & in veteri fuit hoc præceptum. Omnibus enim promiscuè dictum est Matthæi 5. *Diligite inimicos vestros, benefacite his, qui oderunt vos: & Prov. 25. Si esurierit inimicus tuus, ciba illum.* Quòd autem in lege veteri dilectio inimici quoque fuerit omnibus injuncta, patet ex Levitico c. 19. ubi dicitur: *Non oderis fratrem tuum in corde tuo.* Item exodi 23. jubetur, ut quilibet, proximi (etiam inimici) asinum & bovem sublevet & reducat. Unde patet perversus aliorum sensus, quo volunt in lege veteri non esse præceptam dilectionem inimici, eo quòd Levit. 19. dicatur. *Diliges amicum tuum, sicut teipsum :* ex quo à contrario inferebant, ergo odio habendi sunt inimici. Imò, quòd ipse Christus Matth. 5. dicat: *Audistis, quia dictum est antiquis: diliges proximum tuum, & odio habebis inimicum tuum.* Verùm ex dictis patet, to amicum idem esse quòd proximum, adeòque nihil concludere objectum argumentum. Deinde, argumentum à contrario non valet, ubi est eadem ratio, quæ utrique convenit: hìc autem una & eadem ratio utrique competit, scilicet & inimicum & amicum diligendum esse propter Deum.

Omni tempore. Quando autem S. Augustinus Enchiridii c. 73. docet, dilectionem inimici esse tantùm perfectorum, intelligendus est de singulari illa dilectione, quâ ille, qui actualiter lædit, adhuc à læso beneficiis afficitur.

Quomodo dilectio inimici sit perfectiorum. Hoc tamen hìc ulterius notandum est, quòd Judæis præceptum fuerit odium abominationis saltem externum

Odium abominationis aliorum.

num erga quasdam gentes sibi inimicas, v. g. quod numquam cum eis possent inire pacem, non quærent eis bona, v. g. Chananæis, ac Jebusæis, &c. Internum tamen odium, numquam iis præceptum fuit, utpotè quod charitati repugnat.

tionis aliquando à Deo præceptum, numquam inimicitia.

Dicendum 2. Debemus inimicis generalia dilectionis signa exhibere: Illorum enim substractio ad vindictam & odium pertinet. Hinc si velis pro communitate rogare aut eidem dare eleëmofynam, non poteris tibi inimicum excludere, cum exclusio illa vix fieri possit sine rancore odii aut vindictæ.

Quæ signa dilectionis debeant inimicis exhiberi.

Specialia tamen dilectionis signa inimico exhibere nemo tenetur, nisi adesset periculum scandali. Debet tamen ea velle præstare in præparatione animi, ut loco & tempore debitis, paratus sit ea præstare. Hinc patet, nos non teneri, inimicos invisere, pro inimicis rogare, eos invitare, nisi adesset ex contrario scandalum. Teneris tamen inimicum obvium salutare, si eundem solitus sis salutare, aliàs odium prodis. Idem majori jure dicendum est de resalutatione, quæ ad generalia signa dilectionis spectare videtur: Excipe tamen casum quo offensus est superior, qui aliquando ad majorem cautelam resalutationem differre potest, etsi & hîc præcavenda sit inferioris exacerbatio. Simili ratione excusandi sunt parentes, qui Filios contra voluntatem aliquando maritatos, nolunt recipere ad aspectum, in qua aversione perseverantes, etiam absolvi possint, si sint rationabiliter inviti: Possunt enim parentes, ut superiores, tali negatione alloqui filium punire, & aliquando ad aliorum natorum cautelam ita castigare.

Dicendum 3. Præceptum hoc obligare, etsi sine aliqua difficultate observari non possit, nec satis est non odisse inimicum. Sic D. Hieron. in c. 5. Matthæi. *Multi ait præcepta Dei, imbecillitate sua, non sanctorum obligat, viribus æstimantes, putant esse impossibilia, quæ præcepta sunt, & dicunt sufficere virtutibus non odisse inimicum: Caterum diligere plus præcipi, quam humana natura patitur.*

S E C T I O X.

De dilectione Inimici.

Omnes tenentur diligere inimicos.

Omni tempore.

DICENDUM primò non tantùm perfecti, sed omnes omnino ex precepto tenentur diligere inimicum : neque solum in legè novà , sed & in veteri fuit hoc præceptum. Omnibus enim promiscuè dictum est Matthæi 5. *Diligite inimicos vestros, benefacite his, qui oderunt vos: & Prov. 25. Si esurierit inimicus tuus, ciba illum.* Quòd autem in lege veteri dilectio inimici quoque fuerit omnibus injuncta , patet ex Levitico c. 19. ubi dicitur: *Non oderis fratrem tuum in corde tuo.* Item exodi 23. jubetur , ut quilibet , proximi (etiam inimici) asinum & bovem sublevet & reducat. Unde patet perversus aliorum sensus, quo volunt in lege veteri non esse præceptam dilectionem inimici , eo quòd Levit. 19. dicatur. *Diliges amicum tuum, sicut teipsum :* ex quo à contrario inferebant, ergo odio habendi sunt inimici. Imò , quòd ipse Christus Matth. 5. dicat: *Audistis, quia dictum est antiquis: diliges proximum tuum, & odio habebis inimicum tuum.* Verùm ex dictis patet , to amicum idem esse quòd proximum , adeòque nihil concludere objectum argumentum. Deinde , argumentum à contrario non valet, ubi est eadem ratio, quæ utrique convenit : hìc autem una & eadem ratio utrique competit , scilicet & inimicum & amicum diligendum esse propter Deum.

Quemodò dilectio inimici sit intelligendus est de singulari illa dilectione, quæ illi perfectorum.

Odium abominatio ali-

Quando autem S. Augustinus Enchiridii c. 73. docet, dilectionem inimici esse tantùm perfectorum, intelligendus est de singulari illa dilectione, quæ illi, qui actualiter lædit, adhuc à læso beneficiis afficitur.

Hoc tamen hìc ulteriùs notandum est, quòd Judæis præceptum fuerit odium abominationis saltem externum

num

num erga quasdam gentes sibi inimicas, v. g. quòd numquam cum eis possent inire pacem, non quærerent eis bona, v. g. Chananæis, ac Jebusæis, &c. Internum tamen odium, numquam iis præceptum fuit, utpotè quod charitati repugnat.

Dicendum 2. Debemus inimicis generalia dilectionis signa exhibere: Illorum enim substractio ad vindictam & odium pertinet. Hinc si velis pro communitate rogare aut eidem dare eleëmofynam, non poteris tibi inimicum excludere, cùm exclusio illa vix fieri possit sine rancore odii aut vindictæ.

Specialia tamen dilectionis signa inimico exhibere nemo tenetur, nisi adesset periculum scandalii. Debet tamen ea velle præstare in præparatione animi, ut loco & tempore debitis, paratus sit ea præstare. Hinc patet, nos non teneri, inimicos invisere, pro inimicis rogare, eos invitare, nisi adesset ex contrario scandalum. Teneris tamen inimicum obvium salutare, si eundem solitus sis salutare, aliàs odium prodis. Idem majori jure dicendum est de resalutatione, quæ ad generalia signa dilectionis spectare videtur: Excipe tamen casum quo offensus est superior, qui aliquando ad majorem cautelam resalutationem differre potest, etsi & hîc præcavenda sit inferioris exacerbatio. Simili ratione excusandi sunt parentes, qui Filios contra voluntatem aliquando maritatos, nolunt recipere ad aspectum, in qua aversione perseverantes, etiam absolvi possint, si sint rationabiliter inviti: Possunt enim parentes, ut superiores, tali negatione alloqui filium punire, & aliquando ad aliorum natorum cautelam ita castigare.

Dicendum 3. Præceptum hoc obligare, etsi sine aliqua difficultate observari non possit, nec satis est non odisse inimicum. Sic D. Hieron. in c. 5. Matthæi. Multi aut præcepta Dei, imbecillitate sua, non sanctorum viribus æstimantes, putant esse impossibilia, quæ præcepta sunt, & dicunt sufficere virtutibus non odisse inimicum: Caterum diligere plus præcipi, quam humana natura patiatur.

*Non suffi-
ciat hic
non odif-
se.*

tiatur. Nec enim idè legis observantia obligare desi-
nit, quia in observantia illa difficultas advenit, imò
moralis impossibilitas. Quòd autem non sufficiat, non
odisse inimicum, clarè patet ex to *diligite & benefacite*,
Matthæi 5. ubi dicitur: *Diligite inimicos vestros, benefa-
cite his, qui oderunt vos.* Adde, quòd illud, quod gra-
ve videtur infirmitati, hoc leve efficiatur charitati, ut
alibi ait S. Augustinus.

*Præceptū
hoc est na-
turale.*

Dicendum 4. Dictum charitatis præceptum est na-
turale, fundatur enim in illo principio juris naturæ,
Quod tibi non vis fieri, alteri ne feceris. Deinde contra
rationem est odisse naturam propter culpam: adeò-
que inimici ita odio habendi sunt, ut sit cum dilectione
hominum & odio vitiorum, de quo ait Psalm. 118.
Iniquos odio habui, & legem tuam dilexi.

*Quid me-
ritum
magis di-
ligere ami-
cum an
inimi-
cum.*

Dicendum ultimò: Diligere amicum est magis me-
ritum, quam diligere inimicum. Ratio est, quia
amicus est objectum magis diligibile, adeòque magis
participat de ratione charitatis, quam dilectio inimi-
ci. Deinde, actus dilectionis amici solet esse intensior.
Dicta intellige, si cætera sint paria, potest enim di-
lectio inimici esse magis meritoria, quam dilectio
amici, cum sit actus magis Heroicus, & dilectio
amici aliquando vitari possit pravo respectu, puta
utilitatis & commodi proprii, aut simili.

SECTIO XI.

*An, & quomodo magis debeat diligere se homo, quam
Proximum.*

*Triplex
necessitas,
extrema,
gravi &
communis*

PRO majori intelligentia subsequen-
tium, notandum est, triplicem distingui necessi-
tatem, unam extremam, aliam gravem, & alteram
communem. *Extrema* est, ut nisi eum adjuves, sit
moraliter certò periturus. *Gravis* est, quando quidem
alter absque tua ope salvari potest, sed valde difficul-
ter.

ter. *Communis* denique, in qua sunt omnes communi-
ter indigentes.

Notandum est ulterius, esse quædam bona spiri-
tualia omnino necessaria ad amicitiam cum Deo con-
servandam, qualis est Gratia, Fides, Spes, Charitas,
&c. Alias sunt bona spiritualia non omnino necessa-
ria, ut amicitia cum Deo conservetur, sunt tamen
valde utilia, ut observantia consiliorum Evangelico-
rum & opera supererogationis.

His positis, dicendum est 1. homo non tenetur *Quomodo*
se semper amare amore majori appetitativo, quam *homo se*
proximum: Debet tamen se semper amare majori *debeat a-*
amore benefactivo. Ratio ex dictis patet, quod ma- *mare in*
gnitudo amoris appetitativi æstimari soleat ex majori *compara-*
conjunctione cum summo bono; possit autem fieri, *tione ad*
quod proximus noster sit magis illi conjunctus, quam *proximum*
nos ipsi. Debet tamen sese magis diligere amore bene-
factivo, cujus major obligatio æstimari solet ex ma-
jori conjunctione secum: nullus autem est sibi magis
conjunctus, quam ipse sibi. Hoc sensu intelligendus
est S. Augustinus, qui homiliâ 37. inter 50. ita ait:
Primum dilige Deum, deinde te ipsum: Post hæc dilige
proximum tuum, sicut te ipsum.

Dicendum 2. Tenetur homo seipsum magis dili-
gere in bonis spiritualibus necessariis ad amicitiam
cum Deo conservandam, quam proximum in iisdem
aut aliis quibuscumque. Probatur breviter ex hoc Matth.
16. *Quid prodest homini, si universum mundum lucretur,*
animæ verò suæ detrimentum patiatur: Nec ideo culpân-
di sunt Moyses & Apostolus, quorum unus volebat
deleri de libro vitæ pro populo: Alter pro fratribus
volebat esse anathema: Moyses enim hoc petiit hy-
perbolicè, ad significandam amoris sui magnitudi-
nem erga populum: Vel ut alii, petiit deleri de libro
viventium, sicut numer. 11. *Sin aliter tibi videtur,*
obsecro te, ut interficias me. Idem de Apostolo dici po-
test. Licitum tamen est, pro brevi tempore velle di-
lationem beâtitudinis, exemplo S. Martini, qui dice-

bat : *Domine, si adhuc populo tuo sum necessarius, non recuso laborem.*

Dicendum 3. Non licet alium de salute sua graviter periclitantem adjuvare, cum periculo moraliter certo peccandi : talis enim interpretativè censeretur velle peccatum & malum, ut eveniant bona. Hoc pacto etiam hanc sequentem propositionem damnavit Theologica facultas Lovanienlis : *Licetum est quæ-
rere directam occasionem peccandi proximam, pro bono spiri-
tuali vel temporali nostro vel proximi. Quam proscri-
psit jure merito, ut Falsam, temerariam, perniciosam &
ab auditu fidelium procul arcendam.* Quam nuper San-
ctiss. P. Innoc. XI. censuram confirmavit.

Dicendum 4. In bonis animæ, quæ non sunt om-
nino necessaria ad amicitiam cum Deo conservan-
dam, non debet quis se necessariò ex charitate præ-
ferre. Sic filius, ut matri suæ assistat, potest non in-
gredi Religionem, imò si ingressus jam sit, ex ea
egredi, ob dictum finem.

Dicendum 5. Homo liber tenetur ex charitate, vi-
tam, honores, & fortunam exponere periculo mo-
raliter certo, pro salute proximi, si altere eamdem si-
ne sua ope consequi nequeat. Probat, quia si ali-
quo, saltem hoc casu habet locum illud Joannis 1. c.
3. & *nos debemus pro fratribus animas ponere.* Dixi ho-
mo liber, quia si foret persona publica, ut Princeps,
Pastor, &c. Cujus vita necessaria foret bono com-
muni, temerariè ageret, si pro salute alterius, vitam
exponeret periculo moraliter certo. Hinc tenetur
alius, intrare domum peste infectam, etiam cum pe-
riculo moraliter certo amittendæ vitæ, ut puerum in
ea jacentem baptiset, qui alias sine illius ope, sine
baptismo esset moriturus.

Dicendum 5. Et si charitas urgeat, ut proximo in
gravi necessitate constituto subveniam, si id sine ma-
gno incommodo possim : tamen, si sit periculum
gravis damni, ad illud charitas quidem inclinat, sed
non obligat. Probat, quia præceptum Christi de
expo-

exponendâ vitâ periculo moraliter certo, vel amittendâ famâ & fortunâ pro salute proximi, non videtur extendendum ultra extremam necessitatem, maxime cum talis gravis necessitas sæpius occurrere so-
leat, adeòque suavi Christi iugo non videatur esse conforme. Aliud esset, si sit Pastor aut Episcopus, qui etiam in gravi periculo salutis, tenentur etiam cum periculo vitæ subditis suis assistere. Ratio est, quòd hi ad illud non tantum ex charitate, sed etiam ex iustitia sint obligati, ratione cujus accipiunt stipendia, exhibentur ipsi honores, & conferuntur emolumenta à subditis, ut ipsis in tali necessitate assistant.

Dicendum 6. Non licet pro alio mihi æquali in periculo vitæ versante, sese tali periculo exponere. Contrarium tradunt alii, eo quòd laudabile sit, ex motivo charitatis suam vitam periculo exponere, pro conservandâ vitâ alterius: Verum his repugnare videtur S. August. de mendacio c. 6. ubi ait: *Si quis pro alterius temporalis vita, suam ipsam temporalem perdit, non est jam diligere illum, sicut seipsum, sed plusquam se ipsam quod sanæ Doctrinæ regulam excedit.* Hinc regulam charitatis excedere videtur juxta eundem Patrem qui vitam suam pro vita alterius periculo exponit, nisi aliquid aliud concurreret, ut puta, quòd illud exigeret bonum publicum, aut aliquid aliud; unde laudatur Paulinus Nolanus, qui se in servitutem vendidit, ut Filium Viduæ liberaret: Item illi qui inserviunt peste infectis & alii similes.

S E C T I O X I I.

De Præcepto dilectionis Dei.

DICENDUM primò, datur verum de dilectione Dei mandatum, per se & directè obligans, imò ^{*Dilectio Dei per se obligat.*} mandatum illud est omnium maximum. Nullum enim utroque testamento ita firmatum est, uti de

diligendo Deo. In primis enim Deuteronomũ 6, totũ
 Israeli præcipitur, ut Deum diligeret ex toto corde,
Quam stri- ex totã animã, ex totã fortitudine: ut in dicto man-
ct. dato meditaretur die ac nocte, sedens in domo,
 ambulans in itinere, dormiens atque consurgens, &
 ligaret illud quasi signum in manu sua, scriberetque
 ea in limine & ostiũ domũs. In nova lege autem,
 rursum arctè inculcatur idem præceptum: Matth.
 22. dicitur *Primum ac maximum in lege mandatum*; Ia-
 cobi 2. dicitur *Lex regalis*: sæpissimè vocatur *man-*
datum Christi, & passim in Paulinis litteris commen-
 datur, ut mandatum singulare. Quòd autem tale
 præceptum sit admittendum per se & directè obli-
 gans, jam pridem contra aliquos, maximum illud
 mandatum enervare volentes, declaravit Alexan-
 der VII. de quo antea. Hinc

Ad aliud Dicendum 2. quòd obligatio hujus mandati, non
obligat, absolvatur in solã mandatorum observatione. Ra-
quam ad tio est, quòd scriptura de eo agens, agat de eo tam-
observan. quam de præcepto speciali, imò de primo & om-
tiam man- nium maximo, quodque specialem importat obli-
daturum. gationem, ab aliis aliorum præceptorum obligatio-
 nibus distinctam. Deinde dilectio Dei specialem ha-
 bet honestatem & conformitatem cum rectã ratione,
 per se humanam naturam decet, estque omnium
 virtutum eminentissima, unde distincta ejusdem obli-
 gatio est admittenda.

Debet di- Dicendum 3. dum dicitur, quòd Deus sit diligen-
ligi Deus dus, ex toto corde, ex totã animã & ex totis viri-
ex toto cor- bus, importatur, quòd debeat omnibus diligibili-
de, tota a- bus anteferri, quòdque præcipuum hominis desi-
nima, &c. derium, & sui amoris naturale centrum, debeat esse
 Deus; adeò ut homo totus debeat esse in Deo, prout
 dicitur esse totus in studiis, in venatione, &c. Pulchrè
 declarat illud S. August. l. 1. de Doct. Christianã c.

Quid hoc 22. ubi ait: *Hæc regula dilectionis, divinitus constituta*
fit. est, DILIGES PROXIMUM TUUM SICUT TE IPSUM;
 Deum vero ex toto corde, ex totã animã & ex totã men-
 te:

te: ut omnes cogitationes tuas, & omnem vitam, & omnem intellectum in illum conferas, ex quo habes ea ipsa, quæ confers. Cum autem ait, toto corde, totâ animâ, totâ mente: nullam vitæ nostræ partem reliquit, quæ vacare debeat, & quasi locum dare, ut aliâ re velit frui, sed quidquid aliud diligendum venerit in animum, illuc rapiatur, quo totus dilectionis impetus currit. Quæ verba de amore generali in omni opere deliberato necessariò sunt intelligenda, quo omne opus in Deum refertur, ut in ultimum finem.

Præceptum dilectionis Dei ex toto corde est possibile in hac vita.

Dicendum 4. præceptum de Deo diligendo ex toto corde, est possibile in hac vitâ ad adimplendum, quoad obligationem, etsi non quoad omnimodam suam perfectionem. Probatur prius, quia Scripturâ teste, David ex toto corde suo exquisivit Deum Pâlm. 118. & 3. Reg. 4. Dicitur secutus Deum in toto corde suo, denique Lucæ 10. interroganti iurisperito, quid faciendo vitam æternam possideret, & alleganti primum hoc mandatum, subjunxit Salvator: *hoc fac & vires*, quo dicto satis innuit possibile esse, quod allegaret, scilicet Deum ex toto corde esse diligendum. Perfectio tamen ejusdem præcepti reservatur in patria, in quâ omnibus modis absolute amabitur Deus ex toto corde, dum semper actuâiter ejusdem amoris inhærebunt Sancti. Et hoc modo intelligendus est S. Augustinus, qui docet l. de spiritu & littera c. ult. & l. de perfectione Justitiæ respons. 17. ubi ait præceptum illud in hac vita perfectè adimpleri non posse, etsi possit quoad obligationem.

Dicendum 5. obligationem Deum diligendi, ipsa obligatio lex naturæ imponit. Si enim solo naturæ instinctu hac ex natura estis constricti sumus, ut genitores nostros diligamus: tutior. potiori jure constricti sumus ad diligendum Deum, à quo totum est, quidquid sumus, à quo potior nostra pars, scilicet anima est profecta: adeò ut rectè quærat Scriptura Sacra Deut. 32. *Numquid non ipse est pater tuus, qui possedit te & fecit te, & creavit*

te? Deinde, lex naturæ quemlibet inclinât & cōstringit, ut diligat summum bonum, quod est ipse Deus.

SECTIO XIII.

Quomodo, & quando diligendus sit Deus.

*Modus diligendi
Deum est,
sine modo
diligere.*

DICENDUM primò, modus, quo diligere Deus debet, est sine modo, ait Doctor Mellissus; cùm ex toto corde, tota mente & omnibus viribus diligendus sit, & ut ait idem Doctor de diligendo Deo: *Ex omni quod est, quod scit, & quod potest* Aliqualem tamen dilectionis divinæ modum nobis suppeditant SS. Patres, ut semper esse diligendum, & nullam vitæ nostræ partem debere relinquere, quæ à dilectione Dei vacare debeat, ut ait S. Augustinus supra. Deinde, omnia propter Deum diligenda esse, docent SS. Patres, de quo alibi diximus. Denique, modo quo potest optimo & perfectissimo, diligendus est Deus. Hinc ait Doctor Angelicus 2. 2. q. 184. a. 3. ubi quærit, *An perfectio consistat in præceptis*: & respondet. *Dilectio Dei & proximi non cadit sub præcepto secundum aliquam mensuram, ita quòd id, quod est plus, sub consilio remaneat, ut patet ex ipsa forma præcepti, quæ perfectionem demonstrat, cum dicitur: DILIGES DOMINUM DEUM TUUM EX TOTO CORDE TUO (totum enim & perfectum idem sunt) &c.* Et rursum. *Quia finis præcepti charitas est, ut Apostolus dicit 1. Tim. 1. in fine autem non adhibetur aliqua mensura, sed solum in his, quæ sunt ad finem.*

*Perfectio
charitatis
cadit sub
legem charitatis.*

Hinc etiam Richardus viêt. de gradibus charitatis c. 2. agens de amoris insatiabilitate ita ioquitur, prædicta confirmans: *Diliges Dominum Deum tuum ex toto corde, &c.* quod tamen in hac vita mortali, vel potius morte vitali, sicut à nemine constat posse impleri (perfectè) ita ab omni homine debet optari: unde & in
justi

Iusti descriptione dicitur? IN MANDATIS EJUS VOLET NIMIS. Quid est velle nimis, nisi plus velle, quam pos- *Dilectio se? quo sensu & ego dictum puto: ADOLESCENTULÆ* *nimis.* *DILEXERUNT TE NIMIS. Infinitus quippe est Deus, in quem tendit amor earum, ut nullus esse debeat finis vel mensura amoris. Amat igitur sic amans anima; etsi non minus posse suo, minus tamen velle suo, nec capit de hac impossibilitate solatium, sed potius desiderii suscipit incrementum.*

• Dicendum 2. debet Deus super omnia diligibilia *Deus de-* diligere non tantum appretiativè, sed & intensivè. *let super* Ratio hujus est, quod firma stet hæc Christi senten- *omnia in-* tia Matth. 10. *Qui diligit patrem aut matrem plusquam* *tensivè di-* *gi.* *me, non est me dignus. Ille autem plus patrem aut* *ratio il-* *lius.* aliud diligit, qui intensius amat illud, quam Deum ipsum. Deinde, cum Deus sit ultimis finis, ad quem dirigenda sunt cætera, inordinatum esset, si media diligentur magis, etiam intensivè, quam ipse Deus. Denique concludere quis posset; si debeat Deus diligere super omnia appretiativè, debet etiam super omnia diligere intensivè, cum illa major appretiatione habeat quoque suos gradus intensificationis.

Objici posset, quod ergo peccaret mater, si teneretur diligere Filium, quam Deum, imò quod aliàs semper in amore erit anxia. Adde, quod præcepta non obligent quoad conatum potentia. Pro cujus *Amor sen-* *sualis per* *rationem* *debet di-* *rigi ad a-* *morem* *Dei.* responsione prænotandum est, alium esse amorem, merè sensualem, qui in parte sensuali potissimum *debet di-* *rigi ad a-* *morem* *Dei.* consistit; alium rationalem, de quo hic ubique est *rigi ad a-* *morem* *Dei.* sermo. Hoc posito resp. si talis mater tam ex parte sensitiva, quam rationali, præferat aut diligit intensius filium, quam Deum, peccati rea est, & facit contra edictum Christi superius allatum: si verò ex parte sensitivâ dumtaxat, se teneat amor ille, sic tamen ut rationali voluntate intensius Deum diligat: rectè procedit ejusmodi mater, nec umquam hoc casu erit anxia, maximè si amorem filii referat ad amorem Dei, uti debet. Ad Confirmationem dico,

Modus legis quando cadit sub legem.

dico, quod præcepta etiam obligent quoad modum conatus, quando modus ille præcepto adjungitur, uti hic fit, ubi diligendus est Deus ex toto corde, id est, modo quo possit perfectissimo, uti mox ante ostendi.

Quando nam obligat lex dilectionis Dei ex toto corde.

Dicendum 3. Præceptum dilectionis Dei super omnia, ut est speciale mandatum, per se & ratione sui obligat 1. dum homo ad usum rationis perductus, divinam bonitatem satis apprehendit. Docet hanc sententiam Doctor Angelicus, 1. 2. q. 89. a. 6. & q.

In primo rationis natura.

28. de verit. a. 3. ad 4. ubi ait: *Cum quilibet teneatur peccatum vitare, & hoc fieri non possit, nisi præstito sibi debito fine: Tenetur quilibet cum primo sua mentis est compos, ad Deum se convertere, & in eo finem constituere.* Quando nam autem homo rationis sit compos, prudenti judicio est determinandum. Ratio autem summi boni ab homine rationis compote, dudum abscondi nequit: Nam ut ait S. Aug. tract. 106. in Joan. *Hac est vis vera divinitatis, ut creatura jam ratione utenti non omnino ac penitus abscondi possit.*

In articulo mortis.

Dicendum 4. Per se obligat in articulo mortis præfatum dilectionis mandatum. Amor enim Dei super omnia tali tempore est maximè necessarius, in quo de æternitate jacitur alea, ut hominem muniat contra tentationes tum maximè ingruentes, & de cætero actum illum elicere non valebit, adeò ut tunc temporis actum illum non elicere, ad contemptum pertinere, meritò judicetur. Dictam obligationem rectè extendunt aliqui etiam ad casum, quo quis in tali articulo copiam habet Sacramenti Eucharistiæ aut pœnitentiæ suscipiendi, cùm eo tempore, sibi providere debeat quoad animam, modo quo possit securissimo.

Sapi in decursu vite.

Dicendum 5. Non solum in principio usûs rationis, & in ultimo vitæ, sed sæpius in decursu vitæ obligat hoc dilectionis mandatum, etsi præcisè determinari nequeat, quo præcisè tempore obliget. Nec inale tempus illud determinant aliqui, quod currat ejusmodi obligatio, pro eo tempore, quo insigne à Deo beneficium

neſcium impetravit ; imò pro feſtis principalioribus , ut Paſchæ, Nativitatis, Reſurrectionis, &c. Quæ principaliter ad colendum Deum modo perfectioni inſtituit Eccleſia : Jam autem teſte S. Auguſtino, *Non colitur Deus ; niſi amando.*

Quod indirecťe quoque ac per accidens hoc præceptum obliget, certum eſt toties, quoties alteri præcepto ſine tali amoris actu ſatiſſeri non poſſit. *Indirecta
ejus obligatio.*

Dicendum 6. Et ſi ſententia, quæ tenet hoc præceptum non obligare in primo inſtanti rationis, à variis tradatur ut probabilis ; imò ab aliquibus aliter procedentibus parentum praxis obtendatur, & Paſtorum de ea re vix ſollicitorum objiciatur conſuetudo : Tamen in praxi tenenda eſt noſtra ſententia, uti oſtendit timoratorum praxis, quæ pueris jam ratione uti incipientibus, oſtendit divitias bonitatis Dei, cui primitias ſuæ libertatis conſecrent. Hinc Catechiſmus Rom. in præfat. c. 10. Agens de præcipuo Paſtoris officio, Paſtores admonet, *Ut oſtendant Populo Chriſtiano divitias bonitatis divinæ, aded ut quivis perſpiciat, omnia perfectæ Chriſtianæ virtutis opera, non aliunde, quam à dilectione ortum habere, neque alium finem, quam ad dilectionem referenda eſſe.* Hinc Paſtores Catechiſtæ in primis ſolliciti ſunt, ut exercitium amoris Dei, uti & aliarum virtutum Theologicarum, pueris inculcent & eos doceant : Si qui hoc negligent, officio ſuo deſunt, nec piorum, ſed deficientium praxim imitantur.

Conclude ergo quo jure hæ ſequentes ſint ab Eccleſia condemnatæ : *An peccet mortaliter ; qui actum dilectionis Dei ſemel tantum in vita eliceret, condemnare non audemus.* Item hæc : *Probabile eſt, ne ſingulis quidem rigorosè quinquenniis per ſe obligare præceptum Charitatis erga Deum.* Item hæc : *Tunc ſolum obligat, quando tene-mur juſtificari & non habemus aliam viam, quâ juſtificari poſſumus.*

SECTIO XIV.

De Eleëmosyna.

*Quid eleë-
mosyna.*

DICENDUM primò, *Eleëmosyna* sæpè sumitur pro re quæ in eleëmosynam traditur: propriè tamen est traditio alicujus rei, quâ alterius miseriæ subvenimus, estque actus externus misericordiæ, ab interno charitatis proximi elicitus, etsi ab aliis virtutibus possit imperari, v. g. à pœnitentia, si adhibeatur ad satisfaciendum, à justitia ad restituendum, &c.

*Est præ-
cepta.*

Dicendum 2. Datur verum de eleëmosyna præceptum. Pro quo notandum est esse duplicem eleëmosynam, corporalem & spiritualement. Prioris generis eleëmosynæ comprehenduntur hoc versu:

*Quotum
piæ.*

Visio, potio, cibo, redimo, tecto, colligo, condo:
Posterioris autem hoc:

Consule, carpe, doce, solare, remitte, fer, ora.

Probat ergo conclusio, quia Matthæi 25. mittuntur maledicti in ignem æternum, ob neglectas eleëmosynas. Deinde 1. Joan. 3. dicitur, quòd charitas Dei excludatur ab eo, qui habens substantiam hujus mundi, claudit viscera sua à fratre indigente. Rursum Eccli. 4. dicitur eleëmosynam prætermittens, defraudare eleëmosynam pauperis. Denique fundatur præceptum illud in illo naturæ principio: *Quod tibi vis fieri, facias alteri*: unde patet esse naturale divinum.

*Est præ-
ceptum
naturæ.*

*Obligat
ex justiti-
a.*

Dicendum 2. Verius videtur, quod præceptum eleëmosynæ obliget ex justitia, & non solum ex charitate. Probat hoc Albertus in 4. Sent. distinct. 15. a. 16. dum hoc eleëmosynæ præceptum revocat ad præceptum, *Non furaberis*. Idem docet Scriptura Sacra dum eleëmosynam nomine *Justitiæ* sæpè exprimit, ut Matth. 6. dum dicitur: *Attendite, ne justitiam vestram faciatis coram hominibus*: Ex quo loco sententiam nostram docet S. Gregorius. Deinde Psalmo 111.

*Sacra Scri-
ptura.*

ubi

ubi dicitur : *Dispersit dedit pauperibus : iustitia ejus manet in seculum seculi.* Rursum Eccli. 4. dicitur negligens dare eleemosynam, *defraudare eleemosynam pauperis.*

Consentiunt SS. Patres, qui dicunt eleemosynam negligentem esse *furtum, spoliatorum, &c.* Imò teste S. Augustino in psalm. 147. *Res alienæ possidentur, cum SS. Pa-*
superflua possidentur. Et S. Basilii oratione ad divites: *res.*

At tu, inquit, nonne spoliator es, qui quæ dispensanda accepisti, propria repulas? quo circa tot pauperibus injuriam facis, quot dare valeres. Hinc & S. Bernardus Epist. ad Henricum Episc. Senonensem ita inducit pauperes divitibus eleemosynam negligentibus occlamantes : *Nosirum est, quod effunditis, nobis crudeliter subtrahitur, quod vos inaniter expenditis.*

Sententiam prædictam confirmat & ratio petita *A ratio-*
 ex eo, quòd superflua divitum sint bona pauperum : *ne.*

Esse enim (ut verbis Card. Bellarmini utar de arte moriendi, c. 5. l. 1.) *Divites hujus sæculi Domini sint opum suarum, si comparentur ad alios homines, tamen si comparentur ad Deum, Domini non sunt, sed administri aut æconomi aut villici.* Quod deinceps ostendit ex Scriptura Sacra ubi dicitur Psalmo 23. *Domini est terra & plenitudo ejus.* Item Aggæi 2. *Meum est argentum, & meum est aurum.* Denique quod Lucæ 16. divites comprehendantur nomine *villici*, dum ibidem dicitur : *Redde rationem villicationis tuæ.* Vide S. August. Serm. 15. de diversis c. 1. ad dictum Aggæi locum.

Ne verò opponat aliquis nomen *iustitiæ, fraudis, &c.* Impropiè sumi in Scriptura & SS. PP. cum firma stet sententia, S. Scripturam & SS. Patres in propriâ verborum significatione interpretandos esse, nisi aliquid ex propria interpretatione sequatur absurdi, quod hîc non est timendum, ut ex hucusque dictis patet, & ex dicendis constabit uberius. Quidquid interrim sit, concludo cum laudato Bellarmino l. 4. c. 9. ubi ait : *Quod, si quis fortè contendere velit, ex rigore juris, non esse supervacanea danda pauperibus, tamen negare non poteris, saltem ex charitate id esse faciendum : Pa-*

rum autem refert, utrum quis ex defectu iustitiæ, aut defectu charitatis in gehennam descendat.

*Fructus
eleemosy-
na.*

Dicendum 3. Dicuntur eleemosynâ aliquando peccata redimi, à morte liberari, omnia munda fieri, &c. Non quòd effectus illos infallibiliter operetur, ut quidam opinati sunt, aut eosdem effectus conferat, quamdiu quispiam vel solo affectu in peccatis hæret, cum sine virtuali saltem Pœnitentia peccata actualia non deleantur, quo sensu docet Concilium Trid. Sess.

*Sine pœ-
nitentia
non remit-
titur pec-
catum.*

14. c. 4. quovis tempore contritionis motum necessarium esse, ad impetrandam remissionem peccatorum. Hinc contra fidem est, dicere, quod aliquando aliquos dixisse refert S. August. l. 21. c. 22. de civitate Dei, quòd eleemosynarii non damnentur, etsi in peccatis perseverarent, vel saltem à damnatione liberarentur: Qui enim ad vitam vult ingredi, debet servare mandata. Habet tamen eleemosyna ex motione

*Misericor-
dia mis-
ericordiam
meretur.*

Spiritus Sancti facta, virtutem peccata delendi mediatè, quatenus de congruo misericordia misericordiam impetrat, & accipientem excitat, ut pro eleemosynario Deum roget pro peccatorum veniâ: Denique quatenus Deus sibi datum reputat, quod pauperibus quis elargitur. Sic etiam eleemosyna aliquando avertit aut differt plagas temporales, prout teste D. Hieronymo factum fuit Nabuchodonosori, cui eleemosynâ per annum dilationem pœnæ contulit, etsi postea in superbiam elatus, vindictam senserit.

SECTIO XV.

De quibus danda sit Eleemosyna.

*Quinam
habeant
superflua.*

DICENDUM primò, cum Salvatore Lucæ 11. *Quod superest, date Eleemosynam.* Quod tamen hic veritas adstruit, humana fallacia destruere visa est, dum aliqui docuerunt, vix inter sæculares reperiri, qui superfluum habeant, quorum Dogmâ censu-

cenſuravit anno 1657. Facultas Theolog. Lovaniensis in hac propositione: *Superfluum non est, quod homines servant, pro status sui vel parentum qualitate habitâ vel adipiscendâ: idedque vix poterit inter ſeculares inveniri qui superfluum habeat.* Quam ut falsam & elidentem obligationem eleëmofynæ proſcripſit eadem Facultas. Unde & hæc nuper damnata ab Ecclesia: *Vix in ſecularibus invenies etiam in Regibus superfluum ſtatuī & ita vix aliquis tenetur ad Eleëmofynam quando tenetur tantum ex ſuperſuo ſtatuī.*

Dicendum 2. cum S. Auguſtino in Pſalm. 147. quod *multa ſuperflua habeamus, ſi non niſi neceſſaria teneamus.* Pro cujus intelligentia notandum eſt, alia bona temporalia eſſe ſupervacanea, alia eſſe neceſſaria. Alia ruſum neceſſaria victui, ideſt ſine quibus competenter ad ſtatum noſtrum vivere non poſſumus: alia ſunt neceſſaria ad conſervandam vitam. Hinc generaliter Venerab. Beda ſuperflua dicit, *quæ neceſſario victui vel veſtiti ſuperſunt.* Et S. Chryſoſtomus in Epift. ad Hebr. c. 12. homil. 28. ubi ait: *ſine quibus vivere poſſumus, ea ſunt ſupervacanea, & ut ſemel dicam, extra ſunt poſita.* Ubi S. Doctor varia enumerat ſuperfluatorum genera. Quæ tamen alicui ad ſtatum vel ad vitam ſuperflua ſunt, Chriſtianâ prudentiâ eſt diſjudicandum. Quamvis hoc falſum ſit, illud non eſſe ſuperfluum, quod ad ſtatum ſuum vel ſuorum meliorandum cenſetur opportunum: ſic enim nulla forent ſuperflua, cum nullus omnino, quin ſuum aut ſuorum ſtatum poſſit meliorare.

Ut autem rectè procedat Chriſtiana diſcretio, in judicando quænam ſuperflua dicenda ſint, attendi ſolet ad alios ejuſdem ſecum conditionis homines, non decoctores, ſed qui competenter ad ſuum ſtatum vitam ducunt: quorum ſtatu & vivendi formâ attentis, rectè de ſuperfluis poterit judicari.

Quot autem prætextus, humana iniquitas conge-
rat, ne bona ſua ſuperflua reputet, pulchræ ob ocu-
los ponit S. Baſilius, homilia in divites avaros, ubi
ait: Prætextus
humani
quod ne
ceſſaria.

ait:

ait: sit, inquit, (divites) res partim in usu, partim condita sepositaque: ista serviat sumptibus domesticis, ista praeſto ſit ad externas phantaſias: ut iter facienti equitatus, ornatus, viaticum pro conditione fiat. Hac domi permanenti vitam reddant ſplendidam, & illuſtrem, ita ut mihi miraculum ſit, quomodo tot inanes ſumptus excogitentur. Innumeri inſtruntur currus, quibus vel ſarcina, vel ipſi mortales vèhantur, illique aere, vel argento obſecti. Equi comparantur per multi. frana, zona, frontalia argentea omnia aureaque. Insuper topeta purpurea, ipſos velut ſponſos ornantia equos. ſuratores, promi, coloni, mimifiri injuſtæ artiſ ſive neceſſariæ ſive voluptuariæ periti. Præterea coci, piſtores, pincernæ, venatores, ſicſores, piſtores, voluptatis omnimodæ commentatores. Domus omni marmorum genere corruſcantes, phrygio, laconico, theſſalico, è quibus, alia hieme calida, alia æſtate frigida eſſe oportet. Sic igitur in mille uſus ſupervacaneos diſiractæ opes, etiam in terra conduntur, & in ſecretis arcaniſque cuſtodiantur. Incertum eſt, inquit, quid futurum ſit: neceſſitati, quæ nos quandoque urgere poſſet, providendum eſt. ſed inquit; ob filios neceſſaria ſunt. Plauſibilis eſt illa avaritiæ excuſatio: liberos pretextiſ, & interea cordibus veſtris ſatiſfacitiſ. Hactenus S. Baſilius, ex quo patet, quot prætextus & excuſationes à danda eleëmofyna, adinveniat humana iniquitas, & mentiatur ſibi.

SECTIONO XVI.

Quando danda ſit Eleëmofyna.

Danda eleëmofyna in extrema neceſſitate. **D**ICENDUM primò: quando proximuseſt in extrema neceſſitate, tenetur quilibet habens ſuperflua, eidem de iſdem ſubvenire. Probatur, quia ſi unquam, certè pro hoc caſu, currit Eleëmofynæ obligatio. Deinde diviſio bonorum, cum ea conditione

didone facta est, ut in necessitate extrema omnia sint communia. De hac resolutione satis constat inter Doctores.

Dicendum 2. non tantum in extrema necessitate, *Etiā in gravi.* sed etiam in gravi tenetur quilibet de superfluis proximo subvenire. Probatur, quia alias valde raro obligaret præceptum eleëmofynæ, extremā necessitate vixdum occurrente. Deinde, multi sunt damnandi juxta Scripturam Sacram qui nudos non operuerint, hospites non collegerint, &c. Quos omnes non nisi in gravi necessitate solummodò fuisse, est verisimile. Nec refert, quòd proximo subvenire non teneamur, in gravi periculo animæ constituto, quia suā culpā in tali statu agit, & se sine tua ope, ab illa necessitate potest eximere.

Dicendum 3. Non tantum in extrema aut gravi *Etiā in communi.* necessitate, sed, & in communi tenentur divites hujus sæculi de superfluis dare eleëmofynam. Ratio est, quòd 1. Tim. 6. dicat Apostolus: *Divitibus hujus sæculi præcipe, faciliè tribuere, communicare, &c.* Si verò solum obligati essent in gravi aut extremā necessitate facere eleëmofynam, *certè non faciliè tribuerent.* Deinde notandum est, omnes communes necessitates simul sumptas, facere unam gravem, quam quisque pro suo posse, sublevare tenetur; imò si nemo eis occurreret, fierent sæpè graves aut etiam extremæ, quod quilibet avertere tenetur. Denique nihil sanctis Patribus magis familiare, quam in divitibus taxare & condemnare omnem superfluum retentionem.

Opponunt aliqui, ergo juxta nostra principia, quibus docemus ex justitia obligare præceptum eleëmofynæ, divites continuo peccabunt, superflua retinendo, cum semper occurrat communis necessitas, adeoque semper habeant secum pauperes, quibus eleëmofynas debent. Deinde, sic pauperes illi communes, *Peccant divites dantē oportunitate non dantes eleëmofynam.* possent superflua à divitibus sibi surripere, utpotè sibi debita. Resp. Cum præceptum eleëmofynæ sit affirmativum, solum pro occasione occurrente obligat:

Tom. II.

K

Unde,

Unde, si occasione occurrente non dent de superfluis suis eleemosynas, verè peccant eadem retinendo. Ad aliud Resp. Hoc quidem licitum admitti in extrema necessitate, non itidem in gravi, neque in divisione bonorum exclusus censetur casus gravis necessitatis, prout extremæ. Quare, esto bona illa superflua debeantur pauperibus illis, non ideo continuo sequitur, quòd possint eadem furripere, uti hoc usuvenit in multis aliis, quæ alicui ex iustitia debentur, quæ tamen furripere non licet.

*Quid cum
superfluis
agendum.*

Opponunt ulteriùs, ergo nullus ascendere potest ad meliorem statum, cum superflua debeant dare pauperibus. Deinde possent superflua illa reservari, danda Monasteriis, ædificationi templorum, &c. Resp. cum superflua habeant suam latitudinem, dicimus quòd non omnia sint in eleemosynas distribuenda. Unde aliqua superflua retineri possent, si ad statum meliorem verosimiliter præviderentur adscensuri, quod novos titulos essent consecuturi. Absit tamen ut superflua retineantur præcisè ad statum, per novos titulos pecuniæ superfluæ acquirendos, meliorandum: sicut enim numquam alicui foret superfluum ut ante notavimus. Denique notandum est superflua illa primò danda esse pauperibus, qui sunt templa Dei viva, deinde templis mortuis, cum Deo plus placeat misericordia, quam Sacrificium. Possunt ergo dari superflua pauperibus, & templorum ædificationi, cum unum oporteat facere, & alterum non omittere. Verùm de hoc latiùs in sequentibus.

SECTIO XVII.

Quinam ad Eleemosynam dandam sint obligati.

DICENDUM primò, cum eleemosynæ largitio importet translationem dominii, sequitur quòd eleemosyna danda sit ab alicujus rei Domino, ejusque

que libero administratore. Hinc mancipia sine expresso aut tacito consensu Domini, non possunt dare aliqua in eleemosynam.

Dicendum 2. uxor potest dare eleemosynas de iis, quorum liberam habet administrationem: talia sunt bona paraphernalia, idest quæ supra dotem contulit, aut quæ labore suo & studio, ad quæ non tenebatur, lucrata est; quæ, etsi jure Cæsareo sint uxoris, in histamen partibus ea bona sunt utrique communia, unde de his bonis, uti de aliis est judicandum. Potest tamen uxor de superfluis familiæ facere eas eleemosynas, quales aliæ fæminæ similis conditionis facere solent. Item pro libitu suo, posset eas elargiri, si administratio familiæ ad eam principaliter pertineret, ut si vir sit amens, diu absens &c. nisi expressè hoc inhibuisset.

Dicendum 3. Possunt filii familias dare eleemosynas de bonis suis Castrensibus, aut quasi Castrensibus, cum illorum bonorum administratio & Dominium ipsis competat. Idem est de iis bonis, quæ illis dantur à parentibus ad honestam recreationem, & aliis, quibus implicitè censentur parentes consentire.

Aliud est de minorennibus & pupillis, qui sine consensu suorum Tutorum non possunt de suis bonis liberè disponere, etsi possint facere parvas eleemosynas, sicut faciunt alii similis conditionis. Idem dic de prodigis illis, quibus Respublica Tutor est, & vocamus *Urbis pueros*.

Dicendum 4. Superior Religiosus potest facere eleemosynas de superfluis, juxta cujusque ordinis statuta. Imò ad hoc obligatur Superior Conventus satis fundati & dotati. Superior enim, tamquam fidelis dispensator constituitur, ut primò suorum necessitatibus provideat, & superflua pauperibus eroget. Talis enim fuit fundatorum intentio, cui sese conformare tenentur. Unde graviter peccant, qui superflua, in vana & curiosa expendunt. Audi S. Bernardum similes arguentem in declamat: ad illud: *Ecce nos reliquimus*

Decentia
statu Ec-
clesiastici.

omnia, &c. ubi ait: Esto studiosè quis laboret, dignus es planè operarius mercede sua: ut qui altario servit, de altario vivat, ut juxta eundem Apostolum, alimenta & qui- bus tegatur habens, his contentus sit. Tertium hoc ei periculum est: de altario, inquit, vivat: Non superbiat, non luxurietur, denique non ditetur, nec contra Sancti cujusdam planè dignam omni acceptione sententiam, ex clericatu ditior fiat. Non sibi de bonis Ecclesiæ ampla Palatia fabricet mutans quadrata rotundis. Nec loculos inde congreget, nec in vanitate, aut superfluitate disperdat, nec extollat de facultatibus Ecclesiæ consanguineos suos, aut nepotes (ne Filias dixerim) nuptui tradat. Res pauperum non pauperibus dare, par sacrilegii crimen esse dignoscitur. Sanè Patrimonia pauperum, facultates Ecclesiarum: & sacrilega eis crudelitate surripitur, quidquid sibi ministri & dispensatores non utique Domini vel possessores ultra victum accipiunt & vestitum. Vide eundem Epistola 42. ad Henricum Episc. Senonensem. De qua tamen praxi, satis sito tempore communi, ita loquitur in Psalm. Qui habitat Serm. 6. in fine. Ipsa quoque Ecclesiastica dignitatis officia, in turpem quæstum & tenebrarum negotium transiere. Nec in his salus animarum, sed Luxus quaritur divitiarum. Propter hoc tondentur, propter hoc frequentant Ecclesias, Missas celebrant, Psalmos decantant. Pro Episcopatibus & Archi-Diaconatibus, Abbatibus, aliisque dignitatibus impudenter hodie decertatur, ut Ecclesiarum reditus in superfluitatis, & vanitatis usus dissipentur.

Hospitali-
tas com-
menda-
tur.

Hinc, sicuti sæcularium vitæ decentia, suos habet limites, ita & Religiosorum, maximè cum fundatorum intentio sit primò suis providere de necessariis, sic ut superflua debeant dari pauperibus, nec in vana & curiosa sint expendenda. Nec de necessitate aut infortunio sibi metuant, cum teste Patre nostro S. Noberto, Hospitalitatem in dies commendante, Non possit domus aliqua egere, supra id, quod possit sustinere, quæ Hospitalitatem sollicitè studuerit observare. Unde & S. Augustinus in regula: melius, ait, est minus egere, quam plus habere.

Dicens

Dicendum 5. Pastores tum regulares tum sæculares, tenentur quoque de superfluis dare eleëmofynam. De sæcularibus per se constat, cum illi sint bonorum suorum liberi administratores. Regulares verò, et si dum ad curas Parochiales destinantur, non sint aut fiant exempti à paupertatis voto: tamen de proveni-^{Pastores possunt & debent dare eleëmofynam,}tibus suis liberè disponunt, ac de superfluis eleëmofynas dare non tantum possunt, sed & debent: Ratio est, quòd hæc quoque fundatorum Parochialium sit intentio, ut Pastores primò domui suæ de necessariis provideant, superflua verò pauperibus reddant. Unde & in Ordine nostrò, talis dispositio Pastoribus relinquitur, eo tamen excepto, ne notabilem quantitatem bonorum, amicis aut consanguineis elargiantur, quod statuta nostra prohibent, liberum tamen iisdem permittentes, elargiri sua ad pias causas.

* Quin imò quòd Pastores principaliter curam pauperum gerere oporteat, cum teste Zypeo in consultationibus Canon. l. 3. de Paroch. consult. 7. num. 1. ^{Eleëmofynarum dispensatio est Ecclesiastica,}apertum sit, quòd nemo tam ignarus sit veteris Historiæ, ut nesciat Templi & pauperum curam fuisse penes Sacerdotes & Levitas. Hinc bona pauperibus addicta, dicuntur esse *Patrimonium Christi*, cujus proinde dispensatio, tanquam quid spirituale, ad viros Ecclesiasticos pertinet.

Si verò Ædiles aut Magistri mensæ Spiritûs Sancti alibi adhibeantur, solum illi secundariò & in subsidium adhibentur ab Ecclesia, partim ut videntes aliorum necessitates, promptius contribuèrent; partim ut tamquam testes adhibeantur, quòd bona pauperum fideliter administrentur. Adde, quòd sæcularibus plerumque magis vacet, obire plateas, & eleëmofynas congregare quam viris Ecclesiasticis, principaliter divino cultui, & Templo obeundo intentis ac destinatis. Hinc tales Ædiles sæculares, sunt ad summum curatores & adiutores Parochorum, uti ex dictis constat.

Ad quid adhibeantur adiles.

S E C T I O XVIII.

*Quibus danda sit Eleëmofyna.**Quibus
danda sit
eleëmofy-
na.*

DICENDUM primò, omni indigenti eleëmofynam esse dandam, sive ille justus sit, sive injustus, sive quicumque alius, cum quilibet sit noster proximus, cui indigenti subvenire tenemur. Recensentur autem communiter pauperes triplicis generis, ut sunt omnino voluntarii, quales sunt ii, qui Evangelica consilia secuti, Christum sequuntur, amore perfectionis Christianæ omnia relinquentes, ut sunt Religiosi: alii sunt quidem in se involuntarii, sunt tamen voluntarii in causa, quales sunt indigentes ex eo, quòd laborare renuant, quo possent se à paupertate expedire. Alii denique sunt omnino involuntarii, uti sunt ii, qui contra suam voluntatem paupertatem subeunt, nec modum sciunt, quo possint se ab illâ eximere.

*Religiosi
etiam Mo-
nachis.*

Dicendum 2. Pauperibus voluntariis, ut sunt Religiosi, danda est eleëmofyna, cum sint veri pauperes, & amore perfectionis Christianæ paupertatem voluntariè subeant: deinde, accedit eorundem servitus, in Catechismis, concionibus, visitandis agris, ratione quorum ipsis aliquid conferri potest per modum eleëmofynæ. Quod quoque locum habet in iis, qui profitentur vitam merè monachalem: etsi enim illi primitus labore manuum victum & amictum compararent: non erat labor ille tam ad eadem comparanda, quam ut ait S. Hieronymus, ut eos diabolus semper reperiret occupatos, ac aliis vitiis resisterent, dum otio resisterent omnium vitiorum matri ac fomento. Poterit tamen laudabiliter illis dari eleëmofyna, cum sint verè indigentes & vicissim opera spiritualia aliis exhibeant, diu noctuque pro proximis Deum rogando.

Dicen-

Dicendum 3. pauperes in gravi necessitate constituti prius sublevandi sunt, quam bona templis & monasteriis ædificandis elargienda, maximè si pauperes alicui sint sanguine juncti, & Ecclesiæ de cætero satis sit provisum. Constans hæc meritiò laudatur S. Elifabethæ sententia, dicentis, plus curæ habendum esse templorum Dei vivorum, quam mortuorum. Hinc etiam S. Augustinus vasa dominica frangi & conflari jubebat, ut captivos redimeret, & pauperes recrearet, quos tamen non nisi in gravi necessitate fuisse, est vero simile. Idem fecit Ambrosius ab Augustino apud Possidonium in vita ejus laudatus c. 24. Acarius Episc. apud Socratem l. 7. c. 21. Cæsarius Arelat. apud Surium 27. Augusti. Unde & jus Canonicum c. 12. q. 2. capt. *aurum*, docet pietatem esse justam causam, alienandi bona Ecclesiæ, ut captivos redimerent, pauperes alerent, &c. Vide L. *Sancimus* 21. c. de Sacrosancta Ecclesia & Barbofam de jure Ecclesiæ l. 3. c. 30. numero 18.

Lubet audire S. Chrysostomum homiliâ 60. ad populum Antiochenum: ubi inter cætera ait: *Cum vagus & peregrinus indigens tecti circumeat, tu verò eum prætermittens, suscipere, pavementum ornas & columnarum capita, & argenteas quidem catenas ad lucernas suspendis, ipsum autem in carcere vinctum, ne vis quidem visere: & hæc dico, non prohibens in his gloriari; sed & hæc cum illis, quin potius anse illa commonens fieri.*

Obijciunt aliqui, quòd Deo nullus cultus, aut ornatus possit exhiberi nimius: unde Salomoni tam splendidum templum jussit sibi ædificari. Ad quæ Resp. etsi per se nullus cultus aut ornatus respectu Dei possit esse nimius, per accidens tamen potest esse talis, dum dato Deo, quod Dei est, ad pauperes vix attenditur, dum superflua suppetunt; quod & docet S. Bernardus apologiâ ad Guilielmum Abbatem, circa finem ubi ait. *O vanitas vanitatum, sed non vanior, quam insanior. Fulget Ecclesia in parietibus, & in pauperibus eget. Suos lapides induit auro, & suos*

Pauperes præferendū hinc sunt extruclio- ni templo rum, &c.

Quis Deo cultus sit nimius.

*filios nudos deserit. De sumptibus egenorum, servitur oculis devotum. Inveniunt curiosi quod delectentur, & non inveniunt miseri, quo sustententur, &c. Vide eundem ibidem multa ad rem nostram adferentem: adde, quòd hoc casu non sit actus Religionis, sua bona monasteriis aut templis erogare, dum pauperes & maxime consanguinei suppetunt, cum actus ille Deo non sit gratus, cui plus placet misericordia, quam Sacrificium. Unde familiare illud S. Augustini quod ait sermone 49. de diversis: *Quicumque exheredato filio, Ecclesiam vult facere heredem, querat alium, qui suscipiat, non Augustinum, imò Deo propitio neminem inveniat.* Hinc multis egit ad Alipium Epist. 239. ut bona volentium ingredi clericorum in communi viventium communitatem, non reciperentur: imò quòd Leporium virum prædivitem ad communitatem recipere noluerit, nisi bona sua in pauperes distribuisset, de quo Baronius ad annum 409. Hinc etiam laudatur praxis illa variorum ordinum, alios sine respectu ad facultates recipiendi, dotatos satis, si communitati congruos & idoneos. Aliàs fit, quod aliquando maritatus evenit, qui opes ducunt, non uxores, & quod tandem infaustra subsequantur.*

Ad illud autem, quod de templo Salomonis obtendunt, Resp. cum D. Hieronymo ad Nepotianum: *Neque verò mihi aliquis opponat dives in Iudæa templum, mensam, lucernas, thuribula, patellas, scyphos, mortariola, &c. ex auro fabrefacta. Tunc hæc probabantur à Domino, quando Sacerdotes hostias immolabant, & sanguis pecorum erat redemptio peccatorum, hoc est, quando carnalis lex vigeat, quæ in præmium observationis suæ permittebat abundantiam rerum temporalium, & ideo congruebat illam ædificatione templi sumptuosissimi ostentari.* De cætero, Deus non tam politis marmoribus, quam ornatis moribus delectatur: & puras magis diligit mentes, quam superauratos parietes, ait S. Bern. ad milites templ. 5.

Nec ideò in universum omnem pretiosum ornamentum

cū in Ecclesiis damnare præsumimus, neque omnem elargitionem locis sacris factam, uti quidam caufantur, quamvis immerito. Potest etenim unum fieri, & alterum non omitti. Unde cum Eximio D. Joanne Molano l. 2. imag. c. 40. in simili dicimus, quòd pretiosus ille ornatus minimè sit condemnandus, si illi, quorum interest, in casu necessitatis memores sint ejus, quod fecit Ambrosius, qui confregit vasa mystica, ut captivos redimeret; & ejus quod fecit Augustinus, qui propter captivos & quam plurimos indigentes de vasis dominicis quædam frangi & consulari jubebat, & indigentibus dispensari. Postremò ejus, quod dicit Bernardus, si propter materiale templum non permittant interire viva templa.

Dicendum 4. Pauperibus secundi generis rectè quoque datur eleemosyna, si ex bonâ intentione datur, puta ut proximo indigenti succurratur. Arcentur tamen à Republicâ plerumque tales ab eleëmosynis, quibus abuti solent ad suam & aliorum perniciem. Unde meritò talis hominum fæx, ut Reipubl. perniciofa, exilio sæpè relegatur, & si deprehendantur mendicare, carceri, radulatorio aut aliò destinantur. Debet tamen moraliter certò constare, eos posse & non velle laborare, ne eleëmosyna subtrahatur, cū præstet misericordiam abundare, quam deficere.

Dicendum 5. Pauperibus tertii generis, rectè quoque dari potest eleëmosyna, cū sint verè indigentes. Indifferens autem est, sintne ii interni & concives; an verò externi, quibus eleëmosyna datur, etsi, quia ex promiscuâ exterorum & vagabundorum mendicatione, plurima incommoda nata sunt evenire, varia circa illos statutz sint leges, quas videre quis posset in codice Belgico V. *Aelmoeffen*. Quamquam concives cæteris paribus externis pauperibus sint præferendi, utpote nobis magis conjuncti.

Dicendum 6. Non satisfacit præcepto eleëmosynæ, qui mutuando, vendendo dilata solutione, aliove

*Pauperes
2. generis.*

Tertii generis.

*Non satis
facit præcepto
eleëmosynæ
pauperi mu-*

collatanti &c.

contractu oneroso succurrit proximo extremè indigenti. Talis enim non ponit actum misericordiæ, qualis est eleëmosyna: nec aliàs sæpè obligaret eleëmosyna, cùm indigentia alterius tali viâ satis posset subveniri. Hinc de eleëmosynaria dicitur Psalmo 111. *Dispersit, dedit pauperibus*, non mutuavit, vendidit, &c. Et si autem mutuando, vendendo, &c. Satis possit obtineri finis præcepti eleëmosynæ, qui est sublevare inopiam proximi: hoc tamen minimè sufficit, ut præcepto eleëmosynæ satisfiat: non enim præcepto alicui satisfiat quando potest haberi finis præcepti. V. g. per cilicia & alias Mortificationes haberi potest finis præcepti de jejunio, tamen ille non satisfacit, si negligat abstinentiam à cibis vetitis. Præcipitur ergo eleëmosyna, id est, actus misericordiæ, qualis non est mutuum, venditio, &c. aliud esset, si solius rei usu satis subveniri posset alterius indigentia, aut si quis solùm in hoc loco indigeret, & in alio abundaret: tunc enim satisfaceret quis mutuando, vendendo, &c.

Qui fisco Dicendum 7. Qui fisco paupertatis titulo eleëmosy-
paupertas titulo nas corradunt, tenentur illas restituere. Ratio est,
eleëmosy- quòd nullo prorsus titulo eas possideant, & sit error
nas corra- in substantiâ actûs. Eleëmosyna enim non consistit
dunt, se- merè in positione rei in manu alterius, sed in manu in-
mentur ad digentis, aliàs non erit actus eleëmosynæ. Securè
restitutio- autem reddi potest ipsi domino, si inveniri possit, aliàs
nemo. posset reddi pauperibus, cùm eâ intentione illam à se
 abdicaverit eleëmosynarius, ut cederet pauperibus,
 quæ intentio censetur moraliter perseverare, nec esse
 retractata.

SECTIO XIX.

An de injustè acquisitis possit dari eleëmofyna.

DICENDUM primò, de injustè acquisitis, quæ *Non debet dari eleëmofyna de injustè ac-*
etiamnum debentur alteri, ut sunt furto ablata *ceptis,*
aut rapinâ, non potest dari eleëmofyna. Debet enim
eleëmofyna dari de bonis propriis, aut alienis, ex com-
missione, qualia non sunt bona, quæ clamant Domi-
num, nec quorum administratio nobis est commissa.

Dicit quidem Salvator Lucæ 16. *Facite vobis amicos de mammona iniquitatis.* Ad quod respondet S. Aug. Serm. 85. de Verb. Domini, In hunc modum: *Intellectus ille corrigendus est, inò de tabulis cordis vestri omnino delendus est: nolo sic intelligatis; de justis laboribus facite eleëmofynas: ex eo quod rectè habetis, dare.* Aliter hîc respondet Card. Bellarm. de arte moriendi l. 1. c. 5. ubi ait: *Quod autem in extremâ parabolâ Dominus dicit, facite vobis amicos de mammona iniquitatis, non significat eleëmofynas esse faciendas de injustis divitiis, sed eleëmofynas esse faciendas de divitiis, quæ revera non sunt divitiæ, sed umbræ divitiarum.* Ita quoque exponit S. Cyprianus l. de opere & eleëmofyna: S. Aug. l. 2. qq. Evang. q. 34.

Dicendum 2. de acquisitis ex opere illicito, quæ *Aliud ali-*
tamen Respublica in pœnam facit esse acquirentis, *quando est*
qualia docent esse acquisita ex opere meretricio, quod *de acceptis*
alibi permittunt, dari posset eleëmofyna. Cum enim *ex opere*
bona illa, etsi opere illicito acquisita, fiunt alterius, *rectis,*
de iisdem possunt liberè disponere, & dare eleëmofy-
nam. Aliud est de aliis bonis ex opere illicito acquisi-
tis, quod neque Respublica tolerat, neque datum in
alterius potestatem transfert, qualia sunt acquisita ex
adulterio, rapinâ, &c. Quæ probabilior sententia
docet esse restituenda, nec transire in dominium illa
ex tali opere acquirentis, unde de iis eleëmofyna da-

ri non potest. Vide quæ dicuntur de hac re agendo de dominio. Similia sunt bona, quæ nec licitè tenentur, nec licitè priori Domino redduntur, qualia sunt simoniace accepta, quæ pauperibus restituenda sunt, ut communis docet opinio.

SECTIO XX.

De Intentione, quæ debet dari eleemosyna.

*Intentio
danti e-
leemosy-
nae debet*

DICENDUM primò, cum S. Chrysoft. hom. 19. in c. 5. Matthæi, *Non enim tantummodo dedisse eleemosynam, sed quemadmodum oportet, & propter hoc dedisse, virtutis est.* Unde requiritur debita intentio in dante eleemosynam, ut virtuosè & meritoriè eleemosyna concedatur. Modum autem illum dandi eleemosynam exprimit Salvator Matth. 6. ubi ait: *Cum facis eleemosynam, noli tuba canere ante te. . . . & nesciat sinistra tua, quid faciat dextera tua.* Ad quod S. Augustinus tract. 6. in Ioan. Epist. per *sinistram* intelligit intentionem placendi hominibus, per *dexteram* intentionem placendi Deo, faciendi eleemosynam propter Deum, ejusque gloriam. Noverat enim S. Pater, quòd licet quis omnes suas facultates distribueret in pauperes, charitatem autem non habeat, nihil proderet. Quam Apostoli sententiam, etsi aliqui exponant de charitate proximi, eandem tamen exponendam & intelligendam esse de charitate Dei, probabo, agendo de contritione. Deinde actus eleemosynæ est actus charitatis proximi, qui sine amore Dei esse non potest, sed debet esse propter Deum.

*Danda est
eo abscon-
dita.*

Alium modum eleemosynæ largiendi dedit Salvator, scilicet ut fiat in abscondito, ne quod foris ostenditur, intus à mercede evacuetur. Deus enim qui videt in abscondito ejusmodi eleemosynam remunerat.

Dicendum 2. Neque ideo culpandi sunt, qui in signum datæ eleemosynæ, sua nomina aut insignia rebus

Est præceptum de jure divino naturale.

Dicendum 2. Correptio Fraterna est in præcepto, ut patet ex hoc Matth. 18. *Si peccaverit in te frater tuus, vade, & corripe eum, &c.* Item Eccli. 19. *Corripe amicum, corripe proximum*: Fundatur autem hoc præceptum in hoc primo naturæ principio: *Quod vultis, ut faciant vobis homines, & vos facite illis*: Vellet autem indubiè quilibet à se averti malum spirituale, quod proinde aliis est faciendum. Adde, quòd honor & gloria Dei nos semper urgeat, ut ejus honori semper intendamus, quantum commodè possumus, quod fit per correptionem fraternam.

Materia correptionis.

Dicendum 3. Omne peccatum & præsertim mortale, est materia correptionis fraternæ. Quòd mortale peccatum, sit propria correptionis materia, patet ex Matth. c. 18. ubi dicitur: *Si audierit te frater tuus, lucratus es fratrem tuum*, ergo jam antea perierat, utique per peccatum mortale. Ita S. Aug. Serm. 16. de Verbis Domini.

Etiam veniale.

Peccatum etiam veniale est materia correptionis, maximè si sit occasio peccati mortalis, scandali, aut vergeret in detrimentum boni communis. Quin imò verior apparet sententia, quæ docet, quòd sub veniali etiam venialiter delinquentes sint corripiendi, si commodè quis possit: ratio est, quòd non impedire damnum temporale cum possis, quod tamen non est ita grave, sit peccatum veniale: ergo à fortiori, non impedire damnum proximi spirituale, etsi non ita grave, erit peccatum veniale. Deinde, licet per peccatum veniale non pereat, diminuitur tamen per illud habitus charitatis, vel quoad fervorem, vel etiam quoad habitum, juxta ante dicta. Denique non semper abest, hic spes fructus, præsertim in iis, qui perfectioni student.

Omnia mortalia.

Dicendum 4. Peccata mortalia sive in Deum, sive in proximum, sive publica sive occulta, sunt quæque materia fraternæ correptionis. Quòd autem Scriptura Sacra solum meminit peccati in se admissi, dum dicit, *Si peccaverit in te frater tuus*, tamen in hoc a majori

jori censetur meminisse peccati in Deum admissi. Adde, quòd omne peccatum in Deum commissum, etiam aliquo modo sit in nos, tamquam in Filios Dei, in quos offensa Patris suo modo redundat.

Neque ideò, dum corripimus peccata publica, sequentur graviora mala, ob quæ à Republicâ tolerantur, si audierint corripientem; neque ideò se quis opponit Magistratui: Quia si spes affulgeat, quòd corripientem audient, solummodo studeret aliorum emendationi, quod à nullo potest impediri. Nec ita publica peccata semper permittuntur, ut hucusque judicant aliqui.

Dicendum 5. Etiam peccata futura possunt esse materia correptionis fraternæ, si periculum sit illud à proximo committendi. Et si enim proximus nondum perierat, est tamen in periculo proximo pereundi, à quo periculo proximum liberare quilibet ex charitate constringitur, dum commodè potest.

Dicendum 6. Quicumque videt, quòd proximus ex ignorantia mortaliter peccet, si sit spes fructus, tenetur eum corripere, aut potius instruere, maximè si sine suo incommodo id possit. Si verò quis operetur malum ex ignorantia crassa juris humani aut divini, si per admonitionem non speretur emendatio, non tenetur ad admonitionem: Excipe tamen casum, quo ex omissione correptionis sequeretur malum aliquod tertio, v. g. ex tali ignorantia doceret Hæreses, aut etiam si sit Superior, aut alium ex officio instruere teneatur, ut sunt Concionatores, Pastores, Confessarii, &c. Idem dic de iis, qui peccant ex ignorantia juris naturæ, maximè cum juxta opinionem à nobis datam, nulla ejusmodi ignorantia sit invincibilis.

Qui verò ex ignorantia invincibili juris divini peccant debent admoneri, si sit spes fructus, nec timeantur graviora mala: illa enim ignorantia est grande malum: cum scientia eorum sit necessaria ad rectè vivendum, quod quilibet à se averti vellet, adeòque à proxi-

*Quando-
nam pec-
cata fu-
tura.*

*Quomodo
corrigen-
dus qui
peccat ex
ignorantia.*

à proximo idem avertere debet, dum commodè potest. Deinde peccata materialia, quæ ex tali ignorantia sequuntur, per se dedecent naturam rationalem. Adde, quod sæpè sit periculum peccatorum formalium, si v. g. inciperet ignorantia fieri vincibilis, quæ ante fuerat invincibilis. Ex eo autem, quod ius humanum non cum tanto rigore obliget, etiam in eo jure non tanta occurrit obligatio ignorantem corripiendi. Unde si aliqua ratio occurrat non admonendi illum, cessare censetur ejus obligatio.

S E C T I O II.

Quinam corripere debeant, & quinam corripi.

*Superiores
in primis
debent cor-
ripere sub-
ditos.*

DICENDUM primò corripiendi obligatio primariò spectat ad illos, qui alios ex officio tenentur instruere, ut sunt Pastores, Superiores, Parentes &c. Secundariò autem ad omnes omnino currit ea obligatio, cum quilibet sit alteri proximus, quem corripere quilibet tenetur, dum occasio corripiendi occurrit, maximè cum unicuique mandatum sit de proximo suo. Alii tamen præ aliis magis principaliter adest talis obligatio, illis scilicet, qui aliis magis sunt conjuncti.

*Superior
non debet
temere in-
subdito-
rum vitia
inquirere.*

Dicendum 2. tenentur Superiores & Patres Familias, & alii quibus aliorum cura ex officio incumbit, in aliorum sibi subditorum vitam & vitia inquirere, non ut aliquid corripiant, sed ut eadem emendent, ait S. August. hoc tamen notandum est, non temerè in alicujus vitam esse indagandum, de quo constat, eum esse probum, cum quilibet debeat præsumi bonus, donec probetur malus aut appareat eum esse malum. Ut autem Superiores efficacius corripere possint ejusmodi, obligantur se custodire innoxios, maximè ab eodem peccato, de quo alium corri-

corripiunt, ne cadat in eos illud axioma: *medice cura te ipsum.*

Dicendum 3. omnes omninò peccatores, dum ^{Omnes} speratur emendatio, sunt corripiendi. Hinc etiam in-^{peccatores} fideles peccantes, consuetudinarii, inferiores ac su-^{sunt cor-} periores sunt corripiendi. Quilibet enim cuilibet est ^{dum spes} proximus, quem spiritualiter indigentem proinde ^{emenda-} sublevare tenetur, si commodè possit. Quòd autem ^{dest.} etiam superiores aliquando sint corripiendi, patet ^{Etiā su-} ex eo, quòd sint ii etiam nobis proximi, imò eo ^{periores,} magis præ cæteris sunt illi admonendi, quo magis sunt diligendi, & quo malum aliquod in ipsis censetur gravius, quam in aliis. Deinde, cùm in periculo majori versentur, & plus carere soleant comite correptore, quam comite assentatore; etiam plusquam cæteri sunt admonendi superiores.

Variastamen volunt alii hîc adhibere cautelas, ne si bestia tangat montem, lapidetur: ac primò, ut superiorem corripiens sit spectatæ virtutis: secundò, ut ejus admonitio plus fiat rogando, quam objurgando. Tertiò, ne fiat publicè, nisi peccatum ejus, de quo corripitur, esset quoque publicum.

SECTIO III.

Conditiones requisite ad debitam correptionem.

DICENDUM primò, cùm præceptum, correptionis fraternæ sit affirmativum, non obligat, nisi ^{Ut corre-} occurrentibus certis circumstantiis, quarum prima ^{prio rectè} est, ut moraliter certò tibi constet, peccatum à fra-^{quiritur} tre esse admissum: unde non sufficit de eo dubitatio, ^{ut mora-} aut quævis opinio probabilis; cùm enim correptio ^{liter certa,} sit odiosa, meritò conquereretur proximus se corripere ^{confitei de} de delicto, cujus est insons, ac de alterius judicio, ^{peccato,} temerario. Adde, quòd in dubio semper standum sit, pro innocentia alterius.

Vt sit spes emendationis. Secunda conditio est, ut sit probabilis spes emendationis. Aliàs enim foret correptio inutilis, & similis esset corripiens medico, qui daret portionem amaræ ægro, quam tamen nosset non profuturam. Unde si prudenter timeatur, quòd proximus eâ correptione excitabitur ad mala graviora, cessabit lex de corripiendo. Idem esse solet, de consuetudinariis, peccatoribus publicis, &c. In quorum admonitione sæpè deest spes emendationis, ratione cujus ab illorum admonitione sumus liberati.

Quid agendum in dubio spei & timoris. Si verò sit dubium, an profutura sit correptio necne, tenet corripiendi obligatio, si de cætero non timeantur incommoda: quorum si sit probabilis timor, melius omittetur correptio, cùm in omissione ejus sint minora & pauciora mala timenda, quam in eadem adhibendâ; cùm omittendo solùm manebit in suo peccato proximus; si verò adhibeam correptionem, addet forsitan plura & graviora. Aliud esset in ultimo vitæ, in quo casu præstat eum cum aliquali spe salutis corripi, quam ex voluntate ejus pravâ gravius damnari. Si verò proximus sit initio futurus pejor, postea tamen sit emendandus, & hoc certò sciam, teneboreum corrigere, si verò illud ignorem an postea emendabitur, à correptione erit abstinendum, ob timorem quòd ex ea fiet deterior. Hoc tamen notandum, sæpè corripiendum esse, etiamsi non speretur in proximo emendatio; sic blasphemi, proditores & similes admonendi sunt, etiam sine spe emendationis, quia ad hoc nos obligat honor Dei debitus, bonum Reipublicæ, &c.

Debet fieri tempore opportuno. Tertia conditio est, ut fiat correptio tempore opportuno: correptio enim, quæ uno tempore prodest, alio tempore oberit. Hinc consultum, non illicò post admissum peccatum, quamdiu durat passio, alium corripere, nec aliis præsentibus, sed in secreto, & alterius animo jam moderato.

Vt sit necessaria. Quarta conditio est, ut sit necessaria correptio: tunc autem censetur esse necessaria, dum non est alius

alius, qui corrigit, nec sit alia via ipsum deducendi ad emendationem. Si enim probabile sit, quòd vel per se, vel per alium proximus emendabitur, cessat obligatio corripiendi.

Ex dictis sequitur plebeos sæpius ad corripiendum non esse obligatos, eo quòd prudenter præsumere possint, se suâ correptione vix aliquid profuturos. Idem est de scrupulosis, qui ab hac obligatione sæpè liberantur, ob grave damnum, quod timetur, puta continuas anxietates conscientie & alia.

Vix plebes ad correptionem obligantur, & quare.

SECTIO IV.

Ordo Correptionis Fraternel.

DICENDUM primò, ordinem hunc assignat Christus Matthæi 18. ubi ait : Si autem peccaverit in te frater tuus, vade, & corripe eum, inter te & ipsum solum : Si te audierit lucratus es fratrem tuum : Si autem te non audierit, adhibe tecum adhuc unum vel duos, ut in ore duorum vel trium testium stet omne verbum. Quòd si non audierit eos, dic Ecclesie. Si autem Ecclesiam non audierit, sit tibi tamquam Ethnicus & Publicanus.

Quo ordine ne fieri debeat correptio.

Hinc primò sequitur, ordinem hunc esse juris naturalis, quod dicat, ut cum minimo famæ proximi dispendio fiat correptio, quod fit hoc ordine servato. Primò enim corripiendus est proximus inter te & ipsum solum, nam ut ait S. Hieron. in c. 18. Matth. Corripiendus est Frater seorsim, ne si semel pudorem ac verecundiam amiserit, remaneat in peccato. Hoc autem, observandum est, si peccatum fratris sit occultum, nam si sit publicum, cessat finis, ob quem correptio debeat fieri in occulto, scilicet, ut quantum fieri potest, consulatur famæ proximi, quæ jam inde perdita est. Deinde, si alii viderint, publicè peccantem manere indemnem, facillè scandalifabuntur : Unde de iis ait Apost. 1. Tim. 5. Peccantes (publicè) coram omnibus

Inter 4. oculos.

Publici *argue.* Idem dic de peccato occulto quidem, sed quod
peccatores *sunt pu* vergit in damnum tertii. Ratio est, quod minor cura sit
blis e ar habenda proximi peccatoris famæ, quam boni inno-
guendi. centis tertii. Unde si quis occultè Hæreses spargeret,
 aut occultè tractaret pro urbe tradendâ, poterit abs-
 que præviâ secretâ admonitione denunciari. Nec refert
 quod Apostolus dicat, *Hæreticum hominem post unam*
aut alteram monitionem evita; Cum alloquatur hîc
 Episcopum Titum, qui præviè hominem Hæreticum
 admonere debet, antequam eundem ut vitandum
 rejiciat.

An possit Idem dicendum de casu, quo quis in illud consenti-
quis cede- ret, ut sine monitione præviâ peccatum suum supe-
re suo juri riori denunciatur, qualis praxis dicitur esse in Societate
ad suam Jesu, posset enim homo, qui est Dominus suæ fa-
famam. mæ, in hoc consentire, maximè ratione boni alicu-
 jus spiritualis, quod ex hoc casu expectari posset.
 Quæri hîc posset, an dicta constitutio Societatis esset
 licita, seclusâ renuntiatione juris ad famam? Resp.
 Quidam etiam generaliter dictam Constitutionem
 Societatis condemnarunt, tamquam planè injustam,
 quam sententiam ut probabiliorem secuta est Aca-
 demia Salmanticensis anno 1627. teste Hieron. Rodri.
 compendii qq. Reg. resolut. 36. Ratio eorum est,
 quod etsi homo sit Dominus suæ famæ, & proinde ob
 aliquod bonum possit in ea pati aliquod detrimentum:
 Quia tamen præceptum correptionis naturale ac divi-
 num, non solum respicit famam proximi, ut quam
 minimè lædatur, sed etiam attendit bonum corre-
 ptionis, puta ut convenientius fiat, & pacem com-
 munem procuret, rixas devitet & alia damna & in-
 commoda, quæ ex tali manifestatione criminum oriri
 solent: Sequitur, quod quilibet privatus non possit
 cedere juri ad famam in dicto casu. Addunt insuper,
 quod sæpè superior sit minus aptus ad emendandum,
 quam alius particularis, tum quod superior sit illitte-
 ratus & peccanti minus bene affectus: Quo casu vo-
 lunt non esse licitum omisâ privatâ correptione, pro-
 cedere

cedere ad inutilem privatam denuntiationem. Ita aliqui. Verum alii verius docent talem constitutionem esse planè licitam, maximè cum statutum illud ut & alia ejusdem Societatis approbata sint à Gregorio XIII. prohibente ne eadem statuta quis impugnare audeat, etiam causâ indagandæ veritatis, idque sub excommunicatione.

Secusâ tamen eâ renuntiatione juris ad famam, docet P. Amicus etiamnum licitam esse talem constitutionem Societatis, maximè ob ingens bonum Religionis, quod ex eâ constitutione consequitur, aut speratur, quod prævalet bono privati, quod ex conservatione famæ apud Prælatum potest expectari. Resp. Tamen secusâ tali renuntiatione juris ad famam, tale statutum fore illicitum: Cum enim lex illa corruptionis sit generalis & omnes omnino obliget, sequitur quòd non possit descendi ad secundam vel tertiam monitionem in Evangelio præscriptam, omisâ primâ secretiori, sine injuria fratris, qui jus habet ad suam famam, quod dicto modo violatur. Deinde expressè docet S. Thom. 2. 2. q. 33. a. 7. ad 5. Prælato non esse obediendum, dum aliquid præcipit contra jus divinum, quod hoc casu fieret. Neque dici potest, aliquando licitè præcipi aliquid à Superiore, si gravis necessitas illud suadeat, aut ob majus bonum, uti prætendit P. Amicus, quia è contra ex tali privatâ delatione, omisâ secretâ monitione, nata sunt in communitate oriri plura incommoda, quam sperari commoda, dum vident subditi omnia sua delicta occulta, nota esse Prælato, dum amisâ famâ liberiùs peccant, unde odia, rixæ, invidiæ, detractiones, judicia temeraria, &c. Denique, cum Superior non sit Dominus famæ subditorum, non potest absolutè secusâ renuntiatione juris naturalis ad famam, sine injuriâ subditi vel le, ut occulta ejus delicta ad se immediatè deferantur, dum speratur correctio per secretam admonitionem.

Restat inquirendum, quomodò Religiosus possit cedere illi juri naturali, cum illud sit planè invariabi-

le & indispensabile, uti diximus agendo de legibus. Ad quod respondemus, talem constitutionem non variare nec dispensare in jure divino naturali, sed solum invariare ejus legis materiam: cum denuntiatio facienda Præfato ante secretam monitionem, quæ tali jure prohibetur, solum illa intelligatur, quæ fit invito delinquente nec juri suo renuntiante, cum sit illi eo casu injuriosa, quod factâ renuntiatione dictâ absolutè cessat, nec ulla fit renuntianti injuria.

*Quare testes sint
adhibendi.*

Dicendum 2. Si peccatum fratris sit occultum, nec correptus occultè emendetur, possunt adhiberi testes, non tantum peccati conscii, ut volunt aliqui, sed & peccati inscii: Quamvis autem hoc casu fiat aliquod detrimentum famæ proximi, tamen hoc nihil obstat, cum sit major cura habenda conscientie proximi, quam famæ ejusdem, si utrumque haberi nequeat. Neque hac inductione testium proximus infamatur, cum non dicatur peccatum ejus animo infamandi, neque illi, cui dici non possit, quod tamen ad formalem infamationem requiritur.

Rationes autem, quare testes sint adhibendi, sunt, primò quia hæc ratione potest correptus illorum ore convinci, si neget se fecisse peccatum. Secundò si neget se illud fecisse, possit à testibus observari, si iteret. Tertiò Si postea denuntiandus sit, possit denuntians testari se fecisse suum officium. 4. ut monitio plurium sit ad emendationem efficacior.

*Posit sine
testibus
dici superiori ut
testi & patri, non ut
iudici.*

Dicendum 3. Si proximus neque secretâ admonitione, neque testium adhibitione factus sit melior, sive non sit emendatus, deferendus est Ecclesiæ id est superiori quâ tali, quem si non audierit, sit tamquam Ethnicus & Publicanus. Dixi *quâ tali*, quia verius videtur, posse proximum secretâ admonitione non emendatum, sine adhibitione testium prævia, deferri superiori, non ut Iudici, sed ut Patri & testi, maximè si superior sit vir pius, nec contra alium præoccupatus. Probat hoc S. Augustinus in regula, ubi ait. *Sed antequam aliis demonstretur per quos convin-*
cendus

cendus est, si negaverit, prius præposito debet ostendi, si admonitus neglexerit corrigi. Vult ergo S. Præful, post admonitionem secretam proximum non emendatum Superiori vel Præposito, ut testi & privatæ personæ esse ostendendum, idest denuntiandum, idque ut ait *antequam aliis*, idest testibus, *per quos convincendus est, si negaverit, demonstratur*. Hinc quando idem ibidem ait: quod prius debeat alteri vel tertio demonstrari, antequam Præposito indicetur, considerat Præpositum ut talem, sive ut iudicem.

Dicendum 4. debet in corripiente adesse bona & recta intentio, ut proximi bonum procures, & ejus malum impedas, non ut idem infametur, ut bonum ejus impedas, quod sub correptionis specie sæpè palliat invidia & ambitio, ita ut sæpè falsa pro veris deferantur. Unde S. August. serm. 16. de verbis Domini, ita rogat: *Quare tu illum corripis? quia tu doles, quod peccaverit in te? absit. Si amore tui id detestamur facias, nihil facis, si amore illius facis, optimè facis.* *Intentio corripientis debita.* Præstaret ergo, quod superior tales delatores rejiceret, si desideraret requiem & subditorum amorem, nam ut ait Scriptura Sacra Eccli. 28. *Lingua tertia multos commovet, & dispersit illos de gente ingentem.*

S E C T I O V.

Quid, & quotuplex sit scandalum.

D ICENDUM primò, scandalum nihil est aliud, quam dictum vel factum minùs rectum, præbens alteri occasionem ruinæ spiritualis. Sub dicto & facto, comprehende eorum omissiones. Dicitur quoque præbens occasionem, non causam, ut significetur, voluntatem à causâ externâ ad peccatum impelli non posse, nisi ipsa consentiat.

Dividitur scandalum in activum & passivum. Activum est, jam jam definitum. Passivum est, ruina spiritualis.

ritualis, sive peccatum, in quod alter inducitur, quod non semper scandalo activo conjungitur, si scilicet alter constans, ex malo alterius exemplo non cadat, vel non accipiat occasionem ruinæ spiritualis.

Occasio Potest autem tripliciter quis alteri præbere occa-
directa & sionem ruinæ. Primò *directè & formaliter* intendendo
indirecta. ruinam alterius, quod propriè diabolicum est. Secundò, *directè* quidem, sed non *formaliter* intendendo alterius malum, v. g. si alterum inducam in luxuriam, non quia illa mala est, sed quòd ex illa lucrum recipiam. Tertiò *interpretativè & indirectè*, quando alterius malum quidem non intendo, sed tamen talem actionem pono, ex quâ prævidere possum & debeo alterum esse casurum.

Ex ignorantia, Aliud quoque est scandalum ex infirmitate seu pas-
passione sione, aliud ex ignorantia, aliud denique ex mali-
or malitia, tia seu pharisaicum.

Ex infirmitate est, quod merè ex impulsu concupiscentiæ contingit: v. g. si quis ex aspectu speciosæ mulieris inducatur ad libidinem.

Ex ignorantia est, quod contingit ex ignorantia ejus, quod opus cohonestat. v. g. videt quis aliquem in quadragesimâ comedentem carnes, ad quod ille habet licentiam, quam alter nescit: & ex illo exemplo perducitur ad idem faciendum.

Ex malitia seu *pharisaicum* est, quod oritur merè ex alterius malitia, seu quod nullâ passione, aut ignorantia aut occasione externâ malâ, sed solâ voluntatis malitiâ contingit.

Scandalum est speciale peccatum, Dicendum 2. Scandalum activum est speciale peccatum, à peccato in quod inducit: deinde contrahit malitiam ejus peccati, in quod inducit. Probatur prius, quia qui alterum inducit ad peccandum, peccat contra charitatem proximi, idque verum est, sive *directè* id fiat, sive *indirectè*, quia indirecta intentio sufficit, ut constituat speciale peccatum. Probatur posterius, quia omnis virtus prohibet alteri da-

ri occasionem etiam indirectè, oppositi vitii, adeoque peccat contra virtutem hoc prohibentem. Deinde, quia alium inducit ad peccatum, est quoque causa moralis talis peccati, adeoque tali peccato peccat.

Objiciunt hinc aliqui, ergo qui vel indirectè alium induxit suo exemplo ad furtum tenebitur ad restitutionem, cum peccarit peccato furti. Resp. negando sequelam, & dico sæpè peccari contra justitiam, ubi tamen non occurrit obligatio restitutionis, maxime si vitium illud tantum reductivè spectet ad injustitiam, & quando læsus non habet jus obligandi aliquem ex eâ actione malâ. v. g. sit aliquis, qui inducit alium, ut sibi det ad usuram: Inducens procul dubio peccat contra justitiam, non quod sibi ipsi volens injuriam faciat, sed ideò, quod alteri occasionem præbeat, inducendo ut tibi injuriam faciat. Nec ideò inferri potest, quod consulens alteri furtum, non teneatur ad restitutionem, eo quod etiam indirectè tantum furto coöperetur. Consulens enim furtum directè vult alterius damnum & aliorum furtum, adeoque auctorem furti principalem se facit. Aliud est in eo, qui malo suo opere ad furtum alium inducit, etsi enim occasionem ejus det, tamen non est ejusdem causa efficax, sed solum occasio.

Sæpe peccatur contra justitiam, etsi non sit obligatio restituendi.

Dicendum 3. Ex dictis patet, quod in Confessione debeat exprimi peccati species, in quod alterum tuo malo exemplo, induxisti; nec sufficiat dicere, dedi scandalum peccati mortalis, cum malitia peccati, in quod inducitur, contrahatur à scandalisante. Etsi secundum sententiam veriore, etiam circumstantiæ graviter aggravantes, etsi speciem non immutent, sint in confessione exprimendæ, de quo postea.

Dicendum 4. Dum quis paratus est facere duo mala, licet sine peccato scandali consulere, ut faciat minus malum, saltem conditionatè; sic Apost. 1. cor. 7. suadet Corinthiis, ut vitent malum fornicationis, & cognoscant uxores solâ voluptatis causâ, quod peccatum est veniale, prout ex S. Augustino docebitur in materia

Licet suadere minus malum parato facere majus malum.

materia de matrimonio. Deinde dictam sententiam aperte tradit S. August. l. 2. de adult. conjugii, ubi ait: *Si enim facturus est, quod non licet; jam faciat adulterium, & non faciat homicidium, ut vivente uxore alteram ducat, & non humanum sanguinem fundat.* Idem docet Epiph. l. 2. contra hæres. hæresi 61. Chrysost. hom. 27. ad populum Antioch. Ratio hujus est, quòd eo casu, non ita suadeatur minus malum, quam dissuadeatur majus malum. Adeòque non fit malum, ut eveniat bonum: sed datur prudens consilium, quale ab amico deberet expectari. Neque inde sequitur, quòd illud minus malum exequens, non peccet, eò quòd consulens non peccet; quia hæc solum sequuntur, ubi consilium est absolutum & non conditionatum, id est, si alterum malum facere velit. Quin imò, quidam dicta etiam intelligunt, etsi alter de malo illo minori non cogitaret, quòd suaderetur; quod probant exemplo Loth, qui ut Sodomix crimen hospitibus à conjuratis Sodomitis inferendum averteret, obtulit filias suas iis stuprandas, quam oblationem à peccato excusant S. Ambros. l. 1. c. 6. de Abraham, D. Thomas q. 1. de malo a. 5. ad 14. & alii.

SECTIO VI.

De variis, qui coöperantur malo alterius.

*Non licet
domum e-
locare me-
rettricibus,*

DICENDUM primò, peccant mortaliter, qui domos suas elocant meretricibus. Ratio est, quòd tali elocatione dent occasionem ruinæ, tum meretricibus, tum accedentibus ad eas. Deinde, accedit judicium sæcularium honestiorum, qui id nefas esse existimant, neque hoc casu licitum elocare domos. Nec dici potest, eos jure suo uti; quia ad hoc jus non habent; deindè sub mortali aliquando à jure suo est abstinendum, v. g. ut evitem ruinam proximi. Et quamvis alibi habitarent, hoc nihil excusat, cum ne-
cessè

cesse sit, ut eveniant scandala, vā tamen est homini illi, per quem scandalum venit.

Aliud esset, si domus non ita commodè aliis posset elocari, v. g. si sita foret in plateā meretriciā, vel dudum in eā domo meretrices habitassent, nec vellet honestiores in eā habitare, tunc cum magno suo incommodo, non tenetur quis alterius malum impedire. Cavendum tamen ne domus meretricibus cariùs elocetur, cum illam maiorem caritatem nullo iusto titulo exigere quis possit aut recipere.

Dicendum 2. peccant famuli & famulæ signantes *Famuli*
locum concubinæ, domino suo, deferentes ad eam *peccant*
litteras vel internuntia, ut eam ad venerem excitent, *subserviunt*
dicentes concubinæ, Dominus meus ad te de nocte *res d. min.*
veniet, &c. Dominus enim illis actionibus, absolu- *normis la-*
tè peccat, ergo & alii eisdem actionibus coöperan- *bideat*
tes, uti sunt hic famulus & famula. Deinde peccant
omnium iudicio lænones, qui meretrices adolescen-
tibus procurant; ergo etiam dicti famuli, cum nihil
faciant, nisi lænorum officia meretricem procura- *Lænorum*
ndo. Deinde, qui procuraret Domino suo vene-
na, indubiè peccaret: ergo multò magis, qui eidem
procurat venena spiritualia. Debent ergo similes fa-
muli, etiam cum damno suo & incommodo, Domi-
nos dictos deferere, & sese aliis elocare: præstat enim
monoculum etiam ad vitam ingredi, quam duos oculos
mitti in gehennam ignis, quare etiam oculus, pro
vita spirituali amittendus est, idest, res sibi aliàs cha-
rissima. Unde & subsequens propositio ab Innocen-
tio XI. est proscripta: *Famulus qui submissis humeris*
scienter adjuvat herum suum ascendere per fenestras ad-
stuprandam Virginem, & multoties eidem subservit defe-
rendo scalam, aperiendo januam, aut quid simile coöpe-
rando, non peccat mortaliter, si id faciat metu notabilis de-
trimenti, puta ne à Domino malè tractetur, ne torvis ocu-
lis aspiCIatur, ne domo expellatur.

Dicendum 3. Peccant caupones & tabernarii, parantes cibos vetitos nolentibus jejunare, eo quòd hoc
sit

fit clarè coöperari peccato alterius. Nec refert, quòd alii idem facerent, quia neceffe est, ut veniant scandala: vñ tamen homini illi, per quem scandalum venit. Sic etiam, si prævideam, quòd alius se veneno occidet, non possum illi illud vendere, etsi alius sit, qui idem vendet.

*Materia-
lis coöpe-
ratio pec-
cati.*

Dicendum 4. Licitum tamen est quandoque coöperari materialiter alterius peccato, quando iusta causa subest, uti si alterius peccatum impedire non possis aut debeas, si actio tua sit indifferens, &c. Videndum tamen ad gravitatem causæ & gravitatem delicti, & juxta illud, quod præponderat, erit disjudicandum. Sic Parochus potest dare Eucharistiam occulto peccatori publicè eam petenti; sic potest moribundo consuetudinario, Hæretico, &c. dare absolutionem, conjux tenetur reddere debitum uxori castitatis voto adstrictæ, si petat, eo quòd sit rationalis causa, peccata alterius permittendi, & solùm est coöperatio materialis alterius peccato, non itidem formalis.

*Femina
lascivè se
ornantes
peccant
mortaliter*

Dicendum 5. Peccant mortaliter mulieres lascivè sese ornantes, prout sunt eæ, quæ vel ex parte ubera sua detegunt, & mediâ parte nuda publicè ostentant. Ratio est, quia præbent occasionem ruinæ tali ornatu, idest lasciviæ. Deinde secundùm omnes peccant mortaliter, qui pingunt picturas inhonestas, eo quòd illas adspicientes ad libidinem excitare, natæ sint; Ergo eo magis talis ornatus, cum magis, quam tales picturæ, tali fini subserviat. Neque hic ullus titulus, vel consuetudinis vel libertatis, vel alius quispiam poterit excusare, uti mox videbitur.

SECTIO VII.

Referuntur falsi prætexus, peccatum scandali permittendi.

DICENDUM primò, jus libertatis propriæ, abs-
que alio incommodo, non potest esse causa suf-
ficiens, scandali admittendi. Ratio est, quòd quan-
documque de lege aliquà certò constat, tunc obliga-
tio ipsi libertati est imposita. Cùm ergo lex charitatis
vitandi scandali sit certa: obligatio ejus libertati cen-
setur imposita. Deinde, aliàs nulla omnino lex obli-
gabit, cùm omnis lex sit libertati imposita, eique
odiosa. Unde clarè patet, quòd jus solius libertatis
non excuset, sed alia insuper requiratur justa causa.

Dicendum 2. Nec consuetudo patriæ est titulus suf-
ficiens, ad peccatum aliquod in se vel in proximo per-
mittendum. Quasi vero leges naturæ, divinæ & huma-
næ, consuetudini flagitiorum hominum cederent;
unde Dionys. Carthus. de non dando scandalo, in di-
rectorio vitæ nobilium art. 15. docet, quòd illud om-
ne, quod contrariatur bonis moribus, Scripturis, seu
juri divino, sit corruptela, non autem bona consue-
tudo, imò sit *Tantò vitiosius, quantò consuetius*. Pul-
chrè idem docet Tertull. de velandis Virg. ubi in initio
ait: *Ostendam Virgines nostras velari oportere, ex quo
transitum ætatis suæ fecerunt. Hoc exigere veritatem doce-
bo, cui nemo præscribere potest, non spatium temporum,
non patrocinium personarum, non privilegia Regionum. Ex
his enim ferè consuetudo imitum ab aliquà ignorantia, vel
simplicitate sortita in usum, per successionem roboratur, &
ita adversum veritatem vindicatur. Sed Dominus noster
Christus veritatem se, non consuetudinem cognominavit. Si
semper Christus, & prior omnibus æquè veritas sempiterna
& antiqua res est. Rectè proinde cum Cypriano Epist.
73. ad Jubajanum hic dici posset, frustra quidam, cum
ratione vincuntur, consuetudinem nobis opponunt, quasi*
consue-

*Non excu-
sat hæc qua
libertatem,*

*Nec mas
patria.*

consuetudo sit major veritate. In simili casu dicebat S. Bernardinus tom. 3. Sermon. 35. p. 1. p. *Nec valet dicere, ita est consuetudo Paduæ, quod femina vadant caudate & cum capillis alterius, quia non est bona excusatio, nec est consuetudo approbata, sed corruptela.*

Nec intentio indeterminata.

Dicendum 3. Neque excusantur à scandalo, eo quod tantum indeterminatè alteri præbeant occasionem ruinæ. Hinc aliqui excusant puellam quæ vanè se ornat, videntem quod alicui in confuso, suo ornatu erit peccandi occasio, dummodo non sciat in particulari, aliquem suo ornatu in peccatum lapsurum: sed planè infundatè. Sicut enim, qui vult peccatum aliquod mortale committere, etsi illud sit indeterminatum, peccat tamen mortaliter: Ita etiam, qui aliquem indeterminatum, ad peccatum perducit, omnino peccat. Quod enim illum, quem ad peccatum trahit noscat, nec ne; est planè indifferens: Unde Lactantius l. 3. de divinis institut: c. 5. *nihil interest, ait, quo animo facias, quod fecisse vitiosum est: quia facta cernuntur, animus non videtur.* Et S. Thomas in Epist. ad Timoth. *ornatus*, ait, *provocat (ad libidinem) non intentio.*

Nec spiritus militaris spiritualis.

Dicendum 4. Neque ob spiritualem utilitatem, scandalum est admittendum. Hinc ait S. Bern. Epist. 82. *Libenter carebo quantolibet etiam spirituali quæstu, qui non potest acquiri, nisi cum scandalo. Ubi enim scandalum, ibi procul dubio charitatis est detrimentum: Ubi autem diminutio charitatis, miror, quod vel quale possit, spiritualis exercitii sperari lucrum.* Non possunt tamen propter scandalum omitti opera ad salutem necessaria, cum nemo debeat peccare, ut alium à peccato liberet: Hinc Innocent. capt. 2. *De novi operis denunti. illa opera, ait, quæ sine peccato mortali omitti non possunt, non sunt pro vitando scandalo dimittenda, neque ea debent pro vitando scandalo committi, quæ sine mortali peccato committi non possunt.* Bona tamen spiritualia ad salutem non necessaria, aliquando omitti, aliquando differri possunt ob scandalum pusillorum, non item ob Pharisæicum.

isaiicum. Ratio est, quia hoc condonandum est alterius infirmitati, non item alterius malitiæ est consulendum. Quin imò, quòd præcepta affirmativa juris positivi cedant, ut scandalum pusillorum evitetur, cum præceptum de non dando scandalo sit naturale, quod consequenter legi positivæ præponderat. Sic docent, quòd mulier quæ sciret suo aspectus in Ecclesia aliquem lapsurum, ex peccato, quod aperit in confessione aliquem confessarium casurum: non tenetur audire sacrum vel integrè confiteri, cum lex naturalis vitandi scandali proximi, præponderet legi positivæ de audiendo sacro vel integrè confitendo.

Dicendum 5. Infundatè excusant mulieres lascivè se ornantes, maritatus quidem ut placeant viro, liberas autem, ut sponsum acquirant. Generaliter enim verum est, quòd non sint facienda mala, ut eveniant bona. Deinde, priorem causam à maritatis falsò prætexti, declarat S. Chrysost. homiliâ 10. in Epist. ad Coloss. ubi ait: *Quid ornaris? dic queso. Ut viro placeas? Igitur domi hoc facias. Hic verò contrarium fit, scilicet domi summa incuria, si foras isur, annus est, dum comuntur. Si autem proprio vis placere viro, aliis ne cura, ut placeas, si verò aliis placere vis, non potes placere tuo.* Nec ut
maritis
placeant,
aut eos ve
nantur.

Ad alias resp. quòd lascivus ornatus, non sit medium ordinatum ad medendum incontinentiæ. Tali enim ornatu, plus à Matrimonio juvenes arceri, experientiâ constat; nec in onere Matrimonii tactus & aspectus carnales quærent, dum hæc extra Matrimonium concedunt puellæ.

CAPUT OCTAVUM.

De Bello & Duello.

SECTIO PRIMÆ.

Quid Bellum, & quadruplex.

Beßern
quando sei
la. 114. m.

DICENDUM primò de fide est, bellum certis conditionibus vestium, esse licitum. Est contra Manichæos, qui docebant peccatum esse, bellum gerere. Ita contra Lutherum & Brasium, quorum prior peccatum docebat, bellare contra Turcas, cum hoc sit Deo repugnare, qui per illos visitat iniquitates nostras: posterior autem ait in lege veteri Judæis quidem permissum fuisse bellum, tamen in lege gratiæ esse illicitum. Contra quos probatur conclusio. Primò enim Genesis 14. Abraham bellum gessit, & victor redux à Melchisedech est benedictus, de cujus belli iustitiâ vide S. Ambr. de Abraham c. 7. & 8. deinde, Deus sæpè iussit Israël. bellum movere contra Amalec, Madian, laudat viros bellatores, & Sampsonem, Gedeonem, &c. Item in lege novâ Joannes Lucæ 3. rogatus à militibus, quid facere deberent, si ad vitam vellent ingredi: respondit Joannes Neminem concutatis, neque calumniam faciatis, & estote contenti stipendiis vestris. ad quod S. August. quibus ait, proprium stipendium sufficere debere præcepit, militare utique non prohibuit. Deinde Christus ipse Matth. 22. dixit reddenda esse tributa Cæsari, quæ dantur ad bella gerenda. Denique Ecclesia sæpè hortata est Principes Christianos ad bella movenda, quibus adde & rationem, quòd vim vi repellere servato moderamine inculpa-

te tutelæ, sit licitum jure naturæ: adeòque bellum defensivum saltem est licitum, si adhibeatur debitum moderamen. Cùm verò principi incumbat populum liberare ab injuriâ, latrocinii, &c. Rectè etiam bellum offensivum erit licitum, cùm ad illa præpediendâ bellum hoc aliquando sit necessarium. Quòd verò Christus jubeat nos non resistere malo, & dicat, quòd qui arripuerit gladium, gladio peribit: item quòd arma nostra juxta Apostolum non carnalia, sed spiritualia sint, nihil dictis obest, cùm solùm intentione Christi ille gladio peribit, qui privatâ auctoritate gladio utitur. Deindè agit Apostolus de armis, quibus Diabolum oppugnâmus, quæ indubiè spiritualia sunt; vel etiam alloquitur viros Ecclesiasticos, quorum arma spiritualia esse debent, qualia sunt excommunicatio, suspensio &c. Hoc tamen quoque norandum est, quòd bellum sæpè taxetur, imò ab Ecclesiâ aliquando sub gravi pœnâ sit interdictum, non præcisè ratione belli, sed quòd hoc non conveniret aliquorum statui: vel quòd debitis conditionibus non esset vestitum; vel quòd principes illi, qui bellum movebant, essent idololatæ, schismatici aut alii, qui Christianos bella gerentes cogebant ad idololatriam. Nec verum est, quòd bellare sit contra charitatem, quin potius sit ad eandem viam, & illa, quæ bellum comitantur mala, fiunt merè per accidens, nec bella inseparabiliter concomitantur. Falsum quoque est Lutheri fundamentum, bellare enim non magis est repugnare Deo, quam sit mederi pesti & aliis morbis, quibus Deus nos solet visitare, in castigationem vel emendationem.

Quod bellum ab Ecclesiâ sit taxatum.

Dicendum 2. Prima conditio gerendi bellum est legitima autoritas, qualis est in Principe non habente in temporalibus sibi superiorem, vel etiam in Republicâ liberâ, quæ talem superiorem non habet, aut de ejus consensu, consuetudinem obtinet bella indicendi. Bellare enim, spectat ad justitiam vindicativam, quæ propriè penes superiores residet. Dico *Superiorem*

Requiruntur adjutus bellum autoritas legitimæ.

in temporalibus : Quia , etsi Reges & alii Principes Pontificem habeant superiorem , tamen hoc solum est in spiritualibus , nec propriè aut directè in eos Pontifex habet jurisdictionem temporalem , sed solum indirectè , quatenus hoc ad finem spiritualem est necessarium. Et hæc de bello offensivo , cum quilibet jure naturæ etiam privatus sese liceat defendere , servato debito moderamine.

Iusta causa.

Dicendum 3. Secunda conditio est iusta causa , id est gravis injuria illata , vel sibi vel legatis suis ; si alteri contra se bellanti injustè , præbuerit alter auxilium ; si pactum majoris momenti violaverit , &c. Debet autem injuria illata esse gravis , adeò ut non timeantur ex bello graviora mala , quam sint illa , quæ per injuriam illata sunt. Deinde notandum est , quòd alià viâ , nisi per bellum satisfactio habere nequeat , quæ si spondeatur , cessare censetur injuria. Hinc docet S. August. quòd *Bellum habere debeat necessitas , pacem voluntas*. Si verò satisfactio offeratur post bellum inchoatum , & illa sit sufficiens , nec bellum jam perductum sit ad eventum sibi favorabilem , tenetur quoque talis satisfactionem acceptare. Si verò de justitiâ causæ non ita constet , primo à viris doctis sedulo de eadem est investigandum : Quò factò si dubium perseveret , à bello prorsus erit abstinendum , eò quòd in re tam periculosâ , tutius sit eligendum. Si verò dubium sit de jure Regni , non potest alter , qui in possessione est inde deturbari , quia hic melior est conditio possidentis. Si verò utrimque sit dubium , non potest pro toto bellum moveri , nec illud , ad quod ambæ partes habent æquale jus , potest uni totum cedere : sed licitum erit pro medietate vel compensatione in alio (si res divisionem non patiatur) bellum gerere.

Quando possint & debeant militas bellare.

Militibus autem , etsi iis de justitiâ belli non ita liquidò constet , possunt tamen sequi suum ducem , cum indubio sit præsumendum pro superiori. Nec ideò dici potest , eosdem agere cum conscientia dubiâ , quæ
etsi

Et si sit speculativè dubia, est tamen practicè certa, cum moraliter certò sibi constet, sibi hîc & nunc esse obediendum & militandum. Aliud esset, si absolutè iis constaret de injustitiâ belli, nec tantùm dubitarent de justitiâ belli, sed etiam an liceret sibi bellare; vel etiam, si sciant principem de justitiâ belli dubitare, quibus casibus bellare non possunt. Hæc autem dicta intellige de militibus subditis: Non subditi enim in dubio, non habent obediendi necessitatem, nec ulli faciunt, non militando injuriam.

Dicendum 3. Potest materialiter bellum esse utrim- *Potest dari bellum utrimque*
que justum, cum utraque pars bonâ fide ex ignoran- *utrimque*
tiâ possit credere sibi bellum esse licitum, quamvis cer- *justis mate-*
tum sit, alteram partem, non habere à parte rei ju- *rialsuer.*
stam causam, cum veritas tantum possit à parte rei stare ab unâ parte contradicentium.

S E C T I O II.

Quanam in bello sint observanda.

D I C E N D U M primò, debet princeps providere de *Regula belli.*
expertis belli ducibus: Unde mala, quæ defe-
ctu horum reipublicæ obtingunt, ipsi principi impu-
tantur. Deindè debet statis temporibus dare militibus
sua stipendia, aliàs sunt causa damnorum, quæ aliis
ex necessitate militum obveniunt; quæ stipendia mili-
tibus ægrotantibus etiam dare debent. Notant tamen *Stipendia*
alii, stipendia militum posse pro parte minui, aut non
ita promptè solvi, si princeps necessitate coactus bel-
lum gerat. Excusari quoque possunt, quibus stipen-
diorum cura commissâ est, ab eorumdem persolu-
tione, si aliqui secessionem meditentur, quo casu ab
illa secessione arceantur. Si autem hinc inde à talibus
malum aliquod inferatur aliis, omnino hæc toleranda
sunt, ne reipublicæ & bono communi sequantur pe-
jora. Verùm in persolvendo militum stipendia non

in omnibus locis servatur consuetudo ; alibi enim trium aut 4. mensium stipendia retinentur , forsitan ut sic milites à fuga coërceant : Si dimittantur , aliquid alibi retrahitur de stipendio , idque velut in pœnam , quòd contra voluntatem principis prædas egerint , quâ de causâ , si moriantur , nihil datur amicis. Quæ omnia culpari non possunt , cum iusta hîc causa sub- sit , & milites talem praxim scientes , in illud con- sentire censeantur.

*Peccata
Ducum
etia.*

Dicendum 2. Peccant graviter belli duces , si teme- rè exercitum magno periculo obijciunt : Non enim sunt vitæ subditorum Domini , sed gubernatores , qui bona militum ob commune bonum periculo ob- jicere possunt , aliàs sunt tyranni. Peccant quoque graviter , qui plures subornatos milites repræsentant , ut sic plura stipendia sibi acquirant. Ratio est , quòd stipendia illa excedentia furentur : Deinde , causa sunt gravissimorum damnorum , quæ inde reipublicæ obveniunt , credenti tot sibi esse milites , quot repræ- sentantur , cum multi reverà desint.

Peccant insuper belli duces , si ob negligentiam aut furtum , necessaria ad bella parantes , parent ea cor- rupta , ex quibus mors militum evenit : Vel etiam , si necessaria non præparent , aliquando fingentes se ea- dem preparasse , & pretium sibi retinentes.

Peccant iidem belli duces , si transeuntes aliquo , in viâ hærent , tenentes loca vicina suspensa , nescien- tia quâ viâ sint progressuri , ut sic ad se cæteros attra- hant , & offerant magnam pecuniæ summam , ne per suas partes transeant. Etsi enim liberum aliquan- do fit belli ducibus transire quâ voluerint ; non ta- men iis licitum est , ut electionem unius loci , præ alio faciant venalem , & sibi pretium retineant.

Peccant quoque , qui pro militibus præparant pa- nes , hoc artificio & fraude : calefaciunt primò aquam magis quam necesse sit ad subigendam farinam , cui aquæ subitò infundunt aliam frigidam , ad eam tem- periem , quæ subigendæ farinæ sufficiat. Quo arti- ficio

ſcio hoc efficiunt , ut panis ſit ponderoſior , eo quòd aqua frigida ſit ponderoſior calidâ , ſicque in pondere lucrantur , ut teſtantur artis piſtinæ periti.

Dicendum 3. peccant milites in bello , contra fortitudinem , ſi ſine cauſâ & temerè ſe periculo obijciunt : ſi ſtationem ſuam , etiam cum periculo mortis deſerant ; ſi arcem defendere nolint , ſi ſpes ſatis magna ſuperſit eamdem defendendi ; peccant quoque , ſi ſine veniâ ſuperiorum , caſtra deſerant , unde hoc facientes , graviter puniuntur. Nec facilis debet eſſe ſuperior in dandâ hîc licentiâ , maxime tempore belli , & ubi in viâ prædas agunt & viatores opprimunt. Peccant inſuper , qui in diſtributione hoſpitiſſimum 3. vel 4. ſcedulas à Magiſtro hoſpitiſſimum exigunt , cum quibus vadunt ad hoſpitia , à quorum Dominis pretia pro hoſpitii ceſſione extorquent. In hoſpitio autem contenti debent eſſe , ſuo ſervitio ut vocant , ideſt , lumine , igne , lecto , & paleis.

Dicendum 4. etſi privatâ authoritate neminem liceat occidere , tamen in bello id licitum eſt , ſi ſit neceſſarium ad belli finem conſequendum. Per ſe quoque ob immaniſſima ſcelera , non licet urbem captam dare in prædam militibus , niſi aliter victoriæ obtineri non poſſet , vel urbs fuiſſet alteri rebellis , vel timor eſſet injuriæ ulciſcendi.

Poſſunt quoque innocentes ſpoliari eis rebus , quibus adverſus hoſtes ſunt uſuri , ut ſunt arma , equi , aliàs enim finis belli haberi non poteſt. Deinde poſſent ii dari in captivitatem , ſi aliter non poſſet haberi ſatisfactio. Nec reſert , quòd innocentes in bello directè occidi non poſſint , quia reſpublica in bona illorum habet Dominium univerſale , quibus proinde ob delictum reipublicæ ſpoliari poſſunt innocentes : Vitæ autem illorum non habet reſpublica Dominium. Poſſunt tamen innocentes indirectè occidi , ſi v. g. in turri aliqua ſint incluſi , ſine cujus dejectione urbs non poteſt obtineri , quo caſu intenditur ſolùm dejectio

turris & victoria civitatis, & innocentium mortes solum permittuntur.

*Ecclesia
a vi belli
immunes*

Quod autem attinet ad Ecclesias: si non sint *inca-*
stellatæ, idest instar arcis munitæ, non possunt per se
expugnari, & illas evertentes gravissimè delinquunt,
& tenentur ad restitutionem: ita capt. *conquesti* de sen-
tentiâ excommunicationis. Si tamen hostes eo con-
fugerint, & inde alios oppugnent, si necessarium sit,
ut per eorum conflagrationem obtineatur victoria,
possent igne comburi: mala autem quæ hinc eveniunt,
fiunt præter intentionem gerentium justum bellum.
Hoc quoque notandum est, quòd bona Ecclesiæ &
Ecclesiasticorum in bello occupare non liceat, eo
quòd à jurisdictione sæculari sint exempta, & consti-
tuant Ecclesiasticum corpus à republicâ diversum,
adeòque ob culpam Reipublicæ puniri non possunt.
Imò non desunt, qui putent hanc immunitate gaude-
re omnia bona ad Ecclesiam delata, in custodiam:
imò si hostes ad Ecclesias fugiant eo animo, ut immu-
nitate Ecclesiasticâ gaudeant, non magis ex eâ pos-
sunt extrahi, quam alii noxii eo fugientes. Aliud esset,
si ex illâ hostes oppugnassent; cum enim prius immu-
nitatem Ecclesiæ fregerint, non possunt eâ gaudere.
Idem etiam est, si timeantur ii, qui in Ecclesiam fu-
gerunt, bellum renovaturi: aut si hoc sit necessarium
ad finem belli consequendum. Sic etiam Ecclesiastici
actualiter pugnantes possunt occidi, cum tunc sint
aperti hostes. Si verò eorum superior sit quoque
Princeps sæcularis, contra quem geritur bellum: pos-
sunt partâ victoriâ in pœnam sui Principis, suis bonis
temporalibus spoliari.

*Cujus sint
bona in
bello cap-
ta.*

Dicendum 5. Bona immobilia in bello capta, com-
muni jure sunt Principis, ob satisfactionem injuriæ,
periculorum & expensarum compensationem. Mo-
bilia verò sunt occupantis, hoc tamen notato, quòd
si sint res alterius injustè ablata, & Dominus etiam-
num illas insequitur, nec adhuc censeantur esse in lo-
co tuto, sint Domino insequenti reddendæ, si is non
sit

sit hostis. Si verò jam sint in loco tuto, vel Dominus jam eas à se abdicaverit, nec amplius insequatur; fiunt eas occupantis; quod recte statutum est à jure, ad cavendas lites inde oriri natas: Deinde ut hoc pacto milites in bello sint ardentiores. Hinc statutum fuit, ut talia bona, quæ capiunt milites nostri in Arthesiâ & aliis Belgii partibus non fiant occupantis; secùs quæ recipiunt ejusmodi in Franciâ, &c. Partibus inimicis.

S E C T I O III.

De Represaliis.

DICENDUM primò, *represaliæ* sunt occupatio bonorum ab aliis alterius Reipublicæ civibus, *Quid re-
presalia.* etiam innocentibus, ut fiat compensatio injuriæ occupanti illatæ. Unde dicuntur *Represaliæ* à *re* & *prebendo*, quia recuperatur, quod erat perditum. Ut autem sint licitæ, varix requiruntur conditiones, quarum prima est, ut constet subditos alterius Reipublicæ intulisse damnum, & quidem grave alterius Reipublicæ civibus. *Conditio-
nes requi-
sita ad re-
presalias.*

2. Ut superior Reipublicæ, quæ damnum intulit, rogatus de satisfactione, eam dare renuat, aut negligat.

3. Debet constare alteram rempublicam nolle facere justitiam. Si enim in eo sit inculpabilis, v. g. si eam facere non possit ob urgentem causam, non poterit eum represaliis punire, cum non delinquat, aut deliquerit.

4. Debet superior Reipublicæ læsæ adiri, & ab eo peti represaliæ, cum ille solus possit eas concedere, qui possit bellum indicare.

5. Cavendum est, ne alteri Reipublicæ plus damni inferatur, quam sit necesse ad plenam injuriæ satisfactionem.

6. Ne concedantur represaliæ in Ecclesiasticas per-

personas innocentes. Ita apertè statuitur sub excommunicatione c. unico de injuriis in 6.

Represaliæ, si his conditionibus vestitæ sint, absolute sunt licitæ. Quando enim in bello necessarium est ad plenam satisfactionem, licitè etiam innocentes suis bonis possunt spoliari, ut ante probatum est. Si quando represaliæ reprehendantur, non illæ, sed aliæ accusantur, quæ fiunt sine superioris licentiâ per violentiam; quæ fiunt inter subditos ejusdem Principis, aut quæ aliquibus ex dictis conditionibus non sunt vestitæ.

SECTIO IV.

Quibus liceat bellum gerere.

Clerici non possunt bellare. **D**ICENDUM primò, Prohibitum est Clericis bellare: cùm enim illi sint specialiter Deo ejusque servitio addicti (à quo militia multum avocat) non poterunt se militiæ implicare. Deinde, Clerici Christum repræsentant, qui proprium sanguinem fudit, non alienum. Prohibitio hæc est sub mortali, quod patet ex pœnis gravissimis illi apposis, quod priventur usu ordinum, quod recludantur in Monasterio, & si in bello moriantur, non offeratur pro iisdem sacrificium. Prohibitio hæc, pertinet ad omnes omnino, qui gaudent privilegio Canonis, etsi sint Laici, & in minoribus constituti. Hinc etiam Laici bellantes capti. *Eos qui* 20. q. 3. mandantur excommunicari, non tantum ob Apostasiam à Religione, ut quidam volunt, sed propter bellum,

Quæ causa possint esse in bello Clerici. **D**icendum 2. Excusantur ab irregularitate Clerici bello interessentes; primò, si justa subsit causa, puta ut administrent spiritualia, ad quod, etsi olim necessaria erat Pontificis dispensatio, jam tamen consuetudo aliter obtinuit. Deinde non incurrunt irregularitatem, si in bello injusto, quo impetuntur sese defendant,

fendant, aut etiam suam urbem, cum cuilibet jure naturæ & se, & bonum commune defendere liceat, servato debito moderamine. Sic non fit irregularis qui aliam occidit pro defensione vitæ, uti patet ex Clement. *Si furiosus*.

Dicendum 3. prohibitio dicta tantum oritur ex jure Ecclesiastico, bellare enim olim licitum fuit Sacerdotibus, v. g. Abraham, Jonathæ, Simoni & aliis; neque id prohibetur jure divino positivo, cum neque in Scripturâ, neque in traditione hujus prohibitionis sit vestigium. Deinde, potest Pontifex committere clerico, ut sit judex in causâ sanguinis, ut dicitur fieri Romæ. Denique potest clerico committere, ut sit dux belli; ut iis sit, qui supremam in temporalibus habent potestatem, cum in jure suo tuendo & prosequendo, non sint clerici pejoris conditionis, quam alii: & hoc illis aperte conceditur cap. *Episcopus* tit. *ne clerici vel monachi in 6.*

*Clericis
utatur
bellare jure
Eccle-
sistico
tantum.*

Dicendum 4. licitum est in bello uti insidiis, modo non mentiatur, aut violetur promissio alteri facta. Non enim tenemur alteri, maximè hostibus, aperire consilium nostrum, quod solum facit, qui insidiis utitur; sic Poëta ait: *dolus, an virtus sit quis in hoste requirat?* sic licitum est, in bello mutare vestes, signa militaria, locum &c. dixi, modo non mentiatur aut violetur promissio, hoc enim semper est illicitum, unde & 2. reg. 21. Domus Saul legitur punita ob violatam fidem datam Gabaonitis. Aliud esset, si fides data, etsi jurata, contineret gravem injustitiam respectu innocentis: vel etiam, si absque incommodo gravi boni communis servari non posset, vel si ipse hostis prius fregerit fidem, juxta illud: *frangenti fidem, fides frangatur eidem*: & in datione fidei censeatur apposita hæc conditio, *si prior fidem non frangas*.

*Quibus
dolu liceat
uti in bel-
lo.*

Dicendum 5. etsi naturâ suâ non sit illicitum Catholicis vocare in auxilium infideles aut hæreticos, ut licitè olim fecerunt scædus Machabæi cum Romanis:

nis?

nis: ordinariè tamen non licet, aut etiam eosdem adjuvare, tum quòd maxima inde oriri soleant scandala; tum quòd hæreticis pronum sit, non seryare pactum, tum quòd Sacra prophanent &c. Hinc 2. paralip. 19. impropèratur Josaphat, quòd impio præberet auxilium. Hinc etiam in juramento Imperatorum Romanorum, continetur, quòd nunquam cum infidelibus, paganis, &c. fœdus belli inibunt.

Dicendum 6. peccant regulariter Catholici qui militiæ hæreticorum coöperantur: partim quòd iis in bello desit copia spiritualium & in articulo mortis defectu eorumdem, sæpè sit periculum æternæ damnationis: tum etiam, quòd Hæreticis aliquando coöperentur in sacrorum & templorum prophanatione, Religionis diminutione, & aliis sceleribus, quæ Hæreticorum bella solent comitari.

SECTIO V.

An peccent milites, qui rusticos hospites & viatores molestant & gravant.

Qui milites peccant viatores molestantes, **D**ICENDUM primò, Peccant graviter milites, quibus stipendia solvuntur, & interim rusticos & viatores molestant, verberant, & eosdem defurant. Ratio est, quòd nullâ autoritate ad illud sint constituti, nec ulla ratio eosdem ad hoc faciendum excuset. Idem est de iis, qui etsi non recipiant stipendia sua, tamen aliunde sufficienter possunt vivere. Jus enim bellandi, non tribuit eis jus alios divexandi.

Dicendum 2. milites, quibus stipendia non persolvuntur, ratione cujus deveniunt ad extremam aut gravem inopiam, excusantur à furto, si ut necessitatem sublevent, tantum surripiant, quantum necessarium est; in extremâ enim necessitate omnia sunt communia; Deinde gravem necessitatem militum tenetur quilibet privatus sublevare, dum eidem necessa-

ria

ria defunt, & proximum aliquando periculum est in extremam necessitatem incidendi. Debent tamen abstinere à contumeliis & percussione, juxta monitum Joannis, imò si ab aliis possint rogando impetrare, quo egent, debent illud præviè rogare.

S E C T I O VI.

Quid Duellum, & quotuplex.

DICENDUM primò *duellum*, sive *monomachia*, est duorum (etsi aliquando assumant alium, quem vocant *secundum*) ex condicito utrimque suscepta pugna, ad certum locum & tempus cum periculo occisionis. Dicitur *ex condicito*, ut distinguatur à rixâ, quæ non est de condicito, sed de repente. Aliud autem est *solemne*, aliud *privatum*. *Solemne* est, quod quibusdam solemnitatibus iniri solet, datâ fide, adhibitis sponzoribus, quos vocant *patrinos*, datione chirotece, &c. *Privatum* est, quod sine ejusmodi solemnitatibus initur.

Duellum quid sit.

Aliud solemne, aliud privatum.

Dicendum 2. Jure naturæ, divino, Ecclesiastico & civili, duellum est interdictum: illud novissimè acriter Conc. Trid. sess. 25. reform. 19. infectatum est. Rationem addit, quòd sit diabolo auctore inventum: quòd repentinas hominum mortes, & animarum perditiones secum trahat, quòd nova odia disseminet inter amicos, &c. Quæ omnia omni jure sunt inhibita.

Interdictum Ecclesiæ, natura & Dei.

Dicendum 3. Duellum non est licitum propter veritatem investigandam, ad ostendendas vires, ad ostendendam penitiam artis gladiatoriæ, ad oblectandum spectantes, neque ad defendendum honorem; nec denique si injustè sis accusatus, & non possis aliâ viâ vitam conservare, quam duello. Primum enim reputatur inter purgationes vulgares, quæ ab Ecclesiâ damnantur, & spectat ad Dei tentationem, à quo veri-

Fines illiciti duelli.

veri-

veritas expectatur mediis ad id inordinatis. Cæteri casus sunt quoque insufficientes: ut quis occidendi se periculo exponat. Quod verò ad defensionem honoris spectat, notandum est, hoc acceptando neminem reputari apud viros honestos, tamquam animosum, sed ipso jure fieri talem infamem. Hinc quivis provocatus, ut ignaviæ notam non incurrat, respondere poterit, se nolle iniquam provocationem acceptare, tamen ubi impetitus erit, se ostensurum se paratum se defendere modo legitimo. Sic etiam, etsi provocati, non possunt consentire ad bibendum ad æquales haustus, etsi timeant derideri. Rectè proinde ab Alexandro VII. damnata est hæc propositio: *Vir equestris ad duellum provocatus: potest illud acceptare, ne timiditatis notam apud alios incurrat.* Quod verò ad ultimum casum attinet, certum est, quòd hic non liceat; cum tali casu alter non tam se defendere, quam alium aggredi censeatur. Deinde defensio tantum est necessaria, ubi vis infertur; hic autem non infertur vis, sed calumnia, quæ non armis, sed declaratione veritatis est repellenda: nec quia veritatem illam præstare nequeas, idè ad arma confugiendum est, sed calumnia veritate propulsanda. Hinc ab Alexandro VII. hæc est iterum condemnata: *Licet interficere falsum accusatorem, falsos testes, ac etiam judicem, à quo iniqua certò imminet sententia, si alià vià non possit innocens damnum evitare.* Et antè hanc facultas Theol. Lovan. proscripsit sententiam: *Licetum est occidere calumniosum actorem, testes, & injustum judicem ad servandam vitam, honores vel res familiares.*

*causa duelli
licita.*

Dicendum 4. causa sufficiens permittendi duellum, est ad terminandum bellum, modo per illud victoria non trahatur ad eventum magis dubium. Sic olim licitum fuit duellum Davidis cum Goliath & nuper duellum circa Sylvamducis inter 10. Hispanos & 10. Confæderatorum ordinum milites, quem conflictum vocant conflictum *Lackerbergen*. Sic etiam licitum est duellum, si fiat ex divinâ autoritate, quæ est

est domina vitæ & necis. Denique licitum est ad defensionem vitæ, cùm sit iusta defensio.

- Pœnæ verò duellantium ac duello coöperantium multa sunt, earque gravissimæ, de quibus videri potest bulla Clementis VIII. 1592. quæ incipit *Illius vices*, ubi Pontifex renovans decreta Concilii Trid. sess. 25. c. 19. de reform. & Pii IV. & Gregorii XIII. excommunicat pugnantes in duello, ubicumque pugnarint; proscribit eorum bona, declarat perpetuo infames, & si in duello moriantur, Ecclesiasticâ sepulturâ eos privat. Eisdem pœnis subdit eorum paternos. Idem facit Principibus, duellum in suo loco permittentibus, responsa & scripturas transferentibus, & quoquo modo ad duellum coöperantibus.

Reservatio absolvendi duellantes in prædicta bulla reservatur soli Pontifici, si sit publicum & ad forum contentiosum deductum: aliàs, si non sit ita publicum, poterit Episcopus absolvere, in vim Concilii Trid. sess. 24. c. 6. reform. cùm motus proprius Clementis, non censeatur derogare juri Concilii. Prædictam potestatem, aliqui in vim suorum privilegiorum concedunt Patribus Societatis, sed in Sacra Congregatione super casibus reservatis habitâ 1601. & 1602. nominatim de talibus patribus hoc est negatum, teste Dianâ.

SECTIO VII.

De vitiis aliis Charitati oppositis, ac primò de odio.

DICENDUM primò, *odium* nihil est aliud, quam aversio voluntatis ab aliquo, quod apprehenditur ut malum. Est autem duplex odium, scilicet abominationis & inimiciæ, prout amor benevolentie aut concupiscentie repugnat. Sicut enim amore benevolo volumus alteri bonum, quia illi bonum est: ita odio inimiciæ, quod amor illi opponitur, volumus

*Odium
inimici-
tiae & a-
bominatio
nis.*

lumus alteri malum, quia illi malum est: & sicut amore concupiscentiæ aliquid amamus, quia nobis bonum est; ita odio obominationis illi opposito aver-
samur aliquid, quia nobis malum est.

*Deus po-
test odio
haberi.* Dicendum 2. Quamvis Deus, utpotè summa bo-
nitas, non possit odio haberi; tamen multi sunt, qui
eundem odio habent, idque non secundum se, sed
ratione effectuum, qui nobis non conveniunt. Sic
damnati odio habent Deum, propter pœnas, quas
ipsis infligit. Odium illud Dei est omnium peccatorum

*Odium
Dei est
omnium
gravissi-
mum.*

gravissimum, tum quòd bonitati infinitæ directè re-
pugnet, ab eâque voluntatem avocet: tum etiam,
quòd contrarietur virtuti summæ, idest Charitati Dei.
Si verò expressè quis Deum odio habeat, indubiè est
distinctum peccatum: Secùs de omni peccato mortali,
quod odium aliquod Dei implicite in se continet.

*Odium
proximi
est mortale.*

Dicendum 3. Odium proximi est peccatum de se
mortale, repugnans charitati proximi, unde, *qui odit
Fratrem suum homicida est.* Quando autem Scriptura
Sacra dicit, quòd Pater & Mater sint odio habendi,
vel intelligitur, quòd sint amorì Dei postponendi:
Vel etiam odio habendos esse, si sint nobis impedi-
mento circa animæ bonum: quo sensu ait S. Hieron.
Per calcatum vade Patrem: jubemur itidem aliquando
odisse alios, ut sunt ii, qui nobis sunt occasio peccato-
rum; quod tamen ut rectè fiat, debet fieri cum dile-
ctione hominum & odio vitiorum: Sic etiam iussit
Deus Israëlì odisse Chananæos & alios. Odium proxi-
mi non est gravissimum peccatum, quod in proxi-
mum committi potest. Ratio est, quòd gravitas pec-
cati in proximum juxta D. Thomam, pensanda sit ex
gravitate nocumenti, quod proximo infertur: adeò-
que homicidium odio hoc est gravius, cum causet pro-
ximo majus nocumentum.

Dicendum 4. Si malum quod quis alteri ex odio
desiderat, sit notabile, item si persona, cui hoc de-
sideratur sit dignior, notabiliter peccatum odii aggra-
vat; etsi secundum veriorè sententiam non varie-

tur

tur specie, tamen in Confessione, tum qualitas mali, tum personæ, est aperienda, uti omnes omninò circumstantiæ notabiliter etiam intrà eandem speciem aggravantes.

S E C T I O VIII.

De Acediâ, Invidiâ & Discordiâ.

DICENDUM primò, *Acediâ* est torpor sive tædium *Quid acedia.*
circa bona spiritualia, quatenus ea prosequi renuit, ob molestias adjunctas. *Acediâ* hæc est peccatum, *Est peccatum.*
quatenus hominem à bono avocat, & si quidem avocat ab iis, quæ sunt necessaria ad salutem, est peccatum speciale. Tristari autem de festo, de jejunio, &c. Non est speciale peccatum, sed refertur ad vitium Religionis, temperantiæ, oppositum, aut ad alterum vitium, quod oppositum est bono de quo quis tristatur. *Acediâ* hæc solet vocari vitium capitale, cum ex eo soleant nasci tamquam ex capite, desperatio, torpor, rançor, evagatio mentis, &c.

Tristari de ingressu Religionis, est peccatum mortale, si habeat annexam voluntatem aliqua non exequendi, quæ sub mortali jubentur. Si verò quis nondè tristetur de eo, volens interim omnia, quæ sunt ordinis observare, à peccato mortali excusari potest. Dicitur tamen esse peccatum veniale, ob periculum voluntatis, aliqua quæ sunt ordinis non observandi.

Superatur verò *acediâ*, superando molestias bonorum operum, varia spiritualia exercitia exequendo: *Remedia Acediæ.*
unde S. Bern. Epist. 78. *Tædium*, ait, & *acediâ* procul pellit *Sanctarum varietas observationum*. Nova enim & varia delectant.

Dicendum 2. *Invidiâ* est tristitia de bono alterius, *Invidiâ*
ut diminutivo proprii boni, gloriæ aut excellentiæ. Est *quid.*
peccatum ex genere suo mortale, eo quòd inconvenienter *Quale peccatum.*

nienter feratur in suum objectum, de eo tristando, de quo erat gaudendum. Deinde invidi annumerantur ab Apostolo Galat. 5. iis, qui talia agentes, Regnum Dei non possidebunt. Differt autem invidia à Zelo & Nemese: Quòd Zelus sit tristitia de bono alterius; non quòd ille hoc habeat, sed quòd ipse eo careat, cum idem posset habere, si vellet allaborare. *Nemesis* verò est tristitia de alterius bono, quo est indignus, & solet vocari *indignatio*.

Quid Zelus, Nemesis, &c.

Invidia virtutis mercatorum.

Quæres, quale peccatum sit invidia mercatoris respectu mercatoris vicini? Resp. Posse illud esse æmulari, seu non ita tritari de bono vicini, quam de carentiâ proprii lucri, quod potest sibi quoque conquirere debitis mediis, vocando ad se emptores, &c. Solent tamen vix à peccato excusari, cum plerumque sint de bono proximi, & periculum creent discordiæ, aversionis animorum & aliorum.

Est quoque invidia peccatum capitale, cujus filix sunt futurratio, cum invidus in occulto studet alterius famam denigrare: exultatio in adversis, afflictio in prosperis, odium, &c.

Discordia & concordia.

Dicendum 3. *Discordia* est dissensus voluntatum, uti concordia earundem est consensus. Potest autem discordia esse bona, si sit discordia à malo v. g. ab hæresi. Mala autem si sit discordia in bono, v. g. à sanâ Doctrinâ, &c. Est autem discordia in bono peccatum de se mortale; cum Galat. 5. statuantur dissensiones inter opera mortalia: Et prov. 6. dicitur illum Deus maxime odisse, qui seminat inter Fratres discordias.

Mala discordia & bona.

SECTIO IX.

De Contentione & Schismate.

Contentio quid.

DICENDUM primò, *Contentio* est concertatio vehementior, eaque verbalis. Potest autem fieri contentio, vel pro defensione veritatis, vel exercitiū gratiæ;

gratiâ, etiam veritatem oppugnando, ut magis illa elucescat, quæ contentiones ambæ bonæ sunt, atque laudabiles, etsi aliquando per accidens propter immodestiam sint culpabiles. Si verò fiant, ut seriò veritas aut fides oppugnetur, erunt peccatum mortale, aliàs si sit veritas Philosophica, quæ oppugnetur, erit solum veniale. Denique potest quis contendere eo fine, ut alter irritetur, publicè confundatur, ejus autoritas evertatur, nisi fortè alter errore suo alios pervertat; quod aliquando poterit esse mortale. Damnatur quoque contentio, ex quâ alii à fide defleunt, de quâ contentione ait Apost. 2. Timoth. 2. *Noli contendere verbis, ad nihil enim utile est, nisi ad subversionem audientium.* Estque hoc vitium de se peccatum mortale, cum ad Gal. 5. annumeretur iis, quibus regnum Dei interdictur: & Rom. 1. Annumeratur gravibus peccatis, quæ digna sunt morte: qui repleti sunt *Contentione, dolo, malignitate* &c.

Dicendum 2. *schisma* est divisio, quâ quis se voluntariè scindit ab unitate Ecclesiæ, servatâ tamen professione nominis Christiani. Potest esse sine hæresi, si servatâ fide, separat se à Pontifice legitimè electo. Hæresis tamen, sine Schismate esse nequit, cum unitas Ecclesiæ importet unitatem fidei. Potest verò Schisma esse tam à capite, quam à membris: à capite, quando se quis à Pontifice vero segregat, nec eum vult agnoscere. A membris, quando quis non vult communicare cum membris, ut capiti sunt annexa, v. g. Gallis in eis, quæ sunt fidei. Posset & fieri schisma utroque modo, tam a capite, quam à membris, uti ex dictis satis patet. Est autem schisma de se peccatum mortale, cum grave sit, se ab unitate Ecclesiæ separare, unde & gravissimis pœnis iidem afficiuntur, ut quod amittant jurisdictionem, etsi characterem sacramentalem retineant, excommunicentur, inhabilitentur ad officia obtinenda, ordinati à schismatico suspendantur ab usu ordinum, collatio beneficiorum à schismatico facta invalidetur &c.

Tom. II.

N

TRACTA-

*Quando-
nam mor-
tale pec-
catum.*

*Quid
schisma.*

*Potest esse
sine hæresi.*

*Tam bene
schisma
est à mem-
bris, quam
à capite.*

*Gravitas
schismatis.*

TRACTATUS V.

CAPUT PRIMUM.

De Virtutibus Cardinalibus.

SECTIO PRIMA.

De Prudentia.

*Quid vir-
tus Cardi-
nalis.*



ICENDUM primò, contra vulnera qua-
tuor animæ potentiarum, dantur 4. virtu-
tes morales, quas & *principales* vocant, seu
Cardinales, eo quòd tota rerum honestas in
illis ut Cardinibus vertatur. *Prudentia* enim perficit in-
tellectum contra ignorantiam: *Iustitia*, voluntatem
contra malitiam: *Fortitudo* irascibilem contra infir-
mitatem: *Temperantia* denique concupiscibilem perfi-
cit, contra concupiscentiam. Sunt autem hæ virtutes
sibi mutuo indivulsè connexæ, ut teste S. Gregorio in
lib. Job. 22. c. 1. *Nec prudentia vera est, quæ iusta,*
fortis & temperans non est: Nec perfecta temperantia, quæ
fortis iusta & prudens non est: Nec fortitudo integra, quæ
prudens, temperans & iusta non est: Nec vera denique ju-
stitia, quæ prudens, fortis & temperans non est.

*Sunt om-
nes con-
nexæ.*

*Aliæ sunt
infusæ, a.
lia acqui-
sitæ.*

Porro aliæ sunt virtutes *Cardinales infusæ*, aliæ a c-
quisitæ. *Acquisitæ* rectè disponunt hominem circa
media ad finem naturalem, *supernaturales* rectè di-
sponunt hominem, circa media ad finem *supernatu-*
ralem, de quibus ita loquitur S. Prosper l. 3. de virtu-
te contempl. c. 18. *Hoc tenere debemus, quòd quatuor*
illæ virtutes donæ sint Dei, & quòd nullus eas habet,
habuit aut habebit, nisi cui Deus contulerit.

Disfin-

Distinguantur autem virtutes Cardinales acquisite *Differunt inter se.* ab infusis, tam ex parte finis jam dicti, quam ex eo quòd acquisite solum attendant honestatem moralem naturalem: Infusæ verò aliùs ascendunt & hominem supra se extollant, adeò ut quidquid agant, ex amore Dei agant. Unde sicut *Fortitudinem gentium mundana cupiditas facit: Ita fortitudinem Christianorum Dei charitas facit;* & ita conformiter hìc de aliis tribus virtutibus cardinalibus est intelligendum. Imò quòd quadripartita virtus Cardinalis, non sit aliud, quam ipse amor, officio distinctus. Vide dicta de charitate.

Dicendum 2: Prudentia est *Rerum appetendarum & fugiendarum scientia*, sive quod idem est, *Est virtus intellectus, quæ in quovis negotio occurrente, novimus quid tamquam honestum sit amplectendum, & tamquam turpe fugiendum.* Subjectum enim prudentiæ est intellectus practicus, ideòque actus ejus præcipui constituuntur, *consultare, judicare imperare,* qui propriè ad intellectum spectant: Deinde, scientia & notitia, qualis est prudentia, ad intellectum pertinent. Unde consequens est, quòd prudentiæ objectum non possit esse falsum, sicut virtus moralis in voluntate subjectata non potest habere objectum malum; cum sicuti harum objectum proprium est bonum; ita illius est verum. Hoc tamen notandum est, quòd judicio prudentiæ possit adesse aliud *judicium speculativum falsum, sicut tamen ut judicium prudentiæ semper sit verum.* v. g. judicium quo Jacob accedebat ad Liam, quam putabat esse suam, erat falsum; tamen judicium prudentiæ, quo judicabat se in his circumstantiis licitè posse ingredi ad eam, quæ sibi objiciebatur, erat verum: verum enim est, quòd stante invincibili ignorantia Jacob, poterat cum illa in his circumstantiis congrèdi. Quod verum est pariformiter in omnibus, quæ ex ignorantia invincibili homo operatur. Dictum quoque est *in quovis negotio occurrente*, quia qui in aliquibus actibus scit quid turpe sit & fugiendum, aut quid rectum sit

Quid sit prudentia

Ejus actus proprii.

Judicium prudentiæ practicum semper est verum, speculativum conjunctum potest esse falsum.

Quis prudens absolute.

& amplectendum, non item in omni opere quod agit, non erit prudens absolute, sed solum secundum quid, & in certâ materiâ. Deinde, non sufficit ea nosse in generali, quid v. g. generaliter rectum sit aut turpe, sed debet nosse moraliter certò, quid hîc & nunc agendum sit, aut omittendum.

*Prudentia
nequit sub
esse falsu.*

Dicendum 3. Ex dictis patet, quòd prudentiæ non possit subesse falsum, neque possit habere formidinem adjunctam de opposito, quæ sit practica. Ratio prioris est, quòd ex modo tendendi in objectum proprium, non possit falli: Considerat enim omnia, quæ consideranda sunt, ac juxta eadem resolvit ac dirigit operantem. Ratio posterioris est, quòd operari cum conscientia aut judicio practicè anxio seu dubio, sit operari cum conscientia practicè dubia, quod numquam licet. Non ideo tamen debet habere adjunctam omnimodam & Metaphysicam certitudinem, sed satis est, quòd habeat moralem certitudinem de honestate actûs, unde patet, quòd imprudenter operetur, qui agit innixus sententiæ merè probabili, cum talis sententia moralem certitudinem de honestate actûs non conferat, uti probavi in materia de conscientia.

*Actus alii
prudentia.*

Dicendum 4. Præcipui actus prudentiæ sunt, inquirere de mediis, judicare de iis inventis, & applicare consiliata & judicata ad actum, ne videant meliora probentque, deteriora sequantur. Hinc prudentia Christiana, quam Christi charitas facit, inquit de mediis quæ necessaria sunt, ut homo suo ultimo fini adhæreat, de iisdem judicat, ac demum eadem ad operationem deducit, & omnia disponit tamquam directrix, quæ necessaria inventa sunt, ad Deo tamquam ultimo fini placendum.

*Partes
prudentia*

Dicendum 5. Constat autem prudentia tamquam partibus integrantibus, *Memoria præteritorum, intelligentiâ præsentium, providentiâ futurorum, circumspeditione circumstantiarum, solertiâ sive competenti ad interventionem mediorum, sollicitudine vitandi omnia incommoda, &c.* His accedit ratio bene consiliativa, seu *Eubulia*: Ra-

tio

tio bene judicandi secundum communes regulas, quam vocant *Synesis* : & *Gnome*, quæ est ratio de actione judicandi secundum principia altiora, quam sint communia; ad prudentiam quoque spectat *donum Consilii*, quod est lumen quoddam, quo homo quasi divinitus accepto consilio probè novit, quid in rebus arduis, potissimum spiritualibus ad salutem spectantibus, sit agendum. *Donum Consilii.*

Dicendum ultimò. *Imprudentia*, quæ per defectum opponitur prudentiæ, aliquando est peccatum veniale, aliquando mortale, idque distinctum ab eo peccato, quod quis ex eâ committit. Mortale erit, si adsit contemptus divinorum documentorum, vel negligentia eorum, quæ sub peccato mortali quis scire tenetur: aliàs erit veniale peccatum. Coniinet hæc sub se præcipationem in agendo, sine debita circumspectione, inconsiderationem, & inconstantiam seu mutationem iudicii ob nullum vel leve fundamentum, & negligentiam seu omissionem diligentia debita. *Quid imprudentia.*

Per excessum verò opponitur prudentiæ, *prudentia carnalis*, quæ solerter excogitat media necessaria ad sequendos instinctus naturæ corruptæ, unde solet stipari *astutiâ, fraude, dolo &c.* quæ naturæ corruptæ subservire possunt. *Prudentia carnalis.*

S E C T I O II.

Quid sit Justitia, & quosuplex.

DICENDUM primò *Justitia* juxta S. Aug. l. 19. de civit Dei c. 21. *Ea est virtus, quæ sua cuique distribuit.* Hinc proprius ejus actus nihil est aliud, quam reddere unicuique quod suum est, ait S. Thomas 2. 2. q. 58. a 11. in Corp. unde ulteriùs justitia benè disponit voluntatem ad alterum. *Quid justitia. ejus actus proprius.*

Dividitur justitia in distributivam & commutativam,

Justitia distributiva Commutativa est virtus, quæ tribuit unicuique quod suum est, servatâ æqualitate rei ad rem. *Distributiva* vero est virtus servans æqualitatem proportionis ad proportionem in divisione bonorum & onerum communium. Possunt ea membra dividendia esse inter se connexa, si quis ex justitiâ aliquid distribuere debeat servatâ æqualitate Geometricâ, uti fit in contractu societatis, in quò lucrum per partes secundum proportionem inter socios debet distribui. Ex quibus patet, quòd justitia commutativa requirat æqualitatem in suo objecto secundum *proportionem Arithmeticam*, justitia distributiva verò secundum *proportionem Geometricam*, quæ proportionem in eo distinguuntur, quòd *Arithmetica* sit æqualitas rei ad rem, non respiciendo qualitatem personæ: *Geometrica* verò considerat proportionem rerum inter se, ut qui dignior v. g. est officio, alteri præferatur & sic de cæteris.

Sola commutativa est justitia propriè dicta. Dicendum 2. sola justitia commutativa est propriè dicta justitia, non autem distributiva, quæ non reddit quod alteri stricto jure est debitum: etsi enim unum membrum communitalis sit dignius & magis capax ad beneficium aliquod, non est tamen beneficium illud stricto jure illi debitum. Unde inferunt, quòd justitia distributiva violata non obliget ad restitutionem, eo quòd illius violatione, non violetur jus alterius. Ratio autem à priori, quare justitia commutativa violata, magis obliget ad restitutionem, quam distributiva, est hæc, quòd justitia commutativa velit dari unicuique quod suum est, & ne quis suâ re privatus maneat, quod etiam justitia illa intendit, etsi jam violata sit. Justitia verò distributiva intendit quidem, ut juxta proportionem bona communia distribuantur; verum illâ semel violatâ, cessat hoc intentum, cum non amplius bona illa sint distribuenda, veluti qui die festo non audit Missam, non satisfacit eam audiendo sequenti die, sed quod factum est, jam transiit, nec resarciri potest.

SECTIO

S E C T I O III.

Inter quas personas possit esse Justitia.

DICENDUM primò potest inter Deum & hominem esse vera justitia, cum hoc nihil in Deo dicat absonum, & honestum sit unicuique reddere, quod suum est. Unde Scriptura Sacra vocat beatitudinem *Coronam justitiæ, depositum, denarium diurnum*, quæ omnia ex justitiâ dari debent. Hinc etiam S. August. Epist. 108. nam ait, *si accepturus est vitam eternam; Justitiæ stipendium est.* Unde & Apostolus Heb. 6. *Non enim injustus est Deus, ut obliviscatur operis vestri.* Et quamvis omnia sint ipsius Dei bona, unde videri posset non posse hîc intervenire rationem dati & accepti: tamen stante illo Dei dominio generali in omnia creata, nos quoque sumus veri Domini nostrorum actuum, quos proinde eidem dare possumus. Hinc ulterius S. Augustinus l. 6. de verb. Apost. Docet, quòd Deum alloqui possimus, ut nostrum debitorem, & dicere, *redde quod promissisti, quia fecimus, quod jussisti.* Nec ideo fit Deus nobis subjectus, eo quòd fiat noster debitor, quia non fit debitor noster ratione necessitatis aut inopiæ alicujus, aut etiam subjectionis; sed ratione propriæ benignæ voluntatis, unde totum provenit, quòd nobis sit debitor. Aliàs præcisè vi operis nostri, absque promissione præviâ, non fit nobis debitor, quo sensu intelligendus est S. August. l. 1. Confess. c. 4. dum dicit de Deo, quod sit *nulli debens.*

Dicendum secundò, quandocumque peccator peccat mortaliter, facit Deo injuriam. Probatur ex D. Augustino l. 19. de Civit. c. 21. ubi ait, *An qui auferit fundum ejus, à quo emptus est, & tradit ei, qui nihil in eo habet juris, injustus est? & qui se ipsius auferit dominantî Deo à quo factus est, & malis*

Inter Deum & homines esse potest justitia.

Quomodo Deus nulli sit debens.

Peccans mortaliter peccat contra Deum, contra quam justitiam, & malis

servit spiritibus, justus est? Unde sicut servus cō-
nando fugere à suo Domino, facit illi injuriam: ita
peccator fugiens per peccatum à Deo, & diabo-
lo adhærens, facit Deo injuriam. Quamvis au-
tem Deus, sicuti bonorum nostrorum non
eget, ita & malorum nostrorum seu peccatorum
non sentiat propriè incommodum aliquod; tamen
per peccata nostra patitur damnum in honore suo
extrinseco: Deinde etsi non sentiat inde incommo-
dum, nihil refert, aut dictis obstat, cū sæpè pec-
cetur & fiat alteri injuria, etsi nullum alteri inde
accedat damnum. Sic v.g. qui viro probò diceret eum
esse infamen, sicutamen ut nullus ei dicenti crederet,
peccaret tamen alter, & faceret viro illi injuriam.
Denique peccatum fit Deo invito, cū sit Deus no-
lens iniquitatem, etsi illa permittendi habeat ratio-
nes justissimas, eo quòd creârit hominem liberum
& per actus liberos debeat ad finem suum pervenire.

Ex quo ulteriùs deducunt, quòd si per peccatum
mortale Deo sit illatum damnum aliquod v.g. in ho-
nore extrinseco, v. g. persuadendo aliis, Deum
esse crudelem: statim contrariâ persuasione dan-
num illud esse resarciendum. Quod & alii extendunt
ad omnem casum mortaliter malum: quamvis hoc
alii meliùs negant, quando nullum Deo creatum est
damnum, præter usum contra Dei voluntatem,
cū nullum tunc damnum existat, quod illam acce-
lerationem exigit.

Potest ju- Dicendum 3. Potest intercedere vera justitia in-
stitia sita ter Patrem & Filium, Dominum & servum, virum
esse inter & mulierem conjugem. Ratio est, quòd Filius Patri
Patrem & suo detrahens, aut notabilia furto ab eo rapiens, vio-
Filium, let justitiam & verè sit injustus: quibus casibus du-
Dominus plici peccato peccat, contra pietatem & contra justiti-
& servum am. Idem dicendum est de Domino & servo, &c,
&c.

SECTIO IV.

De Jure & Dominio.

DICENDUM primò, Quòd *jus* sit propriè potestas moralis disponendi de re aliquà, in suum commodum, per se obstand, ne alius de eà re disponat, te rationabiliter invito. Sumitur etiam aliquando *jus* pro *lege*, quomodò dividitur in *jus* naturale & positivum, de quo vide materiam de legibus. *Quid sit jus.*

Porro dividitur *jus*, in *jus* in re & *jus* ad rem. *Jus* in re est, quod tribuit actionem realem, sive ad quem res ipsa devincta est, sic ut ad quemcumque res illa devenerit, manet tamen illi obstricta. *Jus* ad rem est, quod non tribuit actionem realem, sed solum personalem, idest non ad rem, sed ad personam, eo quòd res ipsa nobis devincta non sit, sed solum persona ad nobis rem illa tribuendam. *Jus in re & jus ad rem.*

Dicendum 2. *Dominium* duplex est, jurisdictionis & proprietatis. *Dominium jurisdictionis* est potestas gubernandi subditos illis, præcipiendo, prohibendo, &c. *Dominium* hoc aliud est divinum, estque perfectissimum, quale habet Deus in omnia creata: aliud verò est humanum, quod dividitur in Ecclesiasticum & politicum: *Dominium Ecclesiasticum* est, potestas gubernandi subditos in spiritualibus, in ordine ad finem spiritualem. *Politicum* autem, est potestas gubernandi subditos in ordine ad pacem & felicitatem temporalem sive politicam. *Dominium divisio.*

Dominium proprietatis est *jus* disponendi de re aliquà tamquam suà, ad omnem usum, lege non prohibitum: quod ulimum additur, quia *jus* illud sæpè per leges particulares restringitur, aut impeditur, uti patet in pupillis, qui sunt Domini suarum rerum, sed tamen usus earum diversis legibus impeditur. *Dominium proprietatis.*

Dominium illud dividitur in perfectum & imperfectum. *Perfectum & imperfectum.*

ctum. *Perfectum* sive *plenum* est illud, quod simul complectitur proprietatem Rei & emolumentorum ejusdem. *Imperfectum* seu *non plenum* est illud, quod habet vel solam rei proprietatem absque emolumentis, vel solum usumfructum & emolumenta absque proprietate, quod Dominium vocatur *utile*, & Dominus illius, vocatur *usufructuarius*, necita propriè est Dominium.

Alio modo dicitur Dominium plenum & non plenum, non solum ex parte objecti, sed & ex parte subiecti, prout habet compartem secum in Dominio vel non habet illam.

Potest dari dominium duorum in solidum. Dicendum 3. Potest dari Dominium duorum in solidum, idest, potestas disponendi de re indivisibili, quam jura per Dominium in solidum solent intelligere. Sic duo possunt habere Dominium ejusdem equi, ejusdem domus, &c. Si verò intelligatur per Dominium in solidum, potestas utendi re aliquà ad omnem usum possibilem, qualiter sæpè intelligunt Theologi; sic non possunt duo in solidum esse Domini ejusdem rei: cum unus posset pro eodem instanti velle rem alienare, & alter pro eodem instanti noller, in quo est aperta contradictio.

Dominium rerum sub nullius potestate existentium. Dicendum 4. Ad acquirendum Dominium rei altius, quæ sub nullius est potestate, ut sunt gemmæ in littore maris, aves & bestię sylvestres & volatiles: thesauri, &c. Requiritur sola apprehensio illarum rerum, & fiunt primi occupantis, ita statuunt diversa jura. Si verò res aliquæ Dominum habeant, etsi jam infortunio amissæ sint, ad acquirendum Dominium earundem, requiritur ordinariè titulus & traditio; cum in titulo fundetur Dominium & sit radix Domini.

Titulus ille aliquando *verus* est, aliquando *presumptus*. *Verus* est, si revera subsistat: *presumptus* est, qui etsi revera non subsit, præsumitur tamen bonâ fide subesse.

Dicendum 5. Omnis & sola natura rationalis, est subje-

subjectum capax Dominii. Quòd sola sit talis, probatur ex eo, quòd fundamentum Dominii & disponendi de re aliqua, sit intellectus & voluntas: quòd autem omnis sit talis, patet ex eo, quòd quælibet natura rationalis, sit Domina suorum actuum liberorum; unde Deus perfectissimum habet Dominium in omnes creaturas, non tamen tantum, ut beatos possit detrudere in gehennam, aut plectere innocentes: Vide dicta de beatitudine. Angeli quoque & animæ separatæ Dominium habent suæ famæ, hinc qui eis detraheret, faceret illis injuriam. Homines quoque habent Dominium suorum actuum, & aliorum, uti per se est manifestum. Parvuli ante usum rationis habent verum Dominium; etsi usus Dominii illius per leges sit impeditus ob defectum usûs rationis: idem dic de amentibus.

*Subjectum
Dominus.*

*Dominus
perfectissimus.*

SECTION V.

*De Filiis familias, Religiosis, & Clericis non Religiosis,
eorumque Dominio.*

DICENDUM primò, Filii familias sub patriâ potestate constituti, habent Dominium bonorum *Dominus
Filiis fam.* *Castrensi*, idest, bonorum quæ in castris, sive militiâ, aut ratione militiæ acquirit filius. Item habet *Bona Ca-* Dominium bonorum quasi Castrensi, idest illo- *strensa,* rum, quæ ratione beneficii Ecclesiastici, ut Cantoribus, Exorcistæ, &c. Aut ratione officii publici, ut Judicibus, Advocatis, Notariis, &c. Aut ratione professionis artis liberalis proveniunt. Bonorum verò *quasi ca-* adventitiorum, idest, quæ aliorum donatione vel suâ industriâ, *strensa,* ut negotiatione acquirit filius, censetur habere Dominium directum, sic ut de iisdem sine consensu Patris disponere nequeat, apud quem utilitas & administratio eorundem remanet. Bonorum verò *adventi-* profectiorum, seu quæ à Patre vivo, aut ejus intuitu dantur *strensa,* Filio,

Filio, non habent Dominium, quamdiu sunt sub Patriâ potestate. Hoc quoque circa hæc dicta notari potest ex D. Stockmans in decis. Curia Brab. decis. 8. quòd in his Brabantia partibus, possint Filii Familias testari de iis rebus, quarum habent Dominium aut proprietatem, etsi Pater habeat usumfructum & administrationem. Notat autem ibidem in Frisia Filios Familias testari non posse.

Religiosorum Dominium,

Dicendum 2. Religiosus status potest consistere cum Dominio in particulari, uti expressè declaravit Gregorius XIII. quoad Religiosos Societatis post biennium vota sua emittentes, ita tamen, ut Dominium illud nihil obsit voto paupertatis, cum sit planè dependens à nutu superioris, à cujus nutu si independenter Religiosus talis aliqua bona alienet, alienatio illa erit valida, sed illicita, cum nulla sit lex illam irritans aut invalidans.

Monasterii votum.

Dicendum 3. Potest tamen Monasterium habere Dominium aliquarum rerum tam mobilium, quam immobilium, uti patet ex Concilio Trid. Sess. 24. c. 3. deinde, communiter dicitur, *quidquid acquirit Monachus, acquirit Monasterio*, ex quo sequitur, Monasterium aliquorum fieri Dominum. Dominium autem hoc Monasterii non est ita independens, uti sæcularium: cum non possit, nisi in utilitatem ac commodum communitatis, bona illa alienare; sed obligatur ea ad posteros transmittere: Denique potest Pontifex urgenti de causâ, bona Monasteriorum diminuere, & de uno ad aliud Monasterium ea transmittere.

Dicendum 4. Incapacitas illa Religiosorum oritur merè ex jure positivo Ecclesiæ: Ratio est, quòd votum simplex paupertatis non reddat hominem incapacem Domini; si enim voluntate mutata, bona aliqua alienet, alienatio quidem illa erit illicita, sed tamen valida: Votum autem solemne, & simplex sunt ejusdem rationis, & votum solemne est solum Cæremonia Ecclesiastica, voto simplici superaddita, & jure Eccle-

Ecclesiastico solummodo introducta, de qua re plura in materia de voto.

Dicendum 5. Talis incapacitas Religiosi fuit ab initio statûs Religiosi; unde S. Augustinus in Regulâ, furti arguit eum qui Religiosorum, aliquod proprium possideret. Deinde, vivebant à principio juxta normam actorum 4. præscriptam, quando erant inter Discipulos omnia communia, quod non permittit aliquem habere in particulari Dominium Rei independentem ab alterius arbitrio. Denique capt. *cum ad Monasterium*, de statu Monachorum, dicitur, quòd abdicatio proprietatis ita pertineat ad statum Monachalem, ut ne Pontifex quidem in eâ valeat dispensare. Et quamvis aliqui Religiosi testati sint, prout narrant Historiæ de quodam Januario, & de eodem S. Aug. Serm. 1. & 2. de vita communi Clericorum, tamen factum illud S. Augustinus c. 3. & 4. ejusdem Sermone vehementer accusat & reprehendit: neque inde sequitur eos eorundem bonorum fuisse Dominos, sed cum iisdem fortè dispensatum, ut testamentum eorum post mortem valeret, qualiter sæpè dispensatur cum Episcopis Religiosis, de quo plura statim.

Dicendum 6. Religiosus ad Episcopatum aut Abbatiam promotus, est quoque incapax Dominii, cum maneat verus Religiosus, de cujus essentiâ est votum paupertatis: ac de cætero nulla sit ratio hîc in eo dispensandi; unde bonorum communium sunt solùm administratores, non Domini, & indubiè peccant, si aliqua in vanis & superfluis expendant: quantum autem quisque Abbas vel Episcopus consumere possit, prudentum judicio est determinandum, uti etiam, quodnam cedere censeatur in communem utilitatem.

*Religiosus
Episcopus
et Abbas
manet vere pauper.*

Sunt tamen, qui hîc pro regulâ allegant, quòd si communitas vel sanior ejusdem pars conveniret in unum, & judicaret aliquid cedere in commune bonum, censendum esset in tale illud cedere. Ex quo sequitur, quòd ratione officii procuratoris, aut dispensatoris, teneatur Abbas suis subditis providere de necessariis, cum quilibet

*Quantum
possint
consumere*

*Præstat
abundare
in dispen-
sando.*

quilibet Religiosus in particulari, etsi non habeat Dominium, habet tamen jus, ut de communi vivat, & sibi de necessariis provideatur. Necessaria autem illa non ita restringenda sunt, quam amplianda; nam ut verè S. Bernardus: *Ubi non est abundantia, non est ob-*servantia; quod tamen de abundantia moderatâ est intelligendum.

*Beneficia-
tus Reli-
giosus ma-
net vere
pauper.*

Dicendum 7: Religiosus beneficiatus, cum quoque maneat verus Religiosus, est incapax domini; & quidquid acquirit, Monasterio acquirit. Non enim per beneficium magis eximitur à voto paupertatis; quam ab aliis votis. Testatur hoc praxis immemorialis in ordine nostro, quâ religiosi beneficiati: manent regulis ordinis nostri subiecti, quod ut filii familias in Monasterio recipiantur, habeant locum professionis, vocem activam in electione Prælati, & quamvis jure communi habeat religiosus beneficiatus independentem administrationem fructuum ex suo beneficio provenientium, per particulares tamen leges, illud aliquando impeditur, prout aliquando expedit fieri. Fructus autem beneficii, & cætera talis religiosi bona acquiruntur monasterio. Ex quo ulterius patet, quomodo nec Episcopus, nec Decanus aliquod jus habeat in bona Pastoris defuncti, cum quidquid religiosus acquisivit (qualis quoque fuit, dum ad beneficium erat promotus) monasterio acquisierit.

*Bona Re-
ligiosi ac-
quiruntur
Monasterio.*

*Ad qua
posse dis-
ponere be-
neficiatus.*

Notant tamen aliqui, quod religiosus beneficiatus possit liberè disponere de suis fructibus ad causas pias, neque quoad illas posse limitari: unde & statuta nostra prohibentia ne pastores & alii beneficiati notabilia munera aut dona amicis suis elargiantur, nihil agunt aut meminerunt, de dispositionibus ad pias causas; quamvis consultissimum sit, & illas expensas ad pias causas, si notabiles sint, superiori in inventario exprimere, ut judicet, an sint legitimè expensæ, & pia causa revera subfuerit.

Dicendum 8. Etsi jure antiquo religiosi permis-
sum

sum fuerit habere redditus annuos ad nutum superioris revocabiles ad pias & honestas causas, jure tamen Concilii Tridentini sess. 25. cap. 2. de regularibus ita statuitur: *Nemini igitur regularium, tam virorum quam mulierum, liceat bona immobilia vel mobilia, cujuscunque qualitatís fuerint, etiam quovis modo acquisita tamquam propria, aut etiam nomine conventus possidere, vel tenere; sed statim ea superiori tradantur, conventuique incorporentur. Nec deinceps liceat superioribus bona stabilia alicui regulari concedere, etiam ad usum fructum vel usum, administrationem vel commendam. Quo jure volunt aliqui, quod jus antiquum non tantum corrigatur, sed & elidatur, & novum jus condatur. Alii è contra docent jus antiquum solum corrigi: maxime cum multorum praxis habeat, bona aliqua mobilia vel immobilia dare religioso administranda, ut certam pensionem annuè persolvat monasterio. Optandum tamen, ut Tridentini lex ad litteram observaretur, ad majorem puritatem voti paupertatis, & vitæ communis.*

Religiosorum incapacitas Dominii, reddituum, &c.

APPENDIX.

De peculio sive redditibus annuis religiosorum.

DICENDUM primò etsi juxta posteriorem sententiam per Concilium Trid. non prohibeantur religiosorum peculia sive redditus, sed illis permittantur juxta us antiquum, quod jus Concilium Trid. non elidit, sed solum corrigit: tamen absolute videtur esse contra vitam communem & paupertatis perfectionem, habere tales redditus. Probatur hoc ex primævâ puritate paupertatis Evangelicæ, undè paupertas religiosa descendit, quando fideles bona sua ante pedes Apostolorum ponebant, qui dividebant singulis prout cuique opus erat. Unde & dicebantur omnia eis communia. Hoc autem particulari possessione

ne

ne peculii violatur: nam ut ait D. Basilius constitut. monast. c. 9. *Perfectissimam ego illam vitæ communio- nem apello, à qua omnis propria & privata cujuscunque rei possessio exclusa est: à qua abest omnis dissensio, omnis perturbatio & rixa, sed omnia communia.*

Nec refert, quòd peculia illa dicantur possidere religiosi, dependenter à nutu superioris: quia etsi eo titulo non sint dicendi proprietarii: puritastamen Evangelicæ paupertatis & vitæ communis diminuitur, dum uni assignatur, quod omnibus deberet esse commune. Adde, quòd titulus ille sæpè proprietatem palliet, cujus veritatem sæpè superior detegit, si religiosum suo peculio privare attentet, & illud in communes usus expendere se velle declaret, ad quod superior juxta aliquorum sententiam aliquando constringitur, maximè ut omnem proprietatis animum à subditis excludat, & discant se nihil proprii possidere.

Dicendum 2. non videtur posse excusari à gravi culpâ superior ille, qui in monasterio satis fundato, & ubi necessaria victûs & amictûs religiosi suppetunt & administrantur, concedunt suis religiosi redditus immoderatos. Ratio hujus est, quòd juxta omnes, ut ejusmodi redditus sint liciti, debeant solum inservire particulari necessitati religiosi: quâ de causâ eosdem plurimi excusant in monasteriis pauperioribus, ubi vix necessaria possunt religiosi de communi vel consuetis eleëmofynis ministrari: quæ ratio proinde in monasterio opulento prædicto hîc deest.

Deinde, dum necessaria religiosi ministrantur, ad nihil aliud ordinariè serviunt ejusmodi redditus immoderati, nisi in usus vanos & prophanos, qui vitam communem æquè ac disciplinam religiosam destruunt aut corrumpunt, uti experientia probat.

Unde ulterius graviter peccat superior ille, qui in ejusmodi opulentis monasteriis non ministrat necessaria, dum eadem ministrare commodè potest, dando

dando causam similibus pecuniis immoderatis: superiores enim illi juxta D. Antonin. 3. p. tit. 16. c. 1. §. 11. non sunt in tuto statu, si non adhibeant debitam diligentiam, ut in communi vita religiosa transigatur, quando id commodè fieri potest, uti hic fit. Mirum enim & notum, quot abusus ex vitæ communis violatione nascantur in religione. Similiter etiam peccat graviter subditus, qui communi vitæ non contentus, similes sibi redditus fundat, cum sit quoque causa, quod vita communis & religiosa disciplina violetur.

Dicendum 3. Peccant graviter Religiosi, qui ejusmodi redditus ita apud depositarios tenent, ut illis pro suo nutu independenter à licentiâ Prælati uti velint, nec per Prælatum illi redditus possint peti & pro suo libitu de iisdem disponere. Ratio hujus est, quod hæc sit mera proprietas, velle aliquid possidere independenter à nutu & arbitrio superioris. Hinc peccant ii, qui vel sensim vel simul redditus illos sine scitu superioris petunt ab amicis vel depositariis, & eosdem pro suo libitu expendunt, & consumunt.

Dicendum 4. Posset Prælatus, imò juxta multos aliquando expediret, interdicare suis Religiosis ejusmodi pecunia, & redigere omnes ad rectam observantiam vitæ communis. Neque hic valeret excusatio, quod quando professi sunt, fuerit usus ille à Superiori permissus, neque se aliter vovendo voluisse obligare, quam ad eum vivendi modum: Tum quia Religiosus in Professione suâ obligavit se ad observantiam religiosam, non verò ad ejus abusum, ob negligentiam aut malam conniventiam aliquando introductum: Tum etiam, quod usus ille illorum peculiorum à Superioribus multis solum tolleretur & permittatur, non verò approbetur: Cum quâ permissione stat, quod usus ille sit illegitimus, & consequenter justè & meritò possit revocari.

Ubi ergo exacta vult esse vitæ communis observantia, etiam ab omni proprietatis specie oportet

esse alienationem, ut sit juxta Chrysost. hom. 58. ad Pop. Antioch. *Una mensa; & Ministrantibus & suscipientibus & exhibentibus eadem fercula, eadem indumenta, habitacula eadem, eadem vita.* Hinc in constitutionibus Canonorum Regularium ita laudabiliter statuitur, p. 2. c. 1. *Et si neque per professionem, neque per S. Canones prohibeamur annuos redditus in communi possidere, per Concilium autem Tridentinum id nobis sit concessum: Nihilominus (Voluntariè tamen, ut nullo unquam vinculo adstringamur) ab illis abstinemus, quo à secularibus negotiis liberiores, paupertatem Christi Domini, Apostolorum, & multitudinis illorum, quibus cor unum & anima una fuisse legitur, imitemur..... novitiis nostris, dum bonis suis ante Professionem renuntiant, annuos redditus, quoad ipsi vixerint, nostræ congregationi ut relinquunt, ne permittatur. Optandum ergo, ut ejusmodi peculiorum praxis, maximè in Monasteriis opulentioribus eliminaretur, uti & alia plura, communi vitæ adversa, v. g. quod officialibus dentur salaria, non itidem aliis, qui aliquando illis operosiùs communitati inserviunt, & meliùs de eadem merentur, de quibus ita ait S. Antonin. loco supra cit. *Magna quoque abusus est, ut fratres velint habere salaria pro officiis suis, cum omnia opera sint in manibus Prælatorum, ac etiam voluntates.**

Ut ergo peculia religiosorum sint licita, requiritur primò ut res quæ per modum peculii datur, sit conventui incorporata, & dispositioni superioris relicta. Ratio hujus est clara ex Concilio Trid. sess. 25. c. 2. de reg. Quòd expressè vetat, ne quispiam aliqua bona mobilia aut immobilia tanquam propria, aut etiam nomine conventus possideat, sed ea statim superiori tradi debeant, & conventui incorporari. Deindè, nisi aliquo modo essent illi incorporata, non videtur, quomodo in eadem haberet superior aut communitas aliquid juris, & consequenter clarè esset proprietarium. Ex quo patet, quam secura sint illa peculia, quæ relinquuntur religioso

ligioso sub eâ conditione, quod nullum jus ad eadem detur conventui, v. g. quòd Petrus religiosus possit exigere summam aliquam ab amicis annuam, quòd non potest idem conventus: imò si conventus sese vellet ingerere, obligatio peculii sit planè nulla.

Requiritur 2. ut peculium concedatur ad simplicem usum facti, non juris. Ratio hujus est, quòd aliàs religiosus habeat aliquid proprium, scilicet jus ad illam pensionem. Jus enim ad pensionem independens, tam benè prohibetur à voto paupertatis quam ipsa pensio aut ejus possessio independens. Patet ex dictis.

Requiritur 3. ut peculium illud ad nutum superioris sit amovibile. Ratio est; quòd aliàs esset independens à nutu superioris, & consequenter proprietarium. Hinc assignant pro medio indagandæ proprietatis, si superior illud peculium exigeret, aut rejiceret.

Requiritur 4. ut peculium illud sit moderatum, ratio est, quòd omne superfluum vetetur voto paupertatis. Nec enim sola proprietas repugnat tali voto: sed etiam omnia illa habere, agere, possidere, quæ statui paupertatis repugnant. Si enim sola proprietas tali voto repugnaret: non posset contra paupertatem peccare communitas, qua talis, cùm proprietas & communitas opponuntur. Unde nec ad superflua potest superior dare licentiam, cui sola facultas est concessa ad ædificationem, non ad destructionem religionis, de quo alibi. Quando autem aliquid hîc sit moderatum, morali judicio est determinandum.

Requiritur 5. Ut subsit justa causa, puta si religioso illi non possit sufficienter juxta exigentiam statûs provideri à communitate. Nec ideo communitas aliqua necessaria religionis substrahere debet, quòd aliunde illa possint acquirere; cùm eâ ratione det occasionem peculiorum & subinde destructionis disciplinæ, & aliorum abusuum in religione

Requiritur 6. ut peculium illud in usus vanos & superfluos non infumatur. Ratio illa patet ex dictis requisito 4.

Hoc tamen pro coronide hîc advertendum est , generaliter à quibusdam graviter culpari peculia religionum , & signanter Dyonis. Carthus. de reform. claustrî art. 16. & de reformatione monialium art. 9 ubi ait: *Viri prudentes , & Sancti Religionum institutores , ex proprietate seu peculio multa mala provenire didicerunt , ut contumaciam , superbiam , contentionem , factionem , avaritiam ; inanem gloriam , invidiam , mendacium , luxuriam , occupationem infructuosam , curam supervacaneam , dissolutionem variam , mentis distractionem , acediam , negligentemque divini officii persolutionem . Abundantes enim peculio , ad resistendum suis superioribus fiunt audaces , disciplinam & correctionem egrè ferunt & excutunt : Factiones concitant : Rebelliones fovent , commensationibus & ebrietatibus vacant , ex quibus in vitia carnis labuntur , & quotidie magis excæantur & obdurantur . Et novissimè Author celebris , ejusmodi peculia vocat *Monstra Religionum* . Sic & illos , qui sub prætextu , quod eadem retinerent nomine communitatis , dicit Trîhemius exhort. 1. ad Monachos , parare sibi viam ad infernum . Alia huc spectantia videri possunt in materiâ de voto paupertatis ;*

SECTION VI.

An Clerici seculares sint Domini fructuum & maximè eorum qui ex beneficio honestam sustentationem excedunt .

PRÆNOTANDUM est ex Dominico Soto de jure & just. l. 10. q. 4. Art. 3. & aliis, alia esse Clericorum bona merè secularia , v. g. patrimonialia & similia , alia esse Ecclesiastica , quæ rursum sunt quadruplicia : quædam enim erant ex oblationibus fidelium ,

ium, ut inde in communi viverent tam Clerici quam pauperes, de quo act. 4. quod fideles sua bona ad pedes Apostolorum ponerent, ut inde distribueretur, prout cuique opus erat. Quo tempore putat Soto cessasse decimas, & Clerum eâ distributione fuisse contentum. Aliud bonorum genus est, quod postea cœpit offerri Ecclesiæ, non solum fidelium & pauperum sustentationi, sed tamquam stipendium perpetuæ Capellanix. Tertium bonorum genus est, quod ex quotidianis fidelium oblâtionibus, vel pro celebrandis Sacris, vel ad pedem altaris fieri solet. Quartum genus sunt decimæ, seu decima pars juri Clericorum addicta.

Secundò prænotari potest, in primitivâ Ecclesiâ omnes Clericos vixisse in communi, quæ vita erat verè Canonica & Apostolica, & ut ait Soto, erat status decentissimus, si durare potuisset: Unde & etiamnum in quibusdam Cathedralibus & Collegiatis ejus vitæ communis signum apparet & vestigium, ut Colonix, Leodii, Brugis & alibi. Quomodo autem ea communis vita apud Clericos desierit, dicit idem Doctor subdens: *Dum autem Clerici non cum suo capite vitam communem degerent, cœperunt Episcopi infideliter communia distribuere. Quare videntes Pontifices non posse vitam retineri communem, factâ bonorum Ecclesiæ partitione, in quatuor portiones singulas singulis addixerunt: Episcopo scilicet unam, reliquo vero Clero alteram, & fabricæ necessitati-que Ecclesiæ tertiam, ac denique quartam pauperibus. Idque fieri cœpit circa annum Domini 470. nempe in confinibus temporum Hieronymi & Augustini.* Ita Soto.

Tertiò prænotari potest, SS. Patres sæpè in hac materia locutos esse Hyperbolicè & per exaggerationem, vocando aliquando *avaritiam*, quod liberalitati debitæ deest; uti etiam vocando *rapinam*, quod misericordiæ debitæ Clericorum deest, & maximè eâ hyperbole uti, ut fortiùs Ecclesiasticos stringant, & ad debitas eleëmofynas validiùs inducant. Deinde hoc quoque notari potest, sæpè SS. Patres hic loqui, non

ut aliquid est præcepti, sed solum consilii, & quid Clericali institutioni de se conveniat, puta vivere in communi, & sua pauperibus elargiri.

Deinde veteres SS. PP. & DD. valdè rigidi erant in hac parte: Primò enim S. Prosper l. 2. de vitâ Contempl. c. 9. & sequentibus docet, Episcopum non posse vivere de bonis Ecclesiæ, si habeat patrimonium, nisi fortè illud Ecclesiæ donasset: Ita enim inter alia scribit. *Illi quoque qui vel idonei nil quidem sibi dari velut debitum possunt, sed tamen Ecclesiæ vivunt sumptibus, non est meum dicere, quali peccato cibos pauperum præsumendos suscipiant, qui Ecclesiam, quam juvare de propriis facultatibus debuerunt, suis expensis insuper gravant.* Et post pauca subdit. *Dura sunt quæ dico: nec ego diffiteor. Dura sunt, sed observare nolentibus.* Hunc secutus est S. Bernardus in declaratione super illa verba; *Ecce nos reliquimus omnia.* Imò S. Ambrosius in epistolâ ad Sororem ita scribit: *Convenior ipse à Comitibus & tribunis, ut basilica fieret matura traditio, dicentibus Imperatorem jure suo uti eo quòd in potestate ejus essent omnia. Respondi, si à me peteret quod meum esset, idest fundum meum, argentum meum, jus hujusmodi meum, me non refragaturum, quamquam omnia quæ mea sunt, essent pauperum.* Eâ de causâ quoque antiquitus Ecclesiasticâ constitutione sancitum est in Conc. Carthag. 3. c. 49. ut quæ Episcopus vel Clericus ex paupere ditior effectus, emisset ex bonis Ecclesiæ, eadem Ecclesiæ cederent, nec posset de illis pro suo libitu testari, de quo videri potest Spondanus ad annum Christi 397. num. 19.

Insuper N. bona Clericorum sæpè vocari res Dei, patrimonium Christi, bona pauperum, &c. non idèò, quòd omnia illa bona ad Deum, vel ad pauperes pertineant tamquam veros Dominos: Sed quòd ad cultum Dei concedantur: Vel etiam quòd Clericis dabantur, qui more pauperum solebant in communi vivere.

His prænotatis, Dicendum primò, si quæ bona in
usum

usum pauperum à populo offerantur, ea non posse à Clero usurpari, sed debent pauperibus distribui, & ille qui eadem usurpat nec distribuit, tenetur ad restitutionem: ita Soto loco citato. Bona verò secundi generis, puta prædia & aliæ possessiones relictæ sive Ecclesiæ sive Episcopatui, sive etiam Canonici præbendam possidentis, sed sunt solum eorundem administratores: quod patet ex eo, quod eadem neque vendere possint nec alienare, nisi accedente consensu superioris, aliquando ipsius Pontificis. Fructuum verò ex possessionibus obvenientium, Clerici pro sua quisque portione sunt veri Domini, uti & quotidianarum pitantiarum, quæ illis vel promissis vel exequiis offeruntur: Si enim eleemosyna pauperi data, transeat in Dominium pauperis; quidni & similia oblata transeant in Dominium Clericorum? Si verò quædam possessiones aliquibus sub ea conditione competant, ut pauperes alant, certum est earundem fructuum non esse absolutos Dominos, sed solum administratores quoad eam partem, quæ pauperibus debetur. Quod verò fructuum ex possessionibus uti & pitantiarum dictarum Clerici sint veri Domini, ulterius docet Concilium Trid. quod Sess. 24. c. 12. reform. statuit, ne Clericus habens beneficium, cui annexa est animarum cura, faciat fructus suos, si intra 2. menses non faciat professionem fidei: item, quod Canonicus privetur primo anno fructibus, quos fecit suos, si ultra tres menses non resideat. Unde patet, quod Clericus faciat aliquos fructus suos, sive aliquorum habeat Dominium, quos ex beneficio percipit, quod in primis dicendum est de iis, quæ honestæ sustentationi sunt necessaria. Oppositum tamen tenent aliqui, eo quod omnia bona Ecclesiæ, etiam ex beneficio provenientia, dicantur *bona pauperum, patrimonium Christi*, & ut ait Conc. Trid. Sess. 25. c. 1. reform. quod *sint res Dei*. Sed quo sensu ea dicantur à SS. Patribus & aliis mox ante prænotavimus. Ut ut sit, certum est, quod Clerici

rici possint liberè disponere de iis fructibus, quos ex beneficio acquirunt, & honestæ sustentationi sunt necessarii, adeò ut possint patrimonialibus bonis parcere, & de beneficii sui fructibus sibi de necessariis aut competentibus providere, de quo statim.

Quid dicendum de bonis qua debita sustentationem excedunt.

Dicendum 2. triplex est sententia quoad fructus, qui ultra debitam sustentationem supersunt ex beneficio. Prima satis communis docet, quòd etiam similitum bonorum fiant domini: cui favere voluit Conc. Trid. supra citatum, quod innuit Clericos fructus sui beneficii facere suos, adeòque & illorum esse dominos. Verùm notandum est, quòd Concilium non loquatur de fructibus quibuscumque, sed solùm, ut alii docent, de fructibus necessariis ad honestam sustentationem, non item qui eam excedunt. Secunda sententia huic opposita docet, Clericos horum fructuum non esse dominos, sed solùm procuratores, & ad honestum & pium usum illos esse expendendos. Sententiam hanc Navarrus tenuit, quia, ut ait, aliter conscientia suæ non potuisset satisfacere, unde nunc, inquit, *Firmius assevero, beneficiarios injungentes malè, vanè, aut prophanè notabilem reddituum prefatorum quantitatem, non tantum peccare mortaliter, sed etiam obligari ad restitutionem.* Archidiaconus, ait, *vocat oppositam opinionem juris hæresim, alii errorem gravissimum*, imò Joannes Major docuit, quòd nemo Doctorum, qui ante ejus ætatem mortuus fuisset, contrarium tenuerit. Deinde teste Comitolo l. 1. respons. moral. q. 70. visa est contraria sententia Joanni Majori *Falsa & animarum deceptoria*, & ipsi Comitolo *Nova, periculi plena, & ab authoribus, nescio quibus, post mille quingentos annos in Rempublicam christianam invecita, de qua si in Concilio quopiam generali disceptaretur, tamquam falsa & catholicis auribus ac mentibus indigna, meritis exploderetur.* Ratio horum est, quòd bona illa vocentur passim à SS. Patribus *Bona pauperum, patrimonium Christi*, adeò ut S. Bern. epist. 2. ad Fulconem Archid.

chid.

quid. ita scribat : *quidquid præter necessarium victum , aut simplicem vestitum de altario retines ; tuum non est ; rapina est , sacrilegium est.* Quæ sententia si vera sit ; rectè admodum Navarrus de re dit. Eccles. q. 2. inonito. 7. ubi ait. *Decipitur vulgus , cogitans grande bonum esse , alicui amplos redditus Ecclesiasticos habere : tum quia magno labore opus est , ad ita intendendum eorundem dispositioni , ut ob eos Deum non perdat , retinenda vel insumendo , ubi , quando , quare , & quomodo non debet : tum quod rari sint animi satii fortes , ad resistendum tentationibus cognatorum & amicorum , plura quam par est petentium , juxta illud cujusdam sub morie conquerentis ; MEDICI ABSTULERUNT MIHI CORPUS , ET ANIMAM AMICI , Tum quia etiam difficile est , servare se ab impulsibus mundi , qui ut plus justo impendamus , quasi vim quandam infert , & avaritia conatibus , que ad retinendum plusquam oportet , impellis* Haftenus Navarrus.

Tertia sententia docet prædictorum fructuum Clericos quidem esse dominos , sed non absolutè & cum conditione , ut scilicet eosdem pauperibus aut pio fini distribuunt : quæ sententia mediam viam in it ; adeòque docet Clericum ex charitate tantum , non item ex justitiâ illos fructus taliter impendere , & si aliter consumpserit , non teneri ad restitutionem , quod secunda sententia affirmat.

Hoc interim notat Bellarminus in admonit. ad Neopolem , controversiâ ultimâ , non esse anxie disputandum Clericis , an ex justitiâ , an ex charitate teneantur illa dare pauperibus , & ut ait , an sint fructuum suorum veri Domini , & an teneantur restituere , si malè expendant ; *Parum enim , ait , refert , utrum damnentur ad inferos , quia peccarunt contra justitiam , an quia contra Charitatem.* Enim verò , si sæculares arctissimè obligentur superflua sua dare pauperibus , etiam juxta fundatam satis SS. Patrum sententiam ex justitiâ : Quid dicendum de Clericis , qui speciali titulo dicuntur *Pauperum Patres* ? dicit quidem Card.

Card. Lugo hîc, eos esse solùm Patres pauperum in spiritualibus : Sed contortè satis contra communem sensum, qui ex corporali sublevatione miseriæ pauperum, potissimùm ita Clericos appellant.

Quæres ultimò, an liceat beneficiario parcere bonis patrimonialibus, & vivere de bonis Ecclesiæ. Resp. Dyonisius Carthus. de vitâ canonic. art. 24. ita dicens. *Securius ac salubrius, creditur ac paretur dictis SS. per quos locutus est Spiritus Dei, quam Scholasticorum quorundam, qui suo magis, quam expedit, credunt & innituntur ingenio, auctoritates Sanctorum ad suam retorquentes opinionem. Quamvis ergò de propositâ questione quidam dicant Scholastici, posse licitè id fieri: Consultius tamen credendum est, & standum verbis Hieronymi & Bernardi, &c. Hieronymus enim inquit, qui de bonis suis sustentari potest, si acceperit, quod pauperum est, sacrilegium profectò committit. si non eges & accipis: Rapis. Et S. Prosper: Non est meum, ait, dicere, quale crimen committant, qui cum de bonis suis vivere possunt Ecclesiam, eam suis gravant expensis. Unde concludit dicens: Constat ex introductis, quantis se exponant periculis, qui Ecclesiasticis beneficiis bene provisi, eorum se sustentant redditibus; suumque patrimonium largiuntur suis propinquis. Ita ille.*

Verum sententia illa ut nimium stricta & infundata passim rejicitur à DD. eo quòd, bona illa Clericis relicta sint tamquam laboris stipendium, vel ut iisdem tamquam eleëmofynis sustentarentur: Quod de illis licitè fit, etsi aliunde sint sufficientia ad debitam sustentationem: dum dignus est, qui altario servit, ut de altario vivat. Quare titulus beneficii censetur hîc dare jus ad exigendam debitam sustentationem. Ad verba verò SS. Patrum dici potest, illa procedere de jure antiquo, quando non dabatur Clericis talis portio, sed vivebant in communi. Neque etiam verum est, quòd dictus Author objicit, ejusmodi solùm esse stipendia Clericorum egentium, non verò illorum, quibus sufficien-

tia

tia aliundè abundant: Quod planè ex dictis constat esse infundatum, quod & docet contraria timoratorum praxis.

S E C T I O VII.

De rebus, quæ cadunt sub Dominium hominis.

D ICENDUM primò, Vita & membra hominis non sunt sub Dominio ejus, adeò ut de iisdem liberè possit disponere, sed sunt sub Dominio solius Dei, qui est author vitæ & necis, qui deducit ad portas inferi, & reducit, uti ait sapientia divina 16. Ratio hujus est, quòd Dominium dicat superioritatem; homo autem non est superior se, nec suis membris; cùm ipse homo nil sit aliud, nisi membra humana, simul sumpta. Quæ dicta intellige de Dominio directo, cùm certum sit, quòd vitæ & membrorum habeat Dominium utile, unde etiam, qui alterum occidit aut mutilat, facit alteri veram injuriam. Et quamvis homo se ipsum mutilare quandoque possit, v. g. ne totum corpus pereat; tamen hoc fit merè per accidens, nec dominium infert in sua membra, cùm etiam eadem de causâ possit medicus mutilare hominem, qui tamen non habet Dominium in hominis membris.

Eadem est ratio de semine humano, quæ dicta est de aliis membris. Sicut enim membrorum Dominium est apud solum Deum, sic ut eadem abscindere solummodo liceat certis casibus ab autore naturæ concessis; ita & de semine dicendum est, quòd sit sub Dominio Dei, sic ut illud abscindere à se non liceat, nisi certis casibus ab eodem concessis, v. g. in matrimonio; unde alibi docebitur, fornicationem esse jure naturæ illicitam, eo quòd re non suâ utatur ad usum ipsi prohibitum, idque invito rationabiliter Domino.

Dicen-

*Est Domini-
us fama.* Dicendum 2. homo habet dominium suæ famæ ; cum eam proprio labore & industriâ ; puta studio , scientiâ &c. Acquirat , sicuti divitias ; Hinc certis casibus , gravi scilicet de causa citra omnem injustitiam potest homo detrimentum famæ suæ pati , nisi obstat damnum tertii : sic peccat contra justitiam Prælatus , Paterfamilias prodigendo famam , eo quod prodigalitas illa & infamia illorum vergat in infamiam subditorum. Aliàs si damnum tertii & scandalum absit , licebit in sui humiliationem , ad petendum consilium , &c. Suæ famæ detrimentum pati. vide D. Thom. 2. 2. q. 64. a. 5. ad 3.

S E C T I O VIII.

*De modis acquirendi Dominium illarum rerum , quæ
sub nullius sunt Dominio , vel sub eo
esse desierunt.*

*Animalium syl-
vestrium
Dominium.*

DICENDUM primò juxta ante dicta , animalia sylvestria & libera sunt primi occupantis , quæ intelligi debent de animalibus sylvestribus in publico vagantibus ; aliàs animalia sylvestria in vivario , aut loco seposito existentia , censentur esse sub dominio Domini talis loci. His annumerari solet examen apum , si jam abierit , & oculos domini effugerit , quo casu sunt primi occupantis.

*Animalium man-
suetorum.*

Dicendum 2. animalia naturâ suâ mansueta , ut Oves , Boves , Equi , Gallinæ &c. Retinent dominum suum , ubicumque vagantur , ut patet ex institut. de rerum divisione §. Gallinarum. Idem est de animalibus feris , sed jam mansuefactis , v. g. cervis , columbis , cuniculis , &c. Quamdiu consuetudinem redeundi retinent. Hinc peccant , qui illecebris aliorum columbas capiunt , nisi jam consuetudinem redeundi amiserint , aut grave damnum agris alicujus intulerint. Alibi tamen hoc sibi mutuo indulgent ,

*Columba
tota.*

dulgent; ut quilibet columbas quolibet modo quolibet possit ad se allicere: & damnum quod aliis inferunt, permissione, comunitatis pro nullo reputatur, adeoque cedunt alii juri suo respectu columbarum: alibi tamen particulares leges columbaria prohibent, ac varia de iisdem statuunt, ad quas quælibet patria attendere debet.

Dicendum 3. si fera ab aliquo graviter vulnerata sit, quam adhuc insequitur, certò eam apprehensurus, & ab alio interim capiatur, fit vulnerantis, non autem capientis, cum graviter vulnerando & insequendo certò sit eam accepturus; adeoque acquirat jus proximum in illam feram, quod jus ab alio non potest præverti. Aliud est, si vel feram amplius non insequatur vel dubium sit, an eam fuisset quis consecuturus, tunc fit primi capientis, cum eo casu non censeatur fera amisisse suam naturalem libertatem.

Fera vulnerata cui sit, an vulnerantis, an capientis.

Fera autem quæ inextricabiliter inhæret alicujus laqueo, adeo ut se luctando eximere non posset, fit ejus qui laqueum posuit; si verò extricabiliter laqueo inhæret, fit primi occupantis, cum eo casu non censeatur amisisse naturalem libertatem. Idem conformiter dicendum de piscibus in nassa inclusis, aut hamo suspensis.

Dicendum 3. Et si possit Dominus fundi prohibere, ne quis in suo fundo venetur, tamen qui venatur in illo fundo, et si peccet, eo quòd faciat illud invito rationabiliter Domino, tamen feræ quas ibidem capit, fiunt venantis, cum non sint Domini fundi, nec ejus fructus, sed casu ibidem vagantes & in naturali sua libertate. Aliud esset, si feræ illæ conclusæ forent in aliquo loco segregato, aut si segetes conculcarentur, sepes destruerentur aut notabile damnum venando Domino creasset; quo casu ex justitia tenetur quidem illud damnum refarcire, non tamen de feris à se captis in tali fundo aliquid restituere.

Venatio in fundo alieno.

Dicendum 4. qui venatur instrumentis prohibitis, peccat

*Venatio
cum in-
strumentis
prohibitis.*

peccat graviter, si grave damnum tali venatione Reipublicæ causet, non tamen tenetur feras ita captas restituere. Idem dic de eo, qui venatur in loco prohibito, aut alteri elocato. Ratio prioris est, quod sit grave peccatum, inferre Reipublicæ damnum grave. Ratio posterioris est, quod feræ prohibitis instrumentis, aut in loco prohibito captæ, non censeantur amisisse naturalem libertatem, adeoque fieri primi occupantis.

*Venatio
clericis in-
terdicta,
& qua*

Dicendum 5. Clericis interdicatur venatio jure positivo, ut patet ex cap. *de Clerico venatore*, ne ad vana negotia diffluant, qui soli Deo vacare debent. Restrigitur tamen hæc prohibitio, ad venationem *clamorosam* quæ fit cum magno strepitu canum, & vi armorum; aliàs exercitii gratiâ, aut recreationis honestæ causâ, quieta venatio non censetur Clericis interdicta, si absit scandalum. Deinde, cum poenæ huic inhibitioni appositæ sint graves, sequitur quod tantum feriat Clericos illos, qui faciunt venandi professionem, non item illos, qui rarissimè venantur. Ita passim Theologi & Canonistæ.

*Inventio
venarum
metalli-
carum.*

Dicendum 6. Stando in jure naturæ, inventio venæ metallicæ in loco publico, fit primi occupantis: In alterius fundo vero, fit Domini fundi, cum venæ tales censeantur esse fructus fundi. Jure verò positivo, venæ tales partim inventori applicantur, partim Principi talis loci.

Thesauri.

Thesaurus verò jure naturæ fit cum invenientis, cum sit depositio rei mobilis, cujus non extat memoria, ut dicitur *L. numquam §. Thesaurus*, adeoque jam Dominum non habet, & consequenter fit primi occupantis. Jure tamen positivo, Thesaurus inventus in proprio fundo, fit totus inventoris; in alieno fundo fortuito inventus, partim cedit Domino fundi, partim inventori. Inventus verò in alieno fundo de industria sine consensu Domini, fit totus Domini fundi: si verò inventus sit cum consensu Domini, vel dividendus est inter inventorem & Dominum, si præ-
viè

viè talis sit facta conventio : Aliàs totus cedit inventori , cùm Dominus censeatur cessisse juri suo. Si verò sit inventus arte magica , addicitur fisco. Aliæ tamen leges in aliis Regnis de inventione thesauri sunt consulendæ

Porro poterit tutâ conscientiâ emi locus, in quo quis scit latere thesaurum , pretio cummuni , nihil de thesauro illo indicando. Ratio est , quòd justum pretium desumatur ex communi hominum æstimatione , non verò ex utilitate rei in se , & ex qua quis suâ industriâ multum lucri potest acquirere. Aliud esset , si ematur aliquid ab alio , qui rei pretium & valorem ignorat , ut à rustico emens gemmam , quam ille putat esse vitrum , cùm illa gemma communi hominum æstimatione pluris valeat.

Dicendum 7. Bona derelicta à Domino , sive quæ eâ mente à se abdicavit , ut nolit ea amplius esse in numero suorum bonorum , fiunt primi ea occupantis. Unde aliud est , de bonis metu naufragii in mare projectis , quæ non reputantur pro derelictis , cum eadem non abdicavit à se illorum Dominus absolute , sed solum metu naufragii , adeo ut vellet eadem recuperare , si posset. Unde & in Bulla cœnæ excommunicantur , qui bona Christianorum naufragorum ad littus ejecta , injustè usurpant.

SECTION IX.

De Præscriptione & usufructu.

DICENDUM primò , inter alios modos acquirendi Dominii est præscriptio , sive ut alii loquuntur , *usucapio* , quæ nihil est aliud , quam modus acquirendi Dominii per possessionem alicujus , rei , certo temporis spatio legibus definito continuatam. Jure autem civili est præscriptio introducta , ne diu & ferè semper , quarundam rerum Dominia essent incerta , ut dicitur

l. i.

l. 1. *De usurp. & usucap.* Deinde non solum valet in foro externo, sed & in foro conscientiæ, uti ex variis Canonibus patet, & signanter ex capt. *Quoniam de præscript.*

Quanam ad debitorum præscriptionem sit requisita. Dicendum 2. Ut præscriptio sit legitima, requiritur primò possessio; nam ut dicitur Reg. 3. in 6. *Sine possessione præscriptio non procedit.* 2. requiritur bona fides, sive credulitas, quâ quis prudenter judicat, rem possessam esse suam, aut saltem non esse alienam: Hinc dicitur ibidem Reg. 2. *Possessor malæ fidei, ullo tempore non præscribit.* 3. Ordinariè quoque requiritur titulus, saltem probabiliter præsumptus, puta donationis, emptionis, &c. Dixi ordinariè, quia aliquando titulus non requiritur, quando scilicet nulla præsumptio stat in contrarium. 4. requiritur continuatio temporis legibus præscripta.

Quantum temporis ad præscriptionem requiratur. Dicendum 3. Ad præscriptionem rerum mobilium cum titulo probabiliter præsumpto, requiritur triennium: sine titulo verò, tempus 30. annorum. Ad præscriptionem verò rerum immobilium, requiritur cum titulo inter præsentis, idest in eodem territorio habitantes, decennium: inter absentes verò viginti annorum spatium: sine titulo vero, rursus 30. excipiuntur tamen bona immobilia hospitalis, monasterii & aliorum piorum locorum bona, quæ non nisi tempore 40. annorum præscribuntur: Ecclesiæ verò Romanæ bona, non nisi 100. annorum. Bona itidem pupillorum, quamdiu tales sunt, nullo tempore præscribi possunt, uti & bona Ecclesiæ, quæ alienari non possunt, aut sanctis usibus deserviunt. Varia tamen Regna, varias hîc habent leges consulendas.

Res præscripta an maneat præscriptæ rei cognita esse aliena. Dicendum 4. quando quis rem præscripsit, & postea deprehendit rem esse alterius, potest tutâ conscientiâ rem illam retinere. Ratio est, quod res illa per præscriptionem sit facta sua, & autoritate Reipublicæ jam acquisierit ejus dominium, quod ob bonum commune potest Respublica facere, dominia bono-

bonorum transferendo, puta ad cavendas lites, ne Dominia rerum manerent diu incerta, &c. Eâdem de causâ potest quis etiam sine suâ culpâ, re suâ à publica potestate privari, uti hîc fit. Non desunt tamen, qui contrarium docent.

Dicendum 5. *Ususfructus* est jus utendi, fruendi rebus alienis salvâ illarum rerum substantiâ. Unde usufructuarius potest quidem rei fructus percipere, & habere Dominium rei utile, sed debet salvam custodire rem cujus habet ususfructum: Ex quo sequitur, quod ususfructus non possit constitui in rebus quæ unico usu consumuntur. Si quis verò vellet, quod & rebus unico usu consumptibilibus uti quis posset, non adeo condemnandus, si to *uti* accipiat in significatione latiori.

Duplex autem solet distingui usus, unum vocant *usum juris*, alium *usum facti*. *Usus juris* vocant aliqui *et facti*. usum irrevocabilem; *Usus facti* verò usum revocabilem: Sed perperam, cum juris usus variis casibus possit revocari, ut patet in contractu venditionis cum onere revendendi, in donationibus, quæ ob ingratitudinem revocari possunt, in donatione minorennium de consensu tutoris facta, quæ, si sit de re notabili, beneficio restitutionis potest revocari, & aliis multis. Unde melius alii ea distinguunt in eo, quod *usus facti* nihil juris præbeat utenti, *usus verò juris*, præbeat utenti jus & Dominium rei. Ita Nicolaus 3. extravag. *Exiit* vocari dubit. 8. num. 3.

SECTION X.

An usus distingui possit à Dominio, in rebus quæ unico usu consumuntur.

DICENDUM primò, usus juris, à Dominio non potest separari. De usu juris jam ante probatum est. De usu facti verò dari potest separatus à Dominio, qualem usum habent Fratres Minores, quoad res sibi

*Quid de
usu rei u-
nico usu
consum-
ptibili.*

concessas. Magna tamen lis est, an Fratres illi habeant solum usum rei unico usu consumptibilis, v. g. cibi & potus, separatum à Dominio earundem rerum. Affirmant illi, eo quòd neque in particulari, neque in communi habeant aliquarum rerum Dominium, sed totum subsit dispositioni Pontificis, adeo ut omnium rerum dispositionem revocare posset, quo facto paupertas eorumdem tamquam purior ab aliis commendatur. Verum omninò certum nobis est, illis fratribus non esse denegandum Dominium in res unico usu consumptibiles, & liberam earundem dispositionem, eo quòd Dominium illud & administratio illa à Pontifice possit revocari, cum Dominium cum revocabilitate simul stare possit, ut ante probatum est. Et quamvis in illorum regula expressè dicatur tales fratres nihil habere proprium, nihil obstat jam dictis, cum Joannes 22. hoc expressè explicet de rebus unico usu non consumptilibus: Deinde Paulus 4. resumpsit quidem Dominium domorum & similium, sed non rerum unico usu consumptibilium. Rursum, qui proprio nomine consumit rem aliquam, cum iusto titulo, est ejusdem Dominus, dumque Fratres Minores, servi, filii familias habent cibum in ore, fiunt ejus Domini. Iterum, quis neget Fratres Minores esse Dominos pecuniæ, quam expenderent in extremam necessitate, emendo cibos, cum verè ejus Dominium emendo transferrent in vendentem? Absonum verò est, quod hñc addit aliquis, quòd si Pontifex abdicaret à se Dominium earum rerum, transirent ad Dominium universale Dei, adeo ut nihil juris magis haberent eo casu Minores ad ea bona, quam avis ad grana, cum avis Domini sit incapax; non itidem Fratres Minores. Neque hoc obstat paupertatis puritati, quòd nullius sint Domini; nequidem in generali, quia perfecta paupertas in eo absolvitur, quòd Religiosus nihil possideat tamquam proprium, & independenter à nutu superioris, quod omnibus Religiosis est proprium & commune.

Sen-

Sententia hæc dicta apertè est Joannis 22. quem ideo *Fratricelli* dixerunt esse hæreticum, ut refert Antoninus, & Author Glossæ in Clement : *Exivi de Paradiso*. Hoc tamen diligenter est advertendum, quòd Joannes 22. non temerè hîc processerit, sed adhibito maturiori consilio Cardinalium, &c. uti ipse Joannes testatur constitut : quæ incipit, *ad conditorem* & 2. sequentibus. Neque hîc excipi potest, defectu debitæ promulgationis talis constitutionis, cum teste Bzovio ad annum 1324. num. 9. omnibus Prælati orbis Catholici sit prædicta constitutio promulgata, adeo ut quosdam biennio post huic obistere volentes, jussit Pontifex eosdem haberi ut contumaces & rebelles Ecclesiæ Romanæ, imò quòd *Michaëlem de Etsana*, ob hoc privarit suo Generalatu, eo quòd eam constitutionem septem annis post, niteretur oppugnare, declaravitque eum hæreticum, & hæreticorum fauctorem : Deinde, *Petrum de Corbario* pseudopapam, qui Nicolai V. nomen assumpserat, noluit admittere ad absolutionem, nisi constitutionem *cum inter*, & *quia quorundam* admitteret *per omnia & in omnibus*. Vide Bzovium ad annum 1330. ubi ejus confessionem refert, quam voluit Pontifex juramento confirmari.

Dices, Joannes 22. docuit, uti docuit Cælestinus. Deinde Nicolaus 3. revocavit dictas constitutiones Joannis 22. Resp. Cælestinus contrarium quidem docuit ante Pontificatum, neque illud è cathedra definivit, sed ut persona privata docuit : Nicolaus vero 3. præcessit Joannem 22. Cujus proinde constitutionem non potuit revocasse. Adde quòd Joannes 22. expressè dicat Constitutionem Nicolai non esse intelligendam de rebus unico usu consumptibilibus, prout etiam de constitutionibus aliorum Pontificum poterit responderi.

ria, etiamsi quis consentiat, si scilicet juri suo cedere non possit: sic marito fit injuria, etsi consentiat in adulterium uxoris &c.

Dicendum 3. potest actio externa fieri injuriosa, *Actio externa ab interna intentione contrahit injuriam,* ex affectu interno, quæ secluso tali affectu injusta non esset. Ratio est, quia fieri potest, quod actio aliqua de se non habeat connexionem sufficientem cum effectu, ad hoc ut qui vult actionem, censetur velle effectum, illique imputetur ut causæ: sic ut accedente intentione, actio illa cum tali effectu habeat connexionem sufficientem, ut illi tamquam causæ imputetur effectus. Sic qui cœnaret ex intentione pollutionis lautius, censetur peccare contra castitatem, & si foret conjugatus peccaret contra justitiam. Hinc, si velit aliquis suâ actione alteri inferre damnum, etsi actio illa remotè solùm & per accidens damnum inferat, peccat equidem ratione talis intentionis contra justitiam, etsi seclusâ tali intentione contra eam non peccasset. Idem evenit in eo, qui rem furtivam emit sciens ab alio, animo detinendi: quo casu peccat contra justitiam: si verò fiat intentione restituendi, nullo modo illam violat.

Dicendum 4. qui alterum impedit à consecutione *Impediens à consecutione boni sperati, an faciat illi injuriam;* boni sperati, ad quod quis habet jus in re vel jus ad rem, facit contra jus alterius, adeòque facit ei injuriam. Si verò sine vi vel fraude illud impediat, sic ut alter non habeat strictum jus ad bonum speratum, v.g. ad beneficium quod sperat, non facit illi injuriam, cum nihil juris ad illud habeat. Aliud est, si vi vel fraude ita alium impediat, quia etsi alter non habeat jus ad bonum speratum, tamen habet jus, ne vi vel fraude ab alio impediatur à consecutione boni sperati.

S E C T I O II.

*De restitutione.**Quid restitutio.**Est necessaria.*

DICENDUM primò, *restitutio* est actus justitiæ commutativæ quo res alterius injustè ablata redditur, aut damnum injustè illatum compensatur. Est hæc restitutio ad salutem necessaria, quia ut docet S. August. Epist. 54. ad Macedonium: *Non remittitur peccatum, nisi restituatur ablatum, si restitui potest.* Ratio ejus est, quia dum materia restitutionis est notabilis, præceptum restituendi obligat sub mortali, adeòque restitutione culpabiliter omisâ, nullus salvari potest.

Fur aliena retinens continuo peccat.

Dicendum 2. qui non restituit alienum, dum illud restituere potest, continuo peccat illud retinendo, non quidem semper novum peccatum addendo, sed idem peccatum injustitiæ continuando quatenus est diuturnior, & ex diuturniori detentione majus damnum causat Domino illius rei. Quomodo verò diversificari possit numero & specie illa detentio, ex dictis de peccatorum diversitate colligi potest.

Restituere debet ex qua culpa.
Culpa latissima, latissimam
lata, levem,
levissima

Dicendum 3. probabiliùs videtur hominem ex sola culpa theologica teneri ad restitutionem, nec sufficere culpam juridicam. Pro cujus intelligentia, notandum est à juristis quintuplicem distingui culpam, *latissimam* quæ est apertus dolus. *Latiorem*, quæ est dolus præsumptus; *latam*, quæ est omissio diligentiae solitæ adhiberi ab hominibus ejusdem conditionis. *Levem*, quæ est omissio diligentiae solitæ adhiberi à prudentioribus, & *levissimam* quæ est omissio diligentiae solitæ adhiberi à prudentissimis. *Culpa vero Theologica*, idem est, quod peccatum. Notandum insuper, quòd sæpè sit culpa juridica, absque eo quòd sit Theologica; culpa enim levis & Levissima rarò est peccatum, cum nemo teneatur in suis actionibus adhibere

adhibere diligentiam illam, quam prudentiores, vel prudentissimi adhibere solent: sed fatis est, ut à culpa Theologica excusentur, quòd in agendo prudenter se gerant.

Probatur ergo dicta conclusio, quia quando sine peccato damnum aliquod est illatum, tunc Dominus rei censetur irrationabiliter invitus, nec ad illud, de quo non cogitat, alterum obligare potest. Unde quando inadvertentiâ, ignorantia invincibili, oblivione naturali, damnum est illatum, restitutio non obligat; etsi suadendum sit, quòd damnum ita inferens aliqualem compensationem faciat, essetque hoc rationi conforme.

Dicendum 3. qui intulit cum peccato veniali damnum leve, tenetur totum damnum restituere, cum damnificatio illa sit formaliter injusta. Si verò cum peccato veniali intulerit damnum grave, tenetur illud restituere, & quidem probabilius sub mortali. Ratio est, quòd obligatio restituendi oriatur ex natura rei, ex damnificatione injusta, adeoque dum damnum est grave, est materia gravis, & consequenter obligatio restituendi est gravis. Alia tamen opinio, quæ non obligat hîc sub mortali, sua probabilitate gaudet.

Dicendum 4. qui dat operam rei illicitæ, & omnem diligentiam adhibet ne ex illa actione sequatur ^{*Damnum secutum ex actione illicita.*} damnum, non tenetur illud restituere. Ita dicitur cap. *Si culp.* ultimo de injuriis, quod non teneatur quis ad restitutionem, *qui nihil de contingentibus ad damnum præcavendum omisit.* Si tamen damnum illud prævidere potuit & debuit, omnino illud restituere tenetur unde, qui in ebrietate alteri infert damnum, quod prævidere poterat & debebat ex suâ ebrietate secuturum, eo quòd sciat se similia in ebrietate solitum esse committere, tenetur indubiè illud damnum refarcire.

Dicendum 5. Ex contractu sæpè oriri obligationem restituendi, ^{*Restitutio- nis obligatio orta ex contractu.*} etsi nulla culpa intercesserit; imò

etsi res fortuito apud aliquem pereat. Contractus autem vel cedit in alterius, vel utriusque utilitatem. Si cedat res, vi contractus in mei solius utilitatem, uti fit in commodato, tunc tenetur quis ad restitutionem, si res illa pereat, cum culpa levissima. Ita expressè habetur cap. *unico de commodato* & aliis juribus. Gratitude enim & æquitas naturalis hoc dicitur, ut magis sim circumspectus in custodiendis alterius rebus, quibus in meam utilitatem utor, quam in custodiendis propriis. An autem ante sententiam judicis ad restitutionem quis obligetur, an non, utrimque probabiliter disputatur.

Precarium quid.

Excipitur ab hoc casu, si antea sit aliter conventum: item in *precario*, quod est commodatum revocabile ad nutum concedentis. Si enim illud pereat apud commodatarium, non tenetur nisi de dolo & culpâ latâ, ita L. 8. §. 3. de *precario*. Et hoc idè quod precarium ad nutum concedentis possit revocari.

Si verò contractus cedat in alterius utilitatem, uti fit in deposito, tunc tantum alter tenetur de dolo & culpâ latâ, si pereat. Ita habetur ex institut: *quibus modis contrahi possit obligatio §. interea & is*. Ratio hujus est, quod quisque debeat adhibere eam diligentiam in custodiendis rebus alterius, quam solet adhibere in custodiendis propriis, quæ diligentia excludit culpam latam & dolum, non item levem vel levissimam. Excipiuntur tamen hîc in jure quidam contractus, ut mandati, tutelæ &c.

Si autem contractus cedat in utilitatem utriusque, tenetur alius de culpa levi & lata, non item de levissima. Ita constat ex L. *contractus* 23. D. de regulis juris, & alibi. Talis est contractus pignoris, locati, conducti &c. Ratio autem hujus est, quod æquitas naturalis dicat, ut ex unâ parte, majorem diligentiam adhibeam in custodia rei alterius, quæ cedit in meam utilitatem, quam in custodia rei propriæ: deinde, cum etiam cedat contractus ille in utilitatem

litatem alterius, æquum est, ut etiam alicui periculo subiaceat. Excipitur tamen contractus ille virtualis, quem ineunt aurigæ, nautæ, stabularii, &c. Qui hospitum adventantium & viatorum bona custodienda acceperunt, quæ si pereant, tenentur etiam illi de culpa levissima ita habetur L. 3. §. 1. ff. *pro socio*.

Hoc tamen notandum, quòd circa prædicta consulendæ sint patriæ leges, quæ in diversis Regnis sunt diversæ. *Restitutio ex officio.*

Dicendum 6. Tenentur sæpè aliqui ad restitutionem ex officio, si illi desint, idque ex culpa lata, idque sive pro mercede officium obeant, sive gratis. Ratio est, quòd quilibet debeat adhibere eam diligentiam in officii functionibus, qualem adhibere prudentes solent. Si verò officium ambivit, & pro eodem accipit mercedem, etiam tenetur de culpa levi. Patet ex l. 7. *Quidquid tutoris. C. arbitrium tutela*. Ratio hujus est, quòd propositâ mercede non desint communiter, qui officium administrarent, cum exactâ peritiâ & diligentia, ad quod talis ambiens officium, se censetur obligasse. Dicta verò intelligenda sunt de culpa Theologica, non vero juridica: Non enim qui officia talia accipiunt administranda, censentur se velle obligare ad restitutionem, si officio desint, ex sola inadvertentia & planè inculpabiliter, adeòque præter eorum voluntatem. Si verò officium quis obeat absque mercede, solum tenetur de culpa lata & dolo; Ratio est, quòd contractus ille non cedat in ipsius utilitatem: idem dic de eo, qui quidem pro officio stipendium accipit, tamen obedientiâ compellitur & est quasi invitatus ad illud officium obeundum, eo quòd tunc quoque contractus ille non censeatur cedere in ejus utilitatem.

S E C T I O III.

Quandoam confessarii teneantur ad restitutionem ex culpa commissa in suo officio.

Culpa confessarii ad restitutionem obligati.

DICENDUM primò, si confessarius positivè dicat pœnitenti, ut restituat, dum non debet restituere, vel ne restituat, dum debet restituere, idque ex culpa lata, tenetur in defectu pœnitentis damnum restituere. Ratio est, quòd qui injusto suo consilio impedit justam restitutionem, sit causa moralis damni, sicut qui suadet furtum. Idem erit dicendum de casu, quo ex suo Consilio ex culpa lata dato, alteri tertio creetur damnum. Unde, si commodè possit, debet pœnitentem de suo errore admonere, quod si pœnitens adhuc potens sit ad restitutionem, & restituere negligat, ad nihil eo casu tenetur confessarius, quia eo casu errorem abstulit.

Dicendum 2. Si confessarius negativè se habeat in admonitione pœnitentis, dum eundem restitutionis non admonet, dum potest & debet eum admonere, juxta plurimorum sententiam tenetur quoque in defectu pœnitentis confessarius ad restitutionem. Ratio est, quòd confessarius ex officio, & proinde justitia obligetur ad admonendum pœnitentem in iis, quæ necessaria sunt saluti ejusdem. Aliorum tamen opinio probabilior apparet, quæ negat confessarium debere restituere, si id negativè admonere omittat. Ratio illorum est, quòd confessarius ex officio non teneatur ad illam admonitionem ob bonum alterius tertii, cui restitutio facienda est, sed solum ad bonum sui pœnitentis, quem instruere tenetur in iis, quæ salutem ejus concernunt; quod si omittat, peccat quidem confessarius contra pœnitentem, non tamen contra tertium, cui nihil debet. Excipe tamen ab hac sententiâ, nisi omissio ejus admonitionis positivæ, monitioni praviæ æqui-

æquivaleat: v. g. si tacere confessarii ex circumstantiis censeatur esse virtuale consilium de contrario, aut ejusdem approbatio. Certum enim est secundum omnes, quòd qui suo consilio est causa iniqua damni alterius, teneatur quoque ad illud damnum refarciendum.

Dicendum 2. Teneatur confessarius ad restitutionem ex culpa latâ & dolo. Ratio patet ex dictis, eo quòd confessarius non accipiat stipendium pro officio, & si quidpiam fortasse accipiat, accipit illud per modum eleēmosynæ aut sustentationis, non item stipendii. Et si non desint alii, qui hoc negant de confessario curato, quem etiam ex levi culpa ad hoc volunt obligari. Quamvis & hoc addi possit, quòd si confessarius ad confessiones audiendas ex obedientia invitatus cogitur, diffidens suæ peritiæ, magis hîc sit excusandus, quam alius, qui suâ sponte se ad hoc officium ingerit. Si verò confessarii respondeant juxta sententiam verè probabilem, nec ita consulant, aut ad aliquid suadeant pœnitentes, quam bene mentem suam de ea re aperiant, vel etiam respondeant dubitando; tum non tenentur ad restitutionem si negativè omittant, aut positivè ita concurrant, eo quòd tali casu, alter non tam consilio confessarii, quam propriâ malitiâ restitutionem omittat, aut suâ temeritate.

S E C T I O IV.

An possimus negligere res alienas, si propriae res sint in periculo pereundi.

D ICENDUM primò, Si res illa apud nos sit in utilitatem nostram, tenetur quilibet res alienas præferre rebus propriis, nisi res propriæ forent majoris longè valoris. Si verò res illæ sint penes nos in utilitatem eas concedentis, potest è contra proprias præferre alienis. Si denique cedant in utilitatem utriusque poterit præferre proprias, si sint æqualis aut majoris pretii, secus si sint minoris.

Dicen-

*Res propria an
semper a-
liena sit
preferenda.*

Dicendum 2. Probabilis tamen etiam est sententia, quæ tenet, quòd in omni casu liceat præferre res proprias rebus alienis, nisi pactum obstat. Ratio hujus est hæc, quòd nemo teneatur ad custodiam rei alienæ cum gravi suo detrimento, quale subire deberet, si ut parceret alienis rebus deberet perdere proprias. Aliud tamen esset, si esset res aliena longè majoris æstimationis. Ex dictis patet, quòd quis posset in incendio relinquere res alienas, ut proprias salvaret.

SECTION V.

De iis, quæ excusant à restitutione.

DICENDUM primò, generaliter illa excusant à restitutione, quæ faciunt creditorem non esse rationabiliter invitum; dum enim non est rationabiliter invitus, censetur consentire in omissionem restitutionis. Hæc autem partim se tenent ex parte creditoris, partim ex parte debitoris.

Impotentia.

Ex parte debitoris verò 1. excusat à restitutione impotentia restituendi, siue ea physica sit, siue moralis. Unde extrema necessitas, in quam caderet, si restitueret, excusat à restitutione, uti etiam grave damnum, quod timetur, excusat à restitutione. De extrema necessitate clarum est, quia in illâ omnia sunt communia, unde & aliena hoc casu surripere licet, uti diximus agendo de eleëmofyna. Quod autem periculum gravis damni tam temporalis, quam spiritualis excuset, etiam clarum est, quia in casu talis periculi, non esset creditor rationabiliter invitus. Unde si ex restitutione timeretur, quòd in desperationem incidet debitor, quòd filia præ inopia sese prostituet, aut etiam si non possit restituere, nisi vendendo domum suam mille florenis, quam dilatâ restitutione vendere posset bis mille, excusatur debitor à restitutione, eo quòd his casibus censeretur creditor esse irrationabiliter

et invitatus: non excusatur tamen, si potuisset pecuniâ restituendâ lucrari, eo quòd nihil de suo hîc amittat, sed tantùm non percipit ex re alienâ emolumentum, quod potuisset percipere, quod creditor non tenetur attendere. Sic etiam à restitutione excusat jactura decentis & competentis statûs, eo quòd jactura statûs gravior sit, quam jactura rei temporalis. Dico *decentis & competentis*, eo quòd jactura statûs indecentis, uti etiam illius, quem injustè quis acquisivit, minimè excuset à restitutione. Hæc dicta intelligenda sunt de foro conscientiae, cùm similes excusationes minuendi status, amittendi bona temporalia, in foro externo non admitterentur.

*Grave
damnum.*

Excipiendum etiam, si creditor sit in æquali necessitate. Si verò ambo sint in extrema necessitate, volunt aliqui quòd debitor possit sibi de rebus restituendis prius providere, eo quòd hoc casu omnia sint communia. Verùm verius videtur, quòd etsi hoc admitendum sit, si res alterius justè sint ab alio acceptæ: Tamen id minimè verum videtur, si sint injustè ab alio acceptæ, cùm nullius iniquitas debeat alicui patrocinari, prædictum verò axioma, quòd in extrema necessitate omnia sint communia, intelligendum est solùm, si Dominus non sit in simili necessitate.

*Æqualis
necessitas.*

Idem est, si Dominus vel creditor sit in simili gravi necessitate, eo quòd Dominus hoc casu possit esse rationabiliter invitatus, nec eo casu æquitas sinit debitorem præferri, quando creditor est in simili gravi necessitate.

Dicendum 2. Quòd remissio creditoris remittere valentis, excuset à restitutione, si non sit extorta vi vel fraude. Tunc enim debitum alteri condonat, & cedit juri suo, quod in alium habebat. Debet autem creditor ille habere potestatem remittendi; hinc Pupillus non potest debitum validè remittere. Dixi, *Si non sit extorta vi vel fraude*: Eo quòd aliàs non censeatur liberè velle remittere, unde si quis alium velit occidere, nisi remittat, aut fingat se pauperem ubi est dives,

*Remissio
Creditoris.*

dives, remissio illa tali vi vel fraude facta, non valet, eo quod alias non remisisset creditor, si vis aut dolus abfuisset.

*Bonorum
cessio.*

Dicendum 3. Bonorum cessio excusat à restitutione, non magis tamen, quam impotentia se sola, unde si bonis cedens ad pinguiorem fortunam venerit, tenetur creditoribus suis satisfacere. In foro tamen externo hoc efficit bonorum cessio, quod debitor non possit pro suis debitis incarcerationi, nisi sit debitor ex delicto: deinde potest sibi retinere necessaria ad se suosque sustentandos, si sine sua culpa bonis cessit, secus si sit culpabilis: Unde Facultas Theol. Lov. censuravit hanc sequentem: *Qui cessit foro, potest sibi retinere bona, quibus indiget ad sustentationem familiae, ne indecore vivat, licet debita quibus cedit, sint ex injustitia & notorio delicto contracta.* Quam censuram confirmavit Synodus Namurcensis 1659. in foro tamen externo creditoribus assignatur, quidquid mediocri sustentationi superest, unde dicta intellige de foro interno,

*Compositio cum
creditoribus.*

Casus tamen est hic in patria satis frequens: qui bonis cedit, facit compositionem cum suis creditoribus, dandi 20. aut 30, pro centum: Quæsitum est, an debitor, si postea ad pinguiorem fortunam venerit, teneatur creditoribus in integrum solvere, an verò ab eo per factam compositionem sit liber, qui bonis cedit. Non desunt, qui respondeant, debitorem ad nihil teneri: cum facta compositione censeantur creditores juri suo renuntiasse quoad reliquam partem. Verum, verius existimo, talem, qui bonis cedit, si ad pinguiorem fortunam venerit, teneri creditoribus suis in integrum satisfacere, cum planè involuntariè compositionem fecerint, nec illam facere voluissent, si in integrum illis potuisset solvi.

*Quid cedentibus
foro sit necessarium.*

Notandum est, hic in patria Bonis cedentes, habere debere diploma Principis, aut personæ Principem repræsentantis, quod infra mensem ab acceptione debet in judicio offerri, cum jurata Synopsi bonorum, quæ creditoribus relinquunt, abdicatâ eorum

eorum possessione. Deinde, nihil sibi retinere possunt, nisi lectum unum cum suis ornamentis, & unicam rem immobilem, non pretiosam. Ita habet edictum Caroli V. & consuetudines Antverpienses tit 67. Denique notandum est, quod hoc dicto cessionis beneficio tantum gaudeant, qui debitis gravati sunt sine delicto: alias si ex delicto illa debita quis contraxit, dolo vel fraude creditores circumveniendo, bona sua dilapidando &c. beneficio gaudere non debet, sed pœnâ.

Dicendum 4. qui debitis alienis est gravatus, debet bona accepta restituere, si habeat unde restituat, nec ab eo excusatur per ingressum religionis. *Ingressus Religionis non excusat à restitutione.* Idem dicendum est de eo, qui spem habet, bona in mundo remanendo, acquirendi, unde solvat. Ratio ejusest, quod ingressus Religionis, utpote consilii tantum, cedere debeat obligationi ex justitia contractæ. Unde talis ingrediendo peccaret, reddendo se impotentem ad restituendum: quare à variis Pontificibus interdictum est, Religionem ingredi illis, qui alieno ære sunt gravati, & in ordine nostro præviè ante restitutionem & professionem ab Abbate inter alia peti solet, an non sint ære alieno gravati: tenet tamen eorundem professio, nisi superior aliter præviè protestetur, se nolle incorporare illum, si debitis alienis sit gravatus.

Hæc de restitutione in generali: in particularibus materiis dicetur de illa in particulari.

CAPUT TERTIUM.

De Occisione & mutilatione.

SECTIO PRIM A.

*An & quo casu liceat alterum occidere.**Occisio ge-
neraliter
interdicta.*

DICENDUM primò, generalis est juris natura & divini lex, *non occides*. Ab hac tamen aliqua dantur exceptiones, uti ab omni regula, quantumvis generali. Exceptiones illas disertè explicat S. August.

*Casus
excepti.*

1. 1. de civit. c. 21. ubi ait: *His exceptis, quos vel lex iusta generaliter, vel ipse fons iustitiæ Deus specialiter occidi jubet, quisquis hominem vel seipsum, vel quemlibet occiderit, homicidii crimine innectitur.* Deinde ibidem ad particularia descendens, ita subdit: *Nequaquam contra hoc præceptum fecerunt, quo dictum est, NON OCCIDES, qui Deo authore bella gesserunt, aut personam gerentes publicæ potestatis, secundum ejus leges, hoc est justissimæ rationis imperium, sceleratos morte punierunt. Et Abraham non solum non est culpatus crudelitatis crimine, verum etiam laudatus est, nomine pietatis, quod voluit Filium nequaquam sceleratè, sed obedienter occidere. Et meritò quæritur, utrum pro jussu Dei sit habendum, quod Jephthæ filiam, que patri occurrit, occidit, cum se immolaturum hoc vovisset, quod ei redempti de prælio, primitus occurrisset. Nec Sampson aliter excusatur, quod se ipsum cum hostibus ruinâ domûs oppressit, nisi quia spiritus latenter hoc jusserat, qui per illum miracula faciebat.* Hactenus S. Augustinus.

Ex quibus sequitur, quod sicuti licet membrum putridum abscindere, ne totum corpus pereat: ita
licitum

licitum sit abscindere à republica membra putrida, id est fures & latrones, eos occidendo, juxta monitum divinum datum Exodi 22. *maleficos non patieris vivere.*

Pateritidem; quòd tam se quàm alios liceat occidere, quos Deus ipse, qui est author vitæ & necis, occidi jubet. Idem est, de bello justo, quod Deus approbavit, uti ex antedictis constat.

Dicendum 2. Licitum quoque est occidere alterum pro defensione propriæ vitæ. Innuunt hanc sententiam primò Catechismus Rom. parte 3. de 15. præcepto *Non occides* c. 6. num. 4. ubi ait: *Quòd si quis salutis suæ defendendæ causâ, omni adhibitâ cautione alterum interemerit, hâc lege (non occides) non teneri satis apparet.* Cui consonat, quod ex Canonibus pœnitentialis antiqui apud Morinum in appendice ad librum de pœnitentia pag. 9. dicitur: *Si quis autem forsitan defendendo, aut parentes suos, aut familias suas occidisset aliquem, ille non erit reus.* Consentit S. Augustinus Epist. 54. ubi ait: *Cum homo ab homine occiditur, multum distat, utrum fiat nocendi cupiditate, vel injustè aliquid auferendi, sicut fit ab inimico, sicut à latrone: an ulciscendi vel obediendi ordine, sicut à judice, sicut à carnifice, an evadendi, vel subveniendi necessitate sicut interimitur latro à viatore, hostis à milite. Et aliquando, qui causa mortis fuit, potius in culpa est, quàm ille, qui occidit.* Et rursum q. 84. in Exod. intelligitur ergo, ait, Exodi 22. Tunc non pertinere ad homicidium, si fur nocturnus occiditur. Si autem diurnus pertinere. Hoc est enim quod ait: *si orietur super eum Sol, poterat quippe discerni, quòd ad furandum non ad occidendum venerit, & ideo non debet occidi.* Unde patet, quòd ad homicidium non pertineat occisio invasoris vitæ. Augustinum sequitur D. Thomas signanter 2. 2. q. 64. a. 7. ubi ait in corpore: *Nec est necessarium ad salutem ut hunc actum moderatæ tutelæ prætermittat (invasus) ad evitandam occisionem alterius.* Cui loco ita subnectit S. Antoninus: *Verum est tamen secundum Thomam, quòd nullus teneatur ad hoc, (scilicet ut sinat se occidi.) Sed*

Defensio
vitæ.

majoris perfectionis esset, si potius permitteret se interfici, quàm se defendendo occideret. Et hoc intellige, si est in bona dispositione animæ suæ. Nam alias fatuè faceret, exponendo se morti corporis & animæ.

Unde, si alibi S. Augustinus videatur docere contrarium, vel intelligi debet de consilio relinquendi se occidi, vel quòd difficulter moderamen inculpatæ tutelæ non excedat, qui invasus alium occidit: vel quòd irâ & vindictâ eo casu delinquere soleat. Sic dicit l. 1. de Libero Arbit. *impollutâ lege qui occidunt, ne ipsi occidantur, quomodo esse possint impolluti, non video.* Similia habet alibi.

Invadens involuntariè v. g. in ebrietate, &c.

Dicendum 3. si invadens non sit injustus inuasor, v. g. in ebrietate, aut amentia, si constat, quòd per peccatum mortale in ebrietatem aut amentiam inciderit, & probabiliter quis æstimet, quòd sit in statu gratiæ, tenetur invasus ex charitate sinere se interfici, cum plus sit ex charitate diligenda salus proximi spiritualis, quàm vita propria temporalis. Si verò hoc probabiliter judicare non possit, tum non posset invasus permittere se occidi, cum propria salus animæ, salutem alterius sit anteponenda. Unde juxta dicta, si non possit invasus aliter effugere, poterit invadentem occidere servato moderamine inculpatæ tutelæ.

Non licet occidere adulterum in adulterio deprehensum.

Dicendum 4. Non licet occidere adulterum, vel adulteram in adulterio deprehensam. Licitum quidem id aliquando fuit jure civili, tamen illi juri per S. Canones est derogatum: 33. q. 2. cap. *inter hæc*: cujus ratio est, quòd sine ullâ necessitate manifestissimo periculo damnationis æternæ, exponitur ille, qui ita occiditur. Ita tenet quoque S. August. l. 2. de adulterinis conjug. c. 15. unde merito Alexander VII. censuravit hanc sequentem: *Non peccat maritus occidens propriâ autoritate uxorem in adulterio deprehensam: Quam sub pœna excommunicationis vetuit practicari vel docere.*

Dicendum 5. Licitum est occidere tyrannum: Pro quo

quo notandum est, quòd dupliciter possit quis dici tyrannus. Semel ille, qui sine jure aut titulo Regnum tyrannicè invadit : alio modo, qui quidem habet jus ad Regnum, sed illud tyrannicè regit. Si priori modo sit tyrannus, potest quilibet de republica eum occidere, cum sit injustus invasor innocentium : imo eo titulo potest eundem quilibet occidere. Debet tamen constare, quòd ne quidem probabile jus habeat ad Regnum, deinde ne graviora damna innocentibus de occisione tyranni timeantur. Si verò posteriori modo sit tyrannus, non licet eum tali titulo occidere, eo quòd sit verus princeps, etsi tyrannicè regat. Ita statuitur in Concilio Constant. sess. 15.

*Qualem
tyrannum
liceat oc-
cidere.*

Dicendum 6. Quæstio est an ille, qui paratus est alium occidere, possit ab eo occidi, v. g. maritus sub pulvinari posuit pugionem, ut de nocte maritam occidat, quæritur an illa possit prævenire maritum, eumque occidere. Ad quod respondeo, si moraliter certò constet, maritum ad id paratum, nec sit alia via evadendi, quòd titulo justæ defensionis vitæ possit eum prævenire & occidere. Ratio est, quòd talis eo casu censeatur esse injustus vitæ invasor. Si verò hoc non ita certò constet, verius videtur, quòd non possit eum occidere, tum quia fieri potest, quòd maritus mutabit animum : tum quòd alias, quilibet posset temerè de tali animo alterius parato præsumere, eumque occidere.

*Occisio
præveniens
alterum
volentem
occidere.*

Dicendum 7. non licet occidere alium pro defensione bonorum temporalium. Supponit eam sententiam Scriptura Sacra Exodi. 22. ubi dicitur, quòd fur diurnus occidi non possit, eo quòd dignosci poterat, quòd ad furandum, non item ad occidendum venerat, uti ad illum locum ait S. Augustinus, qui & l. 1. de Libero arbit. c. 5. ita ait : *Quomodo apud divinam providentiam liberi erunt, qui pro his rebus, quas contemni oportet, humana cæde polluti sunt ? Aliud esset, si fur se simul vel telo defendat, vel alio modo censeatur esse injustus vitæ invasor, quo*

*Defensio
bonorum.*

casu furem occidi posse, leges permittunt. Ex quibus patet, quomodo à fortiori vetitum sit, furem occidere illarum rerum, quas nondum habemus, sed ad quas spem tenemus: unde recte à S. Facultate Theol. Lov. proscripta est hæc: *Non solum licitum est, defendere (defensione occisiva) quæ actu possidemus, sed etiam ad quæ jus habemus inchoatum, & quæ nos possessuros speramus. Quare licitum est, tam heredi, quam legatario contra injustè impediētem, ne vel hereditas adeatur, vel legatum solvatur, se taliter defendere. Sicut & jus habentem in cathedram vel præbendam contra eorum possessionem injustè impediētem.* Quam censuram suâ autoritate communivit Ecclesia. Et Synodus Namurcensis 1659. hanc censuravit & interdixit: *Neque ad culpam, neque ad pœnam homicidii condemnandus est, occidens eum, qui injustè aggreditur usurpare rem, quæ est valoris unius aurei, vel minoris.* Quam quoque Censuram approbavit Ecclesia in hac nupera condemnata: *Regulariter occidere possum furem pro conservatione unius aurei.* Hoc tamen hic notari potest, quòd nec D. Thomas, nec alii SS. Patres ex professo umquam instituerint hanc quæstionem, an liceret occidere alterum, pro defensione bonorum temporalium, tamquam pro certo supponentes, id esse illicitum.

*Defensio
pudicitia.*

Dicendum 8. Non licet injustum stupratorem pro defensione pudicitia occidere. Ratio est, quòd pudicitia sit virtus in animo residens, quæ à nemine invito potest eripi. Hinc ait S. August. l. 1. de lib. arb. *de pudicitia quis dubitans erit, quin ea sit in ipso animo constituta, quandoquidem virtus est, unde à violento stupratore eripi nec ipsa potest qua propter legem quidem non reprehendo, quæ tales permittunt interfici, sed quo pacto istos defendam, qui interficiunt, non invenio.* Nec dici potest, quòd ob periculum consentiendi eos liceat occidere, cum apertum crimen non possit pro incerto periculi eventu fieri, neque facienda sint mala ut eveniant bona: Nec denique tali opinione aperiatur via stupris & violatoribus pudicitia, cum leges civiles tales permittant

mittant interfici, quod satis obstat talibus flagitiis.

Dicendum 9. Non licet alium occidere pro defensione honoris & famæ. Ratio hujus est, quod aliàs ^{Defensio honoru, calumnia &c.} nimium perverteretur ordo amoris, si honor & fama, quæ parvi æstimanda sunt, ob suam inconstantiam & inanem hominum applausum, anteponerentur vitæ corporali & spirituali alterius. Deinde, vel ille justè invadit, vel injustè alterum, in famam ejus & honorem: si justè, ergo repelli non potest cum ejus occisione: si injustè, jam pro fama occidi non potest, cum moraliter certò cum vita perdet & salutem. Adde, quòd ex contraria opinione maxima sequerentur absurda, dum quilibet pretextu defendendi honoris & famæ, licitum æstimaret alium temere occidere. Quomodò tamen ratio sit habenda boni nominis, alibi est dictum.

Idem dicendum est de eo, qui alium falsò accusat in judicio, ex qua accusatione incurrit mortis periculum, quam evadere non potest, nisi calumniatorem illum occidat: hunc enim illicitum esse occidere, satis declarant hæc opiniones ab Alexandro 7. proscriptæ: *Licitum est Religioso vel Clerico calumniatorem gravia crimina de se vel de sua Religione spargere minantem occidere, quando alius modus defendendi non suppetit, uti suppetere non videtur, si calumniator sit paratus vel ipsi Religioso, vel ejus Religioni, publicè & coram gravissimis viris prædicta impingere, nisi occidatur.*

Item hæc: *Licet interficere falsum accusatorem, falsos testes, ac etiam judicem, à quo iniqua certò imminet sententia, si alià viâ non potest innocens damnum evitare.*

Et hæc: *Vir equestris ad duellum provocatus, potest illud acceptare, ne invidiatis notam apud alios incurrat.* Et hæc ab Innocentio XI. *Fas est viro honorato occidere invasorem, qui nititur calumniam inferre, si aliter hæc ignominia vitari nequit: idem quoque dicendum, si quis impingit alapam, vel fuste percutiat, vel post impactam alapam vel iectum fustis fugiat.*

S E C T I O II.

De occisione alterius innocentis.

*Occiso di-
recta sem-
per verita*

DICENDUM primò, numquam licèt directè vel interpretativè occidere innocentem, etsi gravi de causa quandoque liceat ponere talem actionem, ex qua per accidens permittitur evenire alterius occisio. Prior pars patet Exodi 23. ubi dicitur : *insontem & iustum non occides : quia aversor impium.*

*Casus ex-
cepti.*

Excipitur tamen occisio innocentis facta jussu divino, uti constat ex facto Abraham, cum Deus sit author vitæ & necis. Deinde per accidens potest quis permittre evenire occisionem innocentis, uti fit, si alium finem quis intendat, qui sine innocentis occisione merè per accidens se habente ad suam actionem haberi nequit uti potest quis in bello evertere turrim, in qua sunt innocentes, nisi aliter haberi posset finis belli. Sic etiam juxta plurimos licèt tyranno petenti innocentem sub exterminio reipublicæ, eum tradere & morti exponere, pro defensione boni communis : quo casu non censetur coöperari tyranni istius occisioni, sed solum se habebit respublica permissivè, non defendendo innocentem, quem cum tanto periculo & damno defendere non tenetur. Si verò tyrannus ille petat innocentem, ut occidat, idque sub extremo exterminio, volunt aliqui, quòd eo casu non liceat reipublicæ tradere innocentem in eum finem tyranno, eo quòd sic coöperaretur occisioni tyranni, & directè eam intenderet. Alii tamen docent, quòd eo casu liceat reipublicæ tyranno tradere innocentem, ut à bono publico malum illud avertat, eo quòd traditio illa sit res de se indifferens, & de cæterò respublica habeat causam gravissimam talem actionem ponendi, unde censetur habere se merè permissivè ad occisionem innocentis. Adde, quòd hoc casu ex charitate

&c

*An liceat
Tradere in-
nocentem
quem ty-
rannus
petit, sub
extreme-
ritate mibi*

& pietate teneretur innocens de se accedere tyrannum, & vitam suam pro bono communi periculo exponere.

Dicendum 2. Non licet matri gravidæ præbere *Abortum.* pharmacum, quo fœtus intereat, sive post, sive ante animationem illius. Ratio utriusque est, quod non liceat procurare seminis effusionem, per pollutionem, ergo nec abortum: hinc recte Tertullianus apologet. c. 3. ubi ait: *Nobis homicidio semel interdicto etiam conceptum utero, dum adhuc sanguis in hominem delibatur, dissolvere non licet. Homocidii festinatio est, prohiberi nasci. Nec refert quis natam eripiat animam, an nascentem disrumpet. Homo est, & qui est futurus, & fructus omnis jam in semine est.* Et S. August. Serm. 244. de temp. mulier, ait, *quacumque fecerit hoc, per quod jam non possit concipere, quantoscumque parere poterat, tantorum homicidiorum ream se esse cognoscat.* Unde jure merito censuravit facultas Theol. Lovan. hanc sequentem: *Quidam putant probabiliter, nondum animato fœtu licere abortum procurare ad vitandum scandalum, aut mortem.* Quam censuram confirmavit Innocentius XI. damnando hanc: *Licet procurare abortum ante animationem fœtus ne puella deprehensa gravida occidatur aut infametur.*

Dicendum 3. si verò mater ægrotet periculosè, *Abortus permissus non procuratus.* poterit dari pharmacum directè tendens ad sanitatem, licet prævideatur, quod probabiliter sequetur abortio, si fœtus nondum sit animatus. Tunc enim censetur abortus se hic habere merè per accidens, & minimè procuratus: cum mater jus habet ad sumptionem talis pharmaci, & habeat gravem satis causam, ad abortum, qui per accidens evenit, permittendum. Si verò sit fœtus animatus, nec sit ulla spes (quæ tamen sæpe adest, ut patet in cæsaribus, id est, qui matre mortua exsecantur) vitam edendi, poterit idem fieri, quod mox dictum est: si verò adsit talis spes, hoc minimè fieri potest; ratio hujus est, quod juxta ordinem charitatis, non li-

ceat vitam spiritualement pueri nascituri, postponere vitæ corporali matris.

*Quando
fœtus ani-
matur,*

Quandonam autem fœtus animetur, dissentiunt medici & Philosophi. Aliqui putant tertio aut secundo à conceptione die fœtum animari. Alii econtra docuerunt, non animari fœtum, nisi dum nascitur: alii communiter docent animari fœtum, masculinum quidem intra 30. dies: femininum vero 40. nec desunt, qui tantummodo intra duos menses animationem fieri sentiant, cum fœtus debeat primò organizari, antequam anima rationali informetur, quæ organizatio, tantum temporis probè requirit: Verum de his disputent medici. Hoc saltem jam nuper ab Ecclesia est condemnatum: *Videtur probabile omnem fœtum quamdiu in utero est, carere anima rationali, & tunc primum incipere eandem habere cum paritur, ac consequenter dicendum erit, in nullo homicidium committi.*

*Mater
gravida
etiamnum
viva se-
gari potest*

Dicendum 4. Licitum est matrem desperatæ vitæ, etiamnum vivam secare, si consentiat ne puer nondum natus, sine baptismo discedat. Ratio est, quòd si mors matris sequatur merè sit per accidens, imò teste Theophylo Raynaudo de ortu infantum c. 3. num. 6. & 7. hoc inter medicos est communissimum, quòd in dicto casu id liceat, & adfert plurima exempla, in qua secta mater puero extracto supervixit, imò hoc permittendum esse à matre ex charitate consequenter sustinet, quem authorem curiosi consulant.

SECTIO III.

De homicidio sui ipsius.

*Non licet
occidere
se ipsum.*

DICENDUM primò, non licet homini privatâ auctoritate seipsum occidere *nusquam enim ait S. August. contra donauistas, & l. 1. de civit. c. 20. Nobis divinitus preces*

præceptum permissumve reperiri potest, ut vel ipsius adipiscendæ immortalitatis, vel ullius carendi cavendique mali causâ, nobis ipsis necem inferamus, nam & prohibitos nos esse intelligendum est, ubi lex ait, non occides. dixi privatâ authoritate, quia permissione Divinâ id licet, cum Deus sit Dominus vitæ & necis. Sic à suicidio excusantur Sampson, Appollonia, &c. sequitur tamen ex dictâ S. Augustini sententia, quod nulla de causâ id liceat, puta ut malum sibi vel alteri imminens evitet. Nam ut ait P. Thom. hic: non debet in se committere crimen maximum, quod est sui ipsius occisio, ut vitet minus crimen alterius. Et rursus: nulli licet se ipsum occidere, ne consentiat in peccatum: quia non sunt faciendâ mala, ut eveniant bona, vel ut vitentur mala. Ex dictis patet, improbable esse, Lucretiam Romanam aliosque ethnicos non peccasse mortaliter se interficiendo, existimantes se opus laude dignum manibus suis moriendo præstare, peccavit itidem mortaliter ille, qui in S. Jobo c. 7. legens: elegit suspendium anima mea: se ipsum interemit.

*Occidens
res se ipsas
condem-
nandi.*

Dicendum 2. suicidium de se gravius est, quàm alterius occisio. Nam ut ait S. August. l. de patient. c. 13. Si paricida eò sceleratior est, quàm quilibet homicida, quia non tantum hominem, verum etiam propinquum necat, & in ipsis paricidis, quantum propinquiorem quisque peremerit, tantò judicatur immanior: sine dubio pejor est, qui se occidit: quia nemo est homini se ipso propinquior.

*Suicidium est
gravius,
homicidio*

Dicendum 3. licitum est homini iusta de causâ aliqua facere vel omittere, ex quibus mors probabiliter sequetur: sic licet vitam nostram exponamus periculo, si adsit gravis causa. Sic miles non deserit cum tanto periculo stationem, Pastor peste infectis Sacra administrat, damnatus ad mortem, scalas patibuli adscendit, gladio exponit cervicem &c. Non licet tamen sibi falsum crimen fatendo imponere, unde subit periculum mortis, idque ut fugiat tormenta torturæ: eo quod mendacium nullo casu sit licitum, nec sint faciendâ mala, ut eveniant bona.

*Occisio sua
ex causa
permissa.*

Dicen-

Mortificatio illius.

Dicendum 4. Non licet asperitatibus rigidioribus corporis cum vitæ diminutione carnem domare. Talis enim illis asperitatibus censetur moraliter se occidere. Idem est de illis, qui sibi tantum de potu aut cibo subtrahunt, ut reddantur impotentes ad opera sua debita peragenda. Licitum tamen est, & laudabile exemplo sanctorum, asperitatibus edomare carnis concupiscentias, etsi per accidens sequatur aliqualis vitæ diminutio, modo id non fiat ex tali intentione.

Damnatus ad mortem non potest se occidere

Dicendum 5. Non potest damnatus ad mortem seipsum interimere sumendo venenum, in ignem se conjiciendo, &c. Ponendo talem actum ex quo mors infallibiliter, aut vero similiter sequi prævidetur. Sic etiam non potest damnatus ut fame pereat, respuere cibum sibi clanculò oblatum, illum enim *non sumere, esset seipsum occidere*, ait D. Thomas 2. 2. q. 69. a. 6. a. ad 2.

SECTIO IV.

De mutilatione sui ipsius.

Quo casu licita sit mutilatio.

DICENDUM primò potest homo se mutilare, si mutilatio necessaria sit ad conservationem totius. Sic potest homo membrum putridum abscindere, ne membrum illud totum corpus inficiat & corrumpat. Ratio est, quòd pars sit propter totum, adeoque ratio naturalis dicat, ut pars propter conservationem totius possit abscindi.

Non debet qui admittit mutilationem cum gravi dolore.

Dicendum 2. non tamen tenetur homo talem mutilationem admittere cum magno cruciatu, & eventu satis probabili amittendæ vitæ; nec enim tenetur homo cum eventu non ita certo vitam suam conservare. Aliud esset, si foret persona publica, reipublicæ necessaria, &c. Cum bonum illius cedat in bonum communis.

Dicen-

Dicendum 3. etsi semen humanum se habeat ad instar membri humani, non tamen licet illud per pollutionem abscindere, etsi illâ possit vita conservari. Ratio illius est, quod membra sint propter bonum individui, semen autem propter bonum speciei, unde dicitur, quod Deus quidem dederit potestatem mutilandi se in dicto casu, non tamen semen abscindendi extra licitum usum ejusdem, puta extra matrimonium. Hinculterius notandum est, quod etsi sit periculum vitæ, si pollutionem quis omittat, tamen illam procurare non liceat, cum pollutio non sit medium ordinatum ad conservandam vitam, etsi sit ad illam necessaria: prout non liceret mentiri, adulterari, &c. si illa forent necessaria ad vitam conservandam. Unde laudatur ille, qui ut ait Poëta: *ne se pollueret, maluit ipse mori.*

Dicendum 4. Non licet ad Imperium tyranni, alias mortem minantis, sibi amputare aliquod membrum: rationem hujus dat D. Thom. 2. 2. q. 65. a. 1. quod extra casum corruptionis, de quo antea, non liceat se mutilare: nec ullubi intelligitur homini data talis potestas. Alii tamen satis probabiliter putant, quod in hoc casu id liceat, cum manus v. g. prout conjuncta est, huic mandato tyranni, censeatur noxia & æquivalens corruptæ, unde propter bonum totius amputari poterit ad mandatum tyranni.

Dicendum 5. non licet, ut sonoram vocem retineat, soleris medici manu, absque morali periculo mortis, se sinere castrari aut fieri enunchus. Ratio D. Thomæ est, quam dat 2. 2. q. 65. a. 1. ad 1. *Quod membrum non sit præscindendum propter corporalem salutem totius. nisi quando aliter toti subveniri non potest, atqui sine castratione corporali saluti provideri potest, ergo.*

Imo nec licita est castratio ad vincendas carnis tentationes in se permissa. Rationem hujus dat rursus D. Thomas loco citato, dum ait: *Saluti spirituali semper*

Semen non licet per pollutionem præscindere.

Mutilatio ad imperium tyranni facta.

Castratio illicita.

majoris perfectionis esset, si potius permitteret se interfici, quàm se defendendo occideret. Et hoc intellige, si est in bona dispositione animæ suæ. Nam alias fatuè faceret, exponendo se morti corporis & animæ.

Unde, si alibi S. Augustinus videatur docere contrarium, vel intelligi debet de consilio relinquendi se occidi, vel quòd difficulter moderamen inculpatæ tutelæ non excedat, qui invasus alium occidit: vel quòd irâ & vindictâ eo casu delinquere soleat. Sic dicit l. 1. de Libero Arbit. *impollutâ lege qui occidunt, ne ipsi occidantur, quomodo esse possint impolluti, non video.* Similia habet alibi.

Invadens involuntariè v. g. in ebrietate, &c.

Dicendum 3. si invadens non sit injustus invasor, v. g. in ebrietate, aut amentia, si constet, quòd peccatum mortale in ebrietatem aut amentiam inciderit, & probabiliter quis æstimet, quòd sit in statu gratiæ, teneretur invasus ex charitate sinere se interfici, cum plus sit ex charitate diligenda salus proximi spiritualis; quàm vita propria temporalis. Si verò hoc probabiliter judicare non possit, tum non posset invasus permittere se occidi, cum propria salus animæ, saluti alterius sit anteponenda. Unde juxta dicta, si non possit invasus aliter effugere, poterit invadentem occidere servato moderamine inculpatæ tutelæ.

Non licet occidere adulterum in adulterio deprehensum.

Dicendum 4. Non licet occidere adulterum, vel adulteram in adulterio deprehensam. Licitum quidem id aliquando fuit jure civili, tamen illi juri per S. Canones est derogatum. 33. q. 2. cap. *inter hæc*: *cujus ratio est, quòd sine ullâ necessitate manifestissimo periculo damnationis æternæ, exponitur ille, qui ita occiditur.* Ita tenet quoque S. August. l. 2. de adulterinis conjug. c. 15. unde merito Alexander VII. censuravit hanc sequentem: *Non peccat maritus occidens propriâ auctoritate uxorem in adulterio deprehensam.* Quam sub pœna excommunicationis vetuit practicari vel docere.

Dicendum 5. Licitum est occidere tyrannum: Pro quo

quo notandum est, quòd dupliciter possit quis dici tyrannus. Semel ille, qui sine jure aut titulo Regnum tyrannicè invadit: alio modo, qui quidem habet jus ad Regnum, sed illud tyrannicè regit. Si priori modo sit tyrannus, potest quilibet de republica eum occidere, cum sit injustus invasor innocentium: imo eo titulo potest eundem quilibet occidere. Debet tamen constare, quòd ne quidem probabile jus habeat ad Regnum, deinde ne graviora damna innocentibus de occisione tyranni timeantur. Si verò posteriori modo sit tyrannus, non licet eum tali titulo occidere, eo quòd sit verus princeps, etsi tyrannicè regat. Ita statuitur in Concilio Constant. sess. 15.

Qualem tyrannum liceat occidere.

Dicendum 6. Quæstio est an ille, qui paratus est alium occidere, possit ab eo occidi, v. g. maritus sub pulvinari posuit pugionem, ut de nocte maritam occidat, quæritur an illa possit prævenire maritum, eumque occidere. Ad quod respondeo, si moraliter certò constet, maritum ad id paratum, nec sit alia via evadendi, quòd titulo justæ defensionis vitæ possit eum prævenire & occidere. Ratio est, quòd talis eo casu censeatur esse injustus vitæ invasor. Si verò hoc non ita certò constet, verius videtur, quòd non possit eum occidere, tum quia fieri potest, quòd maritus mutabit animum: tum quòd alias, quilibet posset temerè de tali animo alterius parato præsumere, eumque occidere.

Occiso præveniens alterum volentem occidere.

Dicendum 7. non licet occidere alium pro defensione bonorum temporalium. Supponit eam sententiam Scriptura Sacra Exodi. 22. ubi dicitur, quòd fur diurnus occidi non possit, eo quòd dignosci poterat, quòd ad furandum, non item ad occidendum venerat, uti ad illum locum ait S. Augustinus, qui & l. 1. de Libero arbit. c. 5. ita ait: *Quomodo apud divinam providentiam liberi erunt, qui pro his rebus, quas contemni oportet, humana cæde polluti sunt?* Aliud esset, si fur se simul vel telo defendat, vel alio modo censeatur esse injustus vitæ invasor, quo

Defensio bonorum.

casu furem occidi posse, leges permittunt. Ex quibus patet, quomodo à fortiori vetitum sit, furem occidere illarum rerum, quas nondum habemus, sed ad quas spem tenemus: unde recte à S. Facultate Theol. Lov. proscripta est hæc: *Non solum licitum est, defendere (defensione occisvâ) quæ actu possidemus, sed etiam ad quæ jus habemus inchoatum, & quæ nos possessuros speramus. Quare licitum est, tam heredi, quam legatario contra injustè impediensem, ne vel hæreditas adeatur, vel legatum solvatur, se taliter defendere. Sicut & jus habentem in cathedram vel præbendam contra eorum possessionem injustè impediensem. Quam censuram suâ autoritate communivit Ecclesia. Et Synodus Namurcensis 1659. hanc censuravit & interdixit: Neque ad culpam, neque ad pœnam homicidii condemnandus est, occidens eum, qui injustè aggreditur usurparem, quæ est valoris unius aurei, vel minoris. Quam quoque Censuram approbavit Ecclesia in hac nupera condemnata: Regulariter occidere possum furem pro conservatione unius aurei. Hoc tamen hic notari potest, quòd nec D. Thomas, nec alii SS. Patres ex professo umquam instituerint hanc quæstionem, an liceret occidere alterum, pro defensione bonorum temporalium, tamquam pro certo supponentes, id esse illicitum.*

*Defensio
pudicitia.*

Dicendum 8. Non licet injustum stupratorem pro defensione pudicitia occidere. Ratio est, quòd pudicitia sit virtus in animo residens, quæ à nemine invito potest eripi. Hinc ait S. August. l. 1. de lib. arb. *de pudicitia quis dubitans erit, quin ea sit in ipso animo constituta, quandoquidem virtus est, unde à violento stupratore eripi nec ipsa potest qua propter legem quidem non reprehendo, quæ tales permittunt interfici, sed quo pacto istos defendam, qui interficiunt, non invenio. Nec dici potest, quòd ob periculum consentiendi eos liceat occidere, cum apertum crimen non possit pro incerto periculi eventu fieri, neque facienda sint mala ut eveniant bona: Nec denique tali opinione aperiatur via stupris & violatoribus pudicitia, cum leges civiles tales permittant*

mittant

mittant interfici, quod satis obstat talibus flagitiis.

Dicendum 9. Non licet alium occidere pro defen-
 sione honoris & famæ. Ratio hujus est, quod alias ^{Defensio}
 nimium perverteretur ordo amoris, si honor & fa- ^{honoru.}
 ma, quæ parvi æstimanda sunt, ob suam inconstan- ^{calumnia}
 tiam & inanem hominum applausum, antepone-
 rentur vitæ corporali & spirituali alterius. Deinde, vel
 ille justè invadit, vel injustè alterum, in famam ejus &
 honorem: si justè, ergo repelli non potest cum ejus
 occisione: si injustè, jam pro fama occidi non po-
 test, cum moraliter certò cum vita perdet & salutem.
 Adde, quòd ex contraria opinione maxima sequerentur
 absurda, dum quilibet pretextu defendendi hono-
 ris & famæ, licitum æstimaret alium temere occi-
 dere. Quomodò tamen ratio sit habenda boni no-
 minis, alibi est dictum.

Idem dicendum est de eo, qui alium falsò accusat
 in judicio, ex qua accusatione incurrit mortis pericu-
 lum, quam evadere non potest, nisi calumniatorem
 illum occidat: hunc enim illicitum esse occidere, fa-
 tis declarant hæc opiniones ab Alexandro 7. proscri-
 ptæ: *Licitum est Religioso vel Clerico calumniatorem gravia*
crimina de se vel de sua Religione spargere minantem occi-
dere, quando alius modus defendendi non suppetit, uti sup-
petere non videtur, si calumniator sit paratus vel ipsi Reli-
gioso, vel ejus Religioni, publicè & coram gravissimis
viris prædicta impingere, nisi occidatur.

Item hæc: *Licet interficere falsum accusatorem, fal-*
sos testes, ac etiam judicem, à quo iniqua certò imminet sen-
sentia, si alià vià non potest innocens damnum evitare.

Et hæc: *Vir aqvestris ad duellum provocatus, potest il-*
lud acceptare, ne invidiatis notam apud alios incurrat. Et
 hæc ab Innocentio XI. *Fas est viro honorato occidere in-*
vasorem, qui nititur calumniam inferre, si aliter hæc igno-
minia vitari nequit: idem quoque dicendum, si quis impin-
git alapam, vel fuste percussit, vel post impactam alapam
vel ictum fustis fugiat.

S E C T I O II.

*De occisione alterius innocentis.**Occiso di-
recta sem-
per venia*

DICENDUM primò, numquam licèt directè vel interpretativè occidere innocentem, etsi gravi de causa quandoque liceat ponere talem actionem, ex qua per accidens permittitur evenire alterius occisio. Prior pars patet Exodi 23. ubi dicitur : *insontem & iustum non occides : quia averfor impium.*

*Casus ex-
cepti.*

Excipitur tamen occisio innocentis facta jussu divi-
no, uti constat ex facto Abraham, cum Deus sit au-
thor vitæ & necis. Deinde per accidens potest quis
permittere evenire occisionem innocentis, uti fit, si
aliud finem quis intendat, qui sine innocentis occi-
sione merè per accidens se habente ad suam actionem
haberi nequit uti potest quis in bello evertere turrin,
in qua sunt innocentes, nisi aliter haberi posset finis
belli. Sic etiam juxta plurimos licèt tyranno petenti
innocentem sub exterminio reipublicæ, eum tradere
& morti exponere, pro defensione boni communis :
quo casu non censetur coöperari tyranni istius occi-
sioni, sed solum se habebit respublica permissivè, non
defendendo innocentem, quem cum tanto periculo &
damno defendere non tenetur. Si verò tyrannus ille
petat innocentem, ut occidat, idque sub extremo ex-
terminio, volunt aliqui, quòd eo casu non liceat rei-
publicæ tradere innocentem in eum finem tyranno,
eo quòd sic coöperaretur occisioni tyranni, & dire-
ctè eam intenderet. Alii tamen docent, quòd eo casu
liceat reipublicæ tyranno tradere innocentem, ut à
bono publico malum illud avertat, eo quòd traditio
illa sit res de se indifferens, & de cæterò respublica
habeat causam gravissimam talem actionem ponen-
di, unde censetur habere se merè permissivè ad occi-
sionem innocentis. Adde, quòd hoc casu ex charitate

&c

*An liceat
tradere in-
nocentem
quem ty-
rannus
petit, sub
extrema
ocisione mihi*

& pietate teneretur innocens de se accedere tyrannum, & vitam suam pro bono communi periculo exponere.

Dicendum 2. Non licet matri gravidæ præbere *Abortus.* pharmacum, quo fœtus intereat, sive post, sive ante animationem illius. Ratio utriusque est, quod non liceat procurare seminis effusionem, per pollutionem, ergo nec abortum: hinc recte Tertullianus apologet. c. 3. ubi ait: *Nobis homicidio semel interdicto etiam conceptum utero, dum adhuc sanguis in hominem delibatur, dissolvere non licet. Homocidii festinatio est, prohiberi nasci. Nec refert quis natam eripiat animam, an nascentem disturbet. Homo est, & qui est futurus, & fructus omnis jam in semine est.* Et S. August. Serm. 244. de temp. mulier, ait, *quæcumque fecerit hoc, per quod jam non possit concipere, quanto scumque parere poterat, tantorum homicidiorum ream se esse cognoscat.* Unde jure merito censuravit facultas Theol. Lovan. hanc sequentem: *Quidam putant probabiliter, nondum animato fœtu licere abortum procurare ad vitandum scandalum, aut mortem.* Quam censuram confirmavit Innocentius XI. damnando hanc: *Licet procurare abortum ante animationem fœtus ne puella deprehensa gravis occidatur aut infametur.*

Dicendum 3. si verò mater ægrotet periculosè, *Abortus permissus non procuratus.* poterit dari pharmacum directè tendens ad sanitatem, licet prævideatur, quod probabiliter sequetur abortio, si fœtus nondum sit animatus. Tunc enim censetur abortus se hic habere merè per accidens, & minimè procuratus: cum mater jus habet ad sumptionem talis pharmaci, & habeat gravem satis causam, ad abortum, qui per accidens evenit, permittendum. Si verò sit fœtus animatus, nec sit ulla spes (quæ tamen sæpe adest, ut patet in cæsaribus, id est, qui matre mortua exsecantur) vitam edendi, poterit idem fieri, quod mox dictum est: si verò adsit talis spes, hoc minimè fieri potest; ratio hujus est, quod juxta ordinem charitatis, non li-

ceat vitam spiritualem pueri nascituri, postponere vitæ corporali matris.

*Quando
fœtus ani-
matur,*

Quandonam autem fœtus animetur, dissentiunt medici & Philosophi. Aliqui putant tertio aut secundo à conceptione die fœtum animari. Alii e contra docuerunt, non animari fœtum, nisi dum nascitur: alii communiter docent animari fœtum, masculinum quidem intra 30. dies: femininum vero 40. nec desunt, qui tantummodo intra duos menses animationem fieri sentiant, cum fœtus debeat primò organizari, antequam anima rationali informetur, quæ organizatio, tantum temporis probè requirit. Verum de his disputent medici. Hoc saltem jam nuper ab Ecclesia est condemnatum: *Videtur probabile omnem fœtum quamdiu in utero est, carere anima rationali, & tunc primum incipere eandem habere cum paritur, ac consequenter dicendum erit, in nullo homicidium committi.*

*Mater
gravida
etiamnum
viva se-
curi potest*

Dicendum 4. Licitum est matrem desperatæ vitæ, etiamnum vivam secare, si consentiat ne puer nondum natus, sine baptismo discedat. Ratio est, quòd si mors matris sequatur merè sit per accidens, imò teste Theophylo Raynaudo de ortu infantum c. 3. num. 6. & 7. hoc inter medicos est communissimum, quòd in dicto casu id liceat, & adfert plurima exempla, in qua secunda mater puero extracto supervixit, imò hoc permittendum esse à matre ex charitate consequenter sustinet, quem auctorem curiosi consulant.

SECTIO III.

De homicidio sui ipsius.

*Non licet
occidere
se ipsum.*

DICENDUM primò, non licet homini privatâ auctoritate seipsum occidere *nusquam enim ait S. August.* contra donauistas, & l. l. de civit. c. 20. *Nobis divinitus preces*

præceptum permissumve reperiri potest, ut vel ipsius adipiscendæ immortalitatis, vel ullius carendi cavendique mali causâ, nobis ipsis necem inferamus, nam & prohibitos nos esse intelligendum est, ubi lex ait, non occides. dixi privatâ authoritate, quia permissione Divinâ id licet, cum Deus sit Dominus vitæ & necis. Sic à suicidio excusantur Sampson, Appollonia, &c. sequitur tamen ex dictâ S. Augustini sententia, quòd nulla de causâ id liceat, puta ut malum sibi vel alteri imminens evitet. Nam ut ait D. Thom. hic: non debet in se committere crimen maximum, quod est sui ipsius occisio, ut vitet minus crimen alterius. Et rursùm: nulli licet se ipsum occidere, ne consentiat in peccatum: quia non sunt faciendâ mala, ut eveniant bona, vel ut vitentur mala. Ex dictis patet, improbabile esse, Lucretiam Romanam aliosque ethnicos non peccasse mortaliter se interficiendo, existimantes se opus laude dignum manibus suis moriendo præstare, peccavit itidem mortaliter ille, qui in S. Jobo c. 7. legens: elegit suspendium anima mea: se ipsum interemit.

*Occident
tes se ipsos
condem-
nandi.*

Dicendum 2. suicidium de se gravius est, quàm alterius occisio. Nam ut ait S. August. l. de patient. c. 13. *Si paricida èd sceleratior est, quàm quilibet homicida, quia non tantum hominem, verum etiam propinquum necat, & in ipsis paricidis, quantò propinquiorem quisque peremerit, tantò judicatur immanior: sine dubio peior est, qui se occidit: quia nemo est homini se ipso propinquior.*

*Suicidium est
gravius,
homicidio*

Dicendum 3. licitum est homini iusta de causâ aliqua facere vel omittere, ex quibus mors probabiliter sequetur: sic licet vitam nostram exponimus periculo, si adsit gravis causa. Sic miles non deserit cum tanto periculo stationem, Pastor peste infectis Sacra administrat, damnatus ad mortem, scalas patibuli adscendit, gladio exponit cervicem &c. Non licet tamen sibi falsum crimen fatendo imponere, unde subit periculum mortis, idque ut fugiat tormenta torturæ: eo quòd mendacium nullo casu sit licitum, nec sint faciendâ mala, ut eveniant bona.

*Occiso fuit
ex causa
permissa.*

Dicen-

Dicendum 3. etsi semen humanum se habeat ad instar membri humani, non tamen licet illud per pollutionem abscindere, etsi illâ possit vita conservari. Ratio illius est, quod membra sint propter bonum individui, semen autem propter bonum speciei, unde dicitur, quod Deus quidem dederit potestatem mutilandi se in dicto casu, non tamen semen abscindendi extra licitum usum ejusdem, puta extra matrimonium. Hinculterius notandum est, quod etsi sit periculum vitæ, si pollutionem quis omittat, tamen illam procurare non liceat, cum pollutio non sit medium ordinatum ad conservandam vitam, etsi sit ad illam necessaria: prout non liceret mentiri, adulterari, &c. si illa forent necessaria ad vitam conservandam. Unde laudatur ille, qui ut ait Poëta: *ne se pollueret, maluit ipse mori.*

Dicendum 4. Non licet ad Imperium tyranni, alias mortem minantis, sibi amputare aliquod membrum: rationem hujus dat D. Thom. 2. 2. q. 65. a. 1. quod extra casum corruptionis, de quo antea, non liceat se mutilare: nec ullubi intelligitur homini data talis potestas. Alii tamen satis probabiliter putant, quod in hoc casu id liceat, cum manus v. g. prout conjuncta est, huic mandato tyranni, censeatur noxia & æquivalens corruptæ, unde propter bonum totius amputari poterit ad mandatum tyranni.

Dicendum 5. non licet, ut sonoram vocem retineat, soteris medici manu, absque morali periculo mortis, se sinere castrari aut fieri enunchus. Ratio D. Thomæ est, quam dat 2. 2. q. 65. a. 1. ad 3. *Quod membrum non sit præscindendum propter corporalem salutem totius. nisi quando aliter toti subveniri non potest,* atqui sine castratione corporali saluti provideri potest, ergo.

Imo nec licita est castratio ad vincendas carnis tentationes in se permessa. Rationem hujus dat rursus D. Thomas loco citato, dum ait: *Saluti spirituali semper*

Semen non licet per pollutionem præscindere.

Mutilatio ad imperium tyranni facta.

Castratio illicita.

semper potest aliter subveniri, quàm per membri præcissionem, quia peccatum subjacet voluntati: & ideo in nullo casu licet membrum præscindere, propter quodcumque peccatum vitandum. Ratio hujus est, quòd castratio non sit medium ordinatum ad vincendas carnis tentationes, sed cum sapiente c. 8. ad eundem hic Dominus & exorandus; adhibenda jejunia mortificationis actus &c. adde, quòd castratione teste S. Chrysostomus hom. 63. in Matth. Cupiditatis aestus non mitigentur, sed graviores inflammatioresque reddantur. Idem docet S. Basiliius l. de vera virginit. S. August. l. 6. cont. Julianum c. 14. & ipsa Scriptura Sacra Eccles. 20. ubi dicitur: Concupiscentia spadonum devirginabit juvenulam.

*Castratio
libidinem
inflammat.*

SECTIO V.

De restitutione facienda per homicidium vel mutilationem.

Debet aliquis pro vita restitui.

DICENDUM primò, Verius videtur, quòd aliquid restitui debeat pro vita & mutilatione occisi aut mutilati. Declarat illud D. Thomas loco citato a. 2. ad 1. ubi ait: *Quando id, quod ablatum est, non est restituibile per aliquod æquale, debes fieri recompensatio, qualis possibilis est: puta cum aliquis alicui absulit membrum, debet ei recompensare vel in pecunia, vel in aliquo honore, considerata conditione utriusque persone, secundum arbitrium boni viri.* Ratio hujus est, quòd alter fuerit injusta causa occisionis aut mutilationis alterius, ergo ex justitia tenetur inæqualitatem factam reducere ad æqualitatem, quoad fieri potest.

Debet uterque cessare de lucro & damno occisi.

Dicendum 2. Tenetur homicida aut mutilator de damno aut lucro cessante occiso vel mutilato, prout vero similis spes est lucrum conquirendi, cum sit mutilator aut occisor, injusta causa damni aut lucri cessantis. Tenetur itidem ille, ad persolvendas expensas medicas factas ratione mutilationis, aut occisionis,

nitionis, non itidem exequiarum, quæ equidem fieri debuissent serius aut citius.

Dicendum 3. si homicida moriatur, tenentur hæredes illius pro ipso restituere: quod intelligendum est in foro conscientiæ, cum in foro externo leges negent actionem contra hæredes homicidæ. Hæredes enim, sicut succedunt, in bona defuncti, ita succedunt & in obligationes ejusdem. Imo verius apparet, quòd etsi homicida à Magistratu morte plectatur, tamen teneantur hæredes ad damna dicta resarcienda, eo quòd morte illa sit solum satisfactum justitiæ publicæ, non tamen privatæ: etsi tali morte, tamquam pœna talionis censeantur hæredes defuncti esse contenti, nec exigere ulteriorem satisfactionem.

Dicendum 4. Qui injustè ab alio invasus, invasorem sese defendendo occidit, servans moderamen inculpatæ tutelæ, non tenetur aliquid restituere pro vita occisi: ratio est, quòd illud, eo casu licitum sit, ut antea probavimus, nec sit contra justitiam, quæ restitutionem exigit.

Dicendum 5. tenetur homicida animæ occisi restituere illa damna spiritualia, quæ in vita potuisset præcavere, aut lucra spiritualia, quæ potuisset obtinere. Hinc tenentur confessarii homicidas admonere, ut pro anima defuncti curent missas celebrari, pro viribus suarum facultatum, imo id pro pœnitentia salutaris illis injungere, uti etiam, quòd pro occisi anima elcemosynas elargiantur, jejunent &c. variorum autem in primitiva Ecclesia fuerunt pœnæ homicidis impositæ: 1. quòd 40. diebus in pane & aqua jejunare deberent. 2. quòd 7. annis deberent agere pœnitentiam: 3. quòd primo anno deberent absolute carere piscibus & vino: secundo vero & tertio anno idem facere debebant, excepto, quòd feriis 3. & Sabbatho illam carentiam possent elcemosynis compensare. Quatuor annis sequentibus, debebant per 40. dies jejunare variis temporibus, ut

ante

*Hæredes
tenentur
ad restitu-
tionem
mortui
occisore.*

*Se justè
defendens
non tene-
tur ali-
quid re-
stituere.*

*Quid oc-
cisore de-
beat ani-
ma occisi.*

ante Pascha , ante Festum S. Joannis Baptistæ , &c.

*Quibus
debeat fie-
re restitu-
tio.*

Dicendum 6. Tenetur homicida ad restitutionem faciendam parentibus , uxori ac liberis occisi. Obligatio hæc non oritur ex jure , quod personæ illæ habent in bona defuncti , sed oritur ex arctissima connexionne illorum cum defuncto , & quatenus ipsis jus compete-
bat , ab ipso petendi alimenta , & alia ad debitam sustentationem necessaria. Unde contrarium dicen-
dum est , si personæ illæ ex morte occisi nullum sen-
tiant incommodum , si ipsis occisus alimenta & alia suppeditare non soleret , &c.

*An credi-
toribus oc-
cisi tenea-
tur homi-
cida.*

Dicendum 7. Verius videtur ; quòd homicida non teneatur ad satisfactionem faciendam creditoribus de-
functi. Creditor enim non habet jus in debitorem , nisi quatenus habet jus in bona debitoris , quæ actu habet , vel vero similiter erat habiturus : cum ergo illa bona homicida dederit hæredibus defuncti , quibus ea de-
bet , poterit creditor ab hæredibus debita exigere , in quos obligatio defuncti transiit.

*An om-
nibus qui
ex morte
occisi sen-
tiunt de-
trimen-
tum.*

Dicendum ultimò , quòd verius quoque videtur , quòd non teneatur homicida omnibus , qui ex morte occisi sentiunt incommodum , nisi intenderit homi-
cida , morte illa illis nocere. Ratio est , quòd occisor non faciat illis nece alterius injuriam , sed solum trans-
fert obligationem benefaciendi (si quæ sit) ab occi-
so ad hæredes , non autem omnino eam aufert. Dixi ,
nisi intenderit , &c. Quia , uti probatum est , potest actio ex intentione nocendi fieri injusta , quæ seclusâ tali intentione injusta non fuisset.

SECTIONO VI.

De restitutione facienda per stuprum & adulterium.

*Restitutio
facienda
Supratori
Virginis.*

DICENDUM primò , qui Virginem violavit , quæ in sui violationem liberè consentit , ad nihil tene-
tur. Rationem illius assignant aliqui , quòd scienti &
volenti

Volenti non fiat injuria : Verum, uti antea notavimus, generaliter hoc axioma non tenet, ut in casu, quo quis juri suo cedere non potest: sic marito fit vera injuria, etsi in adulterium uxoris consentiat, eo quòd juri suo cedere non possit: sic etiam virgo, cum non possit cedere juri suo, quod habet ad custodiendum Virginalè claustrum, censetur tamen pati injuriam, etsi in hoc consentiat, quòd violetur; unde ratio dictæ conclusionis est hæc, quòd virgo dum scit, & consentit in sui deflorationem, censeatur compensationem damnorum remittere, adeoque cedere juri suo, quod haberet, si foret invita, ad resarcienda damna per stuprum illata. Hoc tamen notandum est, si ex tali virginis defloratione liberè permissa irrogetur injuria familiæ talis virginis; puta infamia, &c. quòd tam stuprata, quam stuprator teneatur ad reparationem honoris, talis familiæ ex justitia, cum fuerint injusta causa infamiæ.

Dicendum 2. qui per vim vel fraudem defloravit virginem, tenetur ad compensationem damnorum per deflorationem obvenientium, ut puta illam ducendo in uxorem, eam sufficienter dotando &c. si verò eam putarit esse virginem, & postea deprehendat eam esse corruptam, ad nihil tenetur stuprator ratione deflorationis, nisi ex illa fornicatione damna in bonis fortunæ consequantur, vel copula fiat publica, quo casu tenebitur ad reparationem famæ, modo ad id ordinato.

Dicendum 3. qui sub promissione matrimonii à virgine obtinuit usuram corporis, tenetur eam ducere, etsi fictè & dolosè, illud promississet. Ratio hujus est, quòd promissio hæc sit facta per modum contractus, *do ut des*: cum ergo illa ex sua parte compleverit contractum, tenetur & alter ex sua parte illum complere. Excipiunt tamen casum, quo ex Matrimonio illo orientur gravia damna, si sit conjugatus aut voto solenni obstrictus; si postea oriatur impedimentum dirimens &c.

Alii

Vi & fraude stuprans virginem.

Stuprata sub spe matrimonii.

Alii tamen opponunt, quòd talis non teneatur stare promissis, eo quòd promissio talis non solum sit illicita, sed & invalida, eo quòd generaliter dicat Lex generaliter, ff. de Verb. obligat. *generaliter novimus turpes stipulationes, nullius esse momenti.* Verum opinio contraria, ut communior est, ita & in praxi erit observanda.

*Si sit post
emissum
votum Re-
ligionis.*

Dicendum 4. quòd, qui virginem defloravit sub spe Matrimonii, post emissum votum religionis, vel virgo fuit talis voti conscia, vel non: si prius, tenet obligatio voti, ob malam fidem. Si posterius, censent aliqui obligationem voti non tenere, eo quòd adimpletio voti, sit jam facta impossibilis, quatenus absque alterius injuria adimpleri non potest. Deinde, quòd votum non obliget, cum notabili damno proximi in materia justitiæ. Alii tamen docent, quòd obligatio voti teneat, cum possit facere utrumque intrando prius religionem, & postea eam ducendo. Prior tamen opinio communior est, & in praxi sequenda.

*Si post vo-
tum casti-
tatis*

Si verò sit dicta quæstio de voto castitatis, teneatur & defloratam ducere, & votum illud observare, quantum compatibile foret cum debito conjugali, reddendo debitum, sed non petendo.

*Si ante
emissionē
voti tale
fiat su-
pprim cum
promissio-
ne matri-
monii.*

Si verò post eam deflorationem emittat votum religionis vel castitatis, non tenet obligatio voti, nec illud à Deo acceptatur, uti semper quando votetur aliquid, quod cedit in alterius præjudicium. Si verò non sit amplius timor præjudicii, v. g. si puella moriatur, tenetur ingredi Religionem aut servare castitatem, cum votum illud teneat ex parte voventis quando sine alterius præjudicio servari potest: Tempore autem quo timetur præjudicium, non censetur à Deo acceptari, sed pro eo tempore solum sopiri.

Dicendum 5. stuprator non semper satisfacit virginem ducendo in matrimonium; posset enim contingere, quòd virgo sit nobilis, stuprator plebejus, quo

quo casu non tam iniuria per stuprum illata, compensaretur, quam nova superveniret.

Dicendum 6. Tenetur adulter marito adulteræ, uti & filiis legitimis de damnis, quæ ex suppositione spurii illis consequuntur. Ratio est, quòd illorum damnorum sit iniusta causa. Si verò nulla ex adulterio sit secuta proles, non tenetur aliquid restituere adulter marito adulteræ, cum nullum sit secutum damnum, & pro iniuria ab omni damno separata, non debeat fieri restitutio, sed solum quædam satisfactio. Si autem dubitet, an proles ex adulterio sit nata, an non, verius docetur, quòd equidem teneatur restituere, cum in dubio sit potius favendum innocenti, & cum constet adulterium esse commissum, præsumptio solet esse contra nocentem. Si verò duo aliqui adulterium commiserint, & dubitant ambo, an ex suo concubitu proles sit nata, tenetur uterque pro ratione dubii ad partem damni prolibus legitimis illati ex suppositione prolis spurie.

Adulter quibus tenetur.

Quid agat in dubio de adulterio & partu.

Dicendum 7. Tenetur adultera etiam restituere damna veris hæredibus per suppositionem spurii illata. Ratio est, quòd illorum damnorum veram causam posuerit. Unde vel bonis suis paraphernis (si quæ habet) tenetur de iisdem compensare damna veris prolibus illata, vel debet sedulo allaborare, ut veris prolibus magis providendo, damna illa compenset, sibi aliqua subtrahendo & illis elargiendo, &c.

Si verò adultera non possit eo modo damna illa refarcire, non debet communiter crimen suum adulterii marito & veris prolibus aperire: neque tenetur spurius matri suæ adulterium suum attestanti credere. Ratio prioris est, quòd confessio illa soleat esse maxime difficilis, valde noxia, & parum utilis: solet enim tali confessione timeri gravis femine infamia, mariti in illam excandescencia, imò & periculum mortis. Quòd verò soleat esse parum utilis, patet ex eo, quòd non teneantur alii matri adulterium suum proferenti credere, quia juxta regulam juris, *Alleganti suam turpitudinem nulla debetur fides.*

quibus adultera tenetur.

Proles adulterinae exposita.

Dicendum 8. Si proles ex adulterio nata sit exposita, & in Hospitali expositorum sit nutrita, tenetur tam adulter, quàm adultera de damnis & alimentat[i]one talis pueri, tali Hospitali refundenda. Ratio est, quòd talis domus hospitalis sit solùm instituta ad alendos pueros pauperes, qualis non est puer expositus, cujus Mater & Pater sufficientia media possident ad puerum alendum. Imò non desunt, qui doceant, quòd teneatur Pater & Mater talis prolis sese insinuare esse parentem tali proli, cùm sit grave hominis incommodum nescire parentes suos, & consanguineos: alii tamen hoc negant esse necessarium, si timeatur ex tali insinuatione gravis infamia, aut aliud grave incommodum.

*Quo tem-
pore ma-
ter debeat
alere in-
fantem.*

Notandum verò circa prædicta, quòd adulter solum teneatur de damnis ex alimentatione spurii illatis marito & legitimis prolibus, quæ sequuntur à tertio natiuitatis anno talis spurii, cùm Mater teneatur alere Filium usque ad tertium annum, uti habet *L. nec Filium*, C. de Patria potestate.

CAPUT QUARTUM.

De Furto & Rapina, & coöperantibus ad illa.

SECTIO PRIMA.

Quid sit furtum, quid rapina, & quale peccatum.

Quid fur.
Iam.



DICENDUM primò, *furtum* est alienæ rei occulta ablatio invito rationabiliter Domino. Differt à rapina, & quidem specie, quæ est violenta talis rei ablatio, cum violentia furto adjuncta contineat specialem injuriam, unde violent-

violentia illa in confessione furti, necessariò est adjungenda.

Dicendum 2. furtum, uti & rapina de se sunt peccatum mortale. Patet ex 1. Corinth. 6. ubi dicitur, *Quale peccatum, quòd neque fures, neque Rapaces Regnum Dei possidebunt.* Possunt tamen dicta peccata esse venialia, vel propter materiæ parvitates, vel propter defectum advertentiæ, quod & plerisque peccatis commune est.

Dicendum 3. Quantitas rei ablata, quæ sufficiat ad constituendum mortale peccatum, non ita præcisè potest definiri. Alii allegant integrum argenteum, alii medium, alii duos regales, alii duos aureos seu ducatos, alii unum aureum, &c. Melius alii docent, quòd quantitas illa sit prudenti judicio disjudicanda, non solum attentâ quantitate & valore rei ablata, verum etiam attentâ qualitate personæ, cui res ablata est, gravitate damni, quod secutum est; unde aliquando committi potest furtum mortale auferendo rem minimi valoris, v. g. acum, qua futor victum & amictum comparare possit, & desit occasio aliam emendi. Communiter tamen in nostris partibus censetur esse quantitas notabilis, quæ correspondet labori diurno operarii, quam assignant passim florenum aut quatuor solidos.

Dicendum 4. In Filiis Familias, & aliis Domesticis requiritur communiter ad furtum mortale major quantitas, quam prædicta, eò quòd Dominus quoad illorum furta, non soleat esse adeo invitatus, sicut ad furta exterorum. Quænam autem hæc quantitas sufficiat, prudentis judicio est determinandum.

Dicendum 5. qui multis minutis furtis acquirere vult rem notabilem, peccat mortaliter, eò quòd furta illa procedant à voluntate mortaliter mala. Idem est de illo, qui advertens se minutis furtis pervenisse ad quantitatem notabilem, adhuc vult modicum auferre. Licet enim illud modicum auferre, sit secundum se leve & veniale tantum, tamen prout aliis minutis furtis conjunctum est, constituit mortale

tale peccatum, ratione quantitatis notabilis, quam constituit; Deinde quatenus vult retinere rem notabilem, invito rationabiliter domino, imò quatenus accipiendo ultimum furtum aliis adjunctum, graviter proximum suum lædit. Et quamvis verum sit, quod docet alibi D. Thomas, quod peccata venialia, quantumcumque coagmentata, non possint constituere peccatum mortale, tamen illud prædictæ doctrinæ nihil obest, tum quòd intelligi possit S. Thomas, vel de peccatis venialibus omnino disparatis, neque in materia vel effectu connexis, vel quòd solùm illo ultimo furto peccetur mortaliter. Et licet ultimum illud furtum sit ejusdem rationis cum præcedentibus, in ratione objecti, tamen valde diversum est, ex circumstantiis & ratione connexionis cum aliis anterioribus. Hoc interim ab Ecclesia damnatum est: *Non tenetur quis sub pena peccati mortalis restituere quod ablatum est per pauca furtiva quantumcumque sit magna summa totalis.*

*Plures mi-
nuta su-
vantes,*

Dicendum 6. Si plures communi consilio, consensu, auxilio, exemplo, aut coöperatione furati sint aliquid modicum, tamen omnes rem gravem, peccat quilibet mortaliter, & tenetur quilibet in defectu aliorum ad restitutionem insolidum. Ratio hujus est, quod quivis sit causa injusta damni illati totius, consulendo, consentiendo, aut in alio modo coöperando. Aliud esset, si quis cum aliis furaretur rem modicam, nullo modo aliorum furtis coöperando, etsi aliorum furta sciret, cum nec suo furto secundum se, nec ut aliis conjuncto, sit causa damni notabilis, adeoque nec graviter delinquat.

S E C T I O II.

*An liceat rem sibi debitam occultè surripere,
sive an licita sit occulta compensatio.*

DICENDUM primò, non licet rem suam, quæ *Occulta*
apud alium exat titulo locationis aut similis *acceptio*
contractûs, occultè sibi surripere, eò quòd ini-
quum sit aliquem usu rei, ante præfixum tempus
privare. Licitum tamen quandoque est, sibi occul-
tè surripere rem suam modò certæ adsint conditio-
nes. Quarum

1. Est, ut tali occultâ compensatione vitetur dam- *Compen-*
num temporale, & spirituale alterius. *Temporale,*
ne ob ignorantiam talis compensationis creditor il- *falso oc-*
lud solvat iteratò, aut ejus hæredes. *culata qua-*
licita *Spirituale,* ne
existimans alter se non solvisse, in mala fide perfe-
veret.

2. Ne res illa sit alteri data in depositum, ut pa-
tet ex cap. *Bona fides*, de deposito.

3. Ne illud, quod recipitur sit alienum, sed vel
creditoris, vel debitoris.

4. Ut debitum nequeat alia via recuperari, vel
certè non nisi magnis sumptibus.

5. Ut debitum sit certum, cum iniquum sit pro
incertis debitis certam solutionem exigere.

6. Ne in compensatione illâ, adhibeatur vis aut
violencia, nisi forte foret necessaria.

7. Ne ex illa compensatione grave damnum aut
scandalum consequatur.

Ex quibus omnibus patet, regulariter illicitam ef-
se compensationem occultam, eò quòd plerumque
aliqua ex requisitis conditionibus desit. Unde gene-
raliter famulis & aliis erit interdicens, ne furtis
aperiatur via, & injustitiæ.

Dicendum 2. non licet famulis & ancillis de bonis

*Occulta
compensatio
falso famu-
lulorum*

dominorum sibi occultè compensare, super salariū de quo est conventum, etsi judicent stipendia sua esse nimis parva. Ratio est, quòd non habeant jus nisi ad stipendium conventum. Unde meritò antè hanc censuravit S. Facultas Theol. Lovan. & Parisiensis: *Famuli & famulae domesticae possunt occultè heris surripere, ad compensandam suam operam, quam majorem judicant salario, quod recipiunt.*

His accedit, quod nuper Innocentius XI. eandem propositionem proscripserit ut ad minus scandalosam, & in praxi perniciosam. Nam ut ait Sinnichius in suo Saule l. 1. c. 116. par. 442. *Neminem inter laxarum opinionum assertores, aut sectatores reperiri arbitror, qui famulo abs se conducto dicturus sit: si salariū super quo convenimus, videatur tibi minus justo, supple illud ex bonis meis usque ad aequalitatem, proprio tuo judicio taxandam. Cum igitur nullus eorum hoc dicat famulo suo, cur tam prodigi sunt in alieno? Cur non respiciunt regulam istam, quam omnes habent in corde fixam, quod tibi non vis fieri alteri ne feceris? Hucusque Sinnichius.*

Optimum ergo consilium erit, volenti uti occulta compensatione, dum antedictæ conditiones requisitæ adsunt, ut suam conscientiam interroget, num sibi in simili occasione vellet fieri ab alio compensatio occulta, an non: alias, quod tibi non vis fieri, alteri ne feceris

SECTIO III.

De Coöperantibus ad furtum aut aliam injustitiam.

*Coöperandi
modi.*

DICENDUM primò, 9. modis coöperari aliquem ad furtum, qui comprehenduntur his duobus versibus:

Jussio, consilium, consensus, palpo, recursus:

Participans, mutus, non obstant, non manifestans.

Sex primi sunt modi positivi coöperandi, tres reliqui sunt negativi. Omnis tamen qui dictis modis ad peccatum

catum coöperatur, ejus peccati reus est, cum sit *Cooperans* ejusdem causa moralis, jubendo, consulendo, &c. *ad peccatum, rem est peccati,* neque hic excusat, quòd equidem alii fuissent coöperati, eò quòd aliorum malitia, propriam non excuset, & eo non obstante sint equidem vera causa peccati.

Dicendum 2. Quòd alterius jussio, consilium, & *Debet coöperans verè movere alium ad peccatum.* alii coöperandi modi, debeant verè movere alterum ad peccatum: unde si alter nullo modo moveatur, dum peccat, alterius mandato, consilio, &c. *solus alium ad peccatum.* ille, erit reus peccati.

Jubens intelligitur omnis ille, qui suo mandato verè *jussio,* alium movet ad peccandum, uti & omnis ille, qui importunis precibus alterum ad peccatum propellit, illud rogat fieri, aut hortatur ad idem faciendum: item ille, qui latà culpā, aut dolo & fraude alicui restitutionem debitam dissuadet. Ut autem mandans ad restitutionem quoque obligetur, debet damnum, quod mandavit fuisse, secutum, aliàs si non sit secutum, excusabitur à restitutione: idem fit, si satis tempestivè mandatum suum revocaverit, uti etiam non tenebitur illorum damnorum restitutione, quæ mandatarius intulit, excedendo limites mandati, v. g. si quis jubeat alterum occidere, & mandatarius alium occidit comburendo ejus domum, non tenebitur ad restitutionem damnorum ex combustionem præter homicidium obvenientium.

Mandato sive jussioni solet aliquando æquivalere *ratihabitio*: quo casu, ratum habens damnum aliquod, *ratio,* ratione cujus alter ad illud inferendum motus fuit, verè concurret ad illud damnum, teneturque ad restitutionem. Si verò mandato non æquivalet, nec alter per eam ad damnum inferendum moveatur, non tenebitur damnum illud refarcire, cum non fuerit causa efficiens damni, sed solum damnum factum ratum habet, & aliquando ad summum est solum causa finalis, cujus gratia damnum illud infertur.

Consilium præbere dicitur, qui suo consilio & per- *Consilium,* suasio.

suasione est alteri causa peccati. Tenetur hîc ad damnum quod consulit restituendum, si consilium suum tempestivè non revocaverit, & quotiescumque alter suo consilio verè ad peccatum injustæ damnificationis inducitur. Quo casu autem teneatur quis ad restitutionem, qui suo consilio est causa damni, alibi hoc tractatu est ostensum.

Consensus. *Consensus* dicitur, quando quis peccato consentit, cum non tantum qui malè agit, reus sit peccati, sed & qui malè agentibus consensit. Consensus ille facit consentientem obnoxium restitutioni, si verè fuerit causa damni ab aliis illati, aliàs minime, si solum internè opus damnosum approbet aut in illud consentiat; vel èt si externè id fiat, tamen id alterum latet, neque consensu illo ullatenus movetur ad damnificandum.

Palpo. *Palpo* dicitur omnis ille, qui ementitis laudibus, sive adulationibus alium ad peccatum inducit: uti etiam ille, qui exprobrando alterius ignaviam, est causa alterius peccati, v. g. dicendo se non foreobilem, magnanimum, uti apparet, nisi alium occidat, &c. Qui ita palpando alterum verè movet ad damnum inferendum, tenetur quoque ad restitutionem, sicuti consulens, cui æquivalere censetur.

Rekursus. *Rekursus* intelligitur omnis ille, qui furem vel alium peccatorem recipit, sicut illa receptio alium ad peccatum moveat, quâ fit, ut aliter audaciùs aut liberius peccet. Hinc peccant omnes illi, qui prædas servant, illas divendunt, emunt, fures ad hospitium intertinent, illis securitatem spondent, illis instrumenta furandi administrant, principes & Domini familias ob quorum potentes vires, filii familias & alii domestici peccant; cauponarii, qui juvenes intertinent infumentes bona parentum furto ablata, de quibus ita S. Augustinus Epist. 54. *Illud verò fidentissime dixerim, eum qui pro alio ad hoc intervenit, ne malè ablata restituat, & qui ad se confugientem, quantum honestè potest, non repperit; socium esse fraudis & criminis.* Aliud est de eo, qui

qui solùm materialiter furem recipit : unde hîc excusantur , qui furem fugientem Justitiâ ; recipiunt , occultant aut abscondunt , ne apprehendatur : qui furem ut alios hospites ad hospitium recipiunt , cùm non receperint fures ut tales.

Participans censetur omnis ille , qui in alieno peccato est particeps. *Participans.* In furto autem potest quis esse participans ratione rei acceptæ , quæ ad se devenit : & ratione injustæ receptionis , ad quam concurrat. Teneatur autem ille rem ablatam restituere , in tantum , ut si bona fide sit penes aliquem res furtiva , solùm teneatur ad restitutionem ratione rei acceptæ ; Si verò mala fide , etiam ad hoc teneatur ratione injustæ receptionis : Deinde , si res bona fide possessa pereat , tantùm restitui debeat illud , quo factus est ditior : si verò mala fide , teneatur eam restituere in æquivalenti. In furto autem participant , qui suo modo ad illud concurrunt , schalas admovendo , tenendo , excubias tenendo , ne prodantur , qui res alterius ex fenestra dejiciunt , &c. Qui omnes ad restitutionem sunt obligati.

Mutus est omnis ille , qui cùm scit peccatum , non contradicit , dum potest & debet dissuadendo , prohibendo , &c. contradicere. *Mutus.*

Non obstans est omnis ille , qui non præbet auxilium , quod potest & debet præbere , ne actio peccaminosa fiat.

Non manifestans est omnis ille , qui dum potest & debet , furem aut alium malefactorem non prodit , vel ante factum ne id fiat , vel post factum , ut injuriam recompenset , &c.

Omnes illi , qui uno ex dictis modis negativè concurrunt ad peccatum , tenetur ex justitiâ ob stare loquendo vel manifestando , quando ex officio vel contractu ad hoc sunt obligati , nec habeant justam causam non impediendi. Aliàs si non teneantur ad hoc ex officio aut contractu , vel habeant aliunde justam causam non impediendi , non obligantur ad hoc

*Ob stare debent ex officio ad hoc contra-
stribu.*

hoc ex justitia , sed vel ad summum ex charitate. Hinc Princeps, Magistratus, Prætor, &c. tenentur ex justitia damna publica impedire, cum pro eo stipendia recipiant à communitate, ut eam bene gubernent, bene protegant & defendant, & ii vicissim se obligent ad idem præstandum. Deinde, ex justitia tenentur omnes illi, qui non impediunt peccata, ad quæ impedienda sunt conducti, vel ad hoc ex officio sunt constituti, ut Patres familias, ad impedienda damna familiæ, tutores ad impedienda damna pupillorum, &c.

*Ordo restitutionis
cooperantis
suum.*

Dicendum 3. tenentur omnes illi ad restitutionem faciendam suo ordine, & pro ratione influxus in damnum illatum. Unde & hæc est condemnata: *Qui alium movet aut inducit ad inferendum grave damnum tertio, non tenetur ad restitutionem istius damni illati.* Ante omnes tamen restitutioni obnoxius est ille, apud quem res furtiva extat, que semper clamat Dominum, etsi bonâ fide possideatur. Deinde causa principalior, & ante alias obligata ad restituendum est mandans suâ autoritate & potestate ad peccatum: deinde obligatur ipse executor peccati, post quem tenetur qui consulit, consentit, receptat, participat de furto, sic ut inter illos ultimos nullus statuatur ordo, sed pro majori vel minori influxu in damnum teneantur ad restitutionem. Post hos autem positivè concurrentes, tenentur illi, qui negativè concurrunt, cum hi solùm debeant impedire causas positivas & satisfaciant suæ obligationi, si easdem ad restitutionem compellant, vel aliunde procurent, ut damnum refarciatur. Alii tamen ordinem aliquem inter negativè concurrentes statuunt, ut primò teneatur non obstand, deinde mutus, & post eos non manifestans. Verum generaliter notari posset, quam arctè ad impediendum sint tales obligati, & negligentes in impediendo, ex quo obligatio restitutionis statui potest & desumi, inter illos, qui negativè ad damnificationem concurrunt.

SECTIO

S E C T I O I V.

De Restitutione rei furto ablata.

D ICENDUM primò, qui bonâ fide rem alterius possidet, tenetur eam Domino reddere, si innotescat: aliàs enim inciperet esse possessor malæ fidei, & res semper clamat suum dominum. Si verò rem alterius, quam bonâ fide possedit consumpserit aut alienaverit, ad nihil tenetur, nisi in quantum ex eâ re factus est ditior: ratio est, quòd res absque ejus utilitate sit consumpta, adeoque non tenetur ratione rei acceptæ, cum nihil alieni habeat, nequidem in æquivalenti, nisi in quantum factus est ex ea re locupletior. Neque etiam tenetur ratione injustæ acceptionis, uti supponimus, ergò ex quo patet, quòd ille qui rem furtivam dono acceptam consumpserit, aut vendiderit, teneatur eam restituere, si extet saltem in æquivalenti, aut si ex ea sit factus locupletior. Aliud est, si rem illam alteri donasset, nisi forsan rebus suis pepercisset, cum tali casu donando rem alterius, & suis parcens, sit inde factus ditior.

Dicendum 2. qui bona fide rem alienam fructiferam possedit, & ex ea fructus percepit, tenetur Domino fructus merè naturales ac mixtos extantes restituere, non item fructus meræ industriæ. autem merè naturales sunt, qui ex re naturaliter consequuntur, nihil aut vixdum conferente industriâ: ut sunt arborum, segetum fructus, &c. Mixti sunt, qui partim naturaliter, partim industriâ humanâ ex re consequuntur, ut sunt caseus ex vaccis, pannus ex ovibus. illi, qui industriâ humanâ ex re consequuntur, ut Lucrum ex negotiatione. Ratio ergò dictæ conclusionis est hæc, quòd fructus naturales ac mixti, sunt

sint fructus rei; sicut autem res semper debetur Domino, ita & fructus, qui ex re naturaliter consequuntur, cum quælibet res Domino suo fructificet. Fructus verò industriæ, non sunt propriè fructus ipsius rei, sed ejus, qui industriam adhibet. Si verò priores fructus bona fide consumpserit, non tenetur eos restituere, nisi extent in æquivalenti, aut in quantum ex illis factus est ditior.

*Dubitans
an res sit
sua.*

Dicendum 3. qui prius bona fide rem possedit, & deinde incipit dubitare an sit sua, tenetur omnibus modis veritatem inquirere, quod si negligat, exponet se periculo rem alterius possidendi: unde, si res illa sit usu consumptibilis, ut vinum, cerevisia, &c. non poterit eam stante tali dubio consumere. Si tamen post diligentem indagationem factam dubium etiamnum perseveret, poterit rem illam alienare, consumere, aut aliò distrahere, cum hoc casu dubio, sit melior conditio possidentis, quod axioma in materia justitiæ lubens admittit plurimorum opinio. Si tamen postea dominus compareat, non tenetur juxta dicta vel rem vel æquivalens restituere, nisi in quantum ex ea factus est ditior.

*Emptor
rei furtivæ.*

Dicendum 4. qui bona fide rem furtivam emit tenetur eam Domino comparenti restituere, si prætium velit refundere. Si verò non possit pretium datum recuperare, nisi contractum rescindendo, poterit verosimilius eam furi reddere & contractum rescindere, ut prætium recuperet. Ratio illus est, quòd ille nullam fecerit Domino injuriam, rem illam bona fide emendo, & penes se retinendo, ergo sine domini injuria potest eam furi relinquere & reddere, ne pretium amittat. Deinde in casu innocentiae tenetur prius emptor sibi consulere, deinde Domino, & sicut Dominus habet jus ad rem suam, ita habet emptor ad datum pretium, cum ambo sint infontes. Ino hoc aliqui extendunt ad emptorem malæ fidei, cum nullo jure aut justitiæ, aut charitatis, debeat rem alterius cum gravi suo
damno

damno restituere in meliori statu, quàm antea fuit; quòd enim jam res ad meliorem statum deveniat; non oritur ex ipsa re, sed ex emptoris voluntate, unde ad dominum illud non pertinet, sicuti nec fructus industriæ, sed perperam, contraria tamen sententia sua probabilitate gaudet, cum possessor rei alienæ nullum habeat jus in rem alterius, unde de illa disponere non potest, nec eam in deteriori statu collocare, quàm de facto sit, dum ab emptore possidetur.

Dicendum 5. Si quis rem furtivam bona fide emerit, non potest Dominum comparentem ex justitia compellere ad refundendum pretium persolutum, nec tenetur illud Dominus restituere, neque in foro externo, neque interno, cum æquum non sit, ut Dominus rem suam emat. Excipe tamen casum, si quis eo animo rem furtivam emerit, ut eam Domino reddat, quo casu tenetur Dominus pretium in sui utilitatem expensum, restituere, & alter censetur utiliter egisse negotium Domini.

Dicendum 6. Qui rem furtivam bona fide emit, & bona fide vendidit, tenetur admittere rescissionem contractus ab eo, cui vendidit, si Dominus compareat, nec sufficit suam actionem resignare in personam à qua prius emit rem illam furtivam, nisi forte illa resignatione emptor ille vellet esse contentus. Ratio hujus est, quòd contractus ille venditionis à parte rei fuerit invalidus, neque venditor transfert Dominium rei in emptorem, quod ipse non habet: unde tenetur pretium acceptum emptori reddere, cum illud maneat emptoris. Huic tamen obstare videntur variae leges positivæ, quæ statuunt, quòd fur acquirat Dominium pretii pro re furtiva vendita accepti, et si teneatur de evictione ad omne interesse, uti statuit L. *Rem alienam* ff. de contrah. emptione: idem habet L. *Si emptione* §. *item si* ff. de contrah. emptione, &c. Quæ leges an sint in vigore, sedulo hîc debet investigari.

S E C T I O V.

*De quibus & cui facienda sit restitutio.**De quibus facienda sit restitutio.*

DICENDUM primò, restitutio facienda est de injustè acquisitis, qualia quoque sunt illa, quæ accipiuntur pro opere aut re ex justitia debita, cum res & opus ex justitia debeatur, unde illud idem est ac emere rem suam. Hinc peccant ii, qui ratione officii à Republica stipendium recipiunt, ratione cujus ex justitia tenentur officia aliqua præstare, & ultra illud stipendium aliquam mercedem recipiunt, tamquam ex justitia sibi debitam, cum tamen opus illud ex justitia præstare teneantur. Aliud esset, si opus illud aut res illa alteri solùm deberetur ex charitate, vel alia virtute à justitia distincta, unde medicus licitè mercedem recipit ab infirmo, quem ex charitate curat. Idem quoque esset, si solùm à Republica reciperent stipendium, ita tamen, ut pro opere præstito simul mercedem tamquam stipendii supplementum recipere possint.

Restitutio pretii accepti pro opere per se malo.

Dicendum 2. Accepta pro opere per se malo, v. g. fornicatione, adulterio, &c. verosimiliùs post opus commissum, sunt restituenda. Ratio est, quòd actio per se mala non sit pretio æstimabilis, & infra omne pretium: Deinde nullo titulo talia retineri possunt: non titulo virtualis contractus, cum L. *generaliter ff. de verb. obligat.* Dicatur: *generaliter novimus, turpes stipulationes nullius esse momenti.* Neque etiam titulo donationis, cum ille non det illa magis gratuitò, quàm qui dat pretium pro usuris. Denique contraria sententia Reipublicæ est perniciosa, multos ad peccandum inducens, à quo sententia nostra avertit. Neque ullatenus refert, quòd opus per se malum sit pretio æstimabile, ex eo, quòd possit alicui esse utile: quia sic maxima scelera possent pretio æstimari & esse vendibilia.

Hinc

Hinc meretrices tenentur stipendia meretricia restituere, si vires facultatum illud permittant, nec à Republica tolerantur. Aliàs sæpè excusari possunt ratione impotentiae, aut etiam quia hoc à Republica in pœnam & multam fornicario statuitur, quod pretium datum pro opere meretricio, meretricibus cedat: quod huic operi à Republica tolerato, potest esse speciale.

Dicendum 3. Debita incerta ex delicto, v. g. furto, rapina, &c. si post debitam investigationem nesciatur cuiusnam sint, jure positivo danda sunt pauperibus, aut alteri causæ piæ: patet hoc ex cap. *Cum tu*, 5. de usuris. Si verò sint debita illa ex contractu licito acquisita, volunt aliqui, quòd nulla ratione probari possit, illa danda esse pauperibus; verùm rectius docent, etiam illa ex jure naturæ danda esse pauperibus, ut fructus eleëmofynæ in Dominum eorumdem redundet: vel, ut Deo omnium Domino donentur, dum pauperibus dantur, dum eorum Dominus particularis ignoratur: Idem patet ex fidelium praxi & piorum consuetudine, de qua, etsi non constet, an sit inducta animo obligandi, an non, tamen sententiam dictam aliquatenus suadet & commendat. Hinc rectè procedet Confessarius, si illis, quorum facultates ferunt, persuadeat, ut debita incerta ex licito contractu pauperibus reddant, aut saltem id per modum pœnitentiæ imponat. Contraria tamen opinio satis est probabilis.

Si verò post elargitionem in pauperes, talium debitorum Dominus compareat, & antea debitam adhibuerit diligentiam in indagando Domino, ad nihil tunc alter obligabitur. Ratio ejus est, quòd tunc semel legitimè solvendo, idest dando pauperibus, censetur satisfecisse. Pauperes verò, quibus talia bona sunt data, tenentur ea Domino comparenti reddere, si extent: si verò consumpta sint, vel alienata, sic ut inde non sint facti ditiores, tunc ad nihil tenentur, cum bona illa, non mutuo, sed in eleëmofynam receperint. Si tamen pauperes aliunde ad pinguiorem fortunam

Debita incerta ex delicto

Quid si Dominus compareat, & data pauperibus.

fortunam venerint, tenerentur ex motivo honestatis & gratitudinis aliquid Domino comparenti restituere, & compensare. Hoc tamen notandum, quod quis debita incerta & bona inventa possit sibi ipsi retinere & iis uti, si verè sit pauper: videndum tamen ne hinc iniquitas mentiatursibi, & iniustitiam paupertatis specie obvolvatur.

*Redditio
Rei alienæ.*

Dicendum 4. Si Dominus rem suam petat in ordine ad eam abutendum, v. g. gladium ad se, aut alium occidendum, si eam sine suo gravi incommodo negare possit, non potest eam Domino reddere. Ratio est, quod Charitas saltem omnes obliget, ut à proximo suo grave damnum avertat, quando id sine gravi incommodo potest avertere & impedire. Si verò illud sine gravi suo incommodo non possit impedire, poterit rem illam reddere Domino petenti, etsi prævideat, quod Dominus eam sit abusus, eò quod cum gravi suo damno illum abusum impedire non debeat, quo casu reddendo non censetur moraliter loquendo alterius abusui coöperari, sed permissivè se ad eum habere.

Cujus expensis fieri debeat restitutio.

Dicendum 5. Restitutio faciendae ex iniusta acceptione, fieri debet expensis debitoris, qui Dominum debet servare indemnem. Si verò expensæ illæ longè deberent excedere pretium rei reddendæ, posset expectari melior raddendi occasio, aut pretium rei per cambium refundi. Unde, qui talem rem restituit per nuntium aut confessarium, si illa in via pereat, tenetur equidem debitor ille, rem in æquivalenti iteratò refundere, cum suo periculo teneatur rem ablatam restituere, & Dominum rei servare indemnem. Si verò res restituenda sit ratione rei acceptæ, quam possidet bona fide, restitutio fieri debet expensis Domini, nec est ulla ratio, quare possessor bonæ fidei debeat gravari. Unde in transferendo rem illam, expensas illas poterit deducere. Si autem res reddenda sit ex contractu emptionis, depositi, &c. debet ea reddi expensis ejus, de quibus fuit conventum. Unde qui emit
liba

alibi aliquam rem, debet eam perfolvere in loco, ubi emit: si habeat rem in deposito aut commodato, cum illud communiter cedat in utilitatem depositarii aut commodatarii, debet restitutio fieri illius expensis, nisi sit aliter conventum. Si denique res aliqua reddenda sit ex testamento, legato, &c. Debet illa reddi, eo loco, quo res illa existebat, dum de eâ fiebat testamentum: Unde legatarius v. g. debet rem legatam sibi suis expensis acquirere, si à se distet.

Quænam verò ab obligatione restitutionis excusent, an impotentia, an cessio bonorum, &c. Videnda sunt in anterioribus dictis.



CAPUT QUINTUM.

De detractiōe & Contumelia.

SECTIO PRIMA.

Quid sit detractio, & quid contumelia, & quale peccatum

DICENDUM primò, *Detractio* est injusta & occulta famæ alienæ denigratio. Differt à *Contumelia* quòd hæc sit injusta, sed aperta famæ alterius denigratio: unde detractio in occulto rodit alterius famam, contumelia palam & quasi in faciem alterius famam violat.

Fama verò est multorum æstimatio de vita & moribus alterius. *Bona fama* est bona talis æstimatio, *fama mala* est mala talis æstimatio. *Honor* verò est testificatio excellentiæ alterius. Solet autem detractio fieri potissimum 8. modis, quatuor directè, & totidem indirectè, & continentur his versibus:

Imponens, augens, manifestans, in mala vertens: Qui negat aut minuit, reticet, laudatve remisit.

Tom. II.

S

Primum

Quid detractio.

Quid fama.

Primum importat, quòd detractio fieri possit imponendo alteri falsum crimen: 2. Augendo verum. 3. Revelando occultum. 4. Alterius rectè factum sinistrè interpretando. 5. Negando alterius bonum. 6. Illud extenuando. 7. Silendo bonum, ubi deberet manifestari. 8. Frigidè alterum laudando.

Detractio formalis & materialis. Detractio solet aliquando dici *formalis*, quando fit ex intentione diffamandi; si verò ex tali intentione non prodeat, dicitur solum *materialis*.

Detractio fit facta etsiam. Detractio non solum fit verbis, sed & quandoque factis, quæ significant & important diffamationem alterius: Hinc detraheret, qui ad postes adulteræ suspenderet cornua.

Quale peccatum sit. Dicendum 2. Detractio de se est peccatum mortale, idque furto gravius, cum teste Scriptura Prov. 22. *Melius sit nomen bonum, quàm divitiæ multæ*: Unde gravius peccat, qui bonum nomen & famam aufert, quàm qui aufert divitias. Crescit autem detractiois gravitas ex crimine, quod revelatur, ex dignitate personæ, cui detrahitur, cujus fama pluribus est necessaria; neque minuitur detractiois gravitas, eò quòd bono fine fiat, v. g. quòd joci causâ crimen alterius reveletur juxta hoc, *Ridendo dicere verum, quid vetat?* Simile fit in iis, qui ex garrulitate & loquacitate alteri detrahunt in materia gravi; illi enim prævidere poterant & debebant, quòd alterius fama graviter læderetur, sive ex loquacitate, sive sine illâ famam alterius læderent.

Revelatio defectuum naturalium. Dicendum 3. Regulariter loquendo non est grave peccatum alteri revelare defectus alterius naturales, nisi sint tales defectus, qui sine animi vitiis esse vix nequeunt, vel quando habentur pro re infami, vel denique si ex tali narratione defectuum naturalium, alteri sequuntur, vel sequi prævidentur graviora damna.

Detrahens coram uno tantum. Dicendum 4. Mortaliter peccat, qui alteri detrahit, etiam vel coram uno viro probò & prudente, sine justâ causâ. Ratio est, quia ut ait D. Thomas, quam-

quamvis ejus famam non in toto, in parte tamen eam corrumpit. Deinde, si liceat uni revelare, licebit & alteri. Denique, sæpè plus dependet fama alicujus ab æstimatione unius probi, quàm ab æstimatione 10. plebeiorum: unde bonum grave, quod apud talem obtinet alter, aufertur per hanc detractiōem. Aliud est, si adsit justa causa: sic licitè parentes sibi mutuo malefacta filiorum revelant; pœnitentes complices manifestant confessariis; neque ibi est detractio formalis, sed necessaria manifestatio ad emendationem alterius ordinata.

Dicendum 5. Licitè tamen alteri viro probò exponit quis injuriam ab alio passam, ad habendum solatium, consilium vel auxilium. Talis enim habet justam causam sese hoc medio liberandi à dolore injustè passò; deinde, ut à se daninum aliàs impendens, avertat. Si tamen crimen illud manifestari possit, non manifestando personam, à qua illud commissum est, debet omninò persona illa reticeri: secus si crimen manifestari nequeat, sine manifestatione personæ, cum hoc casu solum sit detractio materialis.

Dicendum 6. Non peccat contra justitiam, qui crimen alterius, quod in uno loco est publicum, in alio loco, ubi ignoratur, propalat. Dicitur autem aliquid *publicum jure, publicum facto, & publicum famâ*. Publicum jure est, quod constat per sententiam Judicis, aut confessionem juridicè factam. Publicum facto est, quod ita est publicum & coram multis factum, ut nulla tergiversatione celari queat. Publicum famâ est, cujus fama ad multos devenit, unde aliquid dicitur *famosum*.

Ratio ergo dictæ conclusionis est, quòd ille jam amisit jus ad famam, cujus crimen alibi est publicum. Neque dici potest, quòd ille, qui amisit famam Antverpiæ v. g., eandem etiamnum retineat Romæ, quo crimen nondum est delatum: hoc enim est merè per accidens, unde quòd crimen Romæ non sit publicum, non oritur ex ipsa re, quæ oc-

*Expositio
injuria ab
alio passa.*

*Quid pu-
blicum
jure, quid
facto &
famâ.*

*Licet pu-
blicè in-
famem
infamare.*

culta non est, sed ex eo, quòd eò crimen delatum non sit, sicut occulta res dici potest in surdo, qui audire non potest, etsi crimen alioqui sit publicum. Sic videmus historiographos mandare libris aliquorum crimina alibi publica, quæ ad partes remotissimas deveniunt divulgatione librorum.

Dixi in conclusione, *non esse contra justitiam*, quia si ex tali revelatione ulteriori nulla speretur utilitas, peccare videtur contra charitatem.

*Non licet
crimen
publicum
factum
occultum
iterum re-
velare.*

Dicendum 7. Potest citra injustiam crimen jam occultum sed postea factum publicum alteri revelari. Ratio est, quòd alteri jam publicè diffamato nulla sit actio aut jus ad famam. Neque ulterius jam propalando crimen, continuatur infamia ante facta, neque cum detractoribus hoc est commisceri, quia supponitur, quòd jam alius jus ad famam amisit, neque aliorum diffamatio approbatur, sed facta supponitur. Aliud foret, si crimen esset alteri falsò impositum, tunc enim crimen illud ulterius divulgando, coöperaremur alterius damno, concurrendo ad alterius infamiam continuandam. Deinde, licet alterius fama jam interierit, neque habeat amplius jus ad suam famam, tamen jus habet hoc casu ad famam suam recuperandam & possidendam, cujus fundamentum & radix remanet, scilicet carentia criminis.

Dicendum 8. Quando crimen antea publicum, lapsu temporis fit occultum, peccat contra justitiam, qui illud iterum revelat & manifestat. Ratio est, quòd crimen illud deductum jam sit ad statum pristinum, quo erat occultum, unde illud manifestans peccat contra justitiam, sicut peccaret, qui illud antea occultum revelaret.

*Diffama-
tum de
uno cri-
mine non
licet de
alio infa-
mare,*

Dicendum 9. Non licet diffamatum de uno crimine ulterius diffamare de aliis criminibus occultis: Ratio est quòd infamis de uno crimine, habeat jus ad famam quoad alias virtutes. Aliud esset, si crimina alia, habéant affinitatem cum crimine, de quo

quo est infamatus: tum enim sine gravi peccato aliud crimen annexum priori, etsi occultum pandi potest, cum eo casu non graviter lædatur alterius fama.

Dicendum 10. Qui crimen alterius novit, non sub secreto sibi commissum, neque via injustâ, poterit illud manifestare, ut avertat notabile malum, sibi aut proximo impendens. Ratio est, quòd hoc casu sit causa sufficiens defectus proximi manifestandi: sic Christus sæpiissime Phariseorum duplicitatem & hypocrisim palam redarguit & revelavit, ut alii ab illorum fermento sibi caverent. Si verò aliis mediis damnum illud avertere quis possit, tenetur ex charitate à tali revelatione abstinere. Idem dic de infamatione ejus, qui fictis virtutibus sibi famam comparavit, & ex autoritate ejusdem timetur alteri detrimentum: idem quoque est, de extenuatione alterius Doctrinæ, quæ alteri est perniciosa.

Dicendum ultimò: Peccant contra justitiam, qui crimen alterius ita narrant, ut dicant se illud quidem audisse commissum esse, nolle tamen se illud asserere, si prævidere possint, quòd ex tali narratione malum aliquod proximo impendeat. Si verò hoc prævidere non possit, si aliquod damnum ex tali narratione sequatur, auditoris malitiæ adscribere illud potest.

SECTION II.

An, & quando liceat seipsum infamare.

DICENDUM primò, Cum homo sit Dominus suæ famæ, potest rationabili de causa quandoque se infamare: sic Mathæus professus est se Publicanum, Paulus sese vocat Ecclesiæ persecutorem, & S. Augustinus varia de se crimina manifestat in suis confessionibus. Si tamen crimen illud, quod quis sibi imponit, falsum esset, aut in aliorum infamiam

redundaret , illicite & injustè quis se infameret. Sic peccaret Superior, Religiosus, &c. quia ex illorum infamia , sequitur infamia Monasterii.

*Sine causa
falsè infama-
mans pec-
cat.*

Dicendum 2. Qui se sine justa causa graviter infamat , peccat mortaliter , sicuti peccat mortaliter qui magnam pecuniæ summam prodigit , imò eò magis , quòd nomen bonnm præstat divitiis multis. De tali ait S. August. serm. 44. de diversis : *qui negligit famam, crudelis est.* Neque verum est , quod opponunt alii quòd Apostolus famam prodigat & contemnat , dum 1. Cor. 4. ait : *Mihi autem pro minimo est, ut à vobis judicer, aut ab humano die.* Cùm solùm velit Apostolus, judiciis hominum non esse fidendum, quæ sæpè diversa sunt à judiciis Dei. Unde & Augustinus alibi dicit ; *Senti de Augustino quodcumque lubet, sola me conscientia non accuset.* Conscientia enim mille testes, ut habet commune dictum.

*Impositio
criminis
falsi.*

Dicendum 3. Non licet sibi falsum crimen impo-
nere, ad evadenda tormenta , cùm hoc sit men-
tiri , quod nullo casu licitum est , nec sint facien-
da mala , ut eveniant bona. Unde si ex tali im-
positione videat juxta juris ordinem secuturam mor-
tem , peccat peccato homicidii , ad suam necem
concurrente, ejusque causam ponendo , ex qua ve-
rosimiliter mors secutura prævidetur. Non peccat
tamen ille peccato detractionis , cùm habeat justam
causam famam suam prodigendi. Peccat quoque
ille graviter, qui ut parentem aut amicum ex ma-
nibus Justitiæ liberet , sibi falsò crimen imponit , tum
quòd fiat vera injuria reipublicæ , per fraudem à
pœna debita verè delinquentem eripiendo , tum
quòd perniciosè talis mentiatur.

Dicendum 4. Improbabile est , illum non peccare
mortaliter , qui alteri imponit falsum crimen , ut fa-
mam suam & honorem defendat ; clarè enim hoc est
contra præceptum decalogi , *Non dices contra proxi-
mum tuum falsum testimonium.* Unde hæc ab Ecclesia
damnata est : *Quid ni non nisi veniale sit detrahentis au-
thori-*

toritatem magnam sibi noxiam falso crimine elidere ? Item hanc: Probabile est, non peccare mortaliter, qui imponit falsum crimen alicui, ut suam justitiam & honorem defendat. Et si hoc non sit probabile, vix ulla erit opinio probabilis in Theologia.

S E C T I O I I I.

An & quale peccatum sit audire detrahentem.

DICENDUM primò, qui alium ad detrahendum movet, excitat, hortatur ac promovet, peccat contra charitatem peccato scandali, & contra justitiam damnificationi proximi coöperando. Idem est de eo, qui audiendis detractionibus delectatur, eisque quasi consentit, quia non solum, qui talia agunt sed & qui malè agentibus consentiunt, rei sunt, ut ait Apostolus Rom. 1. Hinc dicunt SS. PP. quòd detrahens habeat dæmonem in ore, & detractiones ita audiens in aure. Audi S. Hieronymum Epist. ad Nepot. *Cave, ait, ne linguam aut aures habeas prurientes, ut aliis detrabas; aut alios audias detrahentes.* Et S. Bern. l. 2. c. 13. de consideratione; *Detrahere ait, aut detrahentem audire, utrum horum damnabilius sit, non facillè dixerim.*

Dicendum 2. qui alium detrahentem audit, neque illum impedit, ubi facillè impedire posset, peccat contra charitatem, non autem contra justitiam, nisi ex officio illud impedire teneretur. Charitas enim unumquemque obligat, ut malum alterius impediatur, dum sine damno id potest. Quòd tamen non peccet contra Justitiam, patet cùm illa solum obliget ad non inferendum damnum, non verò ad illud impediendum, nisi ex officio ad illud impediendum quis foret obligatus.

Dicendum 3. tenetur quilibet alteri detrahenti graviter resistere, si sit spes resistendo detractionem

nem impediendi, nec sit timor gravis damni. Probat illud Sapiencia æterna Proverb. c. 24. ubi dicitur: *Abominatio hominum detractor sit.* Debet ergo detrahentem audiens, vel facie tristiori resistere, juxta illud Prov. 25. *Ventus aquilo dissipat pluvias, & facies tristis linguam detrahentem.* Obligatio hæc eò est arctior, quò vitium detractionis est magis ubique obvium: nam, ut ait S. Hieron. ad Celantiam: *Pauci sunt, qui huic vitio renuntient, tantaque hujus mali libido, hominum mentes invasit, ut etiam qui procul ab aliis vitiis recesserunt, in istud tamen quasi in extremum Diaboli laqueum incidunt.* Rectè proinde admonet Scriptura Eccli. 19. *Audisti verbum adversus proximum tuum? commoriatur in te.*

S E C T I O IV.

De aliis vitiis detractioni affinis.

Conviti-
um, im-
properi-
um, irrisio,
subsan-
natio, su-
furratio,
maledic-
tio.

DE T R A C T I O N I affinia sunt conviti-
um, im-
properium, irrisio, subsannatio, susurratio, & ma-
ledictio. *Conviti-um* est exprobratio de pœna animæ
aut corporis. *Improperium* est exprobratio indigentia,
aut beneficii in necessitate collati. *Irrisio* est, dum
alium ludibrio habemus. *Subsannatio* est derisio quæ
fit motu corporis & membrorum. *Susurratio*, est dis-
cordia disseminatio inter amicos. *Maledictio* denique
est mali imprecatio, quâ honor, uti & præcedenti-
bus solet violari. Prædicta omnia sunt de se peccatum
grave, cum graviter proximum lædere soleant in bo-
nis corporis aut animæ.

S E C T I O V.

De Restitutione famæ.

DICENDUM primò, Tenentur omnes ad restitutionem famæ, qui injustè alterius famam violent. *Omnis illa famam reddere debet, qui eam injustè læsit.* Hinc superior, qui subditum detrahentem non impedit, tenetur ad restitutionem famæ, tamquam causa moralis damni in famâ positi: tenetur quoque ille famam restituere, qui etsi ignorantia vel inadvertentiâ famam læsit, tamen postmodum noscit, infamiam esse secutam. Ad hoc enim justitia obligat, ut damnum proximo etiam sine nostra culpa positum & causatum, impediamus ne crescat, dum id commodè facere possumus. Obligatio autem illa est merè personalis, adeoque nec transit ad hæredes detractoris: *Obligatio hac est personalis.* imo ad nihil tenetur detractor respectu hæredum illius, cui detraxit, nisi ex detractiōe, illis quoque damna sint causata, quæ ex detractiōe per se sequuntur, quorum detractor detrahendo posuit causam.

Dicendum 2. Tenetur detractor famam alterius restituere, etiam cum dispendio famæ propriæ. Ratio est, quòd in pari causa melior sit conditio innocentis, & pejor nocentis. Excipe tamen casum, quo alicujus fama necessaria esset bono communi reipublicæ aut communitatis, eò quòd infamatus non possit rationabiliter velle, ab alio famæ reparationem cum tanto damno boni communis. Idem dic, si ex reparatione immineat periculum vitæ, ob eandem rationem mox datam; nisi fortè alter ex falsâ infamatione foret in eodem periculo, cum in pari causa sit melior conditio innocentis. *Tenetur etiam cum suo damno.*

Dicendum 3. Si infamatus aliâ viâ reparationem famæ obtinuerit, liberatur detractor ab onere famam restituendi. Ratio est, quòd alteri jam factum sit, *Excusatur recuperatâ famâ,* quod sibi fieri debet, nec minus habeat, quàm habe-

re debeat. Idem dicendum est, si infamia jam sit oblitterata, nec sit periculum reviviscentiæ.

*Falsi cri-
mini im-
positio,
tenetur
illud effi-
caciter
revocare.*

Dicendum 4. Qui alteri imposuit falsum crimen, debet illud efficaciter revocare, quod efficaciter non præstat, dicendo se fuisse deceptum, sed candidè facteri debet se esse mentitum. Ratio est, quòd qui alium injustè læsit, debeat adhibere media illa, quæ ad reparationem damni sunt necessaria. Si verò patefecit quis crimen verum, debet adhibere media, quæ ad reparationem famæ sunt idonea: non tamen potest dicere se esse mentitum aut dixisse falsum; non enim licet mendacio famam ablatam restituere; poterit tamen dicere se malè dixisse, vel se de alio malè & injustè locutum esse. Idem dicendum est, quòd non liceat per mentales restrictiones famam ablatam restituere, cum sint purum & purum mendacium, & restringere mentaliter sit mentiri artificialiter. De quo plura postea.

*Excusa-
tur, si non
sit illi da-
ta fides.*

Dicendum 5. Excusatur detractor à restitutione facienda, si auditores non crediderint detrahenti, non intellexerint, si fiat impotens ad restituendum, si non possit nisi cum periculo vitæ, &c.



fit in *pacto nudo*, quod est mera duorum conventio, omni alio fundamento carens, quod non parit obligationem in foro civili, quod etsi talibus conventionibus non resistat, eis tamen non assistit tribuendo actionem, idque ne lites multiplicarentur. In foro tamen conscientiae parit etiam nudum pactum obligationem, cum utraque pars in conscientia teneatur stare promissis: quod & observat Jus Canonicum, & Tribunal Ecclesiasticum, quod conscientiam spectat & dirigit. Si verò tale pactum sit jramento firmatum, parit obligationem in utroque foro.

*Error in
contractu*

Dicendum 3. Quando in altero contrahentium accidit error circa substantiam rei, contractus ille est jure naturae irritus: Ratio est, quod hoc casu desit consensus essentialiter ad contractum requisitus, cum in illam rem, quam putat subesse, & revera non subest, solum consentiat, non item in aliam. Si verò error non sit circa substantiam rei, sed solum circa accidentia, quae movent ad rem comparandam, tunc contractus non erit invalidus, cum verò consentiat intalem rem comparandam. Si tamen hic dolus det causam contractui, poterit contractus pro arbitrio ejus qui deceptus est, rescindi & solvi, si sit solubilis. Ratio ejus est, quod qui alium inducit vi vel fraude ad contrahendum, faciat alteri injuriam, unde tenetur eum in integrum restituere. Excipiunt tamen hic, si altera pars non sit doli particeps, sed ignara vel à tertio decepta, tum enim contractus valet, neque in foro externo revocari potest ad libitum decepti, etsi verius sit, in foro conscientiae id posse fieri, dum error apparet, nisi forte ex revocatione obveniret alteri grave damnum. Unde jura hic non concedunt rescissionem contractus, sed solum actionem quanti minoris, sive ut eò minoris solvant, quò res valitura erat, detecto errore.

*Contractus
metu ini-
tus.*

Dicendum 4. Contractus gravi etiam metu initus jure

Jure naturæ est validus. *Gravis metus* est, qui cadit in constantem virum, sive quo vir constans permoveri solet ut est metus mortis, carceris, exilii, &c. *Metus* Alius, quo quis moveri non solet, dicitur *Levis*. *gravi.* Ratio conclusionis est, quòd illud quod metu fit, absolute voluntariè fiat, unde voluntariè consentit non obstante metu etià gravi. Neque dici potest, quòd injuria per metum illata contractum irritet, cùm injuria non sit immediata causa contractus, sed consensus hic voluntarius. *Levis*

Possunt tamen contractus gravi metu initi revocari ad arbitrium ejus, qui passus est metum, si metus dederit causam contractui, in foro conscientie: *Contractus revocandi.* Ratio est, quòd ille, qui metum intulit, fecerit alteri injuriam, unde debet alium in priorem statum collocare, ad quod & alter jus habet, ut fiat. Dictum est, *Si metus dederit causam contractui*, sive si incussus fuerit ad contractum eliciendum, quia si alio fine metus ille sit incussus, revocari non poterit contractus tali metu initus. Hinc si à latronibus invasus, promittat tertio, qui doli non est conscius, summam 100. florenorum, ut te liberet, tenetur contractui. Idem est, si metus justè incutitur, id est quando malum, quod quis minatur, ab eo potest justè inferri. Prædicti enim contractus revocari solum possunt ratione injuriæ, quæ abest, si metus justè incuti poterat.

Dicendum 5. Contractus levi metu initus, non potest in foro externo ad arbitrium metum passi revocari: Potest tamen in foro conscientie, si metus ille ad extorquendum contractum fuerit injustè incussus. Ratio ejus est, quòd aliquando metus levis tantopere perturbet hominem, quàm gravis: Deinde quod metu hoc levi extorquetur, per injuriam obtinetur, quod proinde in integro restitui debet: quæ dicta sunt de metu gravi & levi, idem pariformiter dicendum est de metu reverentiali, quo uxor movetur precibus mariti, monachus Abbatis, prout

prout metus ille censetur æquivalere metui gravi ,
vel levi.

S E C T I O II.

Quinam contrahere possint.

*Quinam
possint
contrahere*

DICENDUM primò : Omnes illi contrahere possunt , qui habent liberam administrationem rei , de qua contrahitur : alii autem , qui non habent liberam administrationem , non possunt de eis rebus contrahere. Hinc pupilli , religiosi & similes non possunt contrahere sine consensu eorum , quibus respectivè subsunt , de rebus , quarum non habent liberam administrationem.

*Minores
& pupilli
pubertatis
proximi*

Notandum tamen , minores & pupillos pubertati proximos posse sine auctoritate curatoris contrahere in suum commodum , non tamen in suum incommodum. Habent enim ex juris dispositione , sufficientem facultatem alterum sibi obligandi , non verò vicissim se alteri. Censentur verò minores & pupilli proximi pubertati , si masculus sit 10. annorum cum dimidio , si femella 8. annorum cum medio.

Excipiunt tamen contractum pupilli de re non adeo pretiosâ , mobili vel immobili , quo casu pupillum propriâ etiam auctoritate contrahentem volunt in conscientia obligari ; quod , etsi satis probabile sit de jure ordinario , jure tamen extraordinario dicuntur etiam pupillos illis contractibus non obligari : tum quòd non obligentur efficaciter , cum beneficio restitutionis in integrum possint resilire , tum quòd non obligentur tam efficaciter , quàm alii majores. Alii tamen probabilius docent , invalidum esse omnem contractum minoris & pupilli propriâ auctoritate initum , nisi fortè accesserit juramentum , quo casu non potest minor aut pupillus velle resilire , nec alter tenetur rem restituere.

Dicen-

Dicendum 2. Possunt tamen pupilli & minores contrahere de suis rebus castrensibus aut quasi castrensibus, quarum habent dominium & liberam administrationem: Si verò in his quoque senserint grave damnum, possunt beneficio restitutionis uti, & rem repetere reddito prætio.

SECTIO III.

De Promissione & donatione.

DICENDUM primò, *Liberalis promissio, vel donatio alteri facta* non obligat ante ejus acceptationem; post illam verò obligat, etiam aliquando sub mortali, si res promissa sit magni momenti. Excipiunt alii à prima parte donationem vel promissionem datam loco pio, monasterio, hospitali, &c. quam volunt obligare ante acceptationem: Verùm alii hoc meliùs negant generaliter de omni promissione & donatione ante acceptationem. Ratio posterioris partis est, quòd omnis promissio det jus ad rem promissam, si sit vera & seria promissio: aliàs si solum sit assertio aut propositi sui declaratio, non obligat sub mortali ad illud implendum, quo pacto solent excusari, qui promittunt se multa facturos, sed nihil efficiunt. Quantitas autem hìc requisita, ut promissio sub mortali obliget, constituitur ab aliis illa, quæ sufficit ad furtum mortale; verum rectius alii docent, requiri quantitatem majorem, qui valor communi & prudenti judicio debet æstimari: major verò solet æstimari injuria in eo qui aufert unum florenum v. g. quàm qui 3. aut 4. promissos non solvit.

Dicendum 2. Variæ conditiones requiruntur ad legitimam donationem; prima, ut res donata sit donantis, cum nemo dare possit, quod non habet. 2. Ne res illa alteri sit obligata. 3. Ut donatarius rem illam possit recipere. 4. Ne detur major quantitas, quam

quàm dari possit: vel etiam ut donare possit, quod inhibetur minoribus, pupillis, prodigis, quos vocamus *Stads Kinderen*; filiis familias de bonis non castrensibus aut quasi castrensibus; Religiosis, uxoribus, de iis, quæ ultra conditionem similibus dare præsumunt sine consensu viri, & de quibus non possunt libèrè disponere, uti possunt de bonis paraphernalibus; hinc aliquid dono accipiens ab aliquo, qui donare non potest, tenetur ad restitutionem, cum donatio fuerit nulla.

Donatio inter vivos.

Dicendum 3. *Donatio inter vivos*, idest qua sic aliquid donat, ut velit etiam se vivente esse alterius, potest quibusdam de causis revocari, puta ob ingratitudinem, injuriam donatarii, &c. *Donatio verò mortis causâ*, idest facta ea conditione, ut non velit rem donatam esse alterius, nisi post mortem, ut fit in testamento, codicillo, &c. potest ad arbitrium donantis revocari. Hinc commune axioma est jurisperitis: *Ambulatoriam esse testantis voluntatem usque ad supremum vitæ spiritum.*

Inter Conjuges.

Dicendum 4. Donationes inter vivos facta inter conjuges, tempore matrimonii jure communi sunt invalidæ, quod justè statutum est, ne conjuges importunis precibus & sollicitationibus sese spoliarent bonis, cum præjudicio & damno hæredum. Donationes verò mortis causâ inter illos, sortiuntur effectum legati, & valet juxta jura legatorum.

SECTIO IV.

De Emptione & Venditione.

Quid emptio.

DICENDUM primò, *Emptio* est contractus receptionis domini alicujus rei vel juris ab alio, dato pretio legitimo. *Venditio* autem est contractus, quo fit translatio rei aut juris domini in alterum, mediante pretio legitimo. Possunt enim tam jura, quàm

quas res vendi & emi. Pretium verò legitimum duplex est: unum quod jure taxatum est, aliud quod pendet à communi hominum æstimatione, quod & *vulgare* nuncupari solet, quod & rursus est triplex, *Pretium summum* scilicet, ultra quod omnibus pensatis ad-^{vulgare}scendi non potest: *Medium* ultra & infra quod ali-^{sumum,}quando adscendi potest & descendi: *Infimum*, sub^{medium,} quo absque vendentis damno descendi non potest. ^{infimum.}

Dicendum 2. duo sunt, quæ ad legitimam em-^{Requisita}ptionem & venditionem requiruntur. Primò ut om-^{ad debi-}nis fraus hic absit, *neque in negotio circumvenias quis* ^{lam em-}*fratrem suum, quoniam vindex est Dominus*, ut ait Apost. ^{ptionem}1. Thess. 4. quod fieri potest ex parte rei, quæ ven-^{et vendi-}ditur, ut si sit corrupta, quæ venditur pro integra, si vendi nequeat, si non sit vendentis, &c. potest quoque fraudari in pretio, si pretium jure taxatum excedatur, si ultra hominum æstimationem, quo referri possunt monopolia, si ve pacta mercatorum, ne frumentum, vinum, &c. vendere velint, ut annonæ caritatem inducant, & eo tempore pretio extraordinario res suas divendant. Item fraus illa fieri posset ex parte ponderis aut stateræ corruptæ, de qua ait Scriptura S. Prov. 11. *Statera dolosa abominatio est apud dominum.*

Dicendum 3. Licitum tamen est rem pluris ven-^{Ratione}dere ratione officii mercandi, cum illud pretio sit ^{mercatura}æstimabile, quod mercator omnem suam curam & ^{licet rem}industriam & tempus debeat distrahere, in conqui-^{plura ven-}rendis, conservandis & vendendis mercibus. Idem dicendum est, si quis rem vendat in gratiam solius ^{dere.}emptoris, quæ res vendenti est utilis, aut aliquo modo necessaria, aut commoda: Quod posset fieri ratione damni emergentis aut lucris cessantis.

Dicendum 4. Hinc quoque quandoque licitum est ^{Quando}rem minoris justò emere, si illam emat in gratiam ^{licet rem}venditoris, nec emptori multum est utilis: cavendum ^{emere mi-}tamen ne, à pauperibus aut aliis indigentibus, qui ^{nora justo.}ratione inopiæ res suas divendere coguntur, res illas

minori pretio emant , & charitatem violent. Sic etiam res aliquando minori pretio emi potest in auctionibus publicis , in quibus sicut pretium aliquando exceditur , ita aliquando minuitur , cui periculo rei Dominus voluntariè consentire censetur.

Res indeterminatè pretiâ.

Dicendum 5. Res quæ non habent certum , ac determinatum pretium , ut lapides , picturæ raræ & antiquæ , juxta alios possunt tanti vendi , quanti possunt : Rectius tamen docent ejusmodi res non posse vendi pro libitu venditoris , sed juxta commune intelligentium judicium & æstimationem.

Non licet vendere carius ob dilatatam solutionem , aut emere ob anticipatam.

Dicendum 6. Non licet carius vendere præcisè ob dilatatam solutionem , aut emere minoris ob solutionem anticipatam. Ratio est , quòd dilatio , uti anticipatio solutionis sit implicitum mutuum , & perinde est , ac si acceptam à debitore pecuniam eisdem mutues , & deinde aliquid ultra sortem accipias , uti etiam qui solutionem anticipat virtute mutui , & quando postea res pluris valens traditur , aliquid ultra sortem datur ratione mutui , quòd est usurarium , uti postea patebit.

SECTIO V.

De deposito , commodato , & locatione.

Quid sit depositum.

DICENDUM primò *Depositum* est , quando res aliqua alterius fidelitati relinquitur , & alter in suam fidelitatem recipit , ut integra postmodum recipiatur. Hinc peccat depositarius , si fidelem curam rei non habeat , aut suâ culpâ perire sinat. Peccat itidem , si contra voluntatem Domini re depositâ utatur , si suâ culpâ fiat deterior , si depositum tempore statuto integrum non reddat.

Depositum apud religiosos.

Dicendum 2. Si Religiosus , aut Abbas pecuniam aut aliquid aliud , etiam de consensu superioris servet

vet in deposito, & apud eos pereat, non tenetur communitas ad ejusdem restitutionem. Ratio est, quòd fides de deposito servando non sit data vel accepta à monasterio, sed à persona particulari, cujus delictum personam illam afficit, non autem monasterium. Quod frequenter usui venire potest, dum sæculares res suas tradunt in depositum monasteriis, aut locis sacris, quo casu non est verum depositum, cum nec monasterium, nec locus sacer censeatur res illas velle recipere in suam custodiam & fidelitatem: Si verò in monasteria aut loca sacra velut in asylum res suas invehant, tempore belli aut periculi militaris, & res illæ capiantur, ad nihil tenetur monasterium aut locus sacer, cum sæpe prætextu aut causâ talium rerum ibidem existentium monasteria & templa spolientur. Unde ad cavendas difficultates, rectè superiores aliqui inhibent, ne deposita sæcularium recipiant religiosi, aut saltem non sine consensu superioris.

Dicendum 3. *Commodatum* est, cujus usus alteri gratuitò conceditur, ut res eadem numero restituatur. *Quid sit commodatum.* Peccat autem commodatarius, si rem tempore statuto non reddat, ex qua dilatione alter damnum sentit: Si res commodata ad rectum aliquem usum, ad alium usum contra voluntatem Domini adhibeatur; si culpâ commodatarii res pereat, aut deterior fiat, extra rationem usus, ad quem fuit commodata.

Dicendum 4. *Elocatio* est contractus, quo res aliqua aut persona ad certum usum vel fructum pro pretio conceditur. Differt à commandato, quòd gratuitò rei fructum concedit, hæc verò pro pretio. *Quid sit elocatio.* Peccat autem elocator, si rem pluris justò elocat, si operarios conducens eos pauperes opprimat, mercedem defraudet, &c. Si res apud conductorem suâ culpâ pereat, aut fiat deterior, ultra usum ordinarium, elocationis. Peccat itidem, qui agro, vineæ colendæ suam operam addixit, & consuetam & debitam operam adhibere negligit.

S E C T I O VI.

. De Mutuo & Usura.

*Quid sit
mutuum.*

DICENDUM primò, *Mutuum* est traditio rei, numero, pondere vel mensurâ constantis, eo animo facta, ut statim fiat accipientis, cum obligatione, ut similis specie & bonitate restituatur. Mutuum enim fit traditione, uti donatio, commodatum, & depositum. Differt verò à commodato & deposito, in eo, quòd in deposito & locato accommodato concedatur solus rei usus; per mutuum verò transfertur rei mutuatae Dominium. Debet autem reddi eadem specie, numero & mensurâ, quia si reddatur equivalent, sed diversæ speciei, erit permutatio.

*Quid sit
usura.*

Dicendum. 2. *Usura* est lucrum immediatè ex mutuo proveniens, & juxta S. August. in Psalm. 38. *Fenerari, est mutuam pecuniam tuam dare ei, à quo aliquid plus quàm dedisti, expectes accipere.* Dividitur in expressam & implicitam sive mentalem. *Explicita* est, quando expressè de lucro ultra sortem partes perciscuntur. *Implicita* vel *mentalis*, quando ille, qui mutuatur intendit aliquid ultra sortem accipere, idque latenter in animo solum, nec expressè. Ingerit se mentalis hæc usura sæpissimè variis contractibus, qui non videntur usurarii, ubi tamen coram Deo ratione intentionis, sunt revera tales. Porro omnis usura jure divino & humano est prohibita. Unde rogat Ezechias c. 18. *Ad usuram dantem & amplius accipientem, numquid vivet?* Idem confirmat S. Scriptura variis locis. Unde præcipit Salvator Lucæ 6. *Matrimum date, nihil inde sperantes.* Jure quoque positivo humano usurarii ab Ecclesia excommunicantur, & à participatione Sacramentorum arcentur, Ecclesiasticâ sepulturâ privantur, ut patet ex variis juribus.

Dicendum

Dicendum 3. Usura non fuit licita in veteri lege *Usura numquā licita.* quoad alienigenas, sed solum à Deo permessa carnali populo, ne in foro externo possent obillas puniri, etsi in foro conscientiae peccarent mortaliter. Alii tamen ut & S. Amb. l. de Tobia c. 15. Per alienos seu alienigenas intelligunt gentes hostiles, quas iussu Dei occidere poterant, suis bonis spoliare, idque per usuras. Unde ait ibidem: *Ibi usuram exige, cui meritis nocere desideras, cui jure inferuntur arma.... ab hoc usuram exige, quem non sit crimen occidere,.... Ergo ubi jus belli, ibi etiam jus usurae.* Ex quo palam fit, Judæos crasse errare, dum licitum dicunt fenerari externis populis, idque ubivis securè practi-
cant.

Dicendum 4. Usuram illicitam esse evincit & ratio: cum enim pecunia sit de se & ex natura sua res sterilis, nec fructifera, ex eadem injustè fructus accipitur: unde usurarii tollunt quod non posuerunt, & metunt quod non seminarunt, ut de similibus ait S. Lucas c. 19. Deinde cum per mutuum res mutuata transeat in dominium mutuatarii (per mutuum enim fit meum tuum) res mutuata fructificat Domino suo, id est mutuatario, non mutuantii. Rursum illicitum est rem eandem bis vendere, & pro re eadem duplex pretium exigere: usurarius autem semel sortem æqualem recipit, & deinde lucrum usurarium pro eadem. Insuper non licet vendere rem non suam, quod usurarius facit, vendendo & accipiendo pretium pro re non sua, & quæ jam transiit in Dominium mutuatarii.

Dicendum 5. Usura committitur, quandocumque concurrunt, mutuum & pactum vel intentio ex mutuo aliquid pretio æstimabile acquirendi, tamquam ratione mutui debitum. Hinc communiter ab usura excusantur census; ubi non intercedit mutuum, sed potius species quædam venditionis & emptionis, quibus venditur & emitur jus quoddam exigendi singulis annis certam pecuniæ summam.

Deinde usura non censetur committi, quando lucrum aliquod ultra sortem non recipitur immediatè ex mutuo, sed aliunde, quod mutuo est extrinsecum: primò, si quid recipiatur ultra sortem principalem ratione damni emergentis ex mutuo. v.g. mutuatur quis alteri 100. florenos, alter debet statuto tempore illos 100. alicui tertio, idque sub pœna 10. florenorum, quos 100. ob datum mutuum dare non potest: potest ille ratione damni emergentis ex mutuo, aliquid exigere ultra sortem. Secundò aliquid ultra sortem exigi potest ratione lucri cessantis ex mutuo. Hoc tamen hîc sedulò notandum, quòd damnum illud emergens & lucrum cessans debeat hîc verè subesse, nec solùm fictò prætendi, cum sæpe sub dictis titulis palliari soleat usura.

An liceat aliquid ultra sortem recipere ratione periculi præcisè Dicendum 6. Verior est sententia & in praxi tutior, quòd non liceat aliquid exigere ultra sortem præcisè ratione periculi amittendæ sortis, aut ratione difficultatum in ea recuperanda. Hanc opinionem vocat Navarrus communem Theologorum & Canonistarum, ubi contraria est periculosa & usuris aditum pandit, cum quilibet in omni prorsus mutuo facile concipiet timendi causas, ob quas fors principalis periclitetur: vel quòd in ea recuperanda difficultates aliquas debeat subire, quas rationes semper posset obtendere, ut lucrum ex mutuo recipere posset, ut faciliùs usuram palliare.

Dicendum 7. Non licet aliquid recipere præcisè ratione carentiæ pecuniæ, aut quia pecunia numerata pretiosior est numeranda. Unde merito hæc damnata est: *Cum numerata pecunia pretiosior sit numeranda, & nullus sit qui non majoris faciat pecuniam præsentem, quàm futuram, potest creditor aliquid ultra sortem à mutuatario exigere, & eo titulo ab usura excusari.* Tale enim lucrum ex ipsa pecunia sive sorte data expectatur, ubi tamen pecunia de se est res infructifera.

*Appositio
pœna ad
mutuum.*

Dicendum 8. Licitum est in mutuo apponere pœnam,

nam, ut statuto tempore mutuum reddant. Quo casu cavendum, ne appositio illa pænæ apponatur animo usurario & in fraudem, neque pæna illa excedat rationem culpæ, & culpa mutuatarii verè subfit sæpe enim aliqui prævidentes mutuatarios fore in mora, ejusmodi pænas apponunt, ut titulum quendam prætexere possent, aliquid ultra sortem ex mutuo recipiendi.

Dicendum 9. Si mutuò detur pignus fructiferum in assecurationem, debet mutuans vel fructus talis pignoris alteri restituere, vel deducere eosdem in solutionem sortis: nisi forte ex mera liberalitate alter fructus illos donaret. Ratio illius est, Quòd aliàs nullo titulo fructus illos mutuator possit possidere aut acquirere. Deinde cum pignus illud maneat in dominio illius, qui illud dat, etiam eidem fructificat.

Dicendum 10. Veriùs docetur illicitum esse tutoribus, viduis, ancillabus pecuniam aliàs apud se quiescentem, neque negotiationi destinata, mercatori tradere, ut annuè 5. aut 6. per centum recipiant, cum securitate sui capitalis. Communis quidem praxis est contraria & valde frequens, sed ideo vetustas erroris. Sententia nostra probatur ex variis conciliis, & signanter ex Synodo Mechliniensi habitâ 1570. ubi ita habet tit. de usuris: *Quoniam usura jure divino & canonico omnibus Christianis sub pæna peccati mortalis interdicitur, neque facienda sunt mala, ut eveniant bona: Synodus statuit & ordinat, ne quis tutor aut curator sub prætextu augendi patrimonii pupillorum, aut sub eorum curatela existentium pecunias illorum sub certo lucro singulis annis ultra sortem recipiendo mutuò det, retentâ facultate repetendæ sortis, & declarando hujusmodi omnes contractus usurarios, & contra, ut præmittitur, mutuantes tamquam usurarios ad pænas juris procedendum.* Idem habet Synodus Camerac. 1586. Iprensis 1577. Audomarensis 1583. Imo Philippus 2. statuit expressè hujusmodi contractus esse nullos.

Falsa excusatio.

Neque excusari id potest, triplici contractu virtuali, quem hic fingunt alii, nempe contractu societatis, contractu assecurandi capitale, & per venditionem lucri incerti majoris, pro certo minore. Verum enim verò, quis se dicet sincerè inire societatem cum mercatore, & cum eo de sorte velle periclitari? quàm difficulter hic abstergeri potest intentio aliquid lucrandi ultra sortem? adeo ut vel propter usuræ suspensionem, & usuræ favorem, meritiò proscribenda sit contraria opinio. Hoc tamen fatendum est, illos, qui juxta aliam sententiam bona fide & sincero animo procedunt, non ita facile esse condemnandos, aut etiam à Sacramento arcendos; etsi pastores & omnes curam habentes animarum, quantum fieri potest, debeant suos subditos à similibus contractibus abstrahere & detertere.

*Usura omni-
nu est in-
terdicta.*

Dicendum 11. Falsa est aliquorum opinio, quæ docet licitas esse usuras moderatas: item quòd usura liceat cum divitiis, non item cum pauperibus: omnes enim usura cum quolibet, sacræ paginæ detestantur, nec magis licita est injustitia facta diviti, quàm pauperi, nec magis honesta, parva injustitia, quàm magna.

Dicendum 12. Usura est, si aliquid exigatur, ratione mutui, tamquam ex benevolentia aut gratitudine, etsi non ex justitia debitum: prohibetur enim omnis usura, quæ toties fit, quoties aliquid ultra sortem præcisè ratione mutui exigitur, uti hic fit: gratitudo enim suum quoque habet debitum. Undè nuper hæc ab Ecclesia est Condemnata: *Usura non est, dum ultra sortem aliquid exigitur: tamquam ex benevolentia & gratitudine debitum, sed solum si exigatur tamquam ex justitia debitum.* Quæ censura pro praxi hodierna diligenter est expendenda & annotanda.

Dicendum 13. Contractus quem vocant *mobatra*, est omninò illicitus. Tunc autem est talis contractus, dum quis non vult mutuare alteri indigenti, sed res aliquas

aliquas summo pretio vendit, qui easdem alteri vel priori revendit pretio infimo vel medio. Hic enim venditio illa simulata est implicitum mutuuum, unde dum eidem res pretio medio vel minori divenditur, lucrum ex mutuo percipitur: unde nuper ab Ecclesia hæc est condemnata: *Contractus mohatra licitus est, etiam respectu ejusdem personæ, & cum contractu revenditionis prævidè inito, cum intentione lucri.*

S E C T I O VII.

De Montibus Pietatis.

DICENDUM primò, Montes Pietatis solùm permissi sunt, & ab usuræ labe immunes, qui ad Limam Decreti Leonis X. in Concilio Lateranensi, quod incipit, *cum multiplices* ut addam postea, reducuntur. Ratio ejusmodi montes instituendi fuit, quòd pauperes Christiani ab usurariis, usuris opprimerentur: hinc primum Montem instituit in hunc finem Bernardinus de feltro Ordinis S. Francisci Reg. observ. Paduæ ad annum 1491. Cum verò idem malum in Belgio nostro serperet, & publici usurarii à rebus publ. permisi, 33. ad centum reciperent, Sereniss. Princeps Albertus cernens populum suum usuris gravatum, jussit eisdem usurariis 22. ad centum esse contentos, reniisâ illis ingenti summâ, quæ Principi ab usurariis permisis pro multâ debebatur. Melior tamen & opportunior inventa est ratio populo indigenti succurrendi per erectionem montium, qui an sine usura erigi & conservari possent, ad annum 1617. maturè à viris Ecclesiasticis & aliis jurisperitis est examinatum, & tandem liciti declarati, si ad Decretum Leonis X. supra dictum reducerentur. Pro cujus pleniori intelligentia notandum est, ad erectionem & conservationem montium varia esse necessaria, ut domus, ministri, &c. Ratione quorum aliquid ultra sortem dari posse

*Origo
montium,
& causa
institutio-
nis.*

*Ratio
montium.*

posse certum est, ut montes possint servari indemnes. Clarius hoc declarabit Leonis Bulla dicta, quæ ita habet.

**Leo Episcopus servus servorum Dei ad
perpetuam rei memoriam, S. Ap-
probante Concilio.**

„**I** NTER multiplices nostræ sollicitudinis curas,
 „ illam in primis suscipere pro nostro Pastoralis of-
 „ ficio debemus, ut quæ salubria & laudabilia
 „ ac Catholicæ fidei consona, & bonis moribus
 „ conformia, nostro tempore non solum enucleën-
 „ tur, verum etiam ad posteros propagentur: & quæ
 „ materiam scandali præbere possint, penitus succi-
 „ dantur & radicitus extirpentur, nec pullulare
 „ umquam sinantur, ea in agro Dominico & vinea
 „ Domini Sabaoth dumtaxat conferi permittendo,
 „ quibus fidelium mentes pasci spiritualiter possint,
 „ eradicatis Lizaniis & oleastri sterilitate succisa. Sa-
 „ nè cum olim inter non nullos dilectos Filios. S. Theo-
 „ logiæ Magistros, ac juris utriusque Doctores, con-
 „ troversiam quamdam, non sine populorum scan-
 „ dalo & murmuratione exortam & nuper his diebus
 „ innovatam esse comperimus, circa pauperum re-
 „ levationem, in mutu seis publica auctoritate facien-
 „ dis, qui *Montes Pietatis* vulgò appellantur, quique
 „ in multis Italiæ civitatibus ad subveniendum per hu-
 „ jusmodi mutuum pauperum inopiæ, ne usurarum
 „ voragine degluriantur, à civitatum Magistratibus &
 „ aliis Christi fidelibus sunt instituti, atque à Sanctis
 „ viris, divini verbi præconibus & laudati & persuasi
 „ ac à non nullis etiam summis Pontificibus Prædeces-
 „ soribus nostris probati & confirmati, sintne præ-
 „ fati montes à Christiano dogmate dissonantes, vel
 „ non, utrâque parte diversimodè sentiente atque
 „ præ-

„prædicante : nonnullis etiam Doctõribus & Magi-
 „stris dicentibus , eos montes non esse licitos , in qui-
 „bus aliquid ultra sortem pro libra , decurso certo
 „tempore , per Ministros hujus montis ab ipsis pau-
 „peribus , quibus mutuum datur , ex igitur , & pro-
 „pterea ab usurarum crimine injustitiave , seu aliqua
 „certè specie mali , mundos non evadere : cum Do-
 „minus noster , Evangelista Luca attestante , aperto
 „nos præcepto obstrinxerit , ne ex dato mutuo quid-
 „quam ultra sortem spectare debeamus. Ea enim
 „propria est usurarum interpretatio , quando vide-
 „licet ex usu rei , quæ non germinat , nullo labore ,
 „nullo sumptu , nullove periculo lucrum fortisque
 „conquiri studetur. Addebant etiam iidem Magistri
 „& Doctores in his montibus neque commutativæ
 „neque distributivæ justitiæ fieri satis , cum tamen ju-
 „stitiæ terminos contractus hujusmodi excedere non
 „debeant , si debeant approbari : idque præterea
 „probare nitebantur , quia impensè pro hujusmodi
 „montium conservatione , à pluribus (ut aiunt) de-
 „bitæ , à solis pauperibus , quibus mutuum datur ex-
 „torqueantur : pluraque interdum ultra necessaria
 „& moderatas in expensas , non absque specie mali
 „ac incentivo delinquendi , quibusdam aliis personis
 „(ut inferre videntur) exhibeantur. Aliis verò pluri-
 „bus Magistris & Doctõribus contra asserentibus , &
 „multis Italiæ Gymnasiis verbo & scripto concla-
 „mantibus , pro tanto bono , tamque reipubl. per-
 „necessario , modo ratione mutui nihil petatur neque
 „speretur , pro indemnitate tamen eorundem mon-
 „tium , impensarum videlicet Ministrorum eorum-
 „dem , ac rerum omnium ad illorum necessariam
 „conservationem , pertinentium , absque montium
 „hujusmodi lucro , idque moderatum & necessarium ,
 „ab his , qui ex hujusmodi mutuo commodum susci-
 „piunt , licitè ultra sortem exigì & capi posse nonni-
 „hil licere , cum regula juris habeat , quòd qui com-
 „modum sentit , onus quoque sentire debeat , præ-
 „sertim

„sertim si Apostolica accedat autoritas. Quam qui-
 „dem sententiam à fel. record. Paulo II. Sixto IV.
 „Innocentio VIII. Alexandro VI. & Julio II. Rom.
 „Pontif. Prædecessoribus nostris probatam, à Sanctis
 „quoque ac Deo devotis & in magna ob Sanctitatis
 „opinionem existimatione habitis Evangelicæ verita-
 „tis prædicatoribus prædicatam esse ostendunt. Nos
 „super hoc, prout nobis est ex alto concessum, op-
 „portunè providere volentes, alterius quidem partis
 „studium commendantes, cum hæc ad pacem &
 „tranquillitatem totius reipubl. Christianæ spectare
 „videantur, sacro approbante Concilio, declara-
 „mus & definimus, Montes Pietatis antedictos per
 „respublicas institutos & auctoritate Sedis Apostoli-
 „cæ hætenus probatos & confirmatos, in quibus
 „pro eorum impensis & indemnitate aliquid mode-
 „ratum ad solas ministrorum impensas, & aliarum
 „rerum ad illorum conservationem ut præfertur,
 „pertinentium, pro eorum indemnitate dumtaxat
 „ultra sortem absque lucro eorundem montium re-
 „cipitur: neque speciem mali præferre, nec peccan-
 „di incentivum præstare, neque ullo pacto impro-
 „bari, quin imò meritorium esse ac laudari & proba-
 „ri debere tale mutuum, & minimè usurarium pu-
 „tari, licereque illorum pietatem ac misericordiam
 „populis prædicare, etiam cum indulgentiis à S. Sede
 „Apostolica eam ob causam concessis, ac deinceps
 „alioseriam similes montes, cum Apostolicæ Sedis
 „approbatione erigi posse. Multò tamen perfectius,
 „multòque Sanctius fore, si omninò tales montes
 „gratuiti constituerentur, hoc est, si illos erigentes,
 „aliquos Censuum assignarent, quibus si non omni,
 „saltem vel media ex parte huiusmodi montium mi-
 „nistrorum, solvantur expensæ, ut ad Levio-
 „rem æris solvendi portionem medio hoc pauperes gra-
 „vari contingat: ad quos cum huiusmodi census as-
 „signatione pro impensarum supportatione erigen-
 „dos Christi fideles majoribus indulgentiis invitant-
 „dos

„doseſſe decernimus. Omnes autem Religioſos &
 „Eccleſiaſticas ac ſæculares perſonas, qui contra
 „præſentis declarationis & ſanctionis formam de
 „cætero prædicare ſeu diſputare verbo vel ſcriptis
 „auſu fuerint, excommunicationis lætæ ſententiæ
 „pœnam, privilegio quocumque non obſtante, in-
 „currere volumus: non obſtantibus præmiſſis ac
 „conſtitutionibus & ordinationibus Apoſtolicis, cæ-
 „teriſque contrariis quibuſcumque. Nulli ergo om-
 „nino hominum liceat, hanc paginam noſtræ decla-
 „rationis, definitionis, decreti & excommunicationis
 „infringere vel ei auſu temerario contraire. Si quis
 „autem hoc attentare præſumpſerit, indignationem
 „omnipotentis Dei & beatorum Petri & Pauli Apo-
 „ſtolorum ejus, ſe noverit incurſurum. Data Romæ
 „in publica ſeſſ. in lateran. S. Baſilica ſolemniter ce-
 „lebrata 15. 15. 4. nonas Maii, Pontificatus noſtri
 „anno tertio., Hucusque Bulla, naturæ ac debitæ
 „erectioni ac conſervationi Montium Pietatis ſufficientem regulam præſcribens.

Circa dictam Bullam notant DD. quòd illud, quod ultra fortem recipi poſſit, debeat eſſe moderatum, in montibus verò Belgii datur 15. ad 100. annuè, aliquando 12. quod certè non eſt ita moderatum, adeò ut ratione hujus aliquando DD. Lovaniienſibus (teſte Wiggers) judicatum ſit, excedere illam ſummam expenſarum neceſſariarum limites, ob quos aliquid ultra fortem datur in illis Montibus. Ad quod tamen dictus Doct̃or reſolvit, & cum viris peritis ait, ſummam illam omnibus conſideratis non eſſe exceſſivam, cum gravamina Montium Belgicorum ſint longè majora quàm alibi, maxime in Italia, ubi plurimi montes gratis ædificati ſunt & liberaliter dotati, & conſequenter ſine onere ſubſiſtunt. Montes verò Belgici debuerunt emere domus, levare pecunias ad eorundem erectionem, cum onere redituum, quæ proinde adaugent ſummam à mutuatariis dandam, ut mons poſſit ſervari indemnis. Hinc ruruſum ſequitur, quòd ſtipendia

Mini-

Ministrorum Montium Belgicorum debeant esse ampliora, cum eorum administratio requirat majorem curam, industriam & laborem; hoc tamen fatendum est, Montes Italicos potiori jure vocandos esse Montes *Pietatis*, quàm Montes Belgii, ut notant plurimi.

Hoc quoque addunt, summam illam 15. quæ modò recipitur à Montibus Belgicis, tractu temporis diminuendam, adeo ut etiam aliquorum opinione, deveniatur ad summam 6. & $\frac{1}{2}$ quòd tamen hîc fieri potest, absque eo, quòd ipse mons accipiat lucrum ex mutuo; declarat Wiggersex eo, quòd varia onera primis annis solvenda, postea cessarint, tum quòd plurima essent solvenda antequam officina montis aperiretur, adeoque mutuatarii debuerunt concurrere ad montem primis temporibus sublevandum: tum etiam quòd decursu temporis plures petierint mutuum ex monte, adeoque onera in plures distributa; etsi hoc fatendum sit, numquam deveniendum esse ad summam 6. cum $\frac{1}{2}$ cùm onera Montium Belgicorum sint nimia, imò si eo usque veniretur & ibi perpetuò sisteretur, non fore illud sine suspensione usuræ, uti declararunt DD. Lovanienses, teste eodem Doctore.

Sed quid modo de mutuatariis publicis sive Lombardis, qui etiam 15. in 100. annuè recipiunt? Resp. Imprimis plerique condemnant illos, qui privatâ authoritate ita mutant, quos etiam à Sacramentis, ut publicos usurarios volunt repellendos: si verò id faciant indulto principis, varii eosdem justificant ex eisdem fere fundamentis, quibus justificantur Montes Belgici: puta, quòd cum ii plerumque sint mercatores, ratione lucris cessantis possint aliquid recipere ultra sortem: Ratione obligationis non repetendi pecuniam ante annum: 3. Pro obligatione, qua debent cuivis indigenti dare mutuum pro ratione pignoris oblatis. 4. Ratione expensarum in aptanda domo ad conservanda pignora idoneâ, pro sustentatione ministrorum, qui vel pignoribus recipiendis,

cipiendis, vel restituendis vel conservandis præfunt.
 5. Pro labore in mutuando. 6. Pro periculo, quod
 obvenire potest, vel ex incuria ministrorum conser-
 vantium pignora, vel etiam ex fraude mutuario-
 rum, qui aliquando adulterina pignora pro bonis
 supponunt, uti etiam pro periculo contagii ex ve-
 stibus peste aliquando infectis; conflagrationis pig-
 norum, devastationis, deprædationis eorundem,
 &c. ratione quorum aliquid ultra sortem exigi posse
 à similibus Lombardis prætendunt plurimi. Hinc
 etiam Sixtus V. permisit Duci Sabaudie, ut mutua-
 tores publici in suis terris essent, qui etiam 18. in 100. an-
 nuè possent recipere. Similes ergo autoritate princi-
 pis, non secus ac ipsi montes, licitè mutuare pos-
 se & recipere posse aliquid ultra sortem, plerique
 admittunt, hoc tamen addito, ne tantam summam
 exigant, uti montes plerique, puta 15. in 100. cum
 illorum onera non sint tanta, quàm onera mon-
 tium. Deinde norari velim, plurimos titulos supra
 allatos esse plane insufficientes, ut aliquid ultra for-
 tem ejusmodi recipiant, qualis est titulus 2. Scilicet ra-
 tione obligationis non repetendi pecuniam ante an-
 num: Hunc enim articulum damnavit Alexander VII.
 1666. *Licetum est mutuanti aliquid ultra sortem exigere, si
 se obliget ad non repetendam sortem usque ad certum tempus*
 An ergo Lombardi illi, moderamem summæ,
 non excedant, est quæstio facti, quem viri periti con-
 siderent. Hoc tamen notandum est, Lombardos illos
 aliquando ut usurarios fuisse notatos, dum ex edicto
 Caroli V., uti refert Codex Belgicus V. *Woeker*, ab
 Ecclesia tempore divini officii arcebantur: uti etiam,
 quòd Lombardis Belgii aliquando ab Ecclesia indi-
 cta fuit restitutio obligationum, quæ poenæ eisdem
 usuræ reos fuisse & solum permisos, satis ostendunt.
 Hinc aliqui omnes ejusmodi Lombardos usuræ dam-
 nant, cum ex solo mutuo lucrum capiant & ex eo
 ditescant, & quidem lucrum excessivum. Quòd si
 quispiam opponat, etiam Montes Pietatis lucrum

ex

ex mutuo recipere & ex eo ditescere, dum continuò onera montium ex lucro mutuatariorum dato redimuntur: respondent aliam esse rationem montium, ubi Mons semper manet idem, & illud quod expensione mutuatariorum accrescit, accrescat in utilitatem pauperum, qui decursu temporis nihil ultra justam pensionem solvere debebunt, puta 6. aut 7. in 100. hoc autem à superiori autoritate pauperibus illis imponi posse docent, ut de cæterò communi necessitati opportuniùs succurri possit, uti suppetior autoritas potest imponere gabellas v. g. ad sublevanda onera rei publicæ, à quibus posterì erunt libri, quæ tamen suo sumptu subditi moderni debent extinguere. Unde & addunt, etiam similes Lombardos excusari posse, si ita à superiori instituerentur, ut montes particulares, modo prædicto; ita aliqui auctores.

Verùm illa multis displicent, & meritò, maximè his de causis: 1. Quòd Lombardi dicti possint lucrum capere ex mutuo, si adsint alii tituli, puta lucri cessantis & alii supradicti, qui revera subesse possent: nec enim omne lucrum ex mutuo continuò est usura, ut ante dictum est. Quòd verò Lombardi illi ditescant, nihil prorsus obstat, uti & mercatores mutuando & præfecti montium ditescere possunt, cum & Lombardi illi lucrum pecuniæ perdunt, quod aliàs negotiando possent acquirere, & laborem quoque subeant, ut officiales montium, ratione cuius sua stipendia obtinere possunt. Quòd verò Montes Pietatis non ditescant ex dato pretio, modo antedicto, non est mirum & omnino disparatio, cum Montibus illis desit titulus, quem habere possunt Lombardi, puta lucri cessantis. Deinde quòd pauperes moderni deberent ferre onera posterorum à multis non satis æquum judicatur. Si verò dicant pretium illud ultra sortem imponi mutuataris à superiori tamquam tributum, quòd monti applicari debet, est planè infundatum, nec videtur justum,

cum

cum eâdem ratione simile tributum imponi convenisset mutuò mercantium : deinde illis forte æquius impositum esset, quàm indigentibus & miseris, qui mutuum ex montibus petunt.

Hinc melius docere videntur illi, qui dicunt, quòd minor taxa seu pensio oriri possit, ex eo quòd, ut ante dictum est, onera decursu temporis in plures distribuuntur : itidem, quòd variæ largitiones piæ montibus relinquuntur, variū redditus remittantur, vel vitales extinguantur, aut etiam ad minorem taxam reducantur, unde fieri potest, quòd ipse mons quasi ditescat, dum onera montis minuuntur, donec ad justam taxam devenietur, nec tamen ex lucro præcisè, sed ex dictis causis. Hæ autem causæ cessant, neque locum habent in Lombardis, uti per se patet. Quare habere debent alios titulos lucrandi, puta lucri cessantis & alios prædictos, ne ex lucro præcisè ditescant, & usuram committant.

Qua propter non sunt continuò condemnandi Lombardi illi, qui autoritate superiori in commodum indigentium pecunias suas, aliàs negotiationi destinatas, mutant sub dato pignore, si moderatam solum exigant pensionem, prout merentur tituli supradicti : quantum autem mereantur ejusmodi tituli, prudentis arbitri est disjungere, ut ante est annotatum.

SECTIO VIII.

De Cambio & Censibus.

DICENDUM primò, *Cambium* nihil est aliud, quàm *Quid* permutatio pecuniæ cum pecunia. Aliud est *reale*, *Cambium reale* fit, quando revera permutatur pecunia pro pecunia, v. g. cum *nummum*, aurea cum argentea, præsens cum absenti. Aliud est *cambium fictum*, quo pecunia datur pro pecunia absente, & est

proprie mutuum; & si aliquid accipiatul ultra sortem, erit & usura. Hujusmodi cambia damnavit jam dudum Pius IV. constituit 1. ad *Cherubinos*.

Minutum Aliud insuper cambium dicitur minutum, mixtum & locale. Cambium *minutum* est permutatio numismatum diversæ rationis & speciei, v. g. permutatio aureorum cum argenteis vel cupreis, vel è contra. Item pecuniæ Belgicæ cum Italica, &c.

Locale. Cambium *locale* est, quando permutatur præsens pecunia cum aliâ, reddenda in alio loco distanti. v. g. si quis pecuniam det campsoni Antverpiæ, ut aliam recipiat Romæ.

Mixtum. Cambium *mixtum* est, quando pecunia cum aliâ permutatur, & præsens recipitur vel datur, ut in loco dissito ab alio recipiatur vel detur.

Campsoni an liceat aliquid recipere ultra sortem. Dicendum 2. Campsor licet aliquid ultra sortem numeratam recipere potest ex cambio locali aut mixto, ratione industriæ, laboris, periculi, quibus pecuniam procurat in loco distanti: item etiam ratione officii, si sit campsor publicus; tenetur enim pecunias cujusvis speciei conservare, & habere paratas ad mutuandum. Denique aliquando concurrere potest damnum emergens aut lucrum cessans.

Idem dici potest ratione periculi, laboris & industriæ, incambio minuto; uti etiam pro curâ, quâ debet pecunias cujusvis generis habere paratas.

Peccata campsonum. Dicendum 3. Peccat campsor; si lucrum excessivum, quàm legibus sit taxatum, vel communi mercatorum æstimatione, ratione cambii requirat aut recipiat: si monetam adulterinam in cambio supponat, si monopolia cum aliis campsonibus ineat, ut pretium pecuniæ augeatur, cum detrimento campsoniorum: Denique si committat cambium *ficcum*, id est usuram palliatam. Ex dictis sequitur, posse decrescere & crescere pretium pecuniæ in cambio, uti indies videmus fieri stylo burfæ, ut pro raritate pecuniæ, mercium, mercatorum, locorum, periculi, cambiorum lucra augeantur vel diminuuntur. Nec refert quòd cujusque

jusque monetæ pretium à republica sit taxatum, cum non sit taxatum ad omnem usum, quem nummi habere possunt: sed solum ut nummi sunt mensura vendibilium.

Dicendum 4. *Census*, est jus percipiendi annuam pensionem ex re aliena utili vel persona alterius. Alius ^{*Census quid & quotuplex*} est *pecuniarius*, quando solvitur pecuniâ: alius est *fructuarius*, quando fit in rebus, quæ pecunia non sunt, v. g. in avenâ, tritico, caponibus, &c. Alius quoque dicitur certus, alius incertus. *Certus* est, quando certa aliqua & determinata pensio solvitur: *incertus* autem quando incerta & indeterminata pensio debet solvi, v. g. tertia aut quarta pars fructuum, qui aliquando sunt plures aliquando pauciores, juxta fertilitatem aut sterilitatem. Alius insuper est census *temporalis*, qui ad certum tempus solum durat, alius est *perpetuus*, qui semper durat. Alius denique est redimibilis, alius irredimibilis. *Redimibilis* est, qui etsi naturâ suâ sit perpetuus, tamen redimi potest. *Irredimibilis* est, qui est perpetuus, neque redimi potest.

Dicendum 5. *Census* quicumque, certis conditionibus vestiti, de quibus infra, sunt liciti. Neque ^{*Ancensus sint liciti*} emitur pecunia per pecuniam, sed jus ad eandem annuè percipiendam, neque redditus constituitur super pecuniam, sed per pecuniam constituitur super rem aut personam, non nudè secundum se, sed ut sunt fructifera. Unde.

Dicendum 6. Ut census sint liciti requiritur, ut res ^{*Conditiones ut census sint liciti*} aut in se, aut in aliquo conjuncto sit fructifera: ne pensio excedat spem fructuum: ne re in totum aut pro parte percunte, pensio tota exigatur: ne pensio vel census minus justo emanent, quo pacto divites sæpè pauperes opprimunt, qui ob egestatem census suos pro nihilo aliquando debent divendere. Hoc tamen addo, quòd diversas condiciones ad legitimos census addant diversæ leges, diversorum regnorum, unde quæ dicta sunt de censibus & cambiis generalia sunt & juxta jus naturæ.

S E C T I O IX.

De Testamentis & Legatis.

*Quid sit
testamen-
tum.*

DICENDUM primò, *Testamentum* nihil est aliud, quàm dispositio voluntatis de eo, quod quis post mortem fieri vult. Differt propriè à *Codicillo* quòd per hoc testamentum soleat explicari, immutari, &c. Jure antiquo requirebantur 7. testes masculi, puberes & rogati: modo sufficiunt duo testes, præcipuè si testamentum sit ad pias causas: Imò in talibus testamentis juxta multorum opinionem nedum duo testes sunt requisiti, sed satis hìc esse, quòd de jure naturali hìc est sufficiens, scilicet potestas & libertas in testante, & capacitas in instituto hærede. Quæ dicta intelligenda sunt de foro conscientiae, aliàs jus externum etiam Canonicum requirit 2. testes, non quidem ut testamentum valeat in foro conscientiae, sed ut probari possit in foro externo. Imò testamentum factum ad causas non pias, etiamsi solemnitatibus de jure requisitis careat: probabilius tenet, cum juxta omnes Doctores & Canonistas tale testamentum pariat obligationem naturalem, idest obligationem in conscientia. Solum enim a jure inducta est solemnitas testamentorum, ut possit ultima voluntas testatoris in foro externo probari, ut voluntati ejusdem certius satisfieri posset, & fraudibus hominum hoc pacto securius obfisteret. Hinc etiam talibus testamentis solemnitatibus debitis destitutis, denegant jura actionem, ne multiplicarentur aliàs lites, ad excludendas machinationes, quibus homines conati fuissent intervertere alterius ultimam voluntatem. Hoc tamen notari potest, in his partibus edictis Principum sufficere Parochi vel Notarii, & duorum testium, & testatoris subscriptione probari testamentum, aut Parochi loco aliorum 2. Testium.

*Ad quid
solemnita-
tes testa-
mentorum*

Dicenda

Dicendum 2. Testari possunt omnes ii, qui habent ^{Qui possunt testari} Dominium bonorum, neque juris dispositione prohibentur. Hinc testari non possunt, qui ratione carent, impuberes, Filius Familias de bonis, quorum non habet Dominium proprietatis; in nostris tamen pactibus testari possunt de omnibus illis, quorum habent Dominium proprietatis, licet Pater habeat usum fructum. Item testari non possunt ii, qui commiserunt aliquod crimen, cui de jure annexa est testandi inhabilitas, quales sunt, qui insecuti sunt hostiliter Cardinales, eorum fautores, damnati ob libellum famosum: damnati ad mortem per consuetudinem testari possunt, si eorum bona non confiscentur, quod communiter fieri solet in nostris partibus, dum pœnâ capitis debent plecti.

Religiosi etiam ad Episcopatum promoti, non ^{Episcopi Religiosi Clerici} possunt testari nisi ex dispensatione Pontificis, idque solum ad causas pias. Beneficiati verò sæculares Clerici, testari possunt de bonis suis patrimonialibus, & de aliis, quæ suo labore conquiesierunt, uti & de iis, quæ congruæ sustentationi subtraxerunt. De iis verò, quæ honestæ sustentationi supersunt, ex consuetudine testari possunt, sed solum ad pias causas: unde peccant mortaliter beneficiarii omnes Ecclesiastici, si de dictis bonis disponant testamento ad causas prophanas, relinquendo ea consanguineis divitibus, vel sinendo eos ab intestato succedere. Si enim mortaliter peccent, ejusmodi bona dando in usus prophanos, quid ni & mortaliter delinquent eadem per testamentum relinquendo in similes usus? adde, quòd vel illorum bonorum non sint Domini, vel si tales supponantur, tamen Domini sunt cum onere eadem elargiendi ad pias causas: unde & hoc passim à piis observari videmus: *quatinus*, ait Lessius in suo opere posthumo V. *testamentum*, casu 8. num. 21. *Doctores Lovanienses dant aliis bonum exemplum: qui etsi pleraque sua bona labore & industria sua comparaverint, tamen quia simul aliquod beneficium*

beneficium Ecclesiasticum habuerunt, fere omnia relinquunt ad pias causas pro salute animæ suæ & bono Ecclesiæ: & parum relinquunt suis consanguineis, etsi tenuibus.

Secundum autem sententiam, quæ tenet beneficiatos illos non esse Dominos fructuum debitæ sustentationi super excedentium, dispositio de illis facta ad causas non pias, erit invalida; aliàs erit quidem valida, etsi, ut dixi, illicita.

Qui possint institui hæredes.

Dicendum 3. De jure non possunt institui hæredes, qui sunt hæretici, eis credunt, apostatæ, qui ob crimen est intestabilis activè, etiam est talis passivè: Fratres Minores de observantia, Cappucini, Professi in Societate, neque illorum communitas: bene tamen domus professæ Societatis: uti etiam potest in eorum favorem hæreditas relinqui, ut per executores testamenti, testatoris bona vendantur, & illis detur eorundem pretium. Idem est de spuris, qui à patre non possunt institui hæredes, neque à matre, nisi per subsequens Matrimonium, aut indultum Principis legitimentur. Potest tamen illis relinqui portio, quæ necessaria est debitæ eorum alimentatationi.

Exhæredatio puerorum.

Dicendum 4. Olim necesse fuit liberos instituere hæredes, aut nominatim exhæredare, expressâ causâ exhæredationis, hodie verò satis est, illos præterire, sic tamen ut iis detur querela inofficiosi testamenti facti, & ad habendam suam legitimam, idest tertiam partem bonorum si sint 4. pueri, aut pauciores, vel semi, si sint plures.

Qui possint conficere testamentum.

Dicendum 5. Testamentum conficere possunt, omnes qui testari possunt: Consulendum tamen est, ut notarii periti ad confektionem illius vocentur; ut etiam, ne Parochi vel vice-Parochi, facile se illi negotio ingerant, cum experientiâ teste, maxima pars litium ratione testamenti provenientium, inde nascatur, quòd notarii aut Parochi minus periti, terminos necessarios non adjungant, dubios ingerant, neque mentem testatoris satis exponant.

Dicen-

Dicendum 6. Si quis Hæreticus faciat hæredi testamentum eâ conditione, ut dentur ipsi 1000. Florensi si nubat, si verò Religionem ingrediatur, aut in fide Catholicâ educetur, solùm vult solvi 100. si hæres ille, habeat jus succedendi, illa conditio habetur pro non adjecta, utpote quæ in odium Religionis & fidei est adjecta.

Testamentum cum conditione turpi.

Dicendum 7. Executor testamenti potest esse masculus & foemina, Laïcus & Clericus, etiam Religiosi, sed de sui superioris licentiâ, & quidem Generalis, si sit societatis, Minores autem nullo modo possunt. Si verò nullus executor à testatore sit positus, executio spectat ad hæredes. Tenetur autem statim post hæreditatem aditam, exequi testamentum, idque intra annum, nisi iusto impedimento excusetur. Legata verò pia exequi debet intra 6. menses, etiamsi hæreditas non sit adita. Unde si in eo sint negligentes, ab utroque iudice civili & Ecclesiastico possunt compelli. Tenetur verò executor testamenti, omnia sincerè exequi juxta mentem testatoris; neque illis debetur salarium, cum sit officium gratuitæ amicitiae, nisi fortè ex executione damnum sentiant. Quòd si rogatus testamentum exequi renuat, privatur legato, quod subinde executori testamenti relictum est, & datur alteri executori.

Executor testamenti

SECTIO X.

De Negotiatione & contractu Societatis, ludo & sponsione.

DICENDUM primò *Negotiatio* est, cum quis rem aliquam sibi comparat eo animo, ut eandem non mutatam vendat & inde lucretur. Licitam esse negotiationem satis constat, etsi res sit periculis plena: unde Eccli. 26. dicitur: *Duæ species difficiles & periculosa mihi apparuerunt; difficile exiit negotians à*

Quid sit negotiatio

An sit licita,

Clerici in negligentia (salutis procurandæ) & non justificabitur
verdicta. caupo à peccatis. Hinc etiam Clericis negotiatio est
 interdicta, qui ne quidem per alios negotiari licite pos-
 sunt, cum sit eadem ratio prohibitionis, ne lucris
 inhiando incidant in laqueum diaboli & desideria
 multa inutilia & nociva, quæ mergunt homines in
 interitum & perditionem, ut ait Apost. 1. Thim. 6.

Quid con- Dicendum 2. *Contractus societatis* est conventio duo-
tractus so- rum vel plurium, ad conferendum aliquid in com-
cietatu. munem quæstioni. Unde singuli debent in commune
 aliquid conferre, sive pecuniam, sive laborem & indu-
 striam &c. Deinde debet illud conteri in unum, eo
 animo, ut sit unusquisque partialiter Dominus sortis
 in unum collatæ. Et lucrum ex sorte consecutum sit
 commune omnibus. Denique debet fieri divisio lucri,
 juxta illud, quod quisque contulit, quæ proportio
 desumi potest ex æstimatione prudenti laboris, pec-
 unia & aliorum, quæ quis contulit.

Quid lu- Dicendum 3. *Ludus* est contractus, quo ludentes
dit. inter se paciscuntur, ut victori cedat, quod uterque
 deposuit. Quidem verò ludi jure civili prohibentur
An lici etiam laicis, scilicet ii, qui fortunâ magis, quàm indu-
tus. striâ & arte reguntur, uti est lusus alearum, eo
 quod ex simili ludo sæpè soleant oriri iræ & blasphem-
 iæ, lites & pugnae, quod per illos substantia do-
 mestica sæpè soleat exhausti, & deinde diverti ad
 furta & latrocinia. Idem majori jure prohibitum est
 jure Canonico Clericis, uti statuit Synodus Trid. sess.
 22. c. 1. reform. neque tamen illis prohibitum est ali-
 quando recreationis causâ aleis aut chartis ludere, sed
 solum ne ludendi faciant professionem.

Conditio Variæ tamen sunt conditiones requisitæ ad debitum
justi ludi. lusum. 1. ut sit res illius, qui eam deponit. 2. Ne alium
 per fraudem ad ludendum pertrahat, fingens se esse
 lusus ignarum, ubi longè peritior est alio. 3. Ut absint
 fraudes contra leges ludi, exceptis illis, quæ commu-
 ni consensu partium censentur sibi condonari. Quod
 si quis fraudibus, aut injuriâ vicerit, tenetur lucrum
 resti-

restituere : non tamen si ludo vetito sit lucratus , quia etsi jura certum ludum vetent , non tamen irritant , aut annullant.

Dicendum 4. *Sponsio* est , quando duo de eventu aliquo , aut veritate alicujus certant & contendunt , aliquid deponentes , ut sit illius , qui veritatem est affecutus. Debet autem sponsio esse de re utrique dubia , nisi alius certitudinem alterius , quam obtendit , condonet : deinde , ut eodem modo accipiat res , de qua fit sponsio. Spondere possunt ii , qui possunt de re aliquâ , quam deponunt , liberè disponere.

Quid sponsio.

SECTIO XI.

De affecuratione , fidei jussione , pignore & Hypotheca.

DICENDUM primò , *Affecuratio* est contractus , quo quis rem alterius in suam custodiam suscipit , obligando se ad eam conservandam , idque gratis , vel certo pretio , si perierit. Debet autem affecurator esse incertus de eventu aut periculo , aliàs iniquè lucrum ex affecuratione reciperet : idem rectius docent , si certus sit privatâ notitiâ de eventu rei. Sic etiam , qui scit rem suâ certò periisse , non potest pacisci cum alio de affecuratione. Ratio est , quòd obligationem quam petit , novit esse impossibilem , cum affecuratio supponat rem adhuc subiacere periculo , cui non amplius subjacet , cum sit in salvo in casu priori , vel perierit in posteriori. Hoc tamen in hoc contractu notandum est , ne plus in affecuratione recipiatur , quàm periculi & laborum quantitas prudenter æstimetur.

Quid affecuratio.

*Quid re-
quiritur
ad rellam
affecura-
tionem.*

Dicendum 2. *Fidei jussio* , est contractus quo aliquis alienam obligationem in se suscipit , debitore principali non solvente. Jure civili perficitur contractus ille verbis , jure Canonico autem sufficit consensus inter-
nus etiam alio modo expressus hoc tamen notandum est , quòd fidei jussor non possit plus obligari , quàm ipse

Quid fidei-jussio.

*Qui pos-
sit fide-
jubere.*

ipse principalis, adeo ut, si contractus aut obligatio principalis sit invalida, etiam fidei jussio erit invalida. Possunt autem fidejubere omnes ii, qui possunt principaliter obligari, nisi per legem aliquam ipsis sit prohibitum. Hinc illicita est fidei-jussio uxoris pro marito, si fide-jubeat absque instrumento publico, vel per instrumentum absque 3. Testibus: Sic etiam minores non possunt fide jubere, nisi pro Patre incarcerato; si verò pro alio fidejubeant, obligabuntur quidem naturaliter, sed beneficio restitutionis in integrum, possunt fidei jussionem revocare. Episcopi & Clerici possunt fidejubere in damnum proprium, sed non in præjudicium Ecclesiæ: Religiosus verò non potest fidejubere sine licentiâ superioris, & majoris partis capituli: fidei-jussioni aliàs factæ, Conventus non tenetur, nisi cedat in ipsius utilitatem.

Potest autem pro fidejussione aliquid exigi, cum sit pretio æstimabile, alienam obligationem in se suscipere. Quòd si debitor suâ culpâ non solvit, tenetur fidei jussori qui pro eo solvit, ad compensationem debiti soluti, & damnorum & expensarum: Si verò sine suâ culpâ non sit solvendo, videtur solum obligari ad compensandum debitum à fidejussore solutum.

*Quid pi-
gnus.*

Dicendum 3. *Pignus* est contractus, quo debitor dat creditori rem aliquam mobilem, aut immobilem, ut sit pro debito obligata, & ex ea solutio peti possit, differt verò ab *hypotheca*, quòd hæc propriè sit rei immobilis, illud verò rei mobilis: in jure tamen illa duo passim æquivalent. Cum verò pignus aut hypotheca sit res alterius, non licet eâ uti contra Domini voluntatem, cum hypotheca solum detur ad securitatem, non verò ad usum: quòd si eâdem utatur, debet usum illius computare in sortem deductis expensis. Si autem quis pignus accipit, potest illud iterato oppignorare, sed non pro majori quantitate: Licitum quoque est eandem rem pluribus oppignorare, si sit sufficiens ad pluribus solvendum.

*Quid hy-
potheca.*

Oppignorari non possunt, nisi quæ possunt vendi,

v. g. non possunt oppignorari Ecclesiæ, cœmeteria, sepulchra, jus patronatus, & hoc ideo, quod similia non sint res, quibus debitum pecuniarium possit compensari. Res tamen Ecclesiæ pretiosæ, v. g. calices, casulæ, &c. Non possunt oppignorari, nisi in necessitate, in qua & possunt vendi. Peccant tamen graviter Superiores Ecclesiastici, qui res sacras sine sufficienti necessitate oppignorant, si neque ad hoc urgeat ratio boni communis, sed aliquando proprium interesse.

CAPUT SEPTIMUM.

De Judiciis.

SECTIO PRIMA.

De Judicio temerario, an & quale sit peccatum.

DICENDUM primò, *Judicium temerarium* est illud, quod de alterius malo ex levibus fundamentis & rationibus concipitur, aliàs si ad illud concipiendum rationes sufficientes suppetant, non erit temerarium, sed rationale judicium.

Judicium illud temerarium cum advertentiâ saltem interpretativâ de gravi malo proximi, est peccatum mortale. Patet hoc ex sententiâ Salvatoris, Math. 7. & Lucæ 6. qua judicio temerario interminat condemnationem & judicium, dum ait : *Nolite judicare, & non judicabimini : nolite condemnare & non condemnabimini.* Imò Jacobi c. 4. apertè dicitur, *qui judicat fratrem, detrahit legi* : Ratio hujus est, quòd gravis injuria irrogetur proximo, dum sine causâ habetur improbus : adeoque homines ægerriimè ferunt

runt, dum noscunt de se falsam haberi suspicionem de crimine. Adde, quòd judicium illud, soleant sequi graviora mala: exinguit alterius bonam famam, contemptum proximi causat, & quodammodo judicium Dei usurpatur, cujus solius est probare renes & corda, & cui proximus stat aut cadit, ut ait Jacobus c. 4.

*Suspicio
de proxi-
mi malo.*

Dicendum 2. Dubitatio aut suspicio infundata de gravi malo proximi est peccatum mortale, idque perinde est, siue suspicio illa nascatur ex errore intellectus, siue ex pravo affectu voluntatis. Ratio est, quòd utrobique gravis injuria irrogetur proximo: si enim ex errore intellectus judicium illud procedat, in eo culpabile est, quòd rationes insufficientes non rectè perpendat, & ex eo judicium temerarium ferat. Neque dici potest, S. August. tract. 90. in Joan. dicere, quòd ejusmodi judicia pertineant ad tentationem humanam, cum solum agat de suspicionibus planè indeliberatis, quæ menti nostræ assidue ingeruntur, prout alii motus primo primi, unde addit: *De rebus ipsis rectè sentiendum esse, & amandum quod amandum est, & detestandum, quod detestandum est*, Hujusmodi indeliberatis moribus neglectis & sepositis. Idem dicendum est de dubitatione circa malum alterius, cum injuriosum sit, absque causâ judicare alicujus probitatem esse ambiguum, nec posse prudenter judicari aliquem esse probum.

Hoc tamen notandum est, si suspicio illa non sit firma, sed fluctuans, non esse condemnandam peccati mortalis, ut dum rogatus dicit, se non habere pro certâ rem, de qua suspicatur: aliàs, si rogatus dicat, se rem illam habere pro certâ, erit peccatum grave, si malum, quod suspicatur sit grave.

*An dubia
de bonis
interpretari
in
partem
melio-
rem.*

Dicendum 3. Si utrimque sit æquale dubium de bonitate aut malitiâ alterius, debent iis dubia interpretari in partem meliorem, cum ut ait D. Thomas melius sit in dubio frequenter falli, bene de alio opinando, quàm semel malè opinando decipi. Aperitè
id

Id docet S. Aug. de Serm. Domini in monte l. 2. c. 18. ad illa : *Nolite judicare : hoc loco ait , Nihil aliud nobis præcipi existimo , nisi ut ea facta , quæ dubium est , quo animo fiant , in meliorem partem interpretemur .* & S. Bern. Serm. 40. in cant. *Etiamsi , ait , perperam quid factum deprehendas , nec sic judices proximum , magis autem excuso . Excusa intentionem , si opus non potes : puta ignorantiam , puta subreptionem , puta casum &c .*

Dicendum 4. Dum tamen agitur de vitando damno , aut adhibendo remedio , dubia sæpe sunt in deteriorem partem interpretanda . Sic dum quis hospitem ignotum domi recipit , rectè cavemus rebus nostris , ac si dubia foret ejus probitas , non tamen illum æstimando esse furem aut improbum . Sic etiam , aliquando superiores quædam dubia recipiunt in partem pejorem , & catenus injungendo pœnitentias sese exterius gerunt , in ordine ad adhibendum remedium , ut imposterum ab omni mali specie abstineant , etsi in hoc subinde peccent quòd hoc pacto subditos exasperent , eos suspectos aliis reddant , & aliquando efficiunt tales , quales eos æstimare videntur .

SECTION II.

Quenam requirantur ad debitum judicium.

DICENDUM primò , Ad debitum judicium requiritur jurisdictio Judicis in Judice respectu ejus Requisita ad judicium. cui judicium fert : Hinc peccant graviter , qui sibi non subjectos judicant aut etiam exemptos , v. g. sæcularis Clericum , vel Laicum ad Ecclesiam , ut ad asylum confugientem , unde vi vel fraude extrahitur , dum usurpant alienum judicium , cui proinde gravis censetur injuria irrogari .

Dicendum 2. Requiritur quoque in judice debita scientia legum , quibus in judicando debeat se conformare .

formare, aliàs exponit se periculo proximo iniquè judicandi, & alteri parti injuriam irrogandi. Hinc si talis confessorio se sistat, vel officii depositionem injungat Confessarius, vel ut se sedulo aptiorem officio suo reddat, adhortetur. Deinde, si talis suâ imperitiâ parti Innocenti litem adjudicat, aut alio quovis modo injuriosam alteri sententiam ferat, tenetur alteri ad restitutionem, si suâ admonitione alium viâ appellationis integrum & indemnem redde-
dere nequeat.

*Obligatio
judicis.*

Dicendum 3. tenetur Judex in conscientia causas criminales expedire, & litem absolvere, quàm citò potest, cum ex dilatione culpabili, soleant à partibus graves & inutiles expensæ extorqueri.

*Officia
judicis.*

Dicendum 4. Potest judex adversus crimina procedere, viâ *Inquisitionis*, *denuntiationis*, & *accusationis*. Viâ *accusationis*, Si actor spondeat se crimen, ejus alium accusat, probaturum. Viâ *denuntiationis*, Quando aliquis crimen detulit, qui non vult suscipere in se onus probandi. Viâ *inquisitionis*, Dum judex ratione officii sui, inquit an bene se gerant sibi subditi, vel quisnam fuerit author criminis commissi. Inquisitio autem illa, alia est generalis, alia specialis, alia mixta. *Generalis* est, dum judex in genere inquit, num communitas sibi subiecta, bene se gerat. *Specialis* dum de certâ personâ, aut de certo crimine inquitur. *Mixta*, Quando vel solum crimen est speciale, vel sola persona: v. g. quis homicidium fecerit, an Petrus servet Leges Reipublicæ. Hinc

*Quotum-
plex sit
inquisitio*

Dicendum 5. ut judex legitimè procedat viâ inquisitionis specialis, prærequiritur quædam de crimine infamia, si sit inquisitio tendens ad puniti-
nem: secus si sit ad malum aliquod impediendum; v. g. quando agitur de conferendo beneficio, officio, &c. Quo casu licitum est inquirere, an nulla subsint conferendi impedimenta, etsi nullus de iis rumor antecesserit. Ratio autem prioris est, quòd judex
de

debeat procedere ad punitionem criminum ex scientiâ publicâ, quæ solùm habetur vel per accusationem, vel confessionem rei in judicio, vel per infamiam aut facti evidentiam: aliàs quisque de injuriâ posset conqueri, dum fama ejus sine causâ haberetur per inquisitionem suspecta. Infamia verò hîc requisita, prudenti æstimatione censenda est, ut si per majorem partem communitatis sit sparsus rumor; unde hîc non sufficiunt 2. aut 3. testes, quia adhuc res posset esse occulta; sed requiritur plurimorum, & quidem probatorum virorum testimonium.

Excipiuntur tamen à dicto casu, si reus in judicio etiam coram paucis crimen sit fassus, vel crimen aliqujus per inquisitionem generalem sit apertum, in casu hæresis & Apostasiæ, in crimine læsæ Majestatis, dum quæritur de morte Domini contra servos & homicidium est occultum; Imo & ex denunciatione publici officialis duntaxat, procedi potest ad inquisitionem specialem, quem usum probant diversorum regnorum consuetudines, & necessarium est publicæ tranquillitati. Unde quando passim docent DD. quòd absque infamiâ præviâ procedere non liceat ad inquisitionem specialem, vel intelligi debet quando inquisitio solùm intenditur in ordine ad punitionem, vel nisi inquisitio illa aliàs sit necessaria ad bonum commune.

Exceptio à dictâ regula.

SECTIO III.

Quomodo possit judex reum subijcere torturæ,

DICENDUM primò, Non potest judex subijcere reum torturæ, nisi adsit semiplena probatio, & sit homo qui torturæ subijci possit. Censetur verò adesse semiplena probatio, quando unus testis, omni exceptione major testatur se vidisse crimen committi. Ratio hujus est, quòd tortura sit solùm intro-

Quid requiratur ad reum subijciendum torturæ.

introducitur in subsidium probationis, ut confessio rei suppleat, quod probationi perfectæ deest. Nec refert, quòd fieri quandoque possit, quòd innocentes aliquando torturæ subjiciantur, cum in rebus humanis non possint omnia incommoda vitari, nec ideo tortura damnanda sit: uti fieri potest, quòd innocens damnetur, neque ideo relinquenda est justitia. Quamvis hoc quoque notandum est, quòd tortura adhiberi non possit, nisi quando agitur de criminibus, quæ merentur plecti & puniri pænâ graviore, ut mortis vel perpetui exilii, aliàs non potest per torturam iussigi pœna, quæ sit major quàm pœna correspondens crimini, cujus confessio per torturam extorquetur.

*Quinam
tortura
subjici
non pos-
sunt.*

Dixi, *Et sit homo, qui torture subjici possit*: Varii enim sunt qui torqueri non possunt, ut sunt viri illustres, eorumque filii, Doctores, milites, mulier quæ sit gravida, necdum à partu satis robusta, &c.

*Alia, qua
supple-
ment
simple-
nam pro-
bationem.*

Dicendum 2. Ad subjiciendum reum torturæ, non requiritur aliquando semiplena probatio, si scilicet sit fama publica de authore criminis, vel si reus extra judicium crimen Confessus esset, vel coram iudice non competenti, item quando 2. vel 3. focii criminis, illud alteri affingunt & asserunt: deinde, si quis crimine commissio fugiat, vel si habeat graves inimicitias adversus alium, & insuper ante alteri minatus esset: vel denique judicia talia, quæ prudenti æstimatione persuadent, eum crimen commisisse: quale judicium nondum est, si occisus coram aliquo emittat sanguinem ex vulnere inflicto, cum aliquando id fieri possit ex causâ naturali, imò aliquando arte & astutiâ Diaboli. Idem dic de probatione per aquas, quando fæminæ magiæ suspectæ certo modo immerguntur, si demergantur, absoluntur, si supernatent, judicantur reæ, quod aliquando quoque ope dæmonis fieri posse certum est.

*Potest reus
supra tor-
queri.*

Dicendum 3. Potest reus sæpe torturæ subjici, si con-

confessus est, postridie revocet; si verò tertio tormentum sustinuerit, non potest amplius torqueri, cum hoc casu præsumi debeat innocens, & solo tormentum metu forsan crimen esse confessum.

Dicendum 4. Judex tenetur in conscientia, seposito omni affectu judicare juxta leges; unde pœnam minuere vel augere nequit, nisi aliquando per epikiam judicare possit, id expedire ad bonum commune. Ob hanc rationem rectè statutum est, ne quis posset esse judex in eadem causâ in qua est advocatus, cum faciliè judicium ferret pro parte, cui patrocinator. Si verò sententiæ hinc inde stent probabiles, non potest sequi minus probabilem, sed sequi debet probabiliorē: Ratio est, quia judex ex officio litem v. g. illi abjucare debet, qui juxta allegata & probata videtur sibi magis nocens: aliàs esset acceptor personarum. Unde meritò à Sanctissimo P. Innocentio XI. damnata est nuper hæc sententia: *Probabiliter existimo, Judicem posse judicare juxta opinionem etiam minus probabilem.* Neque hic distinguendum est, sitne judex superior, aut inferior, eò quòd inferior possit juxta minus probabilem opinionem procedere, aut quòd ad superius tribunal reus possit appellare: perperam inquam, eò quòd judex inferior eodem onere judicandi ex officio sit obligatus, ac superior, quod judicium ferre debeat juxta opinionem, quæ sibi videtur potior & rationi magis consona.

Quòd, si hinc inde stent rationes pro utraque parte æquè plausibiles, non poterit pro suo libitu totum alteri adjudicare, cum cuilibet habeat jus ad rem æquale: unde vel partes hortari debet ad compositionem, vel aliquando eam injungere, vel rem divisionem patientem ex æquo dividat, & procedat juxta axioma juris: *Si partium jura sint obscura, potius favendum est reo, quàm actori.*

Dicendum 5. Non potest judex ad mortem condemnare eum, qui juxta formam juris probatus est reus.

Judex tenetur la-gibus se-confor-mare.

Nemo potest esse judex & Advocatus in eadem causa.

Judex debet judicare juxta opinionem, quæ sibi videtur probatior.

Quid debet in causa utrumque æquale.

Quid agat de reo probato non reus.

ante, quæ
privatim
noscit esse
innocen-
tem.

reus, quem tamen privatâ scientiâ noscit esse innocen-
centem. Contrarium est D. Thomæ, cujus salvâ
authoritate, verior probatur dicta opinio: primo
quidem, quòd generaliter sit dictum Exodi 23. *Inson-
tem & justum non occides, quia averter impium.* Et li-
cet reus ille per testes probetur nocens, tamen illa
probatio nihil obesse potest ejus innocentix. Deinde,
occidere directè & ex proposito innocentem
est intrinsecè malum, uti & concumbere cum alienâ,
quacum non licet concumbere, etsi millies probaretur
esse tuam, si tu solùm noscas esse alienam. Unde
debet judex ille omnibus modis conari eum liberare,
aperiendo carcerem, impediendo accusationem,
sententiam extrahendo, &c. Quæ si nequeat
exequi cum effectu liberationis, non potest talem
morti adjudicare, etsi foret periculum officii perden-
di. Excipiunt tamen hic aliqui, quando solùm agi-
tur de pœnâ pecuniariâ, quo casu si falsam proba-
tionem impedire nequeat, possit secundùm proba-
ta procedere, etsi sciret eum esse innocentem: Ratio
est, quòd respublica possit ob bonum commune
disponere de bonis fortunæ subditorum, ea de uno
transferendo in alium, quale bonum hic esse potest,
puta ne forma judicii cum populi scandalo perversa-
tatur; cui adde, quòd viâ appellationis ejusmodi
bona repeti possint, secus est de vitâ.

Dicendum 6. E contra non potest condemnare
eum, quem etsi privatâ scientiâ sciat esse nocentem,
tamen formâ juris probatus est innocens: Ratio est,
quòd judex judicare debet ut persona publica, ideo-
que procedere juxta scientiam publicam, habitam
ex allegatis & probatis. Neque illa ratio quidquam
obstat conclusioni s. jam dictæ, quasi judex ille
falsam accusationem & probationem innocentis de-
beret sequi, dum certò scit eum esse innocentem:
cum possit sequi, imò debeat scientiam publicam in
absolvendo, etsi non in condemnando, ne id, quòd
pro justitia introductum est, cedat in injuriam.

Dicen-

Dicendum 7. Præcipue in judice requiritur cum *In judice*
 scientia, fortitudo & Constantia: *fortitudo*, ut for- *requiritur*
 titer sciat malefactoribus resistere: hinc dicit scri-
 ptura Eccli. 7. *Noli querere fieri judex, nisi valeas vir-*
tute irrumpere iniquitates: constantia, ne se sinat unà
 cum justitia muneribus aut inordinato affectu cor-
 rumpi, unde & jure positivo munera judicibus dari
 est interdictum, ob periculum judicii pervertendi.

S E C T I O I V.

De Accusatore, & testibus in judicio adhibendis.

D I C E N D U M primò, In accusatore requiritur an- *Accusa-*
 te omnia veritas, ne alterum deferat aut accu- *tio debes*
 set de falso crimine: aut etiam de tali, quod suffi- *esse vera.*
 cienter probare nequit. Deinde requiruntur constantia,
 ne sine causa ab accusatione desistat, quam jam in-
 choavit, qualis causa esse potest, si incipiat novisse
 se errasse, aut dubitare incipiat, aut si videat se cri-
 men non posse probare.

Dicendum 2. Accusare non possunt, proditores, *Qui ac-*
 excommunicati, infames, filii, servi, suos Do- *c sure non*
 minos aut parentes, Clerici in causa sanguinis, &c. *possint.*
 Alii accusare possunt, non tamen debent, si sint
 privatæ personæ, nam aliqui accusare tenentur ex
 officio, ut fiscalis, & alii ad id conducti. Excipe ta-
 men, si ad hoc accusatio sit necessaria, ut bono
 communi consulatur, vel innocentia alterius, te-
 netur eo casu privatus ad accusationem.

Dicendum 3. Ad plenam in judicio probationem *Capacitas*
 requiruntur 2. testes idonei, quorum capacitatem *testium,*
 hi versiculi insinuant:

Conditio, sexus, ætas, discretio, fama,
Et fortuna, fides, in testibus illa requiruntur.

Hinc à testando in jure Canonico in causa crimi- *Incapa-*
 nali repellitur mulier ob fragilitatem sexus, & in- *cest testes,*
 genii

genii mutabilitatem. Deinde minor 20. annis, servi, inimici, infames, sanguine juncti & domestici, nisi ad reum defendendum: perjuri, socii criminis, personæ viles & inopes, de quibus suspicio esse potest, quod pecuniâ possent corrumpi; semi-fatui & deliri, &c.

*Obligatio
testandi.*

Dicendum 4. Tenetur quis idoneus testari, ex charitate quidem si hoc exigit alterius innocentia, quam facile probare quis posset: ex obedientia verò, dum princeps id præcipit, etiam in causa criminali, quo casu & Princeps præcipere posset, ut secum judicet & reum condemnet. Sic in Anglia moris est, ut cum alterius nationis reum condemnant, ejusdem nationis quendam rogent & angarient, ut ipsi cum judice juxta conscientie dictamen judicium ferant, propositâ & ostensâ prius criminis probatione, & legibus tali crimini constitutis. Unde, si quis ad testandum citetur, tenetur comparere, nec potest se occultare, cum ad minimum peccet contra obedientiam, & aliquando id exigere posset ratio boni communis.

*Casus,
quibus te-
stari non
tenetur.*

Dicendum 5. Variis quoque casibus testari non teneris, etsi legitimè etiam de crimine rogeris: primo, si illud noveris ex sola confessione, sub secreto naturali, si non possis, nisi cum ingenti damno tuo vel tuorum testari, si crimen à viris fide non satis dignis percepisti, si crimen per injuriam accepisti, v. g. litteras aperiendo, cogendo aliquem ad revelationem. Imò aliquando peccat testis, testando & affirmando id, quod ignorat, si pretium pro testando aut non testando recipiat, si scienter testatur falsum, quo casu tenetur ad restitutionem damnorum alteri ex sua injuriosa accusatione provenientium, quorum est causa efficax, vel saltem impedire, ne talia damna alteri obveniant. Aliud esset si inadvertenter aut ignoranter falsum testatus esset, aut testimonium ejus nihil effecisset, quo casu non fuisset causa efficax illorum damnorum.

SECTIO

S E C T I O V.

De Reo & Advocato.

DICENDUM primò, Tenetur reus legitimè interrogatus, candidè & sincerè profiteri veritatem, cùm quivis teneatur obedire superiori legitimè præcipienti, & superior jushabet ad veritatem elicendam, cui juri reus detrectans resistere aliàs censetur. Imò si reo deferatur juramentum, tenetur sincerè & candidè jurare ad mentem judicis; nec potest uti Amphibologiis & mentalibus restrictionibus, quæ nihil sunt aliud, quàm mendacia, quod etsi à multis licitum doceatur, jam tamen ut scandalosum condemnavit Sanctissimus Pater Innocentius XI. in hâc sequenti propositione: *Si quis vel solus, vel coram aliis, sive interrogatus, sive propria sponte, sive recreationis causâ, sive quocumque alio fine juret, se non fecisse aliquid, quod revera fecit, intelligendo intra se aliquid aliud quod non fecit, vel aliam viam ab ea, in qua fecit, vel quodvis aliud additum verum, revera non mentitur, nec est perjurus.*

Reus legitimè rogatus debet candidè profiteri de quo rogatur.

Dicendum 2. Si reus rogetur vel à judice non competentem, vel contra ordinem & formam juris, non tenetur veritatem edicere, aut jurare de calumnia, idest, se dicturum esse veritatem. Rationem dat D. Thom. 2. 2. q. 62. art. 2. ubi ait: *Non tenetur aliquis omnem veritatem faceri, sed illam solum, quam ab eo potest, & debet requirere judex secundum ordinem juris.* Jam autem non potest judex illegitimus de veritate aliquem interrogare juridicè, cum ad hoc jus non habeat, adeòque nec alteri possit obligationem veritatem fatendi imponere. Ut autem judex in interrogando hîc servet ordinem juris, debet priùs præcellisse aliqua criminis infamia, aliqua indicia noxæ, & semiplena probatio. Prædicta tamen intelligenda sunt,

Quid si illegitimè rogetur.

dum interrogatio judicis tendit ad punitionem, secus si tendat ad impediendum peccatum, quo casu tenetur subditus fateri crimen, de quo nulla præcessit infamia, indicia aut semiplena probatio: cum superior habeat juse iam de talibus perquirendi, ut damnum reipublicæ avertere possit, nec subditus habet justam causam non obediendi.

Reus debet sustinere se subdicere.

Dicendum 3. Tenetur reus justæ sententiæ obtemperare, injustæ non item, undè injustè damnatus ad multam pecuniariam non tenetur eam in conscientia solvere: non tamen se potest per vim contra justitiæ ministros defendere: cum judex & ministri jus habeant, exequendi sententiam latam juxta ordinem juris, adeoque non potest reus illi juri resistere. Deinde aliàs sequeretur scandalum & perturbatio reipublicæ, cum omnes judicarent eum committere crimen læsæ Majestatis.

An reo liceat fugere ex carcere.

Dicendum 4. Licet reo fugere de carcere tam ante, quam post sententiam latam: non enim in carcerem detruditur, ut ibi spontè maneat, sed ut ibidem diligenter detineatur & custodiatur. Deinde tantum cuique juris est ad conservandam vitam, ut nullâ superioritate humanâ ab eâdem conservandâ possit quis impediri, nisi aliud exigat commune bonum. Hinc etiam potest vincula dirumpere, effringere carcerem, sine tamen vi justitiæ aut ejus Ministris factâ: quæ non censetur inesse, vinculis & carceri, sed judici & justitiæ ministris: unde justitia non violatur, dum vincula rumpit reus, carcerem effringit, &c. Deinde, ut dictum est, non debet reus ibidem manere, sed debet detineri; unde etiam debitis mediis fugæ illorum judices consulunt, compedibus ferreis, firmissimo ergastulo eos detinendo, &c. Idem extendunt alii, ad casum, quo quis ad talem pœnam esset condemnatus, quæ mortis æquivaleret: ut ad exilium, carcerem perpetuum, ad triremes, servitutem, &c. Quæ est mors civilis. Hinc etiam sequitur, quod alius possit reo licitè suadere fugam, monstrare viam fugiendi, instru-

menta

ad necessitatem gravem, si id sine incommodo exequi possit.

Quid agendum Advocato, dum causa injustitiam advertit.

Peccat quoque, si in processu advertens causæ injustitiam, eam clienti non manifestat: Si processus nimium extrahat, cum damno partis: Si plures causas suscipiat, quàm commodè possit promovere: Si utrique patrocinetur: Si simul sit iudex vel assessor & advocatus in eadem causâ: Si velit pretium majus, quàm labori à republica taxatum est, vel communi prudentum æstimatione sit debitum: si contractum usurarium defendat: Si leges falsas & abrogatas, instrumenta falsa proferat: Jure quoque positivo illis interdictum est, pacisci præviè de aliquotâ litis parte, v. g. dimidiâ, tertiâ, &c. Si victoria sequatur, idque ideò, ne daretur aliàs occasio, per fas & nefas victoriam procurandi.

Potest tamen advocatus patrocinari reo, quem etsi sciat commississe crimen, tamen nondum de eo est secundum ordinem juris plenè convictus. Ratio est, quòd reus non teneatur ad pœnam, nisi convictus: Ergo per se vel per alium eam potest avertere, donèc convincatur.

SECTIO VI.

Quomodo Confessarius cum reo agere debeat.

Officium confessarii cum reo.

DICENDUM primò, Reus ad confessionem non facilè admittendus est, priusquam in judicio res ejus sint liquidò probatæ, eò quòd vix adigi aliàs poterit, ut crimen candidè confiteatur, vel ob timorem ne deferatur, vel ne cogatur illud fateri extra confessionem.

Non debet se immiscere causa criminali.

Dicendum 2. Non potest se Confessarius causæ ejus criminali immiscere, unde caveat ne modum procedendi illi suggerat, judices accuset, &c. Sed opportunius fateatur se Dei Ministrum, & reum ad pœ-

pœnitentiam disponat, simul eidem prædicens, se audita à reo nec communicaturum alicui, sive ob sint sive profint, ne aliqui falsò se excusent, ut à Confessario juventur: aut falsò se accusent, ne rursus torture subjiciantur.

Dicendum 3. cognitâ ejus causâ, interrogabit eum de circumstantiis vel speciem immutantibus, vel crimen notabiliter aggravantibus intra eandem speciem, quæ tali crimini associari plerumque solent, idque pro qualitate criminis, de quo agitur. Deinde criminis gravitatem ostendat, & ad seriam pœnitentiam reum disponat; simul proponens, quàm breve sit hujus vitæ spatium, quàm certò mors sit obventura, & quò longior vita, eò major labor & dolor: Denique quàm melius in hac vita, quàm in futuro pœna criminibus debita possit hic persolvi.

Dicendum 4. Caveat, ne se immisceat sententiæ executioni, aut aliquo modo eidem coöperetur, ne irregularitatem incurrat, de qua alibi. Caveat quoque, ne audita in confessione, post mortem rei, si ve in ejus favorem, sive in ejus præjudicium ullatenus referat, cum per hoc reverentiæ Sacramenti officiat, & sæpè sigillum Sacramenti violet. Et quamvis pro reo quandoque intercedere possit, ut admonet Scriptura Prov. c. 24. dicens: *Erue eos, qui ducuntur ad mortem: Et qui trahuntur ad interitum, liberare ne cesses*: Tamen id moderatè faciendum, ne suâ importunitate tales liberet, quos morte punitos esse præstaret, aliàs particeps futurus malorum omnium, quæ ex tali intercessione postmodum oriantur.

Ad seriam pœnitentiam reum disponat.

Ne executioni sententiæ ullatenus se immisceat.



CAPUT OCTAVUM.

De Distributione onerum & beneficiorum.

SECTIO PRIMA.

Quomodo distribuenda sint officia.

Рациона-
лизм ассе-
рпие.

D

DICENDUM primò , Superior tenetur in conscientia distribuere officia in digniores. Hinc peccat graviter, si accipiat personam ; idest aliquam personæ conditionem, quæ nihil ad officii distributionem pertinet. v. g. quia est amica , favens & fovens suas cupiditates , quia beneficium ab ea vel ejus amicis accepit , &c. Peccatum hoc in superiore sæpè est mortale, cum sæpè fiat cum injuria proximi , imò aliquando cum perversione potioris partis communitatis, dum cernit ad officia promoveri indignos, quo fit, ut negligent sese reddere idoneos officiis communitatis, dum favor, non dignitas prævalet. Tenetur ergo superior, sive sæcularis sive Ecclesiasticus, ex vi taciti contractûs , quo in se suscepit communitatem optimo quo possit modo, regere & gubernare, maximè idoneos præferre cæteris , & seponere affectus inordinatos , ad rem nihil facientes : Aliàs peccabit contra justitiam distributivam, & fidelitatem communitati promissam. Quinam autem in officio constitui debeant, exponit Scriptura Exodi 18. *Provide de omni plebe viros potentes, timentes Deum in quibus sit veritas, & qui oderint avaritiam, & constitue ex eis tribunos.* Quod si negligent, promoventes aliquando in aliorum curam, qui se de jure curare & regere nequeunt, aut ut alios doceant, quod ipsi non didicerint , peccant graviter, cum injuria com-

*Distri-
buentes be-
neficia in-
dignis ,
peccant.*

communitatis. Unde & jura civilia prohibent, ne *Officia etiam secularia illicite venduntur* quis minorennis ad senatum promoveatur, quod jure merito ob dictas causas observatur, & utinam ubivis observaretur. Certè communitatum pestis, est personarum acceptio.

Dicendum 2. Licitè tamen excellentia & quæstus, *Dignitas secularis potest dñi vendi.* quæ in officio sæculari spectari possunt, possunt vendi, cum sint pretio æstimabilia. Consultius tamen foret, ea quoque sine respectu ad pecunias conferri magis dignis, eò quòd ex alia praxi, gravia solent evenire incommoda, puta quòd homines magis ex ea studeant pecuniis, quàm scientiis & probitati, quòd si illis officia conferantur, non ea ad bonum reipublicæ administrent, sed ad bonum & commodum proprium, ut illud recipiant, quod pro officio numerarunt, & ut insuper lucrentur, justitiam exinde venalem habeant.

S E C T I O I I.

De tributis & vectigalibus imponendis.

D ICENDUM primò Tributa sive vectigalia justè *Potest resp. publ. imponere vectigalia.* à Principe imponi possunt ad communia impen- dia, ac Principis statum intertinenda. Hinc ea, toti Christiano orbi imponere posset Pontifex, si hoc necessarium foret ad statum Ecclesiæ conservandum. Idem possunt omnes supremi, qui supremum in suis Regnis non agnoscunt, & quidam Domini locorum, qui præscriptione quasi, jus illud liberæ administrationis obtinent. Sic & civitas potest imponere *Collectas* suis civibus, dum hoc exigit bonum commun- itatis: Imò idem potest & Episcopus, cum consensu capituli in reparationem Ecclesiæ, sustentationem ministrorum, quando aliter illis provideri nequit.

Dicendum 2. Ecclesiæ & Ecclesiastici, & illorum *Exemptia Ecclesiastice exemptionis.* bona à vectigalibus jure Divino & Humano sunt ex- emptæ.

empta. Patet hoc ex jure Canonico cap. *Quamquam* 4. de censibus in 6. & ex variis patet Pontificum decretis. Idem confirmat jus civile, ut novella Frederici Imp. quæ incipit, *item nulla* de Episc. & clericis. Excipiuntur tamen à dicto privilegio, clerici qui exercent negotiationem, si possessio alicujus, habeat annexum onus, antequam veniret ad Ecclesiæ possessionem, si contributio æquè cedat in utilitatem Clericorum ac Laïcorum, vel denique si Laïcorum facultates non sufficiant ad succurrendum publicæ necessitati. Exemplum hujus exemptionis habes Genes. 47. Ubi totam terram Ægypti subjecit Joseph Regi, fecitque eam tributariam, exceptâ terrâ Sacerdotum: Unde ait Conc. Trid. sess. 25. c. 20. reform. *Personarum Ecclesiasticarum immunitatem Dei ordinatione & Canonicis sanctionibus constitutam esse.* Clerici tamen minorum ordinum, primæ tonsuræ, nec ulli Ecclesiæ deservientes, nec habentes beneficium, videntur longâ consuetudine exemptionem amisisse, in cujus præscriptionem videtur Papa consensisse.

causa imponendi vectigalia.

Dicendum 3. Justa causa imponendi vectigal, est necessitas publica, cui aliâ viâ succurri nequit: v. g. ad solvenda stipendia militaria, urbium fortificationes; Deinde requiritur, ut causa sit vectigali proportionata, ne in prodigalitates vectigalia impendantur, aut etiam privatas utilitates, denique ne diutius maneant imposita, quàm causa exigat. Quibus adde, ut expensæ compensentur, quando Princeps urbem rebellantem statuit compescere expensis & sumptibus communibus.

Insuper, *Injusta sunt vectigalia, si sic imponantur, ut plus graventur, qui jussu ratione sunt minus gravandi: utpote si magis indigentes graventur plus aut æqualiter cum ditioribus, minusque indigentibus.* Iniquum est, pauperem pro rebus, quas usu suo consumendas desert, tantumdem ad supportandum reipublicæ onera solvere quantum dives solvit pro similibus rebus æqualis ponderis, ad usum suum delatis. Ita Driedo. Unde vario jure statuitur, ne vectigal-

galia imponantur illis rebus, quæ usu consumuntur, cum æquè gravarentur indigentes ac divites, adeoque violaretur æqualitas & proportio in distributione onerum observanda. Excipe tamen casus, quo vectigalia aliunde collecta, communi necessitati non sufficiunt, vel etiam fiunt cum consensu totius populi; vel pro securitate viarum, ut præstet aliquod onus sustinere, quàm omnia in viâ perdere, vel denique si longâ consuetudine similia vectigalia sine populi contradictione fuerint servata.

Dicendum 4. Qui defraudant vectigalia justè imposita in notabili summâ peccant mortaliter, & tenentur ad restitutionem. Probat hoc Apostolus ad Rom. 13. Ubi docet vectigalia esse omnino debita, dum ait: *Reddite ergo omnibus debita, cui tributum, tributum: cui vectigal, vectigal.* Ubi enim publica causa id exigit, potest cuilibet parti vectigalia superior imponere, cui tenentur subditi in conscientia obedire, sicut debent dare decimas statutas ab Ecclesia, adeoque defraudantes peccant & tenentur pro suâ quotâ, vectigalia defraudata restituere. Aliud esset, si probabiliter teneret subditus, vectigalia esse iniqua, quo casu non teneretur vectigalia in conscientia solvere, nisi esset periculum scandali aut perturbationis Reipublicæ.

Vectigalia defraudantes.

SECTIO III.

De Collatione beneficiorum Ecclesiasticorum.

DICENDUM primò, *Beneficium* est jus perpetuum percipiendi fructus, ex bonis Ecclesiasticis propter aliquod officium spiritale, autoritate Ecclesiæ constitutum. Aliud est sæculare, aliud regulare. *Sæculare* est, omne illud, quod pro regularibus non est institutum, neque iis annexum: unde & illud sine dispensatione Papæ conferri non potest regularibus, juxta-

Quid sit beneficium

Sæculare.

juxta hanc regulam generalem : *Beneficia secularia secularibus ; regularia regularibus conferenda esse*. Excipiuntur autem , si sint beneficia curata , hæc enim regularibus conferri posse , sine dispensatione Papæ , statuunt jura & constat experientiâ. *Regulare* est , quod pro regularibus est institutum , ut sunt Abbatia , prioratus , Canonicatus Regularis. Alia quoque sunt beneficia duplicia , alia simplicia. *Duplicia* sunt , quæ annexam habent administrationem vel eminentiam in Ecclesiâ , ut sunt Papatus , Archiepiscopatus , Decanatus , Prioratus , personatus , &c. *Simplicia* sunt , quæ non habent talem administrationem vel eminentiam in Ecclesiâ , sed solum instituta sunt ad preces Deo persolvendas , aliaque divina officia obeunda , v. g. Canonicatus etiam Cathedralis , Cappellaniæ , sacellæ , item præstimonialia , idest beneficia instituta pro studiosis , ut possint prosequi studia , vel in subsidium terræ sanctæ.

*Præmonstratensis
capacitas
quoad be-
neficia.*

Horum omnium beneficiorum tam sæcularium , quàm simplicium regulares capaces esse ex privilegio Papæ , sine speciali ejus dispensatione Continuatæ praxis ostendit , & signanter in Canonicis Ordinis Præmonstratensis , cui olim 16. Ecclesiæ partim Archiepiscopales , partim Episcopales , quasi hæreditario jure annexæ fuerunt , ut per aliquot sæcula , omnes etiam Episcopi talis Ecclesiæ , fuerint talis instituti : idem adhuc in vigore est in variis Regnis & Provinciis.

*Modi quibus benefi-
cia pos-
sunt ob-
tineri.*

Dicendum 2. Obtineri possunt beneficia , primò præsentatione Patroni & institutione collatoris. *Præsentatio* autem est exhibitio personæ , facta à Patrono collatori , ut illi beneficium conferat , cujus collatio est *institutio* , quæ non nisi ab Ecclesiasticis fieri potest , nec Laicis competere potest. Secundò conferri potest beneficium , electione capituli , aut aliorum Ecclesiasticorum , & confirmatione. 3. collatione libera , idest , quando beneficium solo jure Prælati datur , nec subest juri Patronatus. 4. Resignatione. 5. Permutatione.

Di-

Dicendum 3. In conferendis Ecclesiis Parochialibus, hanc formam præscribit Conc. Trid. sess. 24. c. 18. ubi habet 1. quidem, quòd si vacet Ecclesia Parochialis, debet illi provideri per interim de deservitore; deinde, debet Patronus & collator intra certum tempus aliquos examini subicere aliquorum, quos ad hoc munus idoneos judicavit, nec minus quàm trium, qui jurare debent, se omni affectu seposito, judicaturos prout in veritate comperient: prohibetur autem, ne quidpiam ratione hujus examinis recipiant, aliàs fiant Simoniaci, & beneficium suum amittant. Quo examine facto, tenetur Episcopus beneficium conferre illi, qui est inventus magis cæteris curæ Pastoralis idoneus: imò si rejecto magis idoneo, minus idoneus ab Episcopo sit institutus, possunt alii digniores appellare ad Metropolitanum, vel si ille desit, ad viciniorem Episcopum, tamquam delegatum Sedis Apostolicæ, & institutum ad novum examen appellare: interea tamen electio prior exequenda est.

Dicendum 4. Numquam licet conferre beneficium indignis ratione infamix, ignorantix, vitæ vel morbi aut alterius impedimenti: aliàs collator & patronus sunt causa malorum, quæ ex indignitate talis obveniunt. Beneficium, quod annexum habet animarum curam conferri debet digniori: est communis SS. PP. & DD. sententia, utroque jure stabilita: Unde si digniore omisso, dignum quis eligat, postulet, aut præsentet, peccat mortaliter. Colligitur hoc ex Conc. Trid. sess. 24. c. 1. refor. ubi dicitur: *Omnes & singulos qui ad promotionem præficiendorum, quomodocumque jus habent, mortaliter peccare, nisi quos digniores & Ecclesia magis utiles ipsi judicaverint, non quidem precibus, vel humano affectu, aut ambientium suggestionibus, sed coram exigentibus meritis præfici diligenter curaverint.* Neque dici potest, quòd hic Concilium in to digniores, accipiat comparativum pro positivo, aut improprie loqui, quòd quidam scandalosè docent: Unde & illud à Pontifice nostro moderno nuper condemnatum

*Modus
quod debeat
conferri
Ecclesia
Parochia-
li cura,*

*Beneficia
danda
sunt di-
gnioribus.*

natum

natum est: Cum dixit Conc. Trid. eos alienis peccatis communicantes mortaliter peccare, qui nisi quos digniores & Ecclesie magis utiles ipsi iudicaverint ad Ecclesias promoveant, Concilium vel primò videtur per hoc DIGNIORES non aliud significare velle, nisi dignitatem eligendorum, sumpto comparativo pro positivo, vel secundò locutione minus proprià ponit DIGNIORES, ut excludat indignos, non verò dignos: vel tandem loquitur terciò, quando fit Concursum. Unde, & rectè statuta Ordinis Præmonst: admonent prælatos, ut eum promoveant, quem dictante conscientia, omnibus consideratis & æstimatis, ad tale munus (Pastorale) obeundum maximè idoneum censuerint. Nec hac in re tam ætatis aut temporis professionis, quàm idoneitatis & virtutis ratio habeatur.

Peccata
patrono-
rum.

Peccant ergo Prælati mortaliter, qui omisso digniore, minus dignum præsentant ad tale munus, non pro conscientia dictamine, sed pro sua libidine, eum digniorem censentes, qui suæ libidini quandoque magis obsecundat: peccant mortaliter, qui importunis amicorum precibus acquiescentes, tale munus conferunt minus digno, prætextu amicitia aut muneris suscepti. Peccant mortaliter, qui dignioribus prætermis, minus digno beneficium assignant, ut parentes aut consanguineos indigentes sustentent, cum præiudicio Ecclesie & aliorum digniorum: satius esset, si Patronus ipse suis eleemosynis eosdem sustentaret, & danis & injuriis aliorum ita obviaret. Neque hic vallet casus pro amico, qui si sit minus dignus, erit casus pro diabolo. Hæc Paulò fusiùs, eò quòd, sit frequens Constitutionis Tridentina violatio.

S E C T I O I V.

De conditionibus requisitis, ut censeatur quis aptus beneficio.

D I C E N D U M primò, requiritur ut sit natus de legitimo thoro, nisi ex superioris dispensatione legitimitur. 2. Requiritur ordo prævius, aut saltem prima tonsura. Quod si acceperit Parochiale beneficium, debet intra annum ordinari Sacerdos, aut aliàs ipso jure beneficio est privatus; quod intellige à quieta possessione annum computando, & nisi legiimum impedimentum obsit, v. g. morbus, absentia Episcopi, &c. Nam pœna locum non habet, ubi nulla est culpa. Idem statuit Concilium Trid. de Episcopis, qui se intra 6. menses non sinunt consecrari. 3. requiritur debita ætas, ad Episcopatum 30. annorum, ad aliud officium minus habens annexam curam animarum 25. annorum, ad alias vero dignitates annorum 22. ita Conc. Trid. sess. 24. c. 12. hoc ultimo addens sess. 23. c. 6. *Nemo ante 14. annum beneficium possit obtinere.* 4. Requiritur cœlibatus: unde si Clericus matrimonium ineat, ipso jure illud amittit, eo quod suscipiat statum cum beneficio incompatibilem. 5. Requiritur, ut sit nullâ censurâ irretitus, hinc excommunicato, suspensio aut interdicto non potest conferri beneficium. Requiritur quoque ne sit Irregularis, item ne sit hæreticus aut hæretici filius, qui in hæresi decessit, ne eorum sint defensores, ne sit Simoniacus confidentialis, in electione Papæ, vel in examine ad paræcias, ne sit intrusus, &c. 6. Ne sit infamis, sed moribus probus, 7. ut sufficienti scientiâ sit instructus: unde Conc. Trid. sess. 22. c. 2. requirit, ut Episcopus sit Doctor aut Licentiat^{us} in Theologia, aut jure Canonico, aut saltem publico al^{ius} cujus Academia testimonio ad alios docendos idoneus ostendatur. Hinc inhibet idem Concilium sess. 25. c. 9. nè quis sine examine prævio, ad beneficium assumatur. Et re-

Capacitas beneficiati ut sit legitimus, ordo prævius,

Ætas legitima,

Cœlibatus

Non irregularis,

Non infamis,

Ut sit licentatus,

Aptitudo corporis. Etè Conc. Roman. sub Eugenio 2. c. 4. *Presbyteri, aut, Sint litterati, aliter enim quomodo erunt Magistrati, qui non fuerunt Discipuli? isti sunt canes muti, non valentes latrare.* 8. Requiriturabilitas ex parte corporis, necessaria ad debite officium persolvendum, unde cæcus, mutus & similes ad beneficium sunt inhabiles.

Debita intentio.

9. Requiritur debita intentio in beneficiato, de qua ita appositè Catechismus Rom. p. 2. c. 4. *Quoniam in omni actione suscipienda, magnopere refert, quem sibi quisque finem constituat, (optimo enim fine posito rectè omnia consequuntur) de hoc in primis, qui sacris initiari volunt, admonendi sunt, ut nihil sibi tanto munere indignum proponant..... alii enim eo consilio ad hanc vivendi rationem se convertunt, ut quæ ad victum vestitumque necessaria sunt, parent: ita ut præter quæstum, nihil aliud in Sacerdotio, quemadmodum vulgo ceteri omnes in quovis sordido artificii genere, spectare videantur. Quamvis enim ex Apostoli sententia, natura & divina lex jubeat, ut qui altari servit de altario vivat: tamen quæstus & lucri causâ ad altare accedere, maximum sacrilegium est. Alios honoris cupiditas & ambitio ad Sacerdotalem ordinem ducit. Alii verò, ut divitiis affluant, initiari volunt: cujus quidem rei illud argumentum est, quod nisi opulentum aliquod Ecclesiasticum beneficium eis deferatur, nullam sacri ordinis cogitationem habent: Hi verò sunt, quos Salvator noster MERCENARIOS appellat illi autem ostio in Ecclesiam merito introire dicuntur, qui à Deo legitime vocati, Ecclesiastica munera ejus unius rei causâ suscipiunt, ut Dei honori inserviant. Hucusque Catechismus. En ergo rectam intentionem ordinandi & beneficiati, solius Dei causâ munus suscipere, & ejus honori inservire.*

Requiritur insuper, ut beneficiatus non habeat plura beneficia incompatibilia, unde sit.

S E C T I O V.

De Pluralitate Beneficiorum.

DICENDUM primò, pluralitatem beneficiorum *Plura beneficia habere semper in Ecclesia fuit illicitum,* semper detestata est Ecclesia. 1. enim dist. 86. can. *Singula* dicitur : *singula Ecclesiastici juris officia singulis quibusque personis sigillatim committi jubemus.* Et in 7. Synodo Constantinop. ut refertur 21. q. 1. cap. *Clericus* ita dicitur : *Clericus ab instanti tempore non connumeretur in 2. Ecclesiis.* Et 70. distinct. cap. *Sanctorum*, ait Urbanus : *Omniò in duabus Ecclesiis aliquem intitulare non liceat, sed unusquisque in qua intitulatus est, in ea tantum Canonicus habeatur.* Et extrav. de præbend. cap. *quia*, perhibetur præbendarum multitudinem Canonibus esse inimicam. Idem novissimè statuit S. Synodus Tridentina sess. 24. c. 17. ubi ait : *Cum Ecclesiasticus ordo pervertatur, quando unus plurimum officia occupat Clericorum, Sancte S. Canonibus cautum si it, neminem oportere in duabus Ecclesiis conscribi. Verum, quoniam multi improba cupiditatis affectu se ipsos, non Deum decipientes, ea quæ bene constituta sunt, variis artibus eludere & plura simul beneficia obtinere non erubescunt : S. Synodus debitam regendis Ecclesiis disciplinam restituere cupiens præsentis decreto, quod in quibuscumque personis, quocumque titulo etiamsi Cardinalatus honore fulgeant, mandat observari : statuit ut impostèrum unum tantum beneficium Ecclesiasticum singulis conferatur. Quod quidem, si ad vitam ejus, cui confertur, honestè sustentandam non sufficiat, liceat nihilominus aliud simplex sufficiens, dummodo utrumque personalem residentiam non requirat, eidem conferri. Hæc non modo ad Cathedrales Ecclesias sed etiam ad omnia beneficia tam secularia quàm regularia, quæcumque etiam commendata pertineant, cujuscumque tituli ac qualitatis existant.* Hucusque Concilium.

Dicendum 2. Non tantum juri positivo, sed & re- *An sit*
 Y 2 *EtO CONTRA 143*

*tionem
habere plu-
ra bene-
ficia.*

recto ordini naturæ contrarium est habere plura benefi-
cia pro cuius pleniori intelligentia cum S. Thoma
quodlibeto 8. q. 7. Notandum est, esse triplex actio-
num genus. Unum quod est intrinsecè malum, & quod
inseparabilem habet deformitatem, v. g. menda-
cium: aliud quod secundùm se est indifferens, v. g.
ambulare, quod benè fieri potest & malè. Tertium
deniquè, quod secundùm se consideratum aliquam
continet deformitatem, ita tamen, ut in certis circum-
stantiis possit reddi licitum, v. g. occidere, quod ad-
veniente lege iustitiæ redditur licitum & honestum.
De hoc ergo tertio genere actionum est plura obtinere
beneficia. Illud enim secundùm se spectatum aliquas
recti ordinis continet perversiones.

*Rationes
quare hoc
sit veri-
tum.*

1. Quòd recta ratio dicet, quòd unicuique ministe-
rio suus designetur minister. 2. Quòd diminuatur per
illud cultus divinus. 3. Cùm bona Ecclesiæ stipendia
sint Ecclesiæ, Ecclesiæ suo jure fraudantur, dum
multiplicatis ita præbendis ad personarum paucita-
tem, vix ulli Ecclesiæ pro ratione suarum decimarum
servitur competenter & dignè. 4. Violatur iustitia di-
stributiva, dum hac multiplicitate multi digni esuriunt,
alii verò ebrii sunt: 5. Quod eâdem pluralitate accen-
datur ambitio, dum plures pluribus beneficiis sibi ho-
nores conciliant. 6. Studia litterarum, quæ nervus
sunt disciplinæ Ecclesiasticæ eâdem pluralitate negli-
guntur, dum vident nec meritorum haberi rationem,
sed colorum ambitioforum & ditiorum libidini satis-
fieri. 7. Quòd fundatorum & testatorum voluntates
defraudentur, quorum intentio fuit promovere Dei
cultum suâ foundatione, qui pluralitate beneficiorum
diminuitur. 8. Quòd animæ defunctorum debitis spo-
lientur suffragiis, dum unus pluribus obligationibus
illis animabus nequit satisfacere. Hæc & alia inconve-
nientia, quæ ex pluralitate beneficiorum primâ fronte
apparent, satis indicant, eandem omnino esse secun-
dùm se illicitam & recto ordini repugnantem.

*Aliquan-
do licet*

Dicendum 3. Cùm pluralitas illa beneficiorum
non

non sit intrinsecè mala, ut dictum est, sed certis ^{habere plu-} circumstantiis possit reddi licita, hinc prima est, quan- ^{ra benefi-} do Ecclesiæ reditus sunt ita tenues, ut se solâ non suf- ^{cia} ficiat ad sustentandam unam personam. Secunda, quando una Ecclesia dependet ab alia. Tertia, quando in aliqua Ecclesia tanta est clericorum paritas, ut omnibus beneficiis per singulos ministros non possit provideri. Quarta si Ecclesia aliqua annexa sit præbendæ vel dignitati: sic potest idem esse Canonicus & Pastor, uti fit Antverpiæ; item Pastor & persona. Quinta, si habeat unam intitulatam & aliam ad tempus commendatam, donec de personâ idoneâ Ecclesiæ illi provideatur. Alii addunt sextam, puta ob eximiam aliquorum doctrinam, quæ majoribus beneficiis est honoranda, ut dicitur C. *De multa de præb.* Verum ut norat Dominicus Soto de jure & iustit. l. 3. q. 4. Ratio illa dispensandi in pluralitate beneficiorum solum habebat locum, quando Ecclesia vagiebat in cunis, & potentiâ sæculari opprimebatur, adeoque opus habebat illustrium viribus suffulciri: quâ de causâ indulgebatur, ut aliquantò plus stipendiorum sortirentur. Jam verò hoc ætatis, si fas est dicere verum, nescio an eadem dispensationis causa tam legitima existat, Ita præfatus author.

His insuper circumstantiis excusantibus pluralitatem beneficiorum addunt alii dispensationem Papæ in eadem pluralitate dispensantis: quam quidem quoad beneficia simplicia, curam animarum non habentia annexam nec residentiam requirentia non necessariam docet idem author, benè tamen in iis, quæ residentiam requirunt, sed curam animarum non habent annexam eam esse necessariam, v. g. in Canonicatu. In aliis tamen similibus canonicatu minoribus, usus non habet, ut acquiratur dispensatio, ait idem author, addendo tamen, quòd ejusmodi beneficiorum coacervationes sive per dispensationem fiant, sive secus, carere non possint culpâ etiam quandoque mortali, atque gravi scandalo in Eccle-

*Abusus
in multi-
plicandis
beneficiis.*

fiarum detrimentum, idque potissimè ubi nimium multiplicantur & personis deputantur indignis. *Jam enim*, ait nulla spectantur aut desiderantur merita, sed perinde, quin etiam turpius atque impudentius quàm secularia & profana ambiuntur, Cambiuntur, veneunt, hæreditantur, regressive, profanantur ac dilapidantur.

*Quid si
Papa di-
spenset.*

Dicendum 4. In pluralitate beneficiorum, quibus cura animarum annexa est, v. g. paræciis, &c. requiritur dispensatio, & quidem legitima, adeo ut dicat dictus author, quòd & Papa sine legitimâ causâ dispensans graviter delinquit, & ejus delictum non liberet ambientem, & retinentem à culpa. Ratio ejus est, quòd beneficia, quibus animarum cura annexa est, requirant præsentiam administrantis, nemo autem potest esse præsens duabus Ecclesiis administrandis, adeoque sine urgentissimâ causâ eademque Ecclesiæ necessariâ, non potest citra atrocem culpam super hoc dispensari.

Sed ait fortè ille, cum quo dispensatum est: Papa dispensavit, ipse sibi viderit, ego immunis sum. Hic tamen cavillus securos multos reddit, tutum verò neminem, quoniam Papa non est Dominus, sed dispensator, ideoque qui iniquam dispensationem petit, iniquitatis causa est, & qui eâ utitur, eadem semper irretitur iniquitate. Hæc rursus Soto ibidem.

Notat verò Dionysius Cathuf. art. 8. de plural. benefic. quòd Papa non dispenset cum avaritiâ & ambitione, ex quibus aliquando dispensatio hîc quæritur: non enim, ait idem author, intendit nutrire pestes vitiorum, de temporalibus bonis Ecclesiæ, quæ plene novit ad sustentationem servorum Dei in ejus servitio sacrificata esse Domino & oblata.

*An liceat
alium
substituere*

Dicendum 5. Neque licitum est in unâ paræciâ per se residere & in aliâ substituere Vicarium, cum Ecclesia absolutè prohibeat duas paræcias obtinere, uti patet cap. dudum de elect. Ratio est, quòd beneficium detur ratione personæ beneficium obtinentis, cujus aptitudo & dignitas sæpè nequit suppleri per sub-

Substitutum: adeo ut idem author addat, miraculum est, quòd liceat curato ob eam solùm curam & onus quòd Vicarium vilius, quàm potuit, sibi substituit, amplitudinem fructuum percipere, reclamante Paulo, *Qui non laborat, non manducet: sed ait, satis est laborare per alium. Profecto si non debet manducare nisi qui laborat, fit, ut qui non per se, sed per alium laborat, non debeat ipso manducare, sed contentus esse, si loco illius alius manducet. Ait fortasse paracius beneficii possessor, satis est huic Ecclesiæ hunc vicarium substituere. Responderet autem, Ecclesia, si fieri posset, ergo satis est ei, hæc quam tu illi tribuis, merces. Cur ergo reliquum ex me absque ullo servitio surripis? Hæc ille & meritò. Ex quo quoque concludi posset, quo jure plurimi Pastores impotentes sibi Vicarios substituant, & ipsi sine ullo labore de stipendio Ecclesiæ manducant.*

Dicendum 6. Cùm ex præscripto Concilii Trid. possit quis obtinere plura beneficia simplicia, non exigentia residentiam, quando unum ad debitam sustentationem non sufficit: Hinc inquiri posset, quæ sit debita Clerici aut beneficiati sustentatio. Et quidem Lugo de jure & justitia disp. 4. sect. 4. docet eam esse congruam sustentationem; quæ necessaria est ad decenter suum statum intertinendum, secundum conditionem gradûs, dignitatis, qualitatis & regionis: & consequenter juxta dictorum considerationem morali ac Christiano judicio de eo esse judicandum, debet enim attendi persona, quia plus requiritur ad congruam sustentationem Episcopi, quàm Decani, Canonici, &c. Idem est de consideratione regionis, personæ qualitatis, &c. ex quorum consideratione morale judicium in hac re dependet.

Quomodò tamen excusari possint ii, qui plura beneficia obtinent, etsi sine aliquibus beneficiis debite satis possent sustentari, addit dictus Card. num. 58. *Quòd sit causa dispensandi in ea pluralitate, quando Cardinalis ille adeo pio & laudabili exemplo expendit redditus il-*

Quæ sit debita Clericorum sustentatio.

los, ut Compensari videantur, inconvenientia, quæ ex pluralitate sequuntur: & aliunde providetur, ne eâ occasione detrimentum patiantur Ecclesiæ beneficiorum in spiritualibus vel temporalibus, & omnibus constet bonus & pius usus talium reddituum, ut vitetur scandalum & malum exemplum. Hæc ille: Verum ultra hoc, quod dicta omnia difficulter possint concurrere simul, etiam obstare videtur, quod non sufficiat redditus illos expendi in pios usus quoslibet: sed debeat satisfieri fundatorum intentioni, ut in usus ab illis intentos expendantur. Adde, quod per illud non videatur posse vitari, quod ministri Ecclesiæ ejusque cultus diminuantur, quod justitiâ distributiva violetur, quod studia litterarum vilipendantur, & alia incommoda in principio hujus sectionis allata. Unde videtur hic requiri alia dispensandi causa in beneficiorum pluralitate.

Quæret aliquis, an ergo peccet ille, qui retinet vel obtinet plura beneficia, conformans se opinioni, quæ dicit hoc simpliciter esse licitum. Ad quod ita respondet S. Antoninus 3. p. tit. 25. c. 1. §. 8. *Nota quod secundum Thomam, quod si quis habeat plures præbendas, imitens opinionem illorum Magistrorum, qui dicunt simpliciter hoc esse licitum: illa opinio non est vera, nec propterea excusantur à peccato: sed et si sit vera opinio, quam sequitur, scilicet tenere præbendas esse licitum, si tamen ex contrarietate opinionum dubitat de veritate opinionis, quam sequitur, & nihilominus tenet plures præbendas, peccat mortaliter, quia discrimini mortalis sic se exponit.*

Dicendum ultimò, Potest quis obtinere plura beneficia etiam curata, si Ecclesiæ illæ legitima auctoritate sunt unitæ: unio autem illa aliquando facta est ad vitam, quam abrogavit Concilium Tridentinum sess. 7. c. 4. reform. Item sess. 24. c. 17. reform. Alias verò perpetuas, ex legitimis & rationabilibus causis, coram loci ordinario verificandis fieri debere ibidem statuit idem Concilium; causam verò ejusmodi unio-

His assignat idem Concilium sess. 21. c. 5. reform. Ecclesiarum paupertatem & alias in jure constitutas, ita tamen, ut uniones illæ cedere debeant in Ecclesiæ ipsius emolumentum, non personæ alicujus favorem. Sic est illustris quispiam, ait Soto loco citato, pluralitate beneficiorum pressus, qui ad eximendum sibi scrupulum conscientiæ, procurat per connexionem cuncta in unum coadunare. Profectò is arbitratu meo, dum hoc sophismate fascinare cogitat divinos oculos, gravius turpiusque delinquit, quam si plurimum figuram retineret. Debet enim unio Ecclesiarum in emolumentum ipsarum absque dolo malo fieri, ut sit legitima. Ita ille.

Ex dictis patet, quam periculosum sit obtinere plura beneficia, adeo ut cum S. Bernardo timendum sit, *Quòd qui non unus est sed plures in beneficiis, non unus sed plures erit in suppliciis.*

Dicendum tamen ultimò Temporibus nostris im- An liceat
appetere
Episcopatu-
m.
prudenter esse aut temerari appetere Episcopatum. Probatum primò ex S. Augustino, qui ita ait l. 19. c. 19. de Civitate Dei: *Locus superior, sine quo regi populus non potest, etsi ita teneatur atque administretur, ut decet; tamen indecenter appetitur.* Et S. Thomas ad illa Verba Apostoli prioris ad Timot. *Qui Episcopatum desiderat, bonum opus desiderat, aut*, inquit, *appetit aliquis circumstantias*, puta gradum, honorem, opes, &c. Tunc nescit, quid appetat: aut appetit ipsum quis, & hoc est superbia. Cùm enim Episcopus juxta Chrysostomum hom. 10. in priorem ad Tim. Debeat lucere inter populum, ut sol inter stellas: Et juxta Gregorium 2. parte Past. Debeat supereminere inter populum, quantum homo præstat pecudibus: & juxta Tridentinum sess. 6. c. 1. Episcopale munus sit Angelicis humeris formidandum: præsumptuosum & planè temerarium videtur, appetere Episcopatum.

Objiciet aliquis locum Apostoli prædictum, quòd qui Episcopatum desiderat, bonum opus desideret, ex quo videtur sequi, licitè posse appeti Episcopatum
tani-

tamquam opus bonum. In primis S. Greg. 1. Pastor. c. 8. docet, hoc solum verum fuisse primis Ecclesiæ temporibus, dum promiscuè Episcopi trahebantur ad Martyrium. Unde etiam dictum est in Conclusione, *temporibus nostris*. Communis tamen expositio habet, quòd ille, qui Episcopatum desiderat, bonum opus, id est rem arduam & sublimissimam desideret, cum subdat continuò Apostolus: *Oportet Episcopum irreprehensibilem esse*: Tanta autem res admiranda potius est, quàm expetenda. Unde & Hieronymus in dictum locum, *opus*, ait, *desiderat*, *non honorem*, ubi & multis exaggerat celsitudinem hujus officii. Hoc considerantes SS. PP. non nisi invitati ad Episcopatum trahebantur: ut de Cornelio scribit Cyprianus l. 4. Epist. 2. de Ambrosio Paulinus in ejus vita: de Joanne Chrysostomo idem patet ex libris ejus de Sacerdotio: de Augustino idem ex Sermone de communi vita Clericorum: de Gregorio ex Joanne Diacono l. 1. c. 44. de S. Norberto ex ejus vita c. 42. unde alibi dicitur *Indignus Sacerdotio, qui non fuerit ordinatus invitatus*. Et S. Bernardus l. 4. c. 5. de consideratione ad Eugenium, ita scribit: *Non volentes, neque currentes assumito, sed cunctantes, sed rennentes: etiam coage illos, & compelle intrare*. Quantum opere ab horum exemplo deflexerit hæc ætas nostra, loquitur experientia, dum non solum ejusmodi officia appetuntur & desiderantur, sed etiam petuntur, & extorquentur.

Dicta autem omnia, non solum de Episcopatu intelligenda sunt, sed & de quolibet officio, cui annexa est cura animarum, quæ est ars artium, cui proinde non nisi præsumptuosè sese ultro ingerit, illam ambiendo & desiderando. Aliud tamen est, si evidens Ecclesiæ necessitas alicujus ministerium exigeret, quo casu laudabile esse Episcopatum etiam appetere, docet S. Thomas loco supra citato.

S E C T I O VI.

De Residentiâ Beneficiorum Ecclesiasticorum.

DE residentiâ necessariâ beneficiorum cum animarum curâ ita rursus statuit Tridentina Synodus Sess. 23. reform. c. 1. *Cum præcepto divino mandatum sit omnibus, quibus cura animarum commissa est, oves suas agnoscere, pro his Sacrificium offerre, Verbi-
que Dei prædicatione, Sacramentorum administratione ac bonorum operum exemplo pascere, pauperum aliarumque miserabilium personarum curam paternam gerere; & in cætera omnia pastoralia incumbere: Quæ omnia nequaquam ab iis præstari & impleri possunt, qui gregi suo non invigilant, & assistunt, sed mercenariorum more deserviunt: Sacro-Sancta Synodus eos admonet & hortatur, ut divi-
norum præceptorum memores, factique forma gregis in judicio & veritate pascant, & regant. Ne verò ea, quæ de residentia sanctè & utiliter jam antea sub fel. rec. Paulo 3. sancita fuerunt in sensus à Sacro-Sancta Synodi mente alienos trahantur, ac si vigore illius decreti, quinque mensibus continuis abesse liceat. Et ulterius præcipit, ne absint temporibus Quadragesimæ, Paschæ, Nativitatis, &c. Diebus, quibus oves maximè gaudere debent præsentia Pastoris: Ne Episcopi plusquam 3. mensibus sine justâ causâ absint, ut quando Episcopi in comitiis vel statibus assidere debent, prout hîc in Belgio observatur. Quòd si sine justâ causâ diutius absint, fructus pro rata temporis absentia non faciant suos, ultra quod peccent mortaliter: Neque possunt eosdem tutâ Conscientiâ, aliâ etiam declaratione non secutâ, sibi retinere, sed tenentur illos dare aut Ecclesiæ fabricæ, aut pauperibus loci. Idem extendit Concilium ad omnes curatores inferiores quorum officio animarum cura annexa est, quoad dictas pœnas & culpas. Ut autem parochi aliqua de*

Præceptum residentia,

causa

causa diutius abesse possint, requirit Concilium, ut causa sit ab Episcopo cognita & approbata: Deinde revocat omnes consuetudines, & statuta, quibus ante licitum erat abesse ultra 3. menses, *Etiam si*, ait, *sit immemoralis, quæ potius corruptela Censenda est*; Non ideo tamen revocat aliquorum privilegia, si qui ea habeant. Conformiter ad dictam inhibitionem Concilii Trid. statuunt statuta Ordinis nostri, *Ne Pastores sine manifesta vel propria vel Parochiarum suarum necessitate, locum residentiae suæ exeant, omnesque vagos discursus evitent.*

*Statuta
Præmissa.*

Prædictis constitutionibus non obligantur Abbates vel Priores, nisi curam sæcularium officio suo annexam habeant: de quibus tamen ita conformiter ad Concilium Trid. statuunt dicta nostra statuta dist. 2. c. 2. de officio Abbatum: *Omnes Prælati, prout omni jure obligantur, stricte resideant, ut suo gregi, cujus sanguis à supremo pastore, de ipsorum manibus requiretur, vigilanter intendere queant. Rarissime autem absint, nisi aliud officii eorum ratio postulet, quo in casu domui suæ bene prospiciant, ac assidue curent, ne subditi per eorum absentiam aliquod detrimentum patiantur: Scientes, quod non sit admittenda Pastoris excusatio, si lupus oves comedit, & ipse earum custodia minimè incumbens, nescit. Viderint, an non peccent mortaliter ii, qui neglectis ovibus propriis, disciplinam monasticam depravari sinunt, apud externos commorando, & regimen domesticum indignis, imò aliquando scientiâ & experienciâ monasticâ vixdum imbutis relinquentes: Viderint, an non sint causa moralis omnium damnorum inde obvenientium. Neque excusantur hic illi, qui more custodum carceris subinde ad suos divertunt, & vident an omnia sint in tuto & bene conserventur, solum contenti, si oves stabulo includantur, ipsi vagentur pro sua libidine.*

*Causa non
residendi.*

Dicendum 2. Justa causa beneficiatis dictis se ultra præfixum terminum absentandi esse potest, auditio Theologiæ aut juris canonici usque ad 5. an-

Hos : Idem est de Doctrina eorumdem aliis facta : Utilitas Ecclesiæ ejusve necessitas ; honesta consuetudo, ubi Concilium non est receptum : Item, si quis Romæ de consensu capituli moretur, ut praxi Romanæ studeat ; quod si absint, tempore absentiae non recipiunt distributiones, nisi ubi aliter legitimâ consuetudine præscribente sit in usu, prout est alibi hîc in Belgio.

Dicendum 3. Potest Capellania vel plures, erigi *Reductio* in Pastorum, etiam reducendo missas talibus Capellaniis addictas. Vetat quidem Synodus Trid. Sess. 23, c. 18. Uniri vel variari beneficia cum diminutione divini cultûs, tamen id non vetat, quando illud bonum Ecclesiæ postulat. Et quamvis in dicto casu Missarum numerus diminuatur, facilitè illæ compensantur onere pastoralis. Sic quoque potest Episcopus onera Missarum reducere ad minorem numerum, eo quod aliàs justo stipendio persolveri non possint, v. g. si à 300. vel 400. annis fundatæ sint, quibus temporibus rarior & carior erat pecunia, adeo ut, quod tunc justum stipendium erat pro 6. aut 7. Sacris, modo non sit justum pro unico ; quo fit, ut antea potuerint vel unico beneficio debitè sustentari, ubi jam tribus aut quatuor simul adunatis vix possunt.

Dicendum 4. Qui habet beneficium à patrono hæretico sine legitima collatione ordinarii collatoris, non potest tutâ conscientiâ illud retinere : Patronus enim solus, non potest conferre jus in re aut beneficium, sed solum jus ad rem : Ad hoc enim prius, indiget collatione : Unde, si sciens illud beneficium ita occupet, fit intrusus, & sic inhabilis ad idem beneficium : aliud est de ignorantibus, v. g. pueris, &c. Hoc tamen notandum est, illicitum esse, emere beneficia ab hæreticis : Optimo verò consilio à Pontifice occultè talis beneficii collatio hoc casu petenda esset : & ulterius agere de fructibus beneficii, non involvendo titulum, de ejusdem dispensatione

quo casu erit redemptio fructuum, quos hæretici injustè possident.

*Collatio
beneficii
ab Episco-
po solum
confirmat-
io.*

Dicendum 5. Tenet collatio beneficii ab Episcopo confirmato solum, nondum in possessione Episcopatus existente, hic in Belgio: quod addo, quia aliud vetat regula Cancellariæ Romanæ, quæ in aliis Provinciis non obligat, nisi ibidem promulgata sit & acceptata: adeoque videtur potius regula particularis Cancellariæ Romanæ, quàm universalis Ecclesiæ totius. Talis autem potestas de jure communi competit Episcopis solum confirmatis.

SECTIO VII.

De habitu & tonsura Ecclesiasticorum.

*Origo ton-
suræ Ec-
clesiasticæ*

DICENDUM primò, Tonsuram Ecclesiasticorum ab ipso S. Petro originem duxisse, testatur Rabanus l. 2. de institut. Cleric. c. 2. qui dicit, hunc ritum S. Apostolum primum sumpsisse, ut formam & similitudinem Christi in capite gestaret, dum pro redemptione nostræ Crucis patibulum subiturus, à nefanda Judæorum gente acutis spinarum aculeis coronaretur. Debet ergo in modum sphæræ seu coronæ coma abradi & tonderi, prout variis Conciliis, & universalis Ecclesiæ usu receptum est & statutum.

De habitu verò ita statuit Conc. Trid. sess. 14. c. 6. *Et si habitus non facit Monachum, oportet tamen Clericos vestes proprio congruentes ordini semper deferre, ut per decenciam habitus extrinseci morum honestatem intrinsecam ostendant. Tanta autem aliquorum inolevit temeritas Religionisque contemptus, ut propriam dignitatem & honorem Clericalem parvi pendentes, vestes etiam deferant publicè laicales, pedes in diversis ponentes, unum in divinis alterum in carnalibus. Propterea omnes Ecclesiastica personæ, quantumcumque exemptæ, quæ aut in Sacris fuerint, aut dignitates, Personatus, officia, aut beneficia qualiacumque Ecclesiastica*

clastica obtinuerint, si postquam ab Episcopo suo, etiam per edictum publicum moniti fuerint, honestum habitum Clericalem, illorum ordini & dignitati congruentem, & juxta ipsius Episcopi ordinationem & mandatum non detulerint, per suspensionem ab ordinibus ac officio & beneficio ac fructibus & redditibus & proventibus ipsorum beneficiorum, nec non si semel correpti, denuo in hoc deliquerint, etiam per privationem officiorum hujusmodi coerceri possint & debeant: secundum Constitutionem Clementis V. in concilio Vienensi editam, quæ incipit: QUONTIAM, &c.

Quisnam verò sit debitus Clericorum amictus, & consuetudine & præscripto debet esse talaris, neque sericus aut alias pretiosus & rarus, nec, ut ait Augustinus in regula, *Sit notabilis habitus, nec affectent vestibus placere, sed moribus.* Coloris autem nigri esse solent, etsi enim teste Baronio ad annum 393. omnes Clerici violaceo colore amicti incederent, tamen color ille communi Ecclesiæ usu solis reservatur Episcopis.

Dari tamen possunt varii casus, quibus alio amictus, etiam sæculari possent Clerici indui, v. g. si illud necessitas exigat, dum in partibus hæreticis degunt, eo causa necessitatis aut honestæ recreationis divertunt: sicut etiam veste non talari, sed breviori Clerici usu communi incedunt, dum itinerantur. In aliis Clericis regularibus, extra tonsuram, quisque ordo suos habet limites vestium & ordinationes.

Qui & quando Clerici teneantur ad horas, dicam in sequentibus.

0000 0000 0000 0000 0000 0000 0000 0000 0000 0000
 0000 0000 0000 0000 0000 0000 0000 0000 0000 0000

CAPUT NONUM.

De Simonia.

SECTIO PRIMA.

Quid sit Simonia, quale peccatum & quo jure prohibita.

*Quid Si-
monia, &
quadruplex*

DICENDUM primò, *Simonia* est studiosa idest deliberata voluntas emendi vel vendendi rem spiritualem vel spirituali annexam. *Emendi & vendendi* comprehendit, omnes contractus, ut est elocatio, &c. Per rem spiritualem intelligitur donum Spiritûs Sancti quod ad salutem operatur; ut potestas absolvendi, ordinandi, &c. *Simonia* alia est mentalis, alia conventionalis, alia realis. *Mentalis* est, quando recipiens vel præstans alteri rem spiritualem, intendit alium obligare ad aliquid pretio æstimabile reddendum. *Conventionalis* est, quando vel ab una parte vel utraque fit externa conventio de dando temporali pro spirituali. Huc solet referri *Simonia confidentiæ*, quando datur spirituale, cum tali pacto & obligatione, quod accipiens postea tenebitur rem spiritualem alteri dare: v.g. habet quis Canonicatum, quem vellet resignare Petro nepoti, sed ob defectum ætatis inidoneo, interim illum resignat Paulo, eâ conditione ut postea idem beneficium det Petro, dum habebit annos requisitos. *Simonia realis* est, quando pactio ex utraque parte saltem inchoativè impleta est.

Porro *Simonia* nomen sortita est à *Simone mago*, qui act. 8. *Volebat emere Spiritum Sanctum quia volebat vendere Spiritum Sanctum* ut ait S. Aug. tract. 10. in Joan. est autem omni jure prohibita *Simonia*: in primis enim
 jure

jure naturæ, eo quòd sit contra naturæ ordinem; *Malitia*
 quòd res dignior subjiciatur viliori, *in hoc enim errant* *Simoniam*
homines, quando subdunt pretiosa vilioribus, ut ait S. Aug. *in quo sit*
 c. 13. de mendacio. Unde & juxta Scripturam, Simon
 Magus existimavit donum Dei pecuniâ posse posside-
 ri, in quo Simonia consistit. Deinde juxta Apost. 1.
 cor. 4. homo non est Dominus rerum spiritualium,
 sed solùm dispensator; jam autem est contra ordinem
 naturæ, quòd homo rem spiritualem velit vendere,
 cujus non est Dominus. Denique jure civili & Cano-
 nico sæpiùs interdicitur Simonia, unde & alibi in jure
 vocatur *execrabile flagitium: Simoniacæ pestis, & instar*
criminis læsæ Majestatis. Patebit hoc latius ex dicendis
 de poenis Simoniacorum. Patet verò ex dictis; om-
 nem Simoniam esse contra justitiam, dum aliquis
 usurpat Dominium rerum, quod non habet: sequi-
 tur quoque, quòd neque Deus ipse possit facere, ut
 Simonia sit licita; cùm facere nequeat, ut liceat, quod
 ordinem naturæ pervertit, dum viliora præponit pre-
 tiosioribus, sicut nec potest facere, ut liceat se creatu-
 ris postponere.

Dicendum 2. Datur tamen probabiliùs Simonia *Simoniam*
 juris humani, adeo ut non foret Simonia, si Ecclesiæ *juru hu-*
 prohibitio aut dispositio non interveniret. Potest enim *mani.*
 Ecclesia per suam dispositionem efficere, ut illud,
 quod est naturâ suâ vendibile, reddatur invendibile
 ob connexionem cum re spirituali, uti factum est in
 jure percipiendi temporalia ob connexionem cum di-
 vino officio, respectu beneficiorum. Deinde, sicut
 Ecclesiæ suâ dispositione efficere potest, ut locus sacer
 reddatur immunis, adeo ut peccet judex reum eò con-
 fugientem extrahens; ita & efficere potest, ut id,
 quod est vendibile, fiat invendibile; adeo ut pecce-
 tur contra Religionem si vendatur.

Dicendum 3. Ad dignoscendum generaliter, quan- *Quando-*
 donam simonia committatur, videndum est, an res *nam com-*
 spiritualis, vel illi annexa detur vel accipiat pro *mittitur*
 re pretio æstimabili, siye pro munere siye à manu *Simoniam*

sive à lingua , sive ab obsequio , etsi illa munera sint solum motivum dandi illud spirituale , non item verum pretium. Ex quo deduco sequentia.

Ad Simoniam factu est quod temporale pro spiritali detur tamquam motivum.

1. Quidem , quòd sit Simonia dare aliquod spirituale pro temporali tamquam motivo , quare datur : Nec enim verosimile apparet Balaàm , Giezi , Simonem magum aliàs recepisse aut obtulisse pecuniam , quam ut erat motivum dandi vel offerendi spirituale pro temporali. Unde contraria sententia à variis tradita *Ad implendam Lupis Ecclesiam , & corrumpendam ejus in fonte , hoc est Sacerdotum Ordine , Sanctitatem inventa est* , Ut ait Archiep. Senonensis in censura ejusdem propositionis. Deinde postquam 1657. à facultate Lovaniensi damnata esset hæc propositio , ejus damnationem hoc anno confirmavit Innocentius XI. hanc ut scandalosam proscribens : *Dare temporale pro spiritali , non est Simonia , quando temporale non datur tamquam pretium , sed dumtaxat tamquam motivum conferendi vel efficiendi spirituale , vel etiam quando temporale sit solum gratuita compensatio pro spiritali , aut econtrà.*

Et hanc sequentem : *Et id quoque locum habet , etiamsi temporale sit principale motivum dandi spirituale immò etiamsi sit finis ipsius rei spiritalis , sic ut illud pluris aestimetur , quam res spiritalis.*

Munus ob obsequio.

2. Sequitur , quòd sit Simonia , si quis alteri beneficium conferat , pro obsequiis præstitis , vel ut obsequium postmodum ab eo obtineat : Datur enim res spiritalis pro re temporali , puta obsequio , sive ea detur ut pretium , sive ut gratuita compensatio. Aliud esset , si personam , quæ nobis fuit obsequiosa , præficiamus alteri ignotæ , non intendendo per hoc munere obsequia præstita , modò persona illa sit æque digna beneficio.

Datur Simonia rei spiritalis pro re spiritali.

Sequitur 3. Non esse necessarium ad Simoniam , quòd res spiritalis detur pro temporali , cùm etiam illa subesse possit , quando res spiritalis sine legitima autoritate permutatur , de quo postea. Deinde in jure decerni-

decernitur Simoniacum, si quis alteri pro voto Abbatiae, promittat Prioratum, ut patet ex capr. *de hoc, de Simonia*. Malitia enim Simoniae, uti dictum est, in eo sita est, quod quis non habens Dominium rei spiritualis, sed solum dispensationem, sine legitima auctoritate eam in alium transferat.

Sequitur 4. Simoniacum esse aliquid pretio aestimabile accipere pro labore intrinseco rei vel actionis spiritualis. Qui enim gratis debet prestare functionem sacram, etiam gratis debet prestare laborem ad illam functionem requisitum, cum labor ille sit inseparabilis à tali functione: unde si unum vendit, vendit & alterum: aliud est, si quid detur pro sustentatione fungentis officio spirituali, quo casu non habetur respectus ad opus, sed ad personam. Sic dicit Scriptura dignum esse operarium mercede sua, & qui Altari servit, de Altari posse vivere.

Sequitur 5. Non esse Simoniam aliquid accipere pro tradenda Doctrina Theologica: partim quod illa scientia prout innititur principiis speculativis, non est quid spirituale: partim quod hæc traditio Doctrinae solum ordinetur ad exercitandam memoriam, vel excitandum intellectum audientis. Aliud est in Catechesi vel concione, pro qua præcisè aliquid accipere, est Simoniacum, cum pro fine habeant instructionem in ordine ad salutem animæ, adeoque annexa sunt rei spirituali. Poterit tamen aliquid dari Catechistis & Concionatoribus per modum sustentationis, sicuti celebrantibus sine Simonia dantur stipendia.

*Simoniam
pro labore
rei aut an-
ticipu san-
cta,*

*Pro Do-
ctrina
Theologi-
ca, Cate-
chistica,
&c,*

S E C T I O II.

An sit Simonia aliquid accipere, vel exigere ab illis, qui ingrediuntur Religionem.

Pro ingressu aut professione Religiosa.

DICENDUM primò, certum est esse Simoniam, dare aliquid vel recipere pro ingressu aut professione Religiosa, tamquam pretium aut motivum ingrediendi aut profitendi. Sequitur clarè ex jam dictis. Unde Simoniaci sunt parentes ingredientium, qui dum vident filium non satis aliàs instructum aut Religioni idoneum, offerunt pro ingressu aliquam pecuniæ summam, quâ superiorem mōvent ad filium recipiendum. Simoniaci itidem sunt superiores, qui talem ex tali motivo ad Religionem assumunt, ultra hoc quod graviter peccent, acceptando tales, qui Religioni sunt inidonei.

Casus incidens.

Sed quid, si parentes sponte suâ summam notabilem pro filio offerunt Monasterio satis dotato, v. g. summam 8. aut 10. millium florenorum, dicentes se tantum velle dare pro filii dote, quantum pro filiâ nuper nupta: filius autem ille eo tempore est juvenis planè inhabilis, quoad studia, & solùm superest spes, quòd tempore novitiatûs perfici possit & exerceri, quod & superior in se suscipit? Resp. Esse ibidem certissimò Simoniam, cùm filius ille accipiatur intuitu pecuniæ, cùm aliàs sit inidoneus: inò si dicat superior pecuniam suppleturam defectum idoneitatis, abunde indicat mentem suam, se filium suscipere intuitu pecuniæ. Neque censerì debent exclusa sola pacta explicita & formalia, sed etiam implicita juxta Conc. Trid. quale juxta morale judicium comprehendì videtur in dicto casu. Sed omissò nunc eo, alia specialia & extraordinaria in facto casus propositi displicent; primò quòd filius ille non recipiatur intuitu suæ capacitatis, sed peccuniarum. Secundò, quòd

NON

non foret recipiendus, nisi mediante summâ longè majore, quam ad ejus intertentionem sit necessaria: tertio quòd ista contingant, etiamsi Monasterium, si rectè administraretur, possit suis bonis illum alere. Propter quæ, judicamus ejusmodi receptionem, tam ex parte parentum, quam ex parte Monasterii esse illicitam, neque videmus, quomodo illa receptio possit à Simonia excusari.

Huic favet, quod docet S. Thom. in 4. dist. 25. q. 3. a. 2. ad 7. ubi ait: *Si sine gravamine monasterii possit recipi novitium, Simoniacum est aliquid exigere.*

Sunt tamen qui non distinguunt, utrum monasterium sit dives vel pauper, uti Dom. Soto de jure & just. l. 9. q. 6. a. 2. infine ubi ait: *Respondetur nihilominus opulentiam monasterii nihil prorsus facere, ut quæ in paupere non erat Simonia, sit in divite. Et ratio est patentissima: Nam Simonia ex objecto speciem sortitur nempe quia spirituale venditur, puta professio ipsa & locus in Religione. Si autem illud caveatur, & pecunia non nisi pro victu recipitur, etiamsi monasterium illo subsidio nullatenus egeat, poterit quidem esse peccatum avaritiæ, non tamen Simonie. Sed hoc tantum fatendum est, quod præsumitur Simonia: Nam si victus est abundans, præsumitur pecuniam recipi pro ingressu, prout illic convincit Silvester. Quo circa monasteria ditissima, quæ pauperes recipere absque pretio renunt eodemque ingenti, profectò citra scandalum facere id non possunt. Hæc ille. Ex quo factem hoc habetur, quòd sit scandalosum monasterio diviti recipere aut exigere ab ingredientibus amplas dotes, imò & aliquando monasterii ejusque honoris ruinam, & pecuniam cum illo esse in perditionem.*

Quod tamen nec pro jure sustentationis aliquid exigere liceat, etiam in monasteriis egentibus, declarat Dionys. Carth. opusc. de Simonia l. 1. art. 11. ubi ait: *Præterea si dicant se facere talem exactionem & pactionem considerando rem temporalem non ut pretium rei spiritualis, sed ut est stipendium aut sustentaculum vi-*

zæ, jam patuit illud non sufficere nec valere. Nam & simili palliatione posset pene omnis Simoniaca pravitæ excusari. Simili quoque modo posset de missa celebranda & anniversario concedendo fieri pæctio, cujus contrarium dicunt Doctores concorditer. Insuper exactionis pæctionisque hujus forma est in se inhonestæ ac scandalosæ, repugnans decori Ecclesiæ, & derogans sinceritati Religionis monasticæ, propter quod Urbanus Papa eam totaliter ac apertissimè reprobât. Videri potest idem author ibidem plurima ad rem nostram spectantia adferens.

Dicet aliquis communem esse Ecclesiæ praxim, de tali sustentatione stipulari in monasteriis tenuibus: imò alibi, uti etiam Romæ, statui in quibusdam monasteriis, ne aliqua admitteretur, nisi solutâ aliquod millium aureorum summâ: Quod tamen Ecclesiæ permittere non posset, si foret hoc Simoniacum aut ita scandalosum. Resp. hujus objecti ratione, plurimi in contrarium convenerunt, scilicet in praxi hoc esse modo licitum, sciente nec contradicente Ecclesiâ prout à 2. annis vidimus Romæ à variis subsignatum. Verùm cum sustentatio sive jus ad illam ita professioni annexum est, ut præbenda beneficio, hætenus non video quomodo ratione ejus possit aliquid exigi ab introcuntibus monasterium: Neque etiam, quomodo aliquâ lege humanâ dispensari possit in lege divina, *Gratis accepistis, gratis date*: Ex qua tot & tam arctæ constitutiones Ecclesiæ circa pæcta ingredientium monasterium. Certè an legitima esse possit praxis, tot Ecclesiæ & Dei ipsius constitutionibus contraria, meritò dubitatur. Hinc etiam Conc. Trid. Sess. 25. c. 3. ne hujus prætextu, puta quòd plures accipiant quam possent sustentare monasteria, pæctiones facerent, statuit, *Ut in monasteriis & domibus tam virorum, quam feminarum is tantum numerus constituatur & conservetur, qui ex propriis redditibus monasteriorum vel consuetis eleëmofynis commodè possit sustentari.* Quæ Tridentini Constitutio si exactiùs observaretur, non esset

esset necessarium ad ejusmodi pacta cum scandalo recurrere, nec communitatem tantopere gravarent importunis eleemosynis.

Unum tamen obtendunt aliqui, quòd ratione ejus quod cedat monasterium juri succedendi in bona novitii aut professi, aliquid possit ab illis exigi: cùm variis privilegiis indultum sit variis Ordinibus, ut possent succedere monasteria in bona professi, si vel-
Non licet accipere pro cessione juris, quod quis non habet.
 lent, ac si mansissent in sæculo. Verùm, quidquid sit de aliis Provinciis, certum est, quòd variis legibus privilegia dicta sint hìc in Belgio abrogata, unde in vim eorundem non posset aliquid exigi, cùm non possit aliquid exigi pro jure, quod amplius non habetur. Quare titulus ille perquam idoneus est palliandæ Simonix.

Certum tamen est ingredientem vel profitentem liberaliter aliquid dare posse Ecclesiæ vel monasterio, cui incorporatur.

SECTIO III.

De Permutationibus Beneficiorum Simoniacis.

DICENDUM primò, Permutatio beneficii sine debitâ autoritate facta, est Simonia jure divino interdicta. Ratio est, quòd jus divinum dictet, ne res spirituales indebitè tractemus, ne de eis disponamus tamquam essent nostræ, ubi tamen earumdem sumus dumtaxat dispensatores. Debita autem auctoritas permutandi est auctoritas Ecclesiæ, cui amplissimam dedit Deus potestatem de rebus spiritualibus disponendi.

Dicendum 2. Sequitur ex dictis, quòd simonia-cum sit, permutare propriâ auctoritate beneficia cum fructuum inæqualitate compensatâ. Ratio patet ex dictis: quibus adde jus Ecclesiæ, quod prohibet privatâ auctoritate separari jus percipiendi fructus,

ab ipso titulo percipiendi fructus. Deinde illa major dignitas est quid spirituale, unde non potest pecuniâ æstimari. Aliud est, si accedat superiorum authoritas, & patet ex communi Ecclesiæ praxi. Pro quo notandum est, in beneficio duo posse considerari, jus percipiendi fructus temporales, aliud quod jus illud ex ordinatione Ecclesiæ annexum sit titulo spirituali v. g. Pastoratus, Canonicatus, &c. unde, sicut jus illud, Ecclesiæ ordinatione annectitur illi titulo, sic in permutationibus prædictis, authoritate Ecclesiæ ab eodem titulo separatur & alteri titulo conjungitur. Debet tamen adesse rationabilis causa, ut talis permutatio possit concedi.

Resignatio beneficii. Dicendum 3. Licitum quandoque est beneficia resignare alteri, servatâ sibi certâ pensione, si tamen debitæ conditiones adsint, puta, quòd illud fiat legitimâ authoritate; ut pensio sit moderata, nec excedat limites à jure præscriptos: ut sit justa causa creandi pensionem, v. g. si pastor sit senex, &c. Idem est de resignatione vel permutatione facta in manus ordinarii, idest *si ordinario placuerit*.

Restitutio rerum Simoniacè acceptarum. Dicendum 4. Pretium simoniacè acceptum, jure naturæ debet restitui, eo quòd nullo titulo possit retineri; cùm contractus à principio fuerit nullus: hoc autem intelligi debet de his bonis spiritualibus, quæ restitui possent, aliàs Sacramentum Baptismi v. g. simoniacè acceptum, dimitti non potest.

Debet autem de jure Ecclesiæ talis restitutio fieri in pios usus, nec restituendum est illi à quo accepit, cùm utrumque tantum dantem quam accipientem velit Ecclesia punire. Ita habet capt. *audivimus* & capt. *de hoc*, de simonia.

Pœna Simoniacæ. Dicendum ultimò, Variæ simoniæ reali constituuntur pœnæ à jure positivò: primò, quòd illa facta circa Religionis ingressum, inducat excommunicationem; Conventui, si consenserit, suspensionem; simoniacè verò ordines conferens, est excommunicatus, suspenditur à collatione ordinum, & ab executione

Executione omnium munerum pontificalium, interdicitur illi ingressus Ecclesiæ, non potest absolvi, nisi à Summo Pontifice : qui verò ordinem simoniacè susceperit, est excommunicatus, suspensus ab executione ordinum, &c. qui simoniacè accepit beneficium, sub quo comprehenditur Abbatia & Prioratus, est excommunicatus, omnis provisio & collatio ejus est nulla, fit inhabilis ad idem beneficium, mediatores in simonia beneficii & ordinis, ut parentes, amici, procuratores & omnes operam suam conferentes, sunt excommunicati, &c.

0000 70600070007000009000000000000000
800000800000000000000000000000000000

CAPUT DECIMUM.

De Religione.

SECTIO PRIMA.

Quid sit Religio, & qualis sit virtus.

DICENDUM primò, *Religio* est virtus moralis, quæ debitum Deo cultum exhibet. *Cultus* est honor cum sui submissione alteri exhibitus: hinc differt ab honore, quia etsi Deus sanctos & amicos suos honorificabit, non tamen eos colet, cum se illis non submittet. Debetur verò cultus Deo à nobis, titulis planè innumeris, titulo creationis, conservationis, redemptionis, &c. Differt Religio à virtutibus Theologicis, si propriè de Religione & eisdem loquamur; cum virtus Theologica habeat Deum pro immediato objecto *quod*, Religio verò habeat pro tali objecto cultum Deo debitum, cum Deus solum sit objectum *cui*: Deinde virtus Theologica habet Deum pro immediato objecto formali, fides, quia Deus verax est; spes, quia nobis

Religio fit ex amore bonus est : charitas , quia Deus in se bonus est : Religio verò debitum Deo cultum refert , quia ipsi debitus est : adeòque ratio formalis proxima non est Deus ipse , aut aliqua ejus proprietas , sed debitum cultûs. Rectè tamen S. Augustinus docet , quòd Deus non colitur , nisi amando , eo quòd debita Religio ex amore erga Deum saltem virtualiter prodeat : sic etiam docet , quòd Deus colatur fide & spe. Differt verò Religio à cæteris virtutibus moralibus , quatenus aliæ subjectum bene disponunt in ordine ad se ipsum ut temperantia & fortitudo , aliæ vero in ordine ad proximos , v. g. justitia ; Religio verò in ordine ad Deum.

Religio interna & externa. Dicendum 2. Religio alia est interna , alia externa & interna simul. *Interna* est , quâ colimus Deum actum erè interno , v. g. contemplatione , æstimatione divinæ excellentiæ , &c. *Externa* est , quando externis signis Deo debitum cultum exhibemus , v. g. eum ore oramus , coram eo genuflectimus , pectus tundimus , manus levamus , &c. Hæc autem Religionis species nulla est , si interna Religio non respondeat à qua procedat externa ; adeo ut veriùs sit Religionis simulatio aut umbra : Hinc in V. T. accusantur illi , qui Deum externis actibus videbantur colere , ubi cor eorum non erat rectum cum eo. Præstat interim Deum colere tam externè , quam internè , ut totum Deo demus , dum totum ipsi est debitum : unde psalmista *Cor meum & caro mea exultaverunt* , &c. Psalmo. 83.

Actus Religionis. Præcipui Religionis actus sunt , *devotio* , *adoratio* , *sacrificium* , *votum* , &c. *Devotio* est , voluntas promptè illa faciendi , quæ ad cultum Deo debitum spectant , unde est proximus actus virtutis Religionis , quo imperatur externa devotio , genuflectendi , orandi , psallendi , &c.

SECTIO II.

De Oratione.

DICENDUM primò, *Oratio est adscensio mentis ad Deum: & S. Bern. l. de Scala Claustr. c. 1. Oratio est devota cordis intentio in Deum, &c.* Ad hanc requiritur oculus fidei, quâ credimus Deum esse omnipotentem, bonum & paratum ad opitulandum: unde & Apost. ad Hæb. 11. dicit: *Accedentem ad Deum oportet credere quia est, & inquirentibus se remunerator sit.* Requiritur insuper cognitio & confessio propriæ indigentiae, & necessitatis, cui per orationem subsidium quærimus. Ad hæc requiritur spes, unde Jacobus 1. *Postulet in fide, idest FIDUCIA, nihil hæsitans.* Denique, sicut ad Religionem, ita ad orationem Religionis speciem requiritur amoris affectus erga Deum, unde imperetur saltem virtualiter oratio: Unde SS. PP. Orationem dicunt *Conversionem, intentionem cordis ad Deum, Deo adherentis affectionem, &c.*

Dicendum 2. Oratio tam ad intellectum spectat, quam ad voluntatem. Ad intellectum quidem, quatenus intellectus explicat, quod voluntas desiderat. Et quidem hæc pia voluntatis affectio aut desiderium ita necessarium est ad orationem, ut nulla sit oratio, cui hoc non adjungitur, quo pacto aliquibus à Deo exprobratum est Matth. 15. *Populus hic labiis me honorat, cor autem eorum longè est a me.* Patet quoque ex ante dictis aliâ conclusione 1.

Dicendum 3. Alia est oratio mentalis, alia vocalis. *Vocalis* est quæ sermone fit, ex intimo cordis affectu promanante. Hic enim cordis affectus, necessariò ad veram orationem pertinet. Neque ideo, non verè orare dicendæ sunt, quæ orant vocaliter idiomate, quod ignorant, v. g. moniales dum horas recitant: quia etsi verba non intelligant, finem tamen orationis

Quid sit oratio.

Ad orationem requiruntur virtutes Theologicae.

Oratio spectat ad intellectum & voluntatem.

Oratio vocalis & mentalis.

nis intelligunt, & ad illum intentionem dirigunt, qui est Deum colere & orare.

Mentalis est, quæ internè perficitur absque exteriori signo eam manifestante. De hac ait S. Textus 1. Reg. 1. *Quod Anna loquebatur in corde suo, tantumque movebantur labia ipsius, & vox penitus non audiebatur*: Hæc orabat Paulus dum ait *orabo spiritu, orabo & mente: psallam spiritu, psallam & mente*. Tali orabat Psalmista psalmo 3. dum ait: *Voce mea ad Dominum clamavi*, de quo ita S. August. *Non corporis voce, quæ cum strepitu verberati aëris promitur, sed voce cordis, quæ hominibus filiet, Deo autem sicut clamor sonat*. Præstat tamen ob humanam infirmitatem mentali orationi adjungere vocalem, quatenus verba externa internam devotionem excitant, & ad internam attentionem sono suo conservandam, à distractionibus præservandum sunt idonea, hoc interim notato, juxta monitum Salvatoris, quod orantes nolint multum loqui, idest juxta S. August. Epist. 121. & c. 10. de orando Deum: *Aliud, inquit, est sermo multus, aliud diuturnus affectus*. Et infra. *Absit ab oratione multa locutio: sed non desit multa precatio, si fervens perseveret intentio; nam multum loqui est in orando rem necessariam superfluis verbis agere: multum autem precari est, ad eum quem precamur, diuturnâ & piâ cordis excitatione pulsare*.

Oratio publica & privata.

Alia deinde est oratio publica, alia privata. *Publica* est quæ authoritate publicâ & Ecclesiæ nomine offertur, ut horæ Canonicae, &c. *Privata* est, que privata voluntate & nomine privato offertur. Alia quoque est oratio implicita, alia explicita. *Implicita* est, quando quidem explicitè non rogamus, sed in alio aliquo orantis affectus explicatur, v. g. in desiderio, contritione, &c. *Explicita* verò est, quæ explicito conceptu, seu explicitâ voce formatur. Alia oratio infusa, alia acquisita. *Acquisita* est, omnis ordinaria oratio, quam homo Dei gratiâ excitatus ordinario modo emit. *Infusa* est, quæ extraordinariè homini infunditur à Deo, sic Deus dicit Zachariæ 12. quod effun-

det

Implicita & explicita.

Acquisita & infusa.

det super habitatores Jerusalem; Spiritum gratiæ & præcium.

SECTIO III.

An & quale præceptum sit orandi.

DICENDUM primò, attentâ pronitate hominis ad ^{Orationis} malum ex corruptione naturæ, & infirmitate ad ^{necessarium.} bonum, necessària est oratio. Quibus accedunt assidua labendi pericula, difficultates in exercitio virtutum occurrentes, quibus sine oratione & subsidii precatone vix poterit obviari, adeo ut Lucæ 18. dicat Salvator, oportet semper orare. Et si enim Deus noscat, etiam antequam rogemus, quid cuique necessàrium sit, tamen plurima non dare constituit, nisi mediante oratione, unde ait: *Petite & accipietis*, &c. Matth. 7. Hinc ait quoque S. August. Serm. 1. de S. Stephano: *si Stephanus non orasset, Ecclesia Paulum non haberet.*

Præceptum illud obligat, quando gravis urget tentatio; hinc dicit Sàlvator: *Vigilate & orate, ut non intretis in tentationem.* Matth. 26. deinde obligat præceptum orationis, quando instat aliquod periculum, quod sine Dei ope superare non speramus: item quando peccator vult suscipere Sacramenta, tunc enim peccatorum veniam rogare debet. Denique quando quis ad usum rationis pervenit, cum orationem diu differre, ad contemptum Dei pertinere videatur: uti aliàs sæpè. Ex dictis sequitur præceptum orandi esse divinum naturale, quatenus mediis necessariis tenetur quilibet tali jure procurare suam salutem, quod oratione faciendum est, cum *quicumque invocaverit nomen Domini, salvus erit*, ad Rom. 10.

Quando nam oratio obligat.

S E C T I O I V.

De Horis Canonicis.

Quid im-
portent
hora Ca-
nonica.

DICENDUM primò, *Horæ Canonicae* sunt officia divina, quæ Psalms, Hymnis, canticis, &c. Publico ritu, per certas horas diei regulariter distribuuntur. Dicuntur *Canonicae*, eo quòd per Canones Ecclesiæ sint impositæ. *Psalms* est Cantus Ecclesiasticus, *Hymni* sunt Carmina, quæ ad Dei laudem canuntur: *Lectiones* sunt Historiæ Sacræ propositiones, quibus ad virtutem & imitationem sanctorum permovemur. *Cantica*, sunt quæ ad cantum modulantur in Ecclesia, & differunt à Psalms, quòd hi sint ad Psalterium compositi, illi verò ad humanam vocem. *Antiphona* est sacra sententia, quæ Psalmo canendo præmittitur & subnectitur. *Responsoria*, sunt ejusmodi sententiæ, quarum aliqui unam partem inchoant, & alii alteram respondent. *Capitula* & *versus* sunt quoque sententiæ sacræ ex Scripturis aut Concilis depromptæ, legi solitæ ad instructionem & excitationem legentium & audientium. *Collectæ* denique sunt orationes, quibus fidelium vota Deo exhibentur.

Quot sunt
hora Ca-
nonica

Dicendum. 2. *Horæ Canonicae* sunt 7. *Matutinum* cum *Laudibus*: *prima*: *tertia*, *sexta*, *nona*, *Vesperæ* & *Completerium*. *Horæ* illæ sunt antiquissimæ, de quibus meminit ipse Psalmista dicens Psal. 118. *Septies in die Laudem dixi tibi*: Et ibidem *Matutinum* designans ait: *Media nocte surgebam ad confitendum tibi*: Primam verò innuit ibid. dum ait: *Prævenierunt oculi mei ad te diluculo*. Tertiam, sextam, nonam, & vespertas, dum ita psallit Psalms. 54. *Vespere & mane & meridie narrabo & annuntiabo*. *Completerium* denique dum ait: *Sed ascendero in lectum strati mei, si quædero somnum oculis meis, donec inveniam locum Domino*. Psalms. 131. Sic etiam act. 3. & 10. *ascenderunt in Templum Petrus*

trus & Joannes ad horam orationis nonam, & Petrus adscendit in superiora, ut oraret circa horam sextam.

Tempus verò quamque horam legendi diversum est in variis Ecclesiis & Religionibus, uti praxis docet. *Tempus horarum.* Nonnulli & satis fundatè docent, Matutinum per tria noctis spatia absolui olim solitum, puta in principio, medio & fine noctis. Tempus verò illis horis vel usu vel constitutionibus Ecclesiæ immutare, si justa causa subsit, non est adeo deforme, uti etiam justa de causa immutare ordinem horarum inter se.

Modum verò horas illas recitandi dat capt. dolentes, *Modus recitandi* ubi ita dicitur: *Discretè precipimus in virtute S. Obedientia, ut divinum officium nocturnum pariter & diurnum, horarum.* quantum eis dederit Deus, studiosè celebretur pariter & devotè.

Pertò Studiosè imponitur obligatio ita officium persolvendi, sicuti in serio negotio requiritur, ut accuratè fiat. Deinde inhibet, ne perfunctoriè peragatur, *Quid significet studiosè & devotè.* sed modestè & elaboratè. Unde maledicatur homo, *16.* qui facit opus Dei negligenter.

To devotè importat devotum mentis affectum inter orandum, adeo ut attentè & intentè officium peragant. *Intentio* requiritur saltem virtualis, quâ quis intendit obligationi suæ per horas satisfacere, Deum colere, &c. *Attentio*, ut attendat quid faciat, non tantùm ut psittaci verba pronuntiet, sed & internus devotionis affectus adsit & verba animet. Unde non satisfacit præcepto legendi horas, qui illa agit, quæ cum attentione debita horarum sunt incompatibilia, v. g. si quis eo tempore, quo alter chorus canit, fabulatur, voluntariè se aliò divertit, &c. Deinde, non satisfacit præcepto de legendis horis, qui solum materialiter verba horarum profert, sine interna intentione requisita ad orationem. Nec hîc obijci potest, Ecclesiam non posse præcipere actus merè internos, cujus contrarium docuimus de legibus, cum illud juxta omnes possit indirectè, quando internus actus ad actum externum præceptum, est necessaria.

cessarius. Non tamen debet quis penes se expressè dicere, *Volo recitare horas*, aut etiam se reflectere supra suam intentionem, sed satis est, quòd virtualiter oratio à præterita intentione, sed virtualiter perseverante censeatur exire. In dubio autem, an habuerit quis sufficientem attentionem & intentionem, judicandum est eam se habuisse, cùm in dubio hîc possit esse melior conditio possidentis. Hoc serviat scrupulosis, & sibi & aliis in legendis horis molestis.

Porrò interdicatur omnis ille recitandi modus, quo fit, ut officium, vel non devotè, vel non studiosè recitetur. Hinc syncopatio verborum, uti fieri solet in semiebriis, semisomno gravatis, &c. Impedit lectionem horarum, & si per notabilem partem dureret, est peccatum mortale. Idem est de omni actione incompatibili cum vera oratione. Intentionem quoque, & attentionem debitam dat D. Bern. serm. 47. in cant. *Vos moneo*, ait, *dilectissimi purè semper ac strenuè divinis laudibus interesse. . . ut nihil dum psallitis, quam quod psallitis cogitetis. Nec solas dico vitandas cogitationes vanas & otiosas, vitandæ sunt & illæ, illæ dumtaxat horæ & illo loco, quas officiales fratres pro communi necessitate, quasi necessariò frequenter admittere compelluntur: sed ne illa quidem profectò recipere tunc consulerim, quæ fortè paulò ante in claustro sedentes in codicibus legeratis, qualia & nunc me vivâ voce differente, ex hoc auditorio Spiritus Sancti recensita reportatis, salubria sunt, sed minimè illa salubriter inter psallendum revolvitis.* Hæc ille. Unde rectè hic illud locum habet, *Age, quod agis.*

*Distractio
in recita-
tione ho-
rarum.*

Dicendum 3. Distractio voluntaria in recitatione officii, ita ut nec ad ipsam recitationem, nec ad finem ejus intrinsecum attendat, si materia sit gravis, est peccatum mortale, neque illà distractus obligationi suæ recitandi satisfacit. Censetur verò quis voluntarie distractus, quando vel in se vel in causa ponit actum incompatibilem cum attentione requisita, v. g. voluntarie se alio divertendo: Item si se distra-

distrahitum sentiens, animum ad horas revocare negligat; aliud est si involuntarias distractiones habeamus ob volubilitatem naturæ nostræ, quas quasi inviti patimur, cum illas subterfugere nobis sit moraliter impossibile. Tenetur tamen illas, dum easdem sentit, rejicere & animum ab eisdem avocare. Neque hic nimium indulgendum scrupulis, cum satis sit naturales illas distractiones, dum sentiuntur, rejicere, & antea animam ad orationem præparasse. Si enim tanta obligatione, & tam præcisè ad horas obligasset clericos Ecclesia, prout sibi quidam scrupulosi imponunt, & inesse judicant: onus certè intolerabile impositum esset, cum detrimento sæpè animæ & corporis, uti aliquando experientiâ patet.

S E C T I O V.

De iis, qui ad horas recitandas sunt obligati.

D I C E N D U M primò Obligantur quotidie ad ho- ^{Obligati}
ras recitandas Sacerdotes, majoribus ordinibus ^{ad horas,}
insigniti, id est Diaconi & Subdiaconi: item beneficia-
ti omnes, cum beneficium detur propter officium, Re-
ligiosi & Religiosæ ex vi suæ Regulæ ad id obligatæ,
aut qui aliàs ex voto, vel pacto aliquo ad horas obli-
gantur. Deinde Canonici, qui tenentur singulis horis
cantandis aut legendis interesse choro: neque ulla-
tenus audiendi sunt, qui docent, solum eos debere
interesse, quando aliquid muneris ipsis est obeun-
dum, sic enim rarò interesse aut residere teneren-
tur. Eadem censurâ digni sunt, qui docent eos so-
lùm obligari, ad interesse uni aut duabus horis, aut
sacrificio missæ: plus enim Canones & Concilia re-
quirunt; aliud est, si aliunde justo impedimento
detinerentur, ut in solemnioribus festis, ratione al-
terius officii incompatibilis. Unde dico teneri Ca-
nonicos interesse singulis horis, idque ex virtuali con-

*Præsentia
formalis
& mora-
lis.*

tractu justitiæ, in fundatione & collatione beneficii contento, ad hoc enim Canonicatus sunt primariò instituti, ut officium publicum in choro persolvant, ob quod stipendia tam ampla recipiunt. Nec solum requiritur eorumdem præsentia materialis, sed formalis & moralis, id est ad orandum ordinata. Unde, etsi corpore adsint, si tamen fabulentur, excurrant, aliò distrahantur voluntariè, &c. non censentur obligationi suæ satisfacere. Nec refert quod per consuetudinem censeantur aliqui canere per Cantores & Capellanos, cum ipsi equidem obligentur exhibere præsentiam religiosam & modestam, quod satis indicat Conc. Trid. sess. 24. c. 12. reform: ubi ait, *Canonicos Debere assistere, & in choro ad psallendum instituto, Hymnis & Canticis Dei nomen reverenter, distinctè & devotè laudare.* Ab hac obligatione excipiuntur ob justam causam, puta morbos, studiorum instructionem, & alia impedimenta, ratione quorum sine suo gravi damno, aut alterius, choro adesse non possint. Quod si abfuerint sine justa causa, ita præscriptum habent à Conc. Trid. sess. 24. c. 12. *Distributiones verò, qui statis horis interfuerint, recipiant: reliqui, quavis collusione aut remissione exclusâ, his careant, juxta Bonifacii VIII. decretum, quod incipit: CONSUETUDINEM: quod S. Synodus in usum revocat, non obstantibus quibuscumque statutis & consuetudinibus.*

Dicendum 2. Idem dicendum est de beneficiatis & præbendatis, qui ad chorum sunt destinati, ob dictam de Canonicis rationem: Idem est de stipendiariis, qui loco Canonicorum officium persolvunt cum in se obligationem eorum assumant, ergo tenentur choro assistere, & officium devotè ac studiosè persolvere. Stipendiarii verò ad musicam, solum obligati sunt ad persolvendum cantum materiale ut organistæ, eo quod finis eorum stipendii non sit alius.

S E C T I O VI.

*An regulares omnes, & potissimum Moniales
teneantur ad horas in conscientia.*

DICENDUM primò, Certum esse, quòd in cho- *Moniales*
ro regularium qui ad chorum sunt deputati, de- *an ad ho-*
beat sub mortali officium horarum persolvi, cui invi- *ras priva-*
gilare debent superiores. Idem est de omnibus regula- *tas sint*
ribus in majoribus ordinibus constitutis, & qui ex vi *obliganda*
regulæ suæ ad illam obligationem aliàs tenentur, cer-
tum quoque est, non peccare graviter Laicos om-
nes, qui indies aliquot *Pater & Ave*, vel *miserere*
legere debent, si illa aliquoties omittant, nisi ad-
esset scandalum aut contemptus.

Dicendum 2. Religiosi & Religiosæ etiam ad
chorum professæ, extra majores ordines constituti,
satis communiter dicuntur obligati ad horas quoti-
die, etiam dum à choro absunt, privatim persol-
vendas: ratio eorum est, quòd consuetudo illa hoc
onus jam imposuerit, & communi æstimatione cen-
seatur graviter peccare talis monialis, si privatim
horas legere negligat. Verùm hæc sententia aliqui-
bus numquam visa est satis certa: tum quòd non con-
stet, consuetudinem illam esse inductam animo eas
obligandi, quod ad consuetudinem vim legis haben-
tem requiritur: tum, quòd illa consuetudo induci
non potuerit, nisi mediante hominum opinione,
quæ de tantâ obligatione facilè tollitur, monstrando
eam inniti falso fundamento. Ratio ergo hujus sen-
tentix est, quòd moniales non sunt ad hoc obligatæ
vi voti aut professionis, neque ex regulâ, neque ex
Ecclesiæ præscripto, adeoque non nisi Consuetudine,
de quâ, uti jam dictum est, non satis constat. Dein-
de Canonix Montenses, Nivellenses, &c. Non tenen-
tur ad horas sub tantâ obligatione, ergo nec Moniales.

Aa 2

Ita

Ita aliqui, & maximè Petrus Marchantius Tom. 2. Tribunalis Sacram. tract. 2. p. 2. tit. 3. sect. 1. q. 2. ubi ait, consuetudinem illam esse solùm inductam titulo pietatis & devotionis. Idem sentit & Lessius in resolut: V. *hora Canonice*, ubi docet solùm obligare illam consuetudinem, per modum statuti sub aliquâ pœna, non verò sub culpa mortali. Imò contrarium ei videtur durum & parum humanum, quia sine ulla necessitate vel notabili utilitate præbatur occasio plurimorum peccatorum mortalium, & scrupulorum, quibus plurimæ bonæ virgines creberrimè implicantur. Ita ferè ille, qui & addit, posse confessarium hanc opinionem in praxi sequi, & virginibus illis, quæ timore tantæ obligationis sunt anxie, dicere quòd sub lethali non obligentur. Denique concludit, quòd expediat uti sententiâ probabili, ob tantum bonum promovendum.

Verùm judico in praxi aliter esse procedendum, & dico, consuetudinem illam inductam esse sub obligatione gravi & non tantùm per modum statuti sub aliquâ pœnâ: ut autem clariùs id pateat, recollegendum est, conditiones ad consuetudinem vim legis obtinentem requisitas esse, 1. Ut sit rationabilis: 2. Quòd observetur à majori parte communitatis: 3. Quòd legislator seu superior tacitè in eam consentiat. 4. Quòd sit inducta animo obligandi. Ex iis clarè patet consuetudinem legendi horas apud Moniales habere vim legis. 1. Quidem, quia est rationabilis, quod & alii admittunt, dicentes eam esse laudabilem. 2. Consuetudo illa observatur à majori parte ejusmodi hominum, puta Monialium & aliorum Religiosorum. 3. Certum etiam est, quòd superiores in eam consentiant, cùm ad eamdem suos & suas inducant, etiam puniendo. Quòd sit inducta animo obligandi, patet ex ipsa intentione consuetudinem illam observantium, dum credunt se graviter ad hoc obligari, ex qua intentione optimè colligitur consuetudinem aliquam esse inductam animo obli-

obligandi. Sic quoque rectè colligitur, consuetudinem recitanditertiò *Ave* ad pulsum campanæ, sumendi aquam benedictam in ingressu templi, &c. Non esse inductam animo obligandi, eo quòd fideles credant se non delinquere, si illa omittant, & consequenter ad hoc non esse strictè obligatos. Sequitur ergo sententiam hanc in praxi esse tenendam, & aliam esse planè infundatam. Quæret aliquis an Moniales rectè dicant in suo *Confiteor*, *tibi Pater*, & *vobis Fratres*, neque dicere debeant, *tibi Mater*, *vobis Sorores*; videtur enim illa locutio esse falsa, dum dicitur feminis, *tibi Pater*, &c. Gayantus tom. 2. Thesauri sect. 5. c. 17. docet easdem rectè dicere *tibi Pater*, &c. Potest enim & fœminis dici, *tibi Pater*, & *vobis Fratres*, cum teste Salvatore Matth. 12. Qui facit voluntatem Patris, qui in Cœlis est, Frater ejus sit, Mater & Soror: Moniales autem non solum tenentur facere voluntatem Patris, sed & opera Consilii.

S E C T I O VII.

De usu Breviarii, & Missalis.

DICENDUM primò, Tenetur quivis beneficarius uti Breviario Romano Pii V. jussu edito, cum juxta Concilium Tridentinum, illud Pontifex componi curaverit, ut uniformitas ritûs Ecclesiastici ubivis esset videnda, uti & fecit cum Catechismo quem *Romanum* vocant, & Missali. Si tamen ille, qui utitur tali Breviario, illo alibi careat, & sit alterum ad manum; tenetur juxta illud alterum officium suum absolvere, cum in eo casu censetur obligationi suæ satisfecisse.

*Breviarii
Romani
obligatio.*

Dicendum 2. Nontamen tenentur illud Pii V. Breviario admittere, qui à 200. Annis particulare Ordinis sui Breviarium observarunt, uti sunt Benedi-

*Quinam
alio Bre-
viario uti
possint,
quam Ro-
mani.*

Etini, Præmonstratenses, Prædicatores, qui ultimi uti regulam & statuta, ita & Breviarium à præmonstratensibus mutuarunt, Carthusiani, &c. Idem est, de Missali, ut ex Bulla Pii V. Missali præmissa constat. Hoc tamen notari potest, quòd si ejusmodi ordines relicto proprio Missali & Breviario, velint illa Pii V. recipere, liberè id possint, uti ibidem declarat Pontifex, quòd fortè ad pariformitatem Ecclesiæ non parum conducere.

Dicendum 3. Si Abbas v. g. præmonstratensis, notabiliter post dictam Pii V. constitutionem Breviarium immutasset, non tenerentur subditi illud recipere. Ratio est, quòd Pius V. solùm permittat Breviaria ordinum, quæ consuetudine 200. Annorum observarunt, non verò permittit nova; quale esset illud, quod notabiliter immutaretur. Aliud esset, si adesset hîc autoritas Papæ, uti sæpè fit, cum qua Breviaria ordinum sæpè immutari videmus.

Officia particularia. Dicendum 4. Officia particularia, quæ specialiter Breviario superadduntur, aliquando in conscientia obligant, aliquando non obligant. Obligant, quando illa generaliter toti Ecclesiæ aut ordini, jussu legitimi superioris observari injunguntur: adeo ut aliquando habeant eam obligationem, quam continet Breviarium. Non obligant autem si solùm ex devotione composita sint, cujuscumque devotioni & libertati permissa, vel ea observare vel non observare. Ubi & hoc notari potest, sæpè posse esse obligationem illa officia particularia observandi in choro communi, sicut privatim non obligent, quod sæpè particulari constitutione statuitur,

Officium B. Mariæ, Defunctorum. Dicendum 5. Officium B. Mariæ, Defunctorum, Psalmi Pœnitentiales, sunt solùm accessoria Breviarii, neque privatim legentes obligant: ita expressè statuit Pius V. in Bulla Breviario præfixa, dum dicit: *Quod in Rubricis nostri hujus officii præscribitur, quibus diebus Officium B. Mariæ semper Virginis & Defunctorum, item 7. Psalmos Pœnitentiales, & Graduales dici*

ac psalli oporteat: Nos propter varia hujus vitæ negotia, multorum occupationibus indulgentes, peccati quidem periculum ab ea præscriptione removendum duximus. Aliud tamen censent de litanis diebus rogationum præscriptis, quas communi satis sensu sentiunt esse partem officii illarum dierum, quod & timorati observant.

S E C T I O VIII.

De Cantu Ecclesiastico.

D I C E N D U M primò: Non tantùm Hæretici varii, sed & Catholici cantum Ecclesiasticum improbarunt. Hæretici quidem, ut Julianus apostata, Petrobrusiani, & Wiclef, qui hac de causa nostros Sacerdotes comparat Sacerdotibus Baal; Item Ariani, etsi ipsi Psalmos canant. Ex Catholicis autem, ut refert S. August. l. 2. retract. c. 22. fuit Hilarius quidam tribunitius, &c. Verùm ritus ille cantandi in Ecclesiâ fuit vetustissimus, & Psalmista jussu divino Psalmos ad cantum & Psalterium composuit, adhortans voce Dei omnes, ut Deum laudarent *Intympano & choro, in chordis & organo: Psal. 150. idem approbat Jacobus c. 5. ubi ait: Æquo animo est, Psallat. idem facit: Apostolus admonens Catholicos ad Ephes. 5. & Coloss. 3. Ut se invicem commoneant in Hymnis & Canticis. De eodem præco Ecclesiæ ritu meminerunt, Dionysius Areopagita, Cassiodorus, Justinus Martyr, & S. Ambrosius & Augustinus, qui alternatim, prout Spiritus Sanctus dabat eloqui illis, concinnarunt Te Deum laudamus.*

*Vetustas
Ecclesiastica
Cantus*

Dicendum 2. in primitivâ Ecclesiâ cantus ille Ecclesiasticus non erat ita flexilis aut elevatus, sed magis loquenti, quam canenti similis. Unde S. Aug. l. 10. confess. c. 33. ita de hac re ait: *Tutius mihi videtur, quod de Alexandrino Episcopo Athanasio sæpe mihi dictum commemini: qui tam modico flexu vocis faciebat sonare le-*

*Olim magis
submissus*

ctorem Psalmi, ut pronuntiansi vicinior esset, quam canenti. Et Concilium Generale 6. Can. 73. Eos, ait, qui in Ecclesijs ad psallendum accedunt, volumus nec inordinatis vociferationibus uti, nec naturam ad clamorem urgere sed cum magnâ attentione & devotione psalmodias Deo, qui est occultorum inspector, offerre. Ex qua verò ratione cantus Ecclesiasticus ex simplici illo factus sit modulantiôr, narrat Nicephorus l. 9. Hist. c. 16. ubi ait: Cum jam per 3. à Christo nato secula simplex cantus sive potius recitatio, nullo modulationis fuce permixta, Christi populos nutritisset: ecce tibi Hermonius quidam Bardejane Heresiarchæ filius, mali corvi malum ovum, cum sua prava dogmata musicis numeris includeret, & multi ex Syris propter verborum venustatem & sonorum suavitatem demulsi, paulatim hæreses imbiberent: B. Eprehem eâ re cognitâ, carmina Catholicam fidem resonantia veneficis Hermonii versibus opposuit, clavo scilicet clavum trudens. Ea itaque suavi vocum sonorumque flexu accommodata Syris audienda præbuit & canenda: ab eoque posteriores Ecclesiæ cantores, modulorum formulas mutuati magis atque magis eas auxerunt & propagarunt. Idem fecerunt & alii SS. Patres: imò & Judæos ipsos adhibuisse instrumenta musica in eorundem ritibus, ut populum ab idolorum cultu averterent, ubi idem instrumentorum musicorum erat usus, est manifestum. Hinc multi jure colligunt, quòd cantus Ecclesiasticus solum in Ecclesiam sit introductus, ad imperfectiores confirmandos, vel ut ait S. Aug. l. 10. confess. c. 33. Ut per oblectamenta aurium infirmior animus in affectum pietatis exsurgat. Hinc etiam sæpè in Ecclesia proscriptam esse musicam, uti de usu cytharæ scribit August. in Psalm. 132. Conc. 1. docent Historiæ. Sic tempore S. Thomæ rarissimum fuisse organorum usum in Ecclesia, ex verbis Doctoris Angelici docet Caietan. in 2. 2. q. 91. a. 2. additque usum illum tolerari posse ob infirmitatem hominum, ut vel sic allecti divinis intersint. In eo tamen semper exactior fuit Ecclesia Romana, in tantum ut quando sub Sergio or-
gano.

ganorum usus in Ecclesiam fuit inductus, Romana tamen Vaticana Ecclesia coram Summo Pontifice eadem non admisit. Ita & modernus Pontifex in eadem Ecclesia simplici Cantu utitur & insuper interdixit omnem musicalem Concentum in Ecclesiis Monialium. Causam horum omnium dat S. Bern. quod non levis sit jactura spiritualis levitate cantûs abduci à sensuum utilitate, & plus intendere vocibus, quam rebus.

Dicendum 3. Cantus tamen Ecclesiasticus opportunè ad devotionem augendam & cordis affectum excitandum, est ab Ecclesia institutus. Meminit hujus S. August. l. 9. confes. c. 6. ubi ait : *Quantum flevi in Hymnis & Canticis tuis suave sonantis Ecclesiæ vocibus commotus acriter. Voces illæ insuebant auribus meis, & eliquabatur veritas tua in cor meum, & ex ea aestuabat inde affectus pietatis, & currebant lacrymæ, & bene mihi erat cum eis.*

*Utilitas
Cantus Ec-
clesiastici.*

Dicendum 4. Cantus ille Ecclesiasticus superiorum autoritate ita moderandus est, ne plus adferat vanitatis, quam devotionis, non sit lascivus aut impurus, non disturbet suâ inordinatione audientes potius, quam commoveat, dènique eundem temporibus accomodet, tristicii tristem, lætiori tempori lætum, &c. Hinc videmus permultos magis ad audiendum cantum musicum subinde ad Ecclesiam confluere, quam ad orandum, unde in Ecclesiis Fabulæ, cachinni; imò quod novimus aliquando, magis ad libidinis, quam divini amoris faces inflammari. Quare & Conc. Trid. sess. 22. de celebranda Missa : *ab Ecclesiis, Musicas eas, ubi sive Organo sive cantu lascivum aut impurum aliquid miscetur, mandat removeri.* Hinc in musica plenum periculi negotium dicitur, fatetur S. August. cap. 33. supra citato, & ita fluctuo, ait, *inter periculum voluptatis & experimentum salubritatis.* Deinde cantu abutuntur, qui incompōsitâ voce chororum perturbant, cujus aliquando rei sunt superiores, qui sibi subditos cantum non jubent edoceri,

*Sapè est
moderandum.*

*Musica
lasciva
in templis
eliminanda.*

*Ejus dis-
ordinatio.*

quo

quo fit, ut cantûs Ecclesiastici dignitas vilescat alibi, & contemnatur. Qualis verò debeat esse Chori Cantus, statuit his verbis Concilium Aquisgran: sub Ludovico Pio Can. 137. *Psalmi in Ecclesia non cursim & excelsis atque inordinatis vocibus, sed planè & dilucide & cum compunctione cordis recitentur: ut & recitanti mens, illorum dulcedine pascatur, & audientium aures iorum pronuntiatione demulceantur.* Et constitutio Ecclesiæ Gallicanæ: *Laudes divinæ per singulas horas non cursim ac festinanter, sed tractim ac cum pausa decenti, præsertim in medio cujusque versiculi, debitam faciendo inter solemne ac feriale officium differentiam, reverenter ab omnibus persolvantur.* Plura qui de hac re desiderat, adeat opus Eminentiss. Card. Bonæ de Psalmodia, opus dignissimum & admodum rarum.

S E C T I O IX.

Quanam à Lectione horarum excusent.

*Infirmitas
gravi.*

DICENDUM primò, excusat à lectione horarum, 1. gravis infirmitas, non itidem levis, quæ cum illa lectione sine periculo ulteriori stare potest. Hinc febris tertiana aut quartana non excusat, nisi tota die aut potissima diei parte duret: aliàs illi non tenentur alium substituere, quem audiant legentem, ut aliqui volunt. Si tamen solus non ita commodè posset, & commodè posset legere cum altero, ad id teneretur. Consultum tamen hîc, ut in aliis, esset, uti iudicio medicorum, cum sæpè posset hîc mentiri iniquitas sibi, & amor proprius rectum iudicium pervertere.

*Carentia
Breviarii.*

Dicendum 2. Excusat quoque carentia breviarii inculcata: quod ultimum addo, quia si sit culpata, omissio officii quoque censetur culpabilis in causâ. Si tamen sciret memoriter aliquas horas, vel aliud breviarium acquirere posset, deberet eas persolvere, & eo breviario uti, Dicen-

Dicendum 3. Excusat quoque justus timor gravis damni, v. g. proditionis inter hæreticos: quale damnum non censetur esse derisio, aut contemptus, si nihil aliud adveniat. Si tamen in partibus hæreticis degens, satis tutò eas horas persolvere possit, omnino tenetur.

Dicendum 4. Excusant quoque opera charitatis alteri exhibenda, quæ cum lectione horarum stare nequeunt, & prævalent in obligatione eisdem horis. Sic si confessarius tota die deberet audire confessiones, quæ differri non possent, vel ire ad infirmum moribundum, ex benigna Ecclesiæ intentione tales possent ab horarum recitatione excusari. Si tamen ii possint hoc impedimentum prævenire, vel extrahere, deberent officium anticipare, vel superaddere. Ea de causa aliqui excusant illos, qui sub *magnificat* aut *benedictus* thurificando aliqua omittunt, cum choruseadem pro ipsis persolvat: verùm melius illud negatur, cum præviè aut postea satis commodè possit præveniri lectio vel subdi, & thurificatio sat urgens causa sit ad officium aliquatenus interrumpendum, non item ad illud omittendum.

*Opera
Charita-
tis.*

SECTION X.

Quid, cui, à quo sit aliquid rogandum.

DICENDUM primò, *Quærite primum Regnum Dei & justitiam ejus, & hæc omnia adjicientur vobis*, ait Salvator Matth. 6. hinc & Lucæ 11. dicentibus discipulis, *Domine doce nos orare*, subnectit Christus: *Cum oratis dicite: Pater, sanctificetur nomen tuum, adveniat Regnum tuum, &c.* Quasi dicat, primum, quod in omni actione quærere debeas, est, ad Deum ejusque gloriam intendere, utpote qui sit omnium principium & ultimus finis, ad quem dirigenda sunt cætera. Hinc appositè alii dicunt, quidquid censurent alii,

*Ante om-
nia rogan-
da est glo-
ria Dei.*

alii, ideò primò posuisse Salvatorem in oratione Dominica adveniat Regnum tuum, ut significaret omnia opera nostra in Deum esse referenda. Censuram illorum diluit Doctor Angelicus 2. 2. q. 83. a. 9. ubi ait : *In oratione Dominica, non tantum peti omnia, quæ rectè desiderare possumus, sed etiam eo ordine, quo desideranda sunt. Manifestum est autem, quod primò cadit in desiderio nostro, finis, deinde ea quæ sunt ad finem. Finis autem noster Deus est, in quem noster affectus tendit dupliciter : uno quidem modo, prout volumus gloriam Dei ; alio modo, secundum quod volumus frui gloria ejus, quorum primum pertinet ad dilectionem, quâ diligimus nos in Deo : & ideo prima petitio ponitur, SANCTIFICETUR NOMEN TUUM, per quam petimus gloriam Dei. Huic adde S. Bernardum, qui scribens in eandem orationem in auctuario ita habet : SANCTIFICETUR NOMEN TUUM ; post invocationem petitiones adjungit : & quia plus gloriam Dei, quam utilitatem nostram querere nos oporteat (hic quippe finis debet esse in omnibus quæ agimus, scilicet ut glorificetur Deus) tres istæ ut dixi petitiones, glorificationem ejus expostulant. His conformia habet Catechismus Romanus, D. Franciscus & alii quos brevitatibus causâ prætereo. Unde patet, omnia bona tam animæ, quam corporis rectè appeti & orari posse, sed ut primum in intentione semper sit finis ultimus, qui est Deus.*

Oratio in peccatum.

Cavendum verò summopere ne precemur aliorum mortes, puta inimicorum, nisi notabiliter Ecclesiæ aut bono communi nocerent ; aliàs fiet oratio nostra in peccatum.

Qui specialiter invocantur ad orationem.

Dicendum 2. Etsi omnes orare teneantur, ut antedictum est, peculiari tamen ratione orare debent viri Ecclesiastici, qui pro populo Hostias Deo offerre & preces sunt obligati, & constituuntur tamquam intercessores inter Deum & homines.

A quo fit orandum.

Dicendum 3. Orari debet ille, qui necessitati nostræ potens est subvenire : hinc quia Deus ratione summæ bonitatis ac potentia, cuilibet necessitati succurrere

entrere paratus est, dum ait Psalm. 49. *Invoca me in die tribulationis*, ad ipsum ante omnia nostra oratio est dirigenda. Ab ipso enim, & per ipsum sunt omnia, & omne donum ac datum bonum descendit à Patre luminum, adeo ut quando Sanctos rogamus, tamen per Christum rogemus, quod innuit Ecclesia in omnibus collectis concludens, *per Dominum nostrum Jesum Christum*, &c. Quod etiam in Litanis subinducat, dum dicitur Deo, *miserere nobis, propitius esto, parce nobis, libera nos, te rogamus audi nos*, &c. Sanctis verò: *Intercedite pro nobis, orate pro nobis*, &c. Unde & ipse Christus Ioan. 14. ait, *si quid petieritis Patrem in nomine meo*. Vide quæ ad propositum dixi de cuitu SS.

Dicendum 4. Rationem, quare aliquando preces suo effectu frustrantur indicat Jacobus c. 4. ubi ait: *Petitís & non accipitis, eo quod male petatis*. Unde multi ut ait Augustinus in Psalmo 85. dicunt: *Quantum rogavi, quam sæpè rogavi, & non sum auditus*: Quibus idem respondet ibidem: *Si verè Deum invocasti, certus esto, quia id forte, quod volebas temporaliter, ideo non dedit, quia non tibi proderat*. *Ædificetur in hoc cor vestrum Fratres, cor Christianum, cor fidele: Ne incipiatís tristes facti, veluti fraudati desideriis vestris, ire in indignationem contra Deum & non expediat*. Malè insuper petunt, qui aliquando petunt non in nomine Domini, sed sæpè in nomine Diaboli: Qui non petunt in veritate; Propè quidem est Dominus omnibus invocantibus eum, sed in veritate, id est, qui internum affectum externis precibus adiungunt: Deinde notabile est, quod adfert S. August. Serm. 4. de verbis Domini, ubi ait: *Sæpè servat tibi Deus, quod non vult cito dare: Ut & tu discas, magna magnè desiderare. Cum aliquando tardius dat, commendat dona sua, non negat. Diu desiderata, dulcius obtinentur, cito autem data vilescunt*.

Similis medico, de quo idem S. Præsul in Psalm. 85. *Æger multa petit à medico, quæ non dat vel non statim*

*A Sanctis
per Christum.*

*Quare
preces sue
efficiantur
frustrantur.*

*sim dat medicus : Sed non exaudit ad voluntatem , ut ex-
audiat ad sanitatem.*

Orandum in templis Dicendum 5. Etsi Deus sit ubique præsens , ta-
men peculiariter invocari vult in locis sacris : Hac
de causa loca quædam sibi sacrari voluit , promit-
tens 2. Paralip. 6. & 7. *Erunt oculi mei aperti , &
aures meæ erectæ ad orationem ejus , qui in loco isto orave-
rit.* Hinc etiam ex illo loco ejecit vendentes , num-
mularios , &c. dicens Matth. 21. *Domus mea , Domus
orationis vocabitur.* Ad quod ita Vener. Beda hom.
7. in Evang. *Si ergo Dominus nec ea volebat venumda-
ri in templo , quæ in templo volebat offerri , videlicet pro-
pter studium avaritiæ sive fraudis , quod proprium solet
esse negotiantium facinus ; Quanta putas animadversione
puniret , si invenisset ibi aliquos risui , vel vaniloquio va-
cantes , aut alii cuilibet vitio mancipatos ? Si enim ea , quæ
alibi liberè geri poterant , Dominus in domo sua tempo-
ralia negotia geri non patitur : Quamò magis ea , quæ
nusquam fieri licet , plus celestis iræ merentur , si in ædi-
bus Deo sacratè agantur ? Alia ad hanc rem pertinen-
tia dabo agendo de Missa , in Sacramento Eucha-
ristiæ.*

*Oratio ad
omnia est
utilis,*

Dicendum ultimò , oratio sicut pietas ad omnia
utilis est , hominem Deo unit , ejus affectum ad Deum
transmittit , contra omnia infauſta & adverſa subſi-
dium adfert , pro peccatis ſatisfacit , meretur gra-
tiam , fidem , ſpem , & charitatem renovat & exer-
cet , mentem illuminat , humilitatem cauſat & con-
ſervat , pacem & animi delectationem gignit , &c.

SECTIO XI.

De Decimis.

*Quid de-
cima &
quadrupli-
ces,*

DICENDUM primò , Decimas eſſe decimam par-
tem fructuum quæ quotannis Eccleſiæ Miniſtris
perſolvitur. Solet in jure Can. ſtatui triplex decima,
ſcilicet

scilicet *Prædialis*, *personalis* & *mixta*. *Prædialis*, est decima pars, quæ solvitur ex fructibus, qui proveniunt ex prædiis, v. g. ex vino, oleo, frumento, &c. *Personalis* est, quæ persolvitur ex fructibus provenienti-
 bus, ex industriâ sive operâ personæ, v. g. ex ve-
 natione, mercaturâ, opificio, &c. Hæc tamen in
 disfluetudinem abiit. *Mixta* est, quæ dari debet ex
 fructibus provenienti-
 bus partim ex industriâ homi-
 num, partim ex prædiis, quales sunt decimæ ani-
 malium, v. g. pecorum, ovium, &c. Animalium,
 uti & illorum fructuum, puta lactis, casei, butyri,
 lanæ, &c. Ad pascenda enim & alenda pecora re-
 quiritur hominum cura & industria, uti & ipsa præ-
 dia, ex quibus solent sustentari.

Dicendum 2. Certum esse decimas absoluto ju-
 re deberi Ministris Ecclesiæ, idque ex verâ justitiâ,
 adeo ut Ministri illi easdem exigere possint tamquam
 ex justitiâ sibi debitas. Aliud docebat Wicclef in
 Concilio Constant. Articulo 18. damnatus, dicens: *Decima
 debentur
 ministris
 Ecclesiæ
 ex justitiâ.*

*Decima sunt pura eleemosyna, & Parochiani possunt
 propter peccata suorum Prælatorum ad libitum suum eas
 auferre.* Probatur tamen Conclusio, quia cum jura,
 sive divinum, sive naturale, sive etiam Ecclesiasti-
 cum (de quo statim) injungant & præscribant de-
 cimarum persolutionem; Tribuunt Ministris Eccle-
 siæ jus exigendi & percipiendi decimas. Unde sicu-
 ti ex verâ justitiâ debentur tributa principibus, adeo
 ut eadem defraudans peccaret contra justitiam: Ita
 & peccaret contra justitiam, qui decimas nollet per-
 solvere, detinendo & usurpando sibi rem alienam,
 puta rem Ministris Ecclesiæ debitam. Probat idem
 communis loquendi modus tum SS. PP. tum Cano-
 nistarum & aliorum, qui unanimiter docent, de-
 fraudare Ministros Ecclesiæ illos, qui decimas no-
 lunt persolvere; Per fraudem verò retinere rem al-
 teri debitam, indubiè importat violationem justitiæ.
 Idem satis innuunt alii loquendi modi satis usitati,
 dum dicitur decimas Ministris esse debitas, & qui eas
 dare

*Ex quâ
justitiâ
debeantur
decimæ.*

dare noluerint aut dantes impediunt, res alienas invadere, prout loquitur Conc. Trid. Sess. 25. cap. 12. ex quibus sequitur ex justitiâ commutativâ decimas esse persolvendas, imò & aliquatenus ex justitiâ distributivâ, prout clarè ostendit Card. Bellarmin. de Clericis l. 1. c. 25. dub. 4. Deus enim primitus injunxit decimam partem fructuum dari levitis tamquam Dei Ministris, qui erant ex tribu Levi ex aliis 12. tribus, sive 13. cum tribus Joseph in duas esset divisa, scilicet Ephraim & Manasse. Quòd verò decimam partem injunxerit, non verò decimam tertiam, ideo fortè magis proportionaliter fecit, quia non defuturi essent decimarum retentores, qui decimas vel non æquo vel nullo modo solverent, & consequenter decimam partem injunxit, ut ita veniretur ad æqualitatem. Nec tamen objici potest, Clerum in N. L. vix esse partem sexagesimam, ubi levitæ in V. T. erant pars decima tertia, adeoque non illis, uti levitis competere partem decimam fructuum: Quia ut notat idem Author loco citato, Ministri N. T. majoribus laboribus sunt obnoxii, quam erant levitæ Sacerdotes, qui ex solâ familiâ Aâronis assumebantur, alii erant turba famulorum: Adde, unicum in L. V. fuisse templum, modo verò innumera Ecclesiasticis sumptibus conservanda, uti etiam modo plurimos à solvendis decimis esse liberos, vel ex malitiâ nolentes solvere, vel ex concessione Ecclesiæ, v. g. Reges & principes, qui in subsidium belli earundem condonationem ab Ecclesiâ impetrant; Unde concludit Doctor Angelicus quod omnibus ritè perpensis, determinatio decimarum ab Ecclesiâ facta, benignior sit & humanior quam patiatur rigor absolutæ justitiæ.

*Quo jure
decimæ
sint debite.*

Dicendum 3. Tametsi diuturna & minus aspera fuerit disceptatio inter Canonistas & Theologos, quo jure debitæ sint decimæ, verior tamen opinio tenet decimas secundum id, quod sunt ministrorum stipendia, jure naturali divino esse debitas, cum
jus

jus naturæ & divinum dictent operarios dignos esse suâ mercede. Hoc dictamine naturæ obtulit Abraham ante Legem Scriptam decimas Melchisedech Regi Salem, de spoliis 5. Regum devictorum Genes. 14. Eâdem lege, legimus istos gentiles, suis Sacerdotibus & idolorum ministris certa stipendia assignasse, tamquam iisdem ex justitiâ debita. De divino jure resest clara ex Levit. ultimo, num. 18. & alibi passim, ubi Deus jubet Levitis dari decimam fructuum partem, quæ lex quatenus est moralis, etiam obligat Christianos, cum moralia fundentur in lege naturæ, quæ omnes & semper obligat.

Quatenus verò stipendia Ministrorum Ecclesiæ taxata sunt & determinata ad partem decimam, sic verior est Theologorum sententia, decimas esse solùm ex jure Ecclesiæ. Ratio est, quia præceptum decimarum, quantum ad illam determinationem, non est legis naturæ, quæ solùm generaliter dictat, Ministris Ecclesiæ deberi stipendium, non determinando partem decimam aut vigessimam: nec etiam præceptum illud quoad illam determinationem est juris divini, cum nullibi in lege novâ illud extet quoad illam determinationem: neque etiam in l. v. quia in quantum morale est nos obligans, non importat talem determinationem, sed ut ita determinatum ad partem 10., est propriè judiciale prout docet S. Thomas 2. 2. q. 88. a. 1. Quod cum suâ lege evanuit, prout & Cæremonialia. L. V. præcepta.

Dicendum 4. Ex dictis sequi Ecclesiam posse legem de dandis decimis vel extendere vel minuere, nullo modo tamen eam totaliter abrogare. Prius patet ex eo, quòd lex illa sit lex Ecclesiastica in quâ proinde potest Ecclesia dispensare, & pro suo beneplacito eam invariare. Unde potest Papa justâ de causâ præcipere, ut qui modo dant decimam partem fructuum, dent de cætero tantum vigessimam, & è contra. Posterius etiam videtur certum: si enim legem decimarum tollere Ecclesia posset, posset tolle-

Quid Ecclesia possit circa decimas.

re legem naturalem divinam, quæ dictat stipendia debita esse Sacerdotibus, quæ lex utique auferretur, si omnino lex decimarum supponeretur ablata aut abrogata. Fatendum tamen, posse Ecclesiam justis de causis aliquos absolvere à solvendis decimis, uti sæpè fit, sic tamen ut semper suis Ministris sufficienter provideat, nec in eo legem decimarum totaliter auferat, sed solum cum aliquo dispensat, relinquendo legem illam in suo vigore quoad alios. Dicta quoque intelligenda sunt de lege decimarum considerata ut est lex dandi stipendia Ministris Ecclesiæ, siue ut est lex moralis, cum certum sit, legem illam, ut est determinata ad decimam partem, posse ab Ecclesiâ abrogari eo ipso, quo in universum præscriberet solvi partem vigesimam.

Quæ in hac conclusione dicta sunt de lege, etiam dicenda sunt de consuetudine, quæ habet vim legis, ac proinde si possit lex decimas immutare vel etiam abrogare modo mox dicto; ita potest & consuetudo legitimè præscripta. Insuper, sicut consuetudo tollit legem, ita & converso lex potest tollere consuetudinem: & consequenter ubi consuetudo obtinuit vel nullas decimas dare vel solum vigesimam, potest Ecclesia justis de causis ferre legem de dandâ parte daciinâ, priorem consuetudinem abrogando. Postremò circa jam dicta notari potest, sæpè apud SS. PP. & DD. legi, decimas deberi ex jure divino, vel quia intelligunt decimas prout sunt stipendia Ministrorum Ecclesiæ; vel quia volunt eas esse de jure divino additâ determinatione Ecclesiæ, prout est lex de sanctificando Festo juris divini, vel denique, quòd illa determinatio ad decimam habeatur jure divino, quam Ecclesia innovavit, etsi quoad determinationem illam absolutè sint juris posuivi Ecclesiastici, ut ex dictis constar.

*Quomodo
debeantur
decima
jure divi-
vino,*

S E C T I O XII.

Quinam decimas dare debant, quibus, quando & quâ de causâ?

DICENDUM primò, omnes omnino, qui propria possident, debent dare decimas, sive ille nobilis sit sive ignobilis: dives sive pauper: laïcus sive Clericus: Christianus sive hæreticus, dummodo propria possideant Christianis subiecta. Ita statuitur in jure C. à nobis, de decimis, & alibi passim: lex enim hæc Ecclesiæ est generalis omnes omnino obligans, nisi specialiter ab eâdem, justâ de causâ quis eximatur. Quòd verò ad nobiles spectat, non solum ii ad dandas decimas obligantur, sed etiam ad jus decimarum pro Ecclesiæ ministris defendendum, contra illud jus violantes. Cùm enim nobilium maximè Regum ac Principum munus primarium sit jus suum cuique tueri: maximè obligantur ad tuenda jura ministrorum Ecclesiæ. Imò cùm Regnis suis ac Dominiis inaugurantur, non solum tactis Sacrosanctis Evangeliiis jurant se Ecclesiæ jura observaturos, sed etiam, quòd ea observari facient. Deinde, ad persolvendas decimas cæteris artius obligantur, vel eâ solâ ratione, quòd si decimas violent, subditi eorum exemplo facilè inducentur ad easdem violandas, nam secundùm judicem populi, sic & ministri ejus, ait sapiens Eccli. 10. & *qualis rector est civitatis tales & inhabitantes in eâ.* Denique, si nec Principes à solutione decimarum sint exempti: multò minùs quoque alios ab iisdem persolvendis possunt eximere, cùm laïca potestas, nihil disponere possit de rebus ad Ecclesiam pertinentibus, sine consensu Ecclesiæ. Unde graviter peccant ii, qui principum agros elocant sub conditione non solvendi decimas, illos scilicet agros, qui defectu solutionis censualis evincuntur, et si hucusque

*Nobiles
debent decimas
dare & con-
servare.*

decimas persolverint, quod aliquando Regii ministri infcüs Regibus non sine magno scandalo & Ecclesiæ damno & injuria practlicant ad propriam utilitatem, & ipsius Regiæ Majestatis vilipendium. Hinc tam sollicitè admonet Conc. Trid. sess. ult. c. 20. Reges & Principes Catholicos ut subditos suos ad debitam Ecclesiæ reverentiam vocent: nec permittant, ut officiales aut inferiores Magistratus, Ecclesiæ & personarum Ecclesiasticarum immunitatem Dei ordinatione & Canonicis sanctionibus constitutam, aliquo cupiditatis studio seu inconsideratione violent aut infringant, sed unà cum ipsis principibus debitam sacris summorum Pontificum & Conciliorum constitutionibus observantiam præstent.

*Etiam
pauperes
debent dare
decimas.*

Quòd verò non solum divites sed & pauperes teneantur dare decimas etiam Clerico diviti, declarat S. Thomas quodlibeto 6. art. 10. ex eo, quòd obligatio decimarum spectet ad justitiam commutativam, in quâ non consideratur conditio personæ, sed æqualitas rei ad rem: sicut qui emit rem aliquam, tenetur solvere pretium rei, sive ille dives sit sive pauper.

*Etiam
Clerici.*

Nec solum Laïci, sed & Clerici tenentur solvere decimas, non quidem decimas decimarum, quas ipsi percipiunt, sed de prædiis patrimonialibus, quæ possident, cum decimæ sint onera prædiis annexa, nisi fortè inserviant Ecclesiæ, cui debentur tales decimæ, cum eo casu sint Parochi adjutores, & solum de illis debeant decimas, quando in possessione eorundem se habent ut Laïci, qui in alienâ Parochiâ bona possident. Si verò Clericus prædium habeat, quod pertinet ad Ecclesiæ dotem, sive quod habet ratione Ecclesiastici beneficii in alienâ Parochiâ, variant Authores, an teneatur de illo prædio Clericus dare decimas, aliis negantibus, eo quod similia prædia possideat ut Clericus, adeoque ab obligatione decimarum sit absolutus: aliis tamen absolute affirmantibus, etiam similia prædia esse decimis

mis obstricta : Etsi enim dotalia sint Ecclesiæ prædialia, sunt tamen cum onere decimarum ad Ecclesiam translata, neque aliter transferri potuerunt, cum una Ecclesia non possit cum damno alterius extrui, dotari, &c. Unde etiam prædialia ad fundanda monasteria data, eo ipso non sunt libera ab obligatione decimarum : Quod & videtur rationi conformius & æquitati, quamquam in hac re cuilibet legitimæ Consuetudini possit adhereri.

De hæreticis quoque res est clara, cum & illi subijciantur legibus Ecclesiæ, uti declaravimus in anterioribus agendo de hæreticis. *Etiā hæretici.*

Dicendum 2. Decimæ debentur Clericis sive Ecclesiæ Ministris, ac Primario quidem Parocho loci, in quo est prædium, etsi prædii Dominus in aliâ parochiâ audiat Divina sive Sacramenta percipiat. Deinde Episcopo loci, qui est Parochus Superior, & cui Primario incumbit pascere gregem suum in spiritualibus. *Quibus debeantur decimæ.*
 Quod verò ad Laicos spectat, quos sæpè decimas percipere & exigere videmus, in primis notandum est, *An Laici possint percipere decimas.*
 Laicum per se & nomine suo non posse obtinere jus decimarum, quod cum sit spirituale, in Laicum cadere non potest. Unde, qui possessionis est incapax, rem illam usucapere nequit aut præscribere. Poterit tamen nomine Ecclesiæ concedentis ipsi decimas, exigere easdem, prout ille, qui decimas à Parocho conducere solet. Solet autem Ecclesia personis Laicis, similem facere facultatem propter obsequium aliquod Ecclesiæ præstitum, quare sæpè in feudum Principibus decimas ab Ecclesia datas videmus; vel etiam decimas concedit propter aliquod munus in Ecclesiâ, v. g. cantus aut quid simile; Ita tamen ut semper ratione & nomine Ecclesiæ decimæ à Laico exigantur. Ex quo Colligi potest, quo sensu varii Pontifices anathemate feriri curaverint Laicos varios, qui jure hæreditario decimas prætendebant, puta jure proprio, nec ab Ecclesiâ sibi communicato. Cum verò in Concilio Lateranensi habito 1179, sit interdictum Laicis dare de-

decimas in feudum in perpetuum : Sequitur Episcopi auctoritate decimas non posse Laïco dari in feudum idque in perpetuum , sed solâ summi Pontificis auctoritate , cùm hoc jure comuni sit interdictum , in quo Episcopus nequit dispensare. Possunt tamen auctoritate Episcopi decimæ Laïco vendi , elocari aut concedi ad breve tempus justâ de causâ , cùm in Clement. I. *De rebus Eccles. non alienandis* , dicitur , quod res Ecclesiæ ad breve tempus possint alienari. Modicum verò tempus in jure solet esse intra decennium ; sub quo tamen non videtur posse comprehendi elocatio vel concessio ad vitam. Ubi tamen usu recepta est constitutio Pauli 3. quæ incipit *Ambitiosa* : de rebus Eccles. non alienandis , decimæ ultra triennium alienari non possunt.

*De quibus
debeant
dari deci-
mæ.*

Dicendum 3. Etsi in jure persolutio decimarum facienda sit ex omnibus fructibus prædii , ex omni lucro negotiationis , aut alterius industriæ , uti & ex omnibus animantibus eorumque fructibus , & satis concordet lex divina de omnibus bonis decimas præscribens : tamen in hac parte plurimum valet & attendi debet , cujusque loci consuetudo. Hinc in quibusdam locis videmus decimas fœni solvi , in alia minimè , uti & in aliis multis , tam fructibus prædiorum , quam animalium. Hoc tamen notandum est , quòd si prædii fructus non solvant ex consuetudine decimas , si fructus illi à Domino mutantur , v. g. si prius fœnum erat postea aretur & fiat frumentum , de eodem decimas esse persolvendas : uti & è contra à decimis sunt exempti , si fructus ex consuetudine non debeant decimas , etsi fructus anteriores prædii debuerunt. Insuper , si prædium bis terve in anno ferat fructus , ex jure de omnibus dandæ sunt decimæ , quamquam consuetudo hic sæpè aliud præscribat.

*Quando
decima
sint solven-
da.*

Dicendum 4. Decimam prædialem solvendam esse , quando fructus prædii sunt collecti : ex fœtu verò animalium solvendæ sunt , quando est tempus nascendi pullorum : ex lanâ , quando pecudes solent

ton-

tonderi; expellibus, butyro, &c. Quando ejusmodi res solent præparari. Cum verò decimæ, sint oblatio de jure debita Ecclesiæ ministris, clarum est decimas dandas esse etiam antequàm petantur. Hinc apud Esdram 1. 2. c. 10. *Legimus; primitias Ciborum nostrorum... afferemus Sacerdotibus, & decimam partem terræ nostræ Levitis.* Et Deuteronomii 12. *in loco quem elegerit Dominus Deus vester illuc omnia quæ præcipio vobis conferetis, holocausta & hostias ac decimas, &c.* Denique Malachiæ 3. *Inferre omnem decimam in horreum meum.* Et illud Esdræ 2. c. 13. *Et omnis Juda apportabat decimam frumenti, vini & olei in horrea.* Ubi notari possunt ista verba, *afferre, conferre, inferre & apportare.* In quo Judæi Christianos confundunt, qui non solum manipulos decimarum in agro relinquunt, sed etiam eosdem ab injuriâ aëris vel digito liberare dedignantur, nec multum decimarum accederet ad Parochos, si eorumdem curâ decimæ non colligerentur: adeo ut verum foret illud Chrysostom. in 2. ad Ephes. hom. 4. *mihi, ait, dicere solebat nescio quis, miraculi loco referens, talis decimas dat.* Additque: *Quanti dedecoris plenum hoc est, quia quod Judaica legis tempore nihil præsefererat miraculi dignum, hoc ipsum inter Christianos capiti videri mirabile?*

Dicendum 5. Decimas deberi primò Deo ipsi ob supremum ejus dominium in omnes res creatas, cum *Quibus debeantur decimæ.* *Domini sit terra & plenitudo ejus, orbis terrarum & omnes qui habitant in eo: Psalm. 23, unde Eccl. 35. In exultatione sanctifica decimas tuas: da altissimo secundum datum ejus. & Levit. 27. Omnes decimæ terræ, de frugibus, sive de pomis arborum, Domini sunt.* Neque tamen inde liceat inferri, præceptum decimarum in L. V. fuisse Cærimoniale, quod tamen antea negavimus, cum tametsi decimæ dentur in protestationem summi Dominii, & consequenter ad colendum Deum: non tamen immediate & per se dantur ad illum finem, uti faciunt Sacerdotes in Sacrificiis: verum Deo solum mediatè dantur decimæ, puta Deo in suis ministris: ad cære-

moniale præceptum autem requiritur, ut sit immediatè & per se datum, ad colendum Deum.

Secundò dantur decimæ ministris Ecclesiæ ad eisdem sustentandos propter eorundem ministerium, cum dignus sit operarius mercede suâ, & qui bene præfunt Presbyteri, duplici honore digni sint habendi, maximè qui laborant in verbo & doctrina, ut ait Apostolus 1. Tim. 5. porro decimarum persolutio in comparatione tanti ministerii, nulla est, siue laborem ejus consideres siue dignitatem, etsi homines carnales sese nimium debere aliquando opponant sine fundamento.

Tertiò dantur decimæ propter pauperes: nec solum eæ dantur Clericis ut se pascant, sed etiam ut pauperum curam habeant, quorum sunt Patres spirituales. Hinc S. Aug. Serm. 219. de temp. decimæ, ait, *Tributa sunt egentium animarum: redde ergo tributa pauperibus: offer libamina Sacerdotibus: & quanti pauperes in locis ubi ipse habitat, illo decimas non dante, mortui fame fuerint, tantorum homicidiorum reus ante tribunal æterni judicis apparebit, quia à Domino pauperibus delegatam suis usibus reservavit.* Quæ sententia meritò in jure Can. est olim inserta. Ex quo etiam colligitur Episcoporum & aliorum Clericorum decimas recipientium obligatio quoad pauperes juvandos, cum decimæ non solum propriæ sustentationi, sed & pauperum sint concessæ. Idem est de decimis Abbatiis & mensæ Prælatorum attributis: quasi decimæ solum ejusmodi mensæ sint appropriatæ & non simul debeantur egenis.

SECTIO XIII.

Quomodò decimæ sint exigendæ?

DICENDUM primò, decimæ exigendæ sunt coram judice Ecclesiastico, cum decimarum causa sit planè spiritalis, quæ ad Laicam potestatem non pertinet. Quæ conclusio etiam locum habet in iis quæ-

quæſtionibus, quæ ex jure decimarum ortum habent: v. g. quando conductor decimarum non ſatisfacit, &c. Aliud eſſet, quando fructus decimi jam collecti ſunt aut ſoluti, ſi eoſdem quis furetur aut aliter invadat, tunc enim ejusmodi cauſa coram judice Laïco poterit tractari, cum ejusmodi fructus jam ſoluti, non ſint quid ſpirituale, aut aliquam habere connexionem cum ſpirituale ampliùs cenſeantur.

Dicendum ſecundò, eſſi Clerici teneantur ſollicitè *Præſtat aliquando non niſi ſummo rigore in exigendis decimis.* tueri jura ſuarum reſpective Eccleſiarum; illudque juraverint: tamen aliquando expedit, extremo rigore in defendendis decimis non uti, maximè ſi ex illo rigore prævideatur grave ſcandalum aut aliud incommodum. Cum enim juramentum non ſit vinculum iniquitatis, certum eſt, juramentum non habere locum in caſu gravis ſcandali aut Dei vel proximorum injuriæ: debet ergo juramentum intelligi, ſalvis honore Dei & ædificatione proximorum, & temporalia potiùs perdenda ſunt, quàm quòd nomen Dei propter noſtrum rigorem blaſphemetur aut proximi ſcandalifentur. Aliud foret, ſi ſolum eſſet ſcandalum Phariſaicum, uti dictum eſt de ſimili caſu, agendo de ſcandalo.

Dicendum 3. Eſſi quoque Concilia & Eccleſia velint, ut jura decimarum maneant inviolata, tamen ſæpè propter commune bonum tum Eccleſiæ tum Reipubl. aliquid de jure illo adimitur, in quo ſeſe ſubditi & inferiores Clerici tenentur conformare conſenſui ſuperiorum. Sic Alexander Farnexius ab hinc circiter 100. annis partes noſtras Catholico regimini ſubdens, alibi convenit, ut decimas non ex integro deberent ſolvere, prout & alibi ab aliis eſt inſtitutum: Quod tamen nihil omninò conferre aliqui volunt, quo minùs ſubditi illi à ſolutione decimarum eximantur, cum politica poteſtas nequeat illud relaxare, quòd generali Eccleſiæ conſtitutione eſt injunctum, puta decimas plenè & fideliter perſolvere. Verùm enim verò ſupponi hîc debet, in primis

primis talia non sine consensu superioris Ecclesiæ factum & conventum esse idque ob boni publici necessitatem. Quâ causâ expedit rigorem legis Ecclesiasticæ aliquando vel pro parte vel etiam in toto cedere & remitti: In quo proinde inferiores Clerici sese tenentur conformare: Si tamen, quædam opponenda habeant, quasi id necessitas boni communis, aut alia causa non exegisset, habent quo modestè appellent & judicetur de æquitate causæ, quæ prætenditur: In dubio tamen standum erit iudicio Episcopi aut alterius superioris annuentis tali conventioni.

*Tenetur
Parochus
quis decimarum
exallic ob-
servare.*

Dicendum 4. Tenetur quilibet Clericus decimas suas exactè observare & solvi procurare, nec potest pro suo libitu easdem remittere aut non exigere: Ad prius enim tenetur vi iuramenti præstiti, ad tuenda jura suæ Ecclesiæ. Ad posterius quoque obligatur, quatenus non solum ad se ipsum spectant decimæ, sed & ad omnes alios subsequeutes, quibus sæpè condonando decimas graviter præjudicat. Hinc graviter delinquant Parochi ditiores, qui decimarum curam negligunt, quo fit, ut alii succedentes non nisi cum magno labore & damno decimas sibi debitas recuperare possint, quas sui prædecessores suâ incuriâ neglexerunt.

*Pœna non
solventi-
bus deci-
mas.*

Dicendum 5. Graves esse pœnas constitutas iis, qui decimas non solvunt, aut easdem injuriosè invadunt. Primò enim Malachiæ 3. dicitur homo Deum veluti clavis affigere, qui decimas non solvit. Deinde variè exaggerat aliam pœnam eorundem S. Aug. hom. 49. ad plebem Africanam, dum ait: *Majores nostri ideo copiis omnibus affluebant, quia Deo decimas dabant, & Cæsari censum reddebant: Modo autem quia decessu devotio Dei, accrescit indictio fisci. Nolimus cum Deo partiri decimas, modo autem totum tollitur: Hoc tollit fiscus, quod non accepit Christus.* Et post pauca ex parte Dei ita subdit. *Fallere me existimastis, intus in thesauris vestris, & in domibus vestris erit direptio: Dabo impio militi, quod non vis dare Sacerdoti.* Certè expectantia

rientiâ constat, plerofque experiri hanc S. Auguftini fententiam, non aliâ de causâ, quam quia decimas Deo & Parocho non perfolvunt. Aliam pœnam ftatuit Conc. Trid. Sef. 25. c. 12. in eos, qui decimas fubtrahunt aut impediunt, fcilicèt excommunicationem, nec quod ab hoc crimine abfolvi poffunt, nifi plenâ reftitutione fecurâ. Quod fi quidam decimas injuftè ufurpatas, quietè easdem poffidere pergant, nec in fua poffeffione deturbentur, cogitent fibi majorem in futuro remanere pœnam Sacrilegio ex æquo debitam,

Econtra verò, quanta benedictio maneat illos, qui exemplo Tobix c. 1. Decimas *Fideliter* offerunt, vel ipfi gentiles experti funt, quorum hoc erat adagium: *Dives fieri, qui vult, herculi decimam folvito.* Idem promifit ipfe Deus per Prophetam Malachiam 3. ubi ait: *Inferre omnem decimam in horreum & fit ci-bus in domo mea: & probate me fuper hoc dicit Dominus, fi non aperuero vobis cataractas Cæli, & effudero vobis benedictionem ufque ad abundantiam, & increpabo pro vobis devorantem & non corrumpet fructum terræ vestræ.* Hinc eodem jufto Dei judicio videmus, quasdam terræ partes congruenti imbre perfundi, fructus dare uberrimos, alias autem fatis Contiguas arefcere, fructus grandine devaftari, à prædonibus conculari, &c. Unde ut ab hujufmodi pœnis terræ liberentur, & è contra benedictionibus dictis repleantur: sæpè à parochis obligatio fubditorum quoad decimas perfolvendas erit exponenda & ad eandem follicitè admonendi, non proprii lucri cupiditate, fed defiderio & Zelo boni communis & gloriæ Dei & Ecclefiæ ac falutis fubditorum.

Denique hic advertendum eft, ne Parochi juftâ decimarum folutione defraudentur, & superiores eifdem fine labore gaudeant: Fit enim fubinde quod ii, qui fufstinent pondus diei & æftûs minimam decimarum partem recipiant, quibus tamen primariò decimæ debentur. Hinc verbis Eximii D. Joan. Mo-lani

*Benedictio
nes folven
tium de-
cimam.*

dist. 38. a. 3. q. 2. *Deus vult sacrificia voluntaria, non ad val-*
coacta. Idque ideo, ne forsan videretur coactionis ^{rem voti.}
 aut injuriæ approbator. Hinc si quis metu gravi inju- ^{libertas.}
 riosè intorto voveat, votum non tenet defectu liber-
 tatis essentialiter ad votum requisitæ.

3. Requiritur intentio sese obligandi, quæ trahitur ab ^{Intentio}
 intentione vovendi. Qui enim vult vovere, vult quo- ^{se obligan-}
 que sese obligare. Unde si quis, vovens non intende- ^{di.}
 ret sese obligare, irritum esset votum, cum actus
 agentium ex intentione, non plus obligent, quam
 intentio ferat. Hinc etiam error versans circa substan-
 tiam vel finem voti, invalidat votum, cum ad illud,
 de quo ita erratur, non censeatur sese extendisse in-
 tentio voventis. Aliud est, si error sit solum circa ac-
 cidens aliquod rei, quæ vovetur, vel finem secunda-
 rium qui intentionem voventis non censetur inva-
 riare.

4. Requiritur, ut votum sit de re Deo grata, idest, ^{Debes esse}
 quæ cum ordinario Dei auxilio est in potestate no- ^{de re Deo}
 stra, quæ sit bona, & melior quam opposita, sub ^{grata &}
 qua etiam intellige abstinentiam bonam & Deo gra- ^{possibilem.}
 tam. Hinc votum de re mala, vel quæ impedit ma-
 jus bonum, vel quam cum ordinaria Dei opitulatione
 facere quis nequit, est omnino irritum, v. g. votum
 numquam peccandi venialiter, votum aliquem occi-
 dendì, votum non ingrediendi Religionem, non dan-
 di eleëmofynam, &c. Licitum tamen est votum du-
 cendi uxorem, si non possit quis se continere, cum
 tunc sit melius nubere, quam uri. Item licitum est vo-
 vere se numquam votum amplius emissurum, si vo-
 vens sese vovendo innumeris scrupulis & perturba-
 tionibus soleat involvere: tum enim præstat non vo-
 vere, quam vovere cum tanto onere. Ratio dictorum
 est, quod promissio sit gratificatio, nemo autem gra-
 tificat Deo promittendo rem Deo exosam, aut cui
 gratius est aliquid omittere, quam idem facere: dein-
 de ad impossibile nemo obligatur.

Dicendum 2. Votum in conscientia obligat, adeo ^{Obligatio}
 ut ^{voti.}

ut mortaliter peccet, qui in re gravi illud non servat. Unde Eccles. c. 5. *Si quid vovisti Deo, ne moreris reddere: displicet enim ei infidelis & stulta promissio.* Si verò dubitet quis factâ debitâ investigatione, an voverit nec ne, non tenetur voto, eo quòd hoc casu melior sit conditio possidentis. Si verò certus de voto, dubium tamen sit de legitima materia, obligatur voto, eo quòd onus hoc pacto libertati sit impositum.

Dicendum 3. Obligatio voti negativi, quo quis vovet aliquid non facere, currit pro semper: obligatio verò voti affirmativi currit pro eo tempore, quo vovens illud vovit exequi: si verò ex intentione voventis illud tempus non sit determinatum, stringit primâ opportunitate. Si denique sint vota conditionata, obligant dum conditio est posita.

S E C T I O I I.

Quisnam possit vovere.

*Potens vo-
vere,*

DICENDUM primò Omnis homo rationis compos, quantum de se, potest validè vovere, nisi aliunde sit impeditus. Impediuntur autem lege Ecclesiæ quoad vota solemnia impuberes usque ad annum ætatis 16. ita Conc. Trid. Personæ verò alteri subjectæ vovere possunt, sed non firmiter, id est, non ita quin possint eorum vota revocari à superiori. Sic religiosi, etsi vovere possint, tamen à superiori eorumdem vota possunt irritari & revocari, unde illorum votis hæc conditio annexa subintelligitur, *nisi superior contradixerit.* Aliud tamen est, de novitiis, qui non censentur adhuc tam strictè superiori subjecti, nisi per professionem, quæ cætera omnia vota solvit. Idem est de impubere, cujus vota Pater aut curator potest irritare: Item uxoris vota potest irritare maritus, si vota illa sibi vel rei domesticæ sint incommoda, cum in iis vir sit caput mulieris: item ser-
vorum

votum vota possunt irritare Domini, quatenus illa obsequiis debitis adversantur.

SECTIO III.

Quisnam possit vota commutare, in iis dispensare, &c.

DICENDUM primò, Quilibet etiam privatâ auctoritate potest vota mutare in aliquid, quod constat esse melius, & Deo gratius. Ratio est, quòd illud melius in se contineat aliud minus bonum. Sic potest quivis, quævis vota commutare in votum professionis religiosæ, quo homo sese quasi Deo in holocaustum offert. Non tamen propriâ auctoritate potest quis mutare votum in aliud æquale aut minus bonum: idem dic, si commutatio etiam in melius, cederet in detrimentum tertii, qui jus in illud quod votum promittebat, per acceptionem acceperat.

Permutatio voti.

Dicendum 2. Quicumque potest in votis dispensare, potest eadem commutare: commutatio enim est minor dispensatione. Si verò quis velit votum commutare, debet commutare in aliquid aliud, quod sit æquale aut ferè æquale, cum commutatio sit impositio alterius oneris in locum prioris, facta in ejus favorem, qui vovit. Et in hoc differt à dispensatione, quâ obligatio voti tollitur, non alia imponitur. In hoc tamen conveniunt, quòd utriusque dispensatio, ita commutatio voti debeat fieri iusta de causa.

Qui potest vota commutare

Dicendum 3. Ordinaria potestas dispensandi refidet in Pontifice respectu omnium fidelium. Episcopus illam habet respectu suorum subditorum, exceptis iis votis, quæ Papæ sunt reservata. Eam Abbates etiam habent in suos subditos Religiosos. Vota autem Pontifici reservata sunt, *Castitatis perpetuæ, Religionis approbatæ*, quibus alii addunt vota peregrinationis ad *Limina*

Dispensatio voti.

Limina

Limina Apostolorum, Compostellam & Ultramarinæ sive Jerusalem.

*Desistio
voti.*

Dicendum 4. Sæpè quoque desinit obligatio voti, si materia voti fiat mala, impossibilis, inutilis, majoris boni impeditiva, &c. Idem est si cesset causa finalis, v. g. votum de danda eleëmofynâ Joanni pauperi, cessat si Joannes fiat dives. Idem est, si talis casus superveniat voto, à quo votum incipere non potuisset. Idem de gravi incommodo vel periculo supervenienti dicendum est, si prævideri moraliter non potuerit. Idem denique dicendum est de votis ad certum tempus determinatis, v. g. si quis die Dominica sequenti voveat audire concionem, quam negligit, cessat votum eo tempore transacto.

Dicendum 5. Potest summus Pontifex dispensare in voto solemnî castitatis, prout factum est cum Casimiro Poloniæ Rege, Monacho Ord. Clun. Diacono auctoritate Clementis XI. & Benedicti IX. item cum Constantia Rogerii Regis Siciliæ Filia Monacha, auctoritate Cœlestini III. hanc sententiam probabiliorum docet S. Thomas 4. sent. dist. 38. q. 1. art. 4. quæstiunc. 1. ad 3. dicens quod Papa in casu communis utilitatis hîc possit dispensare. Hinc quando 2. 2. q. 88. art. 11. innixus Decretali cap. *cum ad Monasterium* contrarium quasi innuente aliter differit, intelligi debet, quòd Papa non possit dispensare in hoc casu cum Monacho manente Monacho seu Religioso cui castitatis votum est essentiale. Patebit hæc conclusio magis ex dicendis sectione 5.

Dicendum 6. Poterit aliquando Episcopus longè Româ distans, v. g. in Belgio, dispensare in voto Pontifici reservato, si sit ingens periculum spiritualis salutis; quo casu dari posset dispensatio ex præsumptâ intentione Pontificis, de quo credi prudenter potest, quod hoc casu non velit sibi dispensationem reservare, sed Episcopis illam pro eo casu communicare, hocque videtur exigere suave Ecclesiæ regimen. Ita plurimi Theologi & Canonistæ. Tale periculum verò, est

est periculum incontinentiæ, gravis scandali, damni, &c. v. g. si hoc necesse sit ad legitimandam problem, potest Episcopus in voto castitatis perpetuæ dispensare, si sit periculum in morâ. Item si quis violasset Virginitatem post emissum simile votum, & modo eam vellet ducere ad reparandum ejus honorem, poterit Episcopus in eo dispensare, si timeatur prudenter, quòd eo tempore, quo adiur Pontifex, matrimonium illud per amicos impediatur. Hoc tamen hic sollicitè notandum est, quòd dispensatio illa in tantum sit concedenda, quantum necessitas postulat, cùm sola necessitas eam concedit. Hinc si possit adiri superior, aut ejus vices gerens, debet omnino adiri, nec dari potest dispensatio. Alia huc concernentia videri possunt in materia de matrimonio, agendo de voto & aliis impediementis.

S E C T I O IV.

An sit laudabile vovere castitatem perpetuam in sæculo.

DICENDUM primò, omnino laudabile esse & Consultum Apostolicum vovere castitatem etiam in sæculo. Patet illud exemplo B. Virginis, item Philippus Diaconus domi suæ habebat 4. Filias Prophetissas, de quo act. 21. has autem Virgines fuisse passim ostendunt commentarii bibliorum. Insuper 1. Tim. 5. satis ostenditur, quasdam viduas in sæculo castitatem vovisse. Deinde Matth. 9. commendantur eunuchi, qui sese castraverunt propter Regnum Dei, unde admonetur, *qui potest capere, capiat*. Denique, si hoc sit laudabile in Monasterio, cur non etiam in sæculo? cur in sæculo non tam meritorium illud est, quàm in sæculo orare, jejunare, &c. Hinc commendantur tot Virgines sæculares, quæ cogitaverunt quæ Domini sunt, ut S. Agnes, S. Cæcilia, &c. Adde, non omnibus quadrare ingredi Religionem ob

*Votum
Castitatis
in sæculo
laudabile.*

infirmities vel aliâ de causâ, quæ indubiè non sunt ad nuptias cogendæ, sed laudabiliter possunt vovere castitatem in sæculo.

SECTIO V.

De statu Religioso, & voto solemn.

*Quid sta-
tus Reli-
giosus.
Qui Mo-
nachi.*

*Essentia-
lis & status
Religiosi.*

DICENDUM primò, *Status Religiosus* est status, quo aliqui conveniunt, ut totos se Dei obsequio consecrent. Alii ex instituto sunt *Monachi*, qui sibi soli & Deo vivunt; alii sunt Religiosi, qui ex instituto sunt *Canonici* vel *Clerici*, quibus nomen *Monachi* non competit. Vocantur subinde *Patres*, ut notent se amoris affectum & benevolentiam Laïcis debere impendere Paternam, & juxta D. Augustini regulam: *Non se existiment potestate dominante, sed charitate serviente felices.* Ad essentiam status Religiosi requiruntur tria vota, non tamen solemnia, sed satis est ad statum Religiosum, si ab Ecclesia ut talia recipiantur. Ratio hujus est, quòd uti mox probabo, solemnitas voti sit solum ex institutione Ecclesiæ, quam solemnitatem sicut in unâ Religione potest exigere Ecclesia, ita in aliâ potest eandem nolle exigere. Patet hoc in Scholasticis profitentibus Societatis, qui etsi non emittant vota solemnia, debent tamen dici, veri Religiosi, uti definit Greg. XIII. 1584. in Bulla *adscendente Domino*. Unde si alibi in jure legatur, ad statum Religiosum requiri vota solemnia, intelligendum est, juxta jus antiquum, quando talia vota ad Religiosum statum requirebantur.

*Approba-
tio talis
status.*

Dicendum 2. Requiritur tamen ad statum Religiosum Ecclesiæ approbatio, aliàs erit status Laïcalis, adeo ut etsi quis vota illa in tali statu emitteret, nihil efficeret, & alter in voventem non acciperet ultrà naturalem jurisdictionem. Non tamen requiritur ad statum Religiosum, quòd à Papa sit immediatè approbatus,

batus, nam Religiones S. Augustini, Basilii, Antonii, Benedicti, non fuerunt ab initio à Papa approbatæ, sed solùm ab Episcopis, quibus suberant, etsi sensim à Conciliis & Pontificibus approbatæ sint & confirmatæ.

Dicendum 3. Quo modus vivendi Religionis est conformior modo vivendi Christi, eo est perfectior: Hinc non semper austerior est perfectior, neque qui choro utitur semper perfectior est eo, qui eo non utitur, cum verò vita Christi partim activa fuerit, partim contemplativa, sequitur Religionem de se activam simul & contemplativam esse cæteris paribus perfectiorem, cum ordinetur ad finem perfectiorem; & ex perfectione finis debeat perfectio Religionis æstimari.

Dicendum 4. Solemnitas voti est ex solo jure Ecclesiastico. Disertè id tradit Greg. XIII. loco citato: ubi ait solemnitatem voti solâ constitutione Ecclesiæ inventam esse: idem habet capt. *quod votum* de voto & voti redemptione in 6. capt. *Rursus qui Clerici, &c.* Ex quo patet posse Pontificem dispensare in voto solemnii castitatis Religiosorum, cum hoc possit in tali voto simplici, potest enim constitutionem à se positam relaxare. Sic Alex. 3. dispensavit cum Nicolao Justiniano Monacho, ut duceret uxorem, & alia exempla satis obvia hac de re suppetunt, & aliqua sectione 3. Attulimus.

Status Religionis perfectior.

Solemnitas voti. rum est ex solo jure Ecclesiæ.

SECTIO VI.

Ad quid teneatur Religiosus ex vi votorum, ac primò de voto paupertatis religiosæ.

VOTUM paupertatis, est voluntaria abdicatio rerum omnium temporalium, quâ Religiosus se privat omni Dominio independenti à nutu superioris. Aliud est solemne, aliud est simplex; solem-

Quid sit Religiosa paupertas.

ne est, quo redditur religiosus planè incapax omnis dominii, quod & fit in professione religiosa. Simplex est, quo vovens à se abdicat omnem usum proprietarium, sic tamen ut acquisitio dominii vel alienatio sit valida, etsi illicita. Votum solemne illud constituit statum religionis, ita tamen, ut idem juxtà bullam Gregorii XIII. Faciat votum simplex in Societate JESU. Hoc tamen voto non obstante

Potest Religio habere aliqua in communi.

Dicendum primò Quòd religio possit habere in communi aliqua bona, tam mobilia, quam immobilia, quod exceptis Capucinis & minoribus concedit Conc. Trid. ses. 25. c. 2. de regul. Etiam quoad dominium, non ad usum solum, quem etiam habent Capucini & Minoritæ. Deinde, dominium eorumdem àd se recepit Ecclesia, quo facto patet dominium aliorum ordinum spectare ad communitatem: unde solet etiam dici, quòd quidquid acquirit monachus, acquirat monasterio, tamquam Domino.

His dictis repugnat Navarrus & Marchant tribun. parte 3. Quasi id non conveniret statui religioso, exigenti omnis dominii abdicationem, etiam in communi, juxtà illud Christi. *Si vis perfectus esse, vade, vende omnia quæ habes, &c.* Quomodo enim, ait ille, omnia dimittit, qui sæpè pinguiorem adit Monasterii hæreditatem? quare docet, solam bonorum administrationem relictam monasterio, dominium verò Christo Domino: undè & bona Monasterii, dicuntur *patrimonium Christi*.

Verù nulla communi Doctorum sensui & doctrinæ repugnant, & aliquatenus errori fraticellorum videntur favere, qui teste S. Antonino p. 4. tit. 12. c. 3. tempore Joannis 22. circà annum 1324. non sine magno Ecclesiæ schismate docebant, nec Christum nec Apostolos habuisse aliquid in communi, non obstante quòd Joannes docuisset oppositum: quod & falsum fuisse claret ex S. Textu, ex quo colligitur Apostolos emisisse necessaria: primis Christianis omnia fuisse communia, &c.

Quæ

Quapropter dicendum, quòd dominium in communi non obstat statui religioso, nec consequenter paupertati à Christo institutæ: cùm dictis verbis Christi, *si vis perfectus esse, &c.* Nihil aliud innuatur, quàm omnem proprietatem abdicandam, quod & fieri omninò potest, etsi in communi teneatur dominium. Neque talis hæreditatem adit Monasterii, nisi quoad usum, cùm nihil juris independentis habeat religiosus ad aliqua bona, quorum omnium proprietatem per paupertatis votum à se abdicavit.

Excipitur tamen hîc ordo Minorum & Capucinorum ubi N. Minores conventuales habere posse immobilia & mobilia in communi: Minores verò de observantiâ non habere ejusmodi bona in communi: Sed tamen uti quibusdam declarationibus Pontificum circà eorundem paupertatem factis. Capucinos verò profiteri se nudam observare regulam, & dictis declarationibus renuntiare. Ità Bellifarius c. 2. de voto paup. sect. 2. num. 70. qui & addit num. 116. Excipi quoque domos suas professas, quæ quidem possunt habere bona mobilia etiam quoad dominium: non tamen redditus ullos, aut bona stabilia, neque in communi, præter ea, quæ ad habitationem aut usum fuerint necessaria aut valde convenientia: qualis est hortus, ad quem religiosi interdum se recipiant causâ recreationis. Ita ille.

Quæret aliquis, an dicta illorum paupertas sit *Quæ paupertas sit dignior & perfectior.* dignior & magis perfecta quàm paupertas aliorum Religiosorum? Resp. volunt alii quòd sic, unde alii vocant eam paupertatem altissimam, perfectissimam, &c. Verùm aliter tradit S. Antoninus loco suprâ citato §. 25. dicens: *Nec majoris perfectionis est renuntiare omnibus in proprio & in communi, ut Minores faciunt, quàm renuntiare omnibus in proprio solum, & non in communi: licet sit arctior renuntiatio.* Nec enim omnis arctior, est etiam perfectior, uti dicam in decursu: neque Religio aliqua ex eo est perfectior, quòd nihil habet in communi, ut ibidem probat S.

Doctor: addens tamen jure merito : *Utinam tales gloriationes & propositiones inter religiosos cessarent : quia multorum malorum sunt causa , sicut experientia docet.*

Si verò quispiam roget , quænam paupertas sit perfectissima , Respondet Bellifarius suprà num. 10. si loquamur de religionibus vitæ activæ , quales sunt hospitales , militares , &c. his melius erit habere bona in communi , & quidem copiosa , tamquam necessaria ad finem suum obtinendum. Si verò sit sermo de contemplativis , v. g. ! merè monasticis : sic etiam præstat habere talia moderata in communi , ad tollendam sollicitudinem nimiam temporalium. Si denique loquamur de mixtis , cujusmodi sunt modò mendicantes , erit melius non habere bona nec in communi , nec in particulari. Ità quidem ex S. Thoma dictus author : addens tamen numero seq. juxta varios Thomistas , etià accedente Cajetano , Religionibus vitam mixtam profitentibus , melius esse absolute loquendo , habere bona in communi : eo quòd hoc tempore frigefcente charitate & Religionibus multiplicatis , non ita possint Religiosi ab aliis sustentationem vitæ acquirere , nisi cum magnâ solitudine & mentis distractione : idcirco convenientius est , ut habeant bona in communi. Imò huic favere addit Concilium Trid. quod sess. 25. c. 3. de regul. concedit illis dominia in communi exceptis prædictis ordinibus ; existimantibus sapientissimis hujus Concilii Patribus talem paupertatis statum his temporibus maximè convenire. Idem probat ulterius variis rationibus : 1. Quòd , qui simile genus paupertatis observarint ordines , constet illos præcæteris se conservasse in disciplinâ regulari. 2. Quòd alii ordines non habentes bona immobilia in communi , adinvenierint varios modos , quibus habere possent eadem in æquivalenti , quorum ait , plures adferre posset , si vellet : sed justis de causis omittit. 3. Quòd alii ordines non possint adeò liberè sua administrare ,

ministrare, timentes amittere elemosynas. 4. Quòd aliàs à prælatis non benè provideatur necessitatibus subditorum, quo fit, quòd quisque sibi aliunde procuraret, sive ab amicis, sive ab aliis, non sine damno Religiosæ disciplinæ: ad quod adducit illud S. Bonav. in Epistolâ ad Provinciales: *Occurrit importuna petitio, quâ omnes transeuntes per terras aded abhorrent fratrum occursum, ut eis timeant quasi prædonibus obviare. Et i. ud exposit. ad Reg. S. Francisci quæst. 6. Quando nimis urgemus homines ad dandum, perdunt devotionem prius ad nos habitam, quòd nec prædicatione, nec exemplis, neque alijs quæ facimus, edificantur. Certè Christi paupertas & Apostolorum fuit norma & exemplar omnis paupertatis Religiosæ, quibus tamen aliqua in communi dominio fuisse constat: quod locum etiam habet in ordinibus vitæ mixtæ, qualem coluerunt Apostoli.*

Quæres ulterius an ergo non sit eadem religiosa paupertas in omnibus ordinibus? Resp. Quidam volunt aliam paupertatem esse Monachorum, aliam Canoniorum regularium: Aliam Ordinum mendicantium, aliam Societatis Jesu, aliam Minorum: Aliam ordinum Militarium, prout vel consuetudine vel conniventia facta est strictior vel laxior paupertas: Quasi paupertas variis religionibus posset accommodari: Quod non sine bile se legisse scribit Petrus Marchant Trib. p. 3. tr. 11, tit. 1. quæst. 1. in admonitione singulari, idque in quodam neoterico, fortè jam citato, qui paupertatem religiosam tempore Justiniani imperatoris tradit esse introductam & consensu Romani Pontificis firmatam: & addit: Eheu! in quæ tempora devenimus? Unde melius dicitur esse omninò unam & eandem paupertatem Evangelicam à Christo Domino institutam, ab Apostolis excultam, à primis Religionum institutoribus observatam & commendatam, quâ omnis proprietas independens Religioso adimitur. Quidquid huic contrarium est, est omni paupertati adversum: &

*An sit
omnium
ordinum
eadem
paupertas*

ad summum illud sequitur , quòd paupertas una , sit aliâ strictior , ab unâ tamen & Evangelicâ paupertate descendens , quâ omne proprium interdictum in omni religione.

*Qua ac-
cep:io Re-
ligiosi sit
contra
paupertatem.*

Dicendum 2. Vi Voti paupertatis non potest aliquid religiosus sine ullâ superioris licentia accipere , etsi etiam illud cederet in bonum communis. Ratio illius est , quòd vi voti paupertatis religioso omni sit vetitus omnis actus proprietatis & dominii , qualis est actus ille , puta receptio nomine proprio. Excipi tamen hîc posset casus , quo quidpiam acciperet , eo animo ut à Prælato data occasione petat licentiam , quo casu acceptio illa dicit ordinem ad nutum superioris.

Insuper non potest religiosus sine ullâ licentiâ superioris accipere rei alicujus usum , manente dominio apud datorem , cum utendo re illâ se gerat , ut Dominus & proprietarius ; usus autem proprietarius æquè ac dominium inhibetur vi voti paupertatis. Deinde , cùm usus ille sit pretio æstimabilis , sequitur , quòd sine licentiâ superioris talem rem accipiendo sit proprietarius.

Peccat itidem contrà votum paupertatis religiosus , si sine licentiâ superioris acquirat scedulam camptoriam sive obligationem , quâ possit pro suâ necessitate uti , cùm scedula illa pecuniæ æquivalet. Idem est si eo modo accipiat mutuum aut commodatum : cùm per mutuum vi contractus acquiratur dominium rei mutuatae cum obligatione solvendi , quod (uti supponitur) sit proprio nomine à religioso. In commodato tamen includitur hoc casu usus proprietarius.

*Qua do-
natio.*

Dicendum 3. Peccat contrà votum paupertatis religiosus , sine licentiâ sui superioris donans alteri res ad usum suum concessas. Ratio est , quòd religiosus sit merus usufructuarius , & quidem precario , id est , ad voluntatem & nutum alterius , scilicet superioris , qui rem suo usui concessam nequit suâ auctoritate

tate

tate eam alteri donare. Notant tamen DD. in donatione rerum parvi momenti, præsumi faciliè posse licentiam superioris.

Si verò unus religiosus rem aliquam majoris momenti det alteri religioso sine tali licentiâ, disputant an talis violet votum paupertatis : & quidem Caramuël in reg. S. Bened. docet eo casu non violari, eo quòd conventus non sentiat inde damnum, manente dominio talis rei apud conventum, cui consentiunt plures alii. Verùm rectius videtur etiam eo casu illud votum violari, exercendo actum proprietatis, sine autoritate superioris dando alteri usum rei sibi concessæ. Non solùm enim peccatur contrà paupertatem, quòd communitas damnificetur, uti patet ex eo, quòd peccari possit contrà paupertatem ubi communitas sentit commodum, v. g. accipiendo aliquid sine superioris licentiâ. Hoc addi potest, facilius hîc quidem excusari posse de præsumptâ superioris licentiâ ex eo, quòd res maneat sub dominio communitatis, quam in aliis donationibus externo factis.

Petet aliquis, an saltem religiosus non possit alteri donare sua manuscripta. Resp. plerique Casuistæ quod sic, idque ex eo quòd illa non sint pretio æstimabilia, cùm sint partus scientiæ, quæ de naturâ suâ sunt talia, uti & ipsa scientia, cum accessorium sequitur suum principale. Si verò opponas, quòd ejusmodi vendi possint : Respondent alii, non omnia quæ vendi possunt, prohiberi voto paupertatis, sed solùm bona temporalia & corporalia, quæ vendi possunt & divitem faciunt : Non verò spiritualia, qualis est scientia, ob quam libri pretio digni sunt. Verùm parum infundatè illa procedunt : partim, quòd si quis manuscripta aliqua ab alio accepisset, non posset illa ità alteri donare : Indifferens autem est, an ipse ea fecerit, an ab alio acceperit, cùm quidquid acquirit, acquirat illud monasterio. Deinde, sequeretur inde, nec alios libros esse pretio dignos, cùm non nisi ratione scientiæ

*Quid si
donet sine
sua manu
scripta.*

tiæ contentæ sint tales. Imò manuscripta solent sæpè excusis esse rariora & cariora.

*Qua occultatio
fit contra
votum
paup.*

Dicendum 4. Peccat religiosus contra votum paupertatis res aliquas superiori occultando, cum hoc fiat intentione utendi re aliquâ independenter à dispositione superioris, quòd nolit eam ab illo posse auferri. Excusant alii illos, qui ea occultant eâ solùm intentione, ne subeant confusionem, aut reprehensionem, de cætero parati illa relinquere dispositioni superioris. Idem pariformiter dicendum est, de occultatione rerum apud sæculares.

*Peccat
contra
paupert.
res Monasterii
corruptas.*

Dicendum 5. Peccat Religiosus contra idem votum, si suâ culpâ res Monasterii corrumpat, eis negligenter utendo, &c. Ratio est, quòd habeat solum usum facti rerum Monasterii, non verò quòd possit illas pro suo libitu dissipare & consumere. Unde quivis Religiosus est quasi particularis dispensator, qui nequit de rebus suo usui concessis aliter disponere quàm juxtà mentem superioris, id est, modo paupertati congruo.

Quandonam violatio paupertatis sit gravis.

*In violati-
one pau-
pert. est
ratio fur-
ti & sa-
crilegii.*

NO T A N D U M hic primò, in violatione voti paupertatis reperiri duplicem malitiam, unam furti, aliam sacrilegii: furri quidem, quod usurpet rem alterius, Domino rationabiliter invito, scilicet Monasterio, in quo sita est ratio furti: sacrilegii verò, quatenus est contra votum, & consequenter contra Religionem. In utroque autem vicio, dari parvitatem materiæ, est manifestum.

Notandum 2. Ex illo sequi, dari quoque parvitatem materiæ in violatione voti paupertatis, cujus contrarium docuit Gerson. Quibus positis

Qua ma-

Dico primò, in designandâ materiâ gravi in violatione

tionem voti paupertatis, alii volunt pariformiter lo- *teria hic*
 quendum esse, sicut de furtis filiorum, quibus pro *sis gravis.*
 materiâ gravi illud statui debet, ad quod pensatis cir-
 cumstantiis censeretur pater esse graviter invitus :
 adeo ut illud ex morali potius iudicio judicandum
 sit, aut determinandum, quàm generali determi-
 natione. Cum ergo alia sit ratio filiorum pauperum,
 alia ditiorum in hac materiâ, etiam varia posset sta-
 tui ratio quoad Religiosos ditioris vel indigentioris
 Monasterii : adeo quod in unâ Religione esset ma-
 teria gravis non iidem esset in aliâ. Unde determi-
 natio illius desumi posset, vel à quantitate circâ
 quam superior hujus religionis esset graviter invitus,
 quod ex aliis circumstantiis est disjudicandum. Solet
 alibi illa quantitas determinari, prout fecisse dicunt
 P. Aquavivam Generalem Societ. statuentem eam
 quantitatem gravem quæ esset gravis in sæcularibus
 in furto : quod alii extendunt ad sæculares filios, de
 quo Fagundez & alii.

*Quomodo cesset obligatio voti paupertatis
 Religiosæ.*

CUM violatio voti in eo sita sit, ut ex dictis patet, *Quom-*
 quod aliquid accipiat, donetur, &c. Indepen- *plex sit li-*
 denter à nutu superioris : certum est, quod non viole- *centia su-*
 tur, si ad sit licentia superioris legitima. Talis verò li- *perioris.*
 centia est quadruplex, scilicet generalis, specialis, tacita
 & expressa. *Generalis* est, quæ datur omnibus in gene-
 rali. *Specialis* est, quæ alicui particulariter conceditur.
Tacita est, quæ etsi expressè non habeatur, præsumi-
 tur tamen illa adesse, vel illam dandam, si peteretur.
Expressa est, quæ datur expressè, idest, aliquo signo
 externo, puta verbo aut scripto, &c.

Notandum tamen, ad tacitam requiri fundatam
 præsumptionem, non verò sufficere inanem & infun-
 datam

daram suspensionem aut opinionem, aliàs censeretur esse nulla.

Potest sufficere tacita, Dicendum ergò 1. Etsi securissima hîc sit licentia expressa, quæ dum haberi potest, maximè expedit eam procurari: tamen si illa non ita commodè haberi possit, & aliqua necessitas urgeat, potest sufficere tacita licentia superioris, ne contra votum paupertatis peccet. Ratio est, quòd in moralibus, sit eadem ratio taciti & expressi, uti dicitur cap. 2. *de rescriptis*. Ut autem sciatur, quandò prudenter præsumi possit adesse tacitam licentiam superioris, assignant aliqui sequentes regulas.

Quid eam possit fundare.

1. Dum constat in simili casu Prælatus facilè licentiam tribuere.

2. Si sit talis consuetudo tolerata in eâdem Religione.

3. Si subditus de affectu sui Prælati ergà se prudenter præsumens, aliquid accipiat, donet, &c. Quòd eam licentiam sibi dedisset, si petivisset.

Excipiunt tamen alii casum, quo in aliquâ communitate esset lex, ne quis uteretur licentiâ præsumptâ: nisi fortè adesset urgens necessitas, neque adiri possit superior: quo casu vel lex illa posset dici irrationabilis: vel non habere locum: adeoque per Epykiam excusari. Hoc tamen addo, quòd in uno casu, etiam quoad quantitatem majorem, magis possit præsumi licentia superioris, quàm in alio, v. g. Quoad receptionem, quàm quoad donationem, magis quoad donationem factam huic, quàm alteri, &c.

Licentia debet data esse liberè.

Dicendum 2. Licentia illa debet esse libera: undè, si obtenta sit dolo, metu aut precibus importunis, censetur esse nulla, cum eo casu, ut ait S. Bern. magis sit *violentia*, quàm *licentia*. Deinde, non est satis ad licentiam præsumendam, quòd superior de eâdem rogatus taceat: quamvis enim plerumque juxta commune dictum, qui tacet, consentire videtur: posset præsumi illa licentia: tamen, sæpè occurrere possunt tales circumstantiæ, in quibus non ad eò censendus est

supe-

superior consentire, quàm permittere, quod rogatur: v. g. si rogatus ob graves rationes tacet, quæ si abessent contradiceret: nuda autem permissio non excusat à culpâ.

Dicendum 3. Non potest superior dare licentiam expendendi aliqua in usus superfluos, idque nec validè, nec licitè. Ratio est, quòd superiori nulla sit potestas data ad destructionem Religionis, qualis esset in hoc casu. Non enim hoc casu adeò esset dispensator, quàm dissipator. Inò tacitè illis ablata est potestas talis per Conc. Trid. sess. 25. c. 2. de Reg. strictè præcipiens, ne aliquid superfluum sit in Religionè. Unde mirum viros alioqui graves in hac re adeò clarâ, ob aliquas rationes merè quæsitâs velle contrarium.

*Licentia
ad usus
superfluos
est nulla.*

Hinc sequitur, quòd si superior det licentiam Religioso, expendendi aliqua in generali, censeatur solum dare licentiam ad usus licitos, non vanos, turpes aut superfluos, qualem dare non potest.

Dicendum 4. Excusari quoque potest Religiosus à violatione voti paupertatis, per Epyckiam, consuetudinem & dispensationem, uti aliarum legum prævaricationes: quæ tamen ultimariè fundantur in præsumptâ licentiâ. Et si enim subindè injustè negare possit superior licentiam, potest tamen urgenti casu hîc per Epyckiam Religiosus agere contra voluntatem superioris illius; quatenus eo casu ipsa æquitas naturalis censetur consentire. Hoc tamen sollicitè notandum est, debere certò constare de injustitiâ negationis, vel de subsistentiâ necessitatis, ut per Epyckiam excusentur.

An, & quandò teneatur Religiosus restituere ob violatum votum paupertatis Religiose.

*Quomodo
possit Re-
ligiosus
restituere.*

DICO primò; cum restitutio sit de jure divino naturali, uti alibi probatur, sequitur quòd Religiosus violando votum paupertatis, & faciendo furtum, teneatur ad restitutionem. Sæpè quidem ratione inopiæ ab obligatione illâ excusari poterit, cum nihil habet proprii, ubi tamen ex propriis debet fieri restitutio. Cum tamen eo non obstante de licentiâ sui superioris possit habere aliquos redditus & usum aliorum, quibus posset carere, & iis carendo Monasterio subvenire: sequitur, quòd eatenus posset Religiosus aliqua restituere Religioni, v. g. peculium suo usui concessum, in utilitatem Monasterii convertendo, rebus aliis ad suum usum alias concessis carendo, &c. Cum restitutio fieri debeat omni modo, quo possibilis, &c.

Dicendum 2. Si dictis modis Religiosus nequeat restituere, assignant alii varios modos, non quibus cesset obligatio restituendi, sed quibus fit restitutio in æquivalenti: v. g. si Religiosus pro communi bono procuret vel ab amicis, vel aliunde aliqua bona v. g. libros, ornamenta, &c. Item, si ille, qui aliquid à Religioso contrà paupertatem accepit, tantundem Religioni reddat ex liberalitate. Denique, cessât illa obligatio, si superior illam remittat: sicuti enim ex justâ causâ potest superior alicui Religioso aliquid dare ad privatum usum; ita etiam ex justâ causâ poterit illi remittere aliquid illi æquivalens.

Dicendum 3. Si Religiosus rem mutuò acceptam malè consumat, tenetur restituere illud, quod superest de ea re, uti & illud, de quo factus est ditior. Si verò nihil de illâ re supersit, variant D.D. an teneatur

tur illud solvere. Varii quidem volunt eo casu Religionem gaudere privilegio Macedoniano, quod à lege, & sequentibus ff. & C. *Ad Macedonianum*, tale dicitur, quo filiis familias sic mutuum expendentibus, conceditur non solvere: eo quòd Religiosus in his, quæ utilitatem Monasterii concernunt æquiparetur filio familias, & sicut ille est in potestate Patris, ita iste est in potestate Prælati. Denique, quòd quoad utrumque sit æqualis ratio, puta ut ita refrænctur avaritia forneratorum. Alii tamen rectius docent, Religiosos non gaudere tali privilegio: cùm ratio ejusdem cesset in Religioso, ob quam illud datum est filiis familias, puta ne filii machinarentur mortem Patris, ut possent solvere mutuum consumptum, quod cessat in Religioso, qui bonis Prælati non succedit. Deinde, etsi esset eadem in utrisque ratio, nihil inde posset firmiter concludi, cùm in positivis non valeat argumentatio à paritate rationis. Adde, hoc privilegium valdè deviare à jure naturæ, quod præcipit solvere mutuum: & consequenter majori jure esset restringendum, quàm extendendum.

Dicendum 4. Si depositum apud Religiosum pereat, per culpam Religiosi, non tenetur ad illud conventus, idque verum est, etsi ad illud habuerit licentiam superioris. Ratio est, quòd delictum Religiosi particularis non debet præjudicare communitati: aliud est, si monasterium indè factum sit locupletius, si v. g. in illius communitatem illud sit conversum, quo casu, sicuti sentit commodum, debet & sentire incommodum. Ipse verò Religiosus tenetur modo possibili illud restituere, uti & alias res per injustitiam ablatas. Prudenter tamen ob varias inconvenientias ex deposito nasci solitas, in variis Religionibus interdicitur Religiosis habere deposita, maxime sine scitu superioris.

Dicendum 5. Religiosis interdicta est fidejussio sine legitimâ licentiâ, adeò ut taliter facta sit omninò irrita. Primum clarè habet Cap. *Penult. de fidejuss.* *Religiosus an possit fidejuberè.*
Ratio

Ratio posterioris est, quòd Religiosi nihil habeant proprii, quod fidejubendo alteri obligent: adeòque quòd sine debitâ licentiâ obligant, est nullum, eo modo ac si quidpiam sine debitâ licentiâ alteri donarent. Clericis quidem etiam interdicta est fidejussio, ita tamen ut si fidejubeant valeat eorum fidejussio, uti statuitur c. 1. & 2. *De fidejuss.* tamen alia est ratio Clericorum quoad hunc casum, alia monachorum: Clericis enim fidejussio est interdicta pro Laïcis, eo quòd illa illorum statum dedecet: Religiosis verò interdicitur fidejussio quæcumque, non quòd illa eorum statum dedecet solum: sed etiam, quòd nihil habeant proprii, quod alteri obligent: quo pacto est, nulla illorum fidejussio.

An contractus Religiosi sint irriti.

Dicendum 6. Etsi Religiosis sine debitâ licentiâ superioris sit vetitum contrahere: tamen contractus ita initi sunt omninò irriti, quatenus cedunt in præjudicium Monasterii: quatenus verò cedunt in utilitatem ejus sunt validi, adeò ut in Monasterii voluntate sit, vel eos acceptare vel rejicere. Hoc enim privilegium competit Ecclesiæ, sicut pupillo: ut contractus sine debitâ licentiâ cum illâ facti ita claudicent, ut non sit integrum alteri resiliire, & Ecclesia possit vel stare vel non stare tali contractui. Ita communiter Canonistæ. Ex quo deducunt, Religiosum peccare ita contrahendo cum sæculari, cum illum sic contrahendo decipiat, nisi illius privilegii esset conscius, aut ipse Religiosus ob ignorantiam ejusdem excusetur. Supponitur autem Parochos Religiosos habere licentiam superioris ad contrahendum, uti & ad alia beneficii bona licitè & liberè administranda: Nisi contrarium declarasset.

Correlativa.

1.

Ex dictis desumi potest, si prælatus limites suæ administrationis excedens contrahat obligationem, non teneri monasterium, eo quòd eatenus privetur jure administrandi à communitate concessio, neque personæ delictum debet præjudicare communitati: Aliud esset, si communi consilio capituli & Prælati

Iati obligatio illa esset contracta, quæ in jure nocet Ecclesiæ.

Secundò, si Prælatus aliqua bona mutuò acceperit, ut illa expendat in usus vanos, non verò in utilitatem Monasterii, non teneri Monasterium. Aliud esset, si ille accepisset ad utilitatem Monasterii, etsi postea mutata mente illa vanè expendisset: cum ex legitimâ acceptione mutui teneatur Monasterium, cui præjudicare nequit, quòd postea Prælatus illa malè expenderit.

Tertiò, Si cuipiam commissa sit aliqua administratio, & limites illos non excedendo contrahat, teneri Monasterium obligationi à tali contractæ, cum censeatur ipsum Monasterium per talem contraxisse.

Quartò, Si quispiam à Prælato mittatur foras, vel ad studia, vel aliò, si ille in viâ faciat obligationes necessarias, teneri Prælatum, qui dando licentiam ad aliquid, censetur dare licentiam ad illud, quod ad alterum est necessarium: aliud est, si obligatio illa fuisset superflua: vel si expensæ ab ipso Prælato essent taxatæ, quas si excederet, non teneretur Prælatus, nisi iterum in viâ quid extraordinarii occurreret, vel etiam, nisi quis vel ad studia, vel aliò à superiore missus esset, eâ conditione, quòd alter daret expensas necessarias.

Ex quibus omnibus patet, quam periculosum sæpè sit cum Religiosis pacisci & contrahere.

Dicendum 1. Obedientiam debet secundum regulam, adeò ut illa, quæ regulam excedunt, exequi non obligetur. Si verò dubium sit, an aliquid à superiore injectum, sit regulæ suæ proportionatum, obsequi debet; cum possessio hîc stet pro imperante. Aliquando obedire tenentur superiori sub mortali, si præcipiat in virtute S. Obedientiæ, si imperet in quantum potest, &c. Aliàs, absente scandalo & contemp-
Religiosus debet obedire in iis, quæ sunt juxta regulam, non ita in iis quæ supra regulam

sub obedientia formali mandata imponunt. Neque etiam ad illa quæ manifestè injusta sunt, aut mala, obedire tenetur Religiosus, etsi rationes præcepti non ita anxie debeat investigare, cum vera obedientia soleat esse cæca.

*Castitas
Religiosa*

Dicendum 2. Ex voti castitatis, tenetur se Religiosus custodire ab omni impudicitia tam internâ, quam externâ, aliàs ultra vitium luxuriæ, committet peccatum sacrilegii. Quænam verò ad luxuriæ peccatum pertineant dicitur infra. Hinc etiam Conc. Trid. sess. 25. c. 14. ne fœminam Clerici suspectam ullo modo pœnes se retineant, aut visitent, &c. Verè enim S. Aug. 250. serm. *Inter omnia Christianorum certamina, sola duriora sunt prælia castitatis, ubi quotidiana est pugna & rara victoria.* Nam ut habet l. de Cohab. Clericorum: *Experto crede, expertus loquor, coram Deo non mentior: Cedros libani, duces gregum, sub hac peste cecidisse reperi, de quorum casu non magis suspicabar, quam de Ambrosii vel Hieronymi impudica turpitudine.* Deinde notandum illud S. Bernardi serm. 65. in cantica: *Cum fœmina semper esse, & non cognoscere fœminam, vome plus est, quam mortuum suscitare?*

*Reſtoris
bonitas est
bonum Re
ligionis.*

Dicendum 3. Cum tota statûs Religiosi constitutio debita pendeat à bono rectore, ante omnia opus est, ut caput præcedat, in observantiâ Religiosâ: longum iter est per præcepta, breve & efficax per exempla ait Seneca 7. Epist. 6. *Meminisci debent, ut ait D. Bern. Epist. 201. ad Balduinum Abbatem: Ut voci suæ dent vocem virtutis. Quid illud inquis? Ut opera tua verbis concinant, imò verba operibus, ut cures videlicet prius facere, quam docere.* Pulcherrimus ordo est, ut onus quod portandum imponis, tu portes prior, & ex te discas qualiter oporteat aliis moderari. Alioqui subsannabit te sapiens, utpote pigrum illum, cui labor sit manum porrigere ad os. Arguet & Apostolus dicens: *tu qui alios doces, te ipsum non doces? sed & notaberis vitio Phariseorum, qui alligant onera gravia & importabilia, & imponunt ea in humeros hominum, digito autem suo nolunt ea move-*
re.

*Dare de-
bent voci
suæ vo-
cem vir-
tutis.*

¶ *Sermo quidem vivus & efficax exemplum est operis : faciens facile suadibile , quod dicitur , dum monstrat factibile , quod suadetur .* Sciant hoc sapientis Eccl. 12. Secundum judicem populi , sic & ministri ejus , & qualis est rector civitatis , tales & habitantes in eâ . Sciant hoc Gregorii in Past. ad Caium severum : Cum majores voluptati deserviunt , minoribus lascivie fræna relaxant. Et ibidem 3. parte admon. 5. Prælati si perversa unquam perpetrant , tot mortibus digni sunt , quot ad subditos suos perditionis exempla transmittunt. Neque excusantur illi , eo quod totum Religionis onus , superiorum subordinatorum humeris imponant , nam ut ait Epist. 4. S. Damascenus : Protalibus enim animæ negliguntur , oves pereunt , morbi crescunt , hæreses & schismata prodeunt , Ecclesia destruuntur , Sacerdotes vitiantur , & reliqua mæla proveniunt , quia ii , quibus hanc provinciam demandatis plerumque ut mercenarii , ovium curam nullam gerunt.

Dicendum 4. Cum verò sapientiâ teste , *Adoles-* Novitio.
cents juxta viam suam ambulans , etiam cum senuerit , non rum Ma-
recedet ab ea , tenetur superior in primis sub gravi pec- gister,
cato providere novitiis de Magistro novitorum ad id munus maximè idoneo. Unde statuta Præmonst. disp. 1. c. 19. In deligendo Magistro magna adhibeatur sollicitudo , ut is eligatur , qui excellit pietate & ad juventutem discretè regendam , pietatem sollicitè instillandam , & ad omnem regularis vitæ perfectionem formandam , sit commodissimus.

Dicendum 5. Tenetur sub gravi culpa superior Pietas &
in religione non solum promovere pietatem , sed & D.ctrina,
doctrinam. Ratio ejus est , quod pietas sine doctrinâ sæpè cæcutiat : exemplum ejus præbet Trithemius l. 1. de viris illust. benedict : dum ait : Nihil principes terræ in ordine nostro venerabantur , nisi vitæ meritum & scientiæ doctrinam : quibus neglectis ordo devenit in contemptum ; mox enim , ut se negotiis secularibus immerferunt , lectiones scripturarum neglexerunt , mutari cepit solor disciplina optimus , devotio tota ex-

piravit. Sciendum est quod ait Greg. l. i. regist. aperte, ait, *dæmones sciunt, quia dum litteris instrui- mur, in spiritualibus adjuvamus: cum ergo eas nos dis- cere dissuadent, quid aliud, quam ne lanceam aut gladium faciamus, præcavent? à nonnullorum enim cordibus dis- cendi desiderium maligni spiritus tollunt, ut & secula- ria nesciant, & ad sublimitatem spiritualium non per- singant.* Ex quo patet, quòd ii obligentur gravius ad studia litterarum promovenda, quorum religio de se est activa, qui aliorum directioni aliquando de- stinantur: si ea negligant, pecuniis inhiando easque capacitati præponendo, noverint se interitûs religio- nis præbere causam.

S E C T I O VII.

Quid requiratur ad Professionem Religiosam.

*Ætas pro-
ficiendi.*

EX Conc. Trid. ses. 25. de regul. constât quòd requiratur legitima ætas, quæ ante illud Con- cilium in Femellis erat 12. annorum, in maribus 14. post illud autem requiruntur 16. anni completi. Patet ex cap. 15. aliàs professio erit nulla.

Novitatus

2. Requiritur annus probationis, & quidem con- tinuus. Addi tamen lubuit casum mihi ab aliquot mensibus propositum: Titius per 10. menses in pro- batione existens, tentatione Dæmonis aut aliâ, egredi vult, vestes laicales petit & induit, per 3. dies in eis cum licentia superiorum manet in mona- sterio, si forte animum mutet: post triduum Titium facti pænitet, readmitti postulat; & recipitur: quæsitum est, an Titius teneatur annum integrum probationis resumere, an sufficiat 2. menses super- addere. Ad quem, salvo meliori, resolvi, Titium non debere resumere annum probationis, tum quod censeatur moralis continuatio temporis annui, si 2. menses supperaddat, tum quod non sit dimissio &

& egressio perfecta & absoluta, dum de consensu superioris ad eum finem in communitate degit, tum denique quod glossa in Reg. eum qui de reg. juris in 6. teneat, sufficere annum interpolatum, quod & alii affirmant, si interpolatio non sit adeo notabilis.

3. Requiritur animus profitendi, ne metu vel fraude in monasterium detrudatur, ut admittatur ab iis, qui eum admittere debent; ut professio fiat in religione approbata, ne adsit ulla conditio substantiæ Religionis repugnans, ne habeat impedimentum, quod in aliqua Religione censetur essentialiale; ne sit alteri obstrictus. Cum verò juxta regulam juris, *non firmatur tractu temporis, quod de jure ab initio non subsistit*: Sequitur taliter professum non servatis dictis conditionibus, posse reclamare intra quinquennium & egredi, allegatis egressionis causis, juxta Conc. Trid. sess. 15. c. 19. de regul. Si verò à superiore postmodum reperiatur impedimentum essentialiale subsuisse tempore Professionis, quod Religiosus conticuit, potest eum ejicere, uti etiam si sit incorrigibilis, quem jubet S. Augustinus in regula ejici de communitate. Alia huc pertinentia dabunt cuique sui ordinis & statûs regulæ particulares & statuta,

*Libertas
Professio-
nis.*

SECTIO VIII.

Quid sit juramentum.

DICENDUM primò, *Juramentum est attestatio divini numinis*; jurans enim quantum est de se, facit Deum testem ejus, quod dicit. Juramentum aliquando bonum est & necessarium, si debitis circumstantiis sit vestitum, quæ sunt, ut adsit *Veritas*, *judicium* & *justitia*, juxta hoc Hierem. 4. *Jurabis.... in veritate & in judicio & in justitia. Veritas in juramento hoc exigit, ut verum sit, aut tale judicetur, quod*

*Quid iu-
ramen-
tum.*

*Requisita
ad iura-
mentum.*

*Veritas:
justitia &
judicium,*

quod juratur: *Judicium* requirit, ut non nisi ex necessitate & christiana prudentia juretur, unde S. Aug. Serm. 28. de verb. Apost. c. 9. *Quantum*, ait, *ad me pertinet; juro, sed quantum mihi videtur magna necessitate compulsus. Justitia* denique, ne cuiquam juramentum adferat injuriam. Ex quibus patet, quomodo vera sint S. Scripturæ loca varia, quibus videntur prohiberi juramenta; nihil enim aliud intendunt, quam abstinendum esse à juramento, quod dictis conditionibus non est stipatum: abstinendum esse à consuetudine jurandi, à perjurio, &c.!

Consuetudo
de juran-
di,

Dicendum 2. Consuetudo jurandi, plurimis obvia, est peccatum mortale, si eidem non resistat consuetudinarius. Audi de hac re S. Aug. Serm. 116. inter novos de se ipso: *juravimus*, ait, & *nos, habuimus istam deterrimam consuetudinem & mortiferam; dico charitati vestræ, ex quo Deo servire cœpimus, & quantum malum in perjurio sit, vidimus, timuimus vehementer, & veternosissimam consuetudinem timore frenavimus: frenata restringitur, restricta languescit languescens emoritur, & mala consuetudini bona succedit.* Quamvis autem talia juramenta ex consuetudine edita, aliquando profluant ex inadvertentia, adeoque in se non sint voluntaria, sunt tamen voluntaria in causa voluntariè continuata, id est in consuetudine, quam quis non studet extirpare, unde illud omittendo exponit se periculo pejerandi, adedò què peccat mortaliter.

Peccant itidem illi, qui levissimâ de causâ jurant, et si verum sit, quod jurant, cum desit judicium & sit assumere nomen Dei in vanum. Hinc non facilè excusarim, qui ad quodlibet ingemiscunt, *Jesus*, sancto illo nomine aburentes,

Peccant itidem, qui ad singula proposita dicunt, *per animam meam, per Deum, per Sanguinem Christi, testis est Deus, &c.* Quotiescumque per aliquod Dei juratur, aut cujus Deus author aut vindex esse censetur. Si verò dicatur, *aliquid tam verum esse, quam Deus sit in cœlo, in missa, &c.* Non censetur jurari, sed solum asseri,

afferi, illud tam verum esse, quam illud, ad quod fit comparatio.

Peccant denique illi, qui aliquid jurant, de quo non se existimant esse moraliter certos, sed vel de eo subdubitant, aut falsum sub ratione veri: illi enim, quantum de se est, statuunt Deum testem falsi, aut saltem illius periculo sese exponunt. Hinc tenetur quilibet, antequam juret, rem debitè investigare, num revera subsit, aut censeatur meritò subesse.

Dicendum 3. Non licet in juramento uti restrictio-
ne purè mentali, uti nec mentiti, cùm restrictio mentalis sit mendacium artificiale. Deinde dum quis ro-
gatur, debet jurare ad mentem interrogantis: nam ut ait Isidorus l. 2. c. 31. *Quacumque arte verborum quisque jurat, Deus tamen qui conscientiae testis est, ita hoc accipit, sicut ille, cui juratur, intelligit.* Et S. August. Epist. 224. *Expectationem eorum quibus juratur, quisque deceperit, perjurus est.* Dicta intellige de interrogatione legitima: aliàs si sit interrogatio violenta, injusta, aut non servato juris ordine, non tenetur taliter rogatus ad mentem rogantis, jurare.

Ex dictis quoque patet, quòd illi, qui ad Magistratum promossi sunt, & ad juramentum, se illum non ambivisse, adiguntur, teneantur sincerè ad mentem Regis, hoc juramentum exigentis, respondere & jurare. Ratio dictorum est hæc, quòd cùm Apostolus dicat, quòd juramentum sit omnis controversiæ finis, ad Hæb. 6. Illud minimè firmabitur, si uti liceat æquivocatione, aut mentali restrictione, dum legitime quis de controversia interrogatur. Unde jure merito pridem damnata sunt sequentia à Pontifice maximo Innocentio XI.

Si quis, vel solus, vel coram aliis, sive interrogatus, sive propria sponte, sive recreationis causâ, sive quocumque alio sine juret, se non fecisse aliquid, quod revera fecit, intelligendo intra se aliquid aliud, quod non fecit, vel aliam viam ab ea, in qua fecit, vel quodvis aliud additum verum, revera non mentitur, nec est perjurus.

D d 4

Item

Item : Qui mediante commendatione , vel munere ad Magistratum vel officium publicum promotus est , poterit cum restrictione mentali præstare juramentum , quod demando Regis à similibus solet exigi , non habito respectu ad intentionem exigentis , quia non tenetur fateri crimen occultum.

Dicendum 4. Imò etsi hoc necessarium foret , scilicet cum dicta restrictione jurare , ad bonum corporis vel fortunæ aut famæ conservandum , non tamen dictâ restrictione in juramento uti licet , cum non sint facienda mala , idest mendacia , ut eveniant bona , unde rursus damnata est ibidem hæc sequens propositio : *Causa justa utendi his amphibologiis est , quoties id necessarium aut utile est , ad salutem corporis , honorem , res familiares tuendas , vel ad quemlibet alium virtutis actum , ita ut veritatis occultatio censeatur tunc expediens & studiosa.*

Jurare cum animo non jurandi.

Dicendum 5. Jurare cum animo non jurandi illicitum est , etsi prætendatur adesse causa , cum sit vera elusio divinæ veritatis , & alteri sæpè foret nocivum tale materiale juramentum. Item peccatum mortale est , vocari Deum in testem mendacii levis , cum semper sit gravis irreverentia , vocare Deum , primam veritatem in testem cujuscumque mendacii. Unde rursus hæc damnata ab Innocentio XI.

Vocare Deum in testem falsi cujuscumque , est peccatum mortale.

Vocare Deum in testem mendacii levis , non est tanta irreverentia , propter quam velit aut possit damnare hominem : Et hæc subsequens ; *Cum causa licitum est jurare sine animo jurandi , sive res sit levis , sive gravis.*

Inductio ad jurandum.

Dicendum 6. Aliquando licitum est inducere ad jurandum eum , quem quis novit juraturum per falsos Deos aut pejeraturum. Primò quidem ex officio , cum ille rem petat de se licitam , & licet pejeret aut per falsos Deos , non illud hoc casu petenti ex officio juramentum est imputandum , sed jurantis malitiæ , quam alter solum permittit justa de causa. Si verò justa causa hoc exigendi hîc desit , tum verum est illud S. Aug. Serm. 117. inter novos ; *Scribite , ait , in cordibus vestris :*

stis, quod dico: qui hominem provocavit ad jurationem & scit eum falsum juraturum, vincit homicidam, quia homicida corpus occisurus est, ille animam, imò duas animas. Unde patet, eum quoque mortaliter peccare, qui testem inducit ad deponendum falsum, etsi alter putet hoc esse verum. Talis enim testis, etsi ob bonam fidem possit excusari, tamen non potest excusari ille qui scit aliquid esse falsum, & alium ad illud testandum efficaciter movet: neque magis id licitum est, quam movere ebrium ad blasphemandum, fornicandum, &c.

S E C T I O IX.

De divisione Juramenti.

DICENDUM primò, juramentum aliud est *asser-* Juramen-
torium, cum aliquid sub juramento asseritur vel tum asser-
 affirmando illud esse verum, vel negando. Aliud est torium.
execratorium, cum aliquid alteri quis imprecatur, cum Execra-
 attestatione divini numinis, v. g. *Deum mihi vindex sit,* torium.
diabolus me auferat, nisi hoc malum tibi faciam. Aliud
 rursum est juramentum *promissorium*, cum quis pro- Promisso-
 mittit se aliquid facturum aut omisurum, sub atte- rium.
 statione divinæ veritatis. Duplex autem in promissione est obligatio, dum quis jurat, prima, quòd de facto dum promittit, habeat voluntatem ad promissa aliquando solvenda; alia, respicit executionem futuram, quod tempore debito adimplebit promissa. Ut autem hoc juramentum obliget, primò requiritur, ut materia ejus sit licita, puta ut si res bona & possibilis, unde juramentum de re mala est irritum, cum invocatio divinæ veritatis, non possit esse vinculum iniquitatis: cui adde, quòd sit gravis irreverentia Deum vocare in testem peccati. Unde regula juris in 6. 58. *Non est obligatorium contra bonos mores prestitum juramentum.* Idem est, si materia juramenti illius sit impositiva majoris boni, Se-

Libertas
juramenti Secundò requiritur, ut sicut votum, ita juramentum sit liberum, tali libertate, quæ ad mortaliter peccandum sufficiat. Unde juramentum vi aut metu extortum, irritum est, & nullum: idem est de juramento ex errore circa substantiam rei extorto. Ratio est, quòd in his desit consensus ad juramentum, & votum, essentialiter requisitus, ex cujus defectu prædicta sunt irrita.

Quomodo
juramenta
sint interpretanda. Tertiò requiritur ut juramenta interpretentur juxta conditionem, quam materia juramenti censetur habere annexam: unde quodcumque materia juramenti vel ex dispositione juris, vel communi æstimatione censetur habere annexam conditionem, etiam juramentum super materiam illam cadens, censetur habere talem conditionem annexam. v. g. juramentum matrimonii, habet annexam conditionem, *si nullum adsit impedimentum*: Unde & omni promissorio juramento, hæ conditiones censentur annexæ, *si licitè potero: si superior consentiat: nisi res notabiliter immutetur, si illud cui promissorie juro, volueris acceptare, &c.*

Obligatio
juramenti pendet ex intentione ejus qui jurat. Quartò notandum est, multum pendere ex mente jurantis & communi sensu obligationem juramenti. Oritur hoc ex priori. Sic qui jurat se filium suum castigaturum, intelligitur comminatoriè, & nisi sese filius emendet. Item qui more aulico jurat se non primò intraturum honoris causâ, censetur se nolle obligare, nisi alius primò intret. Talia tamen juramenta sæpè carent judicio, & vanè assumuntur, unde ab iis melius erit abstinendum. Hinc Scriptura Eccli. 23. *Jurationi non assuescat os tuum, multi enim casus in illa.* Et rursus: *V. r multum jurans, replebitur iniquitate, & non discedet de domo illius plaga.*

Notant autem varii DD. Judæos non esse facile juramento admittendos, nisi manu admotâ ad legem Moyſis: aliàs enim se putant juramento non teneri. Hinc in variis locis, ubi permittuntur inter Christianos, hanc eam illis jurandi formam observant, ut manu

manu sua jurantes legem Moyſis contingant. Alii ad cautelam hoc addunt, quod in feſto expiationis abſolvi ſoleant à Rabinis ſuis ab omnibus votis & juramentis malitiſe factis : in cujus fraudem non adeò verentur jurare falſum, maxime in præjudicium Chriſtianorum.


SECTION X

Quomodo obligatio juramenti poſſit tolli.

DICENDUM primò, juramenta tolli poſſunt irritatione, condonatione, & diſpenſatione, unde ſicut illorum vota irritari poſſunt, ab iis quibus ſubſunt, prout materia voti eſt incompatibilis cum ſtatu eorundem : ita & illorum juramenta poſſunt à tali ſuperiori irritari. Hinc Pater Familias poteſt aliquando filii juramenta irritare, Pontifex fidelium juramenta irritat, eorumque vinculum vice Chriſti relaxat, Prælati juramenta Religioſorum, maritus uxoris, &c.

Condonatione poſſet tolli obligatio juramenti, quando is in cujus favorem juramentum factum eſt, illud condonat : Sicut enim poteſt, quis promiſſa non acceptare, ita poteſt & eadem condonare. Unde ſi duo ſibi mutuò in mutuam utilitatem juraverint poſſent ſibi mutuò condonare.

Diſpenſatione tollitur obligatio juramenti, ab eo, qui in jurantem habet juridiſtioneſ non impeditam. Quandonam autem diſpenſatio valeat, nec ne, vide in materia de Legibus.



CAPUT DUODECIMUM.

De Superstitionibus.

SECTIO PRIMA.

Quid, & quotuplex sit Superstitio.

Quid superfluo.

DICENDUM primò, *Superstitio* religioni opposita, est *Cultus vitiosus veri aut falsi numinis*. Hanc ait Doctor Angelicus religioni oppositam per excessum, unde & *Superstitio* dicta est; Non quòd Divinum numen nimium coli possit, cùm quantum potes, tantum aude, quia major omni laude, nec laudare sufficis; Sed quia adhibet Deo cultum, vel quem non debet, vel eo modo, quo non debet, vel illi, cui non debet, Unde sub se comprehendit 4. species, scilicet superstitionem divinatoriam, vanam observantiam; Magiam & maleficium.

**Superfi-
cio divi-
natorio.**

Dicendum 2. *Superstitio divinatoria* est, quâ quis mediis planè inutilibus futura contingentia libera, vel res occultas prædicit aut vult cognoscere. Censentur verò ejusmodi media esse inutilia, quæ neque ex natura sua, nec ex ordinatione divina, aliquam virtutem habent cum effectu. Aliud est, si aliqua naturalem haberent connexionem cum effectu, & à communiter accidentibus colligi possint esse connexa, qualiter ex colore lunæ, solis, aëris temperie, cognoscimus futura contingentia, puta secuturas pluvias, serenitates, &c. Idem dicendum est de signis Physiognomicis, seu quando ex Physiognomia alicujus colligitur, aliquem esse talis vel talis inclinationis, &c. Quæ sæpè connexionem naturalem habent.

habent cum effectu, etsi cautè in talibus sit quoque procedendum. Aliud est, quando vel cribri versione tentant divinare fures, quando inspectione manûs volunt divinare futuram fortunam, quando ex Horoscopo nativitatis alicujus, bonum aut malum hominis successum certò volunt divinare, &c. Quæ omnia ut superstitiones divinatoriæ condemnata sunt à variis pontificibus, & signanter ab Urbano VIII. 1631.

Dicendum 3. *Vana Observantia* est, quæ ex inutilibus & vanis signis, certos effectus certò & infallibiliter expectat. Consistit autem hæc vana observantia in practica expectatione effectûs ex talibus signis, ubi divinatio speculativè præscit & annuntiat futuros eventus. Dividitur vana observantia in artem notoriam, observantiam sanitatum, & observantiam futurorum eventuum. *Arts notoria* est, cum quis per profana signa v. g. amatoria pocula, &c. Scientiæ alicujus infusionem expectat, quam subinde dæmon procurat. Vidimus illud in anabaptistis, qui sumptâ suâ execrandâ cænâ, ingeniosè & doctè ex Sacris Scripturis ex suggestu verba facerent, ubi tamen numquam litteras didicerant, quâ scientiâ rursus destituuntur, si ad Catholicam fidem subinde convertantur. Ad eandem reducitur praxis eorum qui nocte S. Joan. Baptist. sub aviculis pervigilant eorum garritum expectantes à dæmone indubiè procuratum. Est hæc superstitio de se peccatum mortale, uti & divinatio, cum à creatura illud expectetur, quod à solo Deo expectari potest, tum etiam quodd pactum cum dæmone includat.

Dicendum 4. *Observantia sanitatum* est, quando inutilia media adhibentur ad sanitatem recuperandam. In qua, sedulò videndum est; an signa illa, quæ de se apparent ad effectum sanitatis inutilia, nullam habeant naturalem vim ad eundem effectum; & quamvis ad eum habeant vim quamdam naturalem, tamen videndum est an nulla inutilis circumstantia,

stantia, ut necessaria jungatur: v. g. si quid fieri debeat certâ horâ, manu, loco, numero, &c. Unde etiam varia hic pro praxi notanda sunt, primò quidem illa signa sæpè esse Sanctissima, sed aliquid ignoti admixtum habent: vidi ego litteras à quodam milite à me receptas, continentes innumeris locis nomen JESU, sed in fine duo versus advertebantur planè exotici & ignoti: erant autem hæ litteræ (ut præ se ferebant) efficaces contra difficiles mulieris parus, incendia, vulnera, &c. & hæc est dæmonis astutia & dolus, quo sub specie sanctitatis, incautos homines corrumpit & seducit.

*Dæmon
sub specie
sanctitatis
fallit.*

*Frivola
plebi ex-
cusatio.*

Secundò hic observandum est, plerumque à communi populo dum hic arguuntur, obtendi, se sæpè per ea signa expertos esse effectus, ad quos ea signa adhibent. Quasi vero effectus illi à dæmone sæpè non procurarentur, ut plures pervertat, dum effectus experiuntur. Unde, illis ostendendum, quomodò effectus illi, non nisi à dæmone possint expectari. Hinc ulterius dicendum est, superstitiosum esse gestare amuleta, reliquias, &c. tamquam ob eorum gestatiónem, quis sit liber à vulnere, sanguinis effusione & aliis.

*Obser-
vantia
futuro-
rum even-
tuum.*

Dicendum 5. *Observantia futurorum eventuum* est, quando quis ex variis signis, futuros effectus infallibiliter observat. V. g. quando quis non vult lævo pede à lecto surgere, ne malus dies ei succedat: qui non vult die veneris ungues præscindere. Qui ex picitatione picæ, corvi crocitate, &c. malum certò impendens observant; qui projiciunt aut baptisant, ut ajunt, statuas sancti in aquas, ut pluat; qui festo S. Joannis aut Matthiæ hæderas colligunt, ut sciant cui debeant nubere: qui puerum recenter natum equo imponunt, ut fiat auriga generosus, neque equos reformidet: qui secundina pulli equini nati, quercui suspendunt, ut pullus bene accrescat: qui capita equorum stabulorum tectis imponunt, ne morbi aut pestis bestias corrumpat, &c.

Solùm

Solùm hic est difficultas in aliquibus cæremoniis in Ecclesia observari solitis, an eæ sint ab omni superstitione excusandæ. Præcipuæ in Belgio hæ sunt : Pro rabie curanda vadunt ad reliquias S. Huberti, quibus prohibetur respicere specula, à certis cibis abstinere. Pro curandis Aposteumatibus, vadunt ad S. Quirinum : In Festo S. Nicolai aperiunt æquorum venas : Ex primo nummo oblato crucifixo in parasceve, curant fabrefieri annulum contra contractiones nervorum : Ad Tempia S. Cornelii, Eligii & Antonii jumenta aliquoties circumducunt. Ad quæ Respondeo talia non ita statim superstitionis esse condemnanda : Nam multa ejusmodi tacitè approbat Ecclesia, dum eadem observare probè novit, & non contradicit : Possunt enim habere ex intentione Ecclesiæ, sacram quandam significationem tales actus, ac simul aliquando cum effectum naturalem connexionem. v. g. quod rabidi à certo cibo abstineant, quod specula prohibeantur aspicere, ne imaginatio eorum fortius moveatur. Imò certæ cæremoniæ S. Huberti dicuntur ab Ecclesia examinatæ & approbatæ. Hoc tamen fatendum est, multa in similibus cæremoniis subrepisse ex negligentia Pastorum, & vanitate vulgi, quæ vanam observantiam sapiunt, & sæpè ab Ecclesia ignorantur : Unde Pastores singulariter ad hoc vitium invigilare debent, cum in communi populo sit satis frequens & familiare, ut experientia docet.

*Ritus alii
qui ab
Ecclesia
tolerantur*

S E C T I O I I.

De Magia & Maleficio.

DICENDUM primò, *Magia* est ratio quædam mira operandi ope dæmonis, vel tacito vel expresso pacto cum eo inito. Est & alia *magia*, quam vocant *Naturalem*, quæ occultis naturæ miraculis & indu-

*Quid
magia.*

*Magia
naturalis.*

industriâ mira efficit & docet : Tales magi fuerunt juxta plurimos, qui stellâ duce Christum jam natum venerant adorare : Talis tamen magia sæpè veram magiam hinc inde habet annexam, aut periculum ejusdem, unde ab Ecclesiâ libri tractantes de magia naturali, sunt prohibiti, qualis est Ludov. Portæ & aliorum. Hujus ergo magiæ superstitiosæ auctor est dæmon, qui ad certa signa, effectus quosdam mirros producit : Et quisquis eam primus adinvenit hominum diabolo auctore adinvenit

*Magia
includit
pactum
cum dæ-
mone.*

Ratio autem colligendi aliquid spectare ad magiam, est illa, si vel expressè vel tacitè invocetur dæmon : Si verba exotica vel falsa precibus sint mixta, v. g. Christum habuisse febres, &c. Si admixtum habeat ligaturas, specula & alia inutilia, nullam habentia cum effectu connexionem. Deinde, si adhibeantur circumstantiæ inutiles, ut omninò necessariæ. Denique, si tales effectus prodeant, qui industriam humanam superent, quales effectus potestate suâ magnâ satis efficere dæmones posse, omnibus fit manifestum.

*Signa
mali spi-
ritus.*

Eodem modo dignosci possunt boni & mali spiritus : Signa malorum sunt, si ad res sacras diffugiant, si pravam causam suæ apparitionis obtendant si aliquid fidei contrarium adferant, contra doctrinam Ecclesiæ, bonos mores, si ad vitia excitent, si post se relinquant animi turbationem, si impediant rem cum Superiore aut Confessario tractari, si formæ apparentis sit deformis, &c.

*Probatio
vulgaris.*

Dicendum 2. Videtur omnino illicitus esse modus probandi sagas per aquam frigidam, ferventem aut ferrum candens. Cum enim experiri velint hoc pacto, an cum dæmone pactum habeant, censentur implicitè effectum illum à dæmone expectare, quod illicitum esse, nemo nescit. Sic etiam non licet cor animantis veneficiis enecati coquere ferventi igne & aqua, ad dignoscendum veneficii authorem, cum dæmon promiserit, se auctori necis nociturum, posito tali signo.

Dicen-

Dicendum 3. Si dæmon ex energumeno dicat Petrum v. g. esse magum, & promittat se id probaturum, si adjuratus id attestetur, poterit eidem (et si Patri falsitatis) aliquando haberi Fides: Eo quod dæmones adjurati, perjurium horreant, adeoque si v. g. dicant esse urbem hostibus prodendam, posset procedi ad generalem inquisitionem. Hoc tamen notandum est, non esse promiscuè dæmoni credendum, & quamvis aliquando verum dicere possit, tamen dicta ejus fide indigna sunt judicanda: Et quamvis perjuria horrent, tamen ea non facile horrent, uti mendacia, si opportuna sint ad hominum seductionem.

Dicendum 4. Cùm liceat dæmonibus resistere, certum est licitum esse signa maleficii auferre. Maleficium autem est; quando magus vel saga ad positionem signi alicujus ope dæmonis nocet vel nocere intendit, idque ex quodam pacto. Distinguitur verò in veneficium & amatorium. Veneficium est, quando dictum nocumentum fit personæ hominis, eam interficiendo, corrumpendo, &c. Amatorium est, quando dæmon positis certis signis affectus hominis miris modis Inflamat, v. g. ad amorem libidinosum, ad odia philtris, &c. potest enim dæmon mediantibus variis rebus aut speciebus propositis, causare varios hominis affectus. Ratio ergo dictæ conclusionis est, quod talis amovendo simpliciter signa dicta, opera & machinationes dæmonis destruit, eumque oppugnat, nullo modo intendens ei coöperari. Cavendum tamen, ne unum maleficium alio maleficio destruat. Imò licitum est ad destructionem maleficii ponere alia signa, quibus positis desinit dæmon nocere: licet enim aliquid facere, quo finitur pactum diabolicum, modò nullo modo intendatur dæmoni coöperari, sed ejus nocumenta & mala solum avertere. Sic licitum est sagam te percutientem repercutere, ab ea rogare panem, vel salem, ad quæ volunt desinere diabolus à nocumento: quæ om-

nia intelligenda sunt de mera oppugnatione dæmonis, nullo modo effectum aliquem à dæmone expectando, sed solam à nocuimento cessationem.

SECTIO III.

De Cultu falso, & superfluo.

Quid falsus cultus. **D**ICENDUM primò, *Falsus cultus* est omnis ille, qui aliquid falsi continet v. g. si quis falsis miraculis, testimoniis, signis, &c. res fidei nititur confirmare. Talem adhibent & ii, qui cæremoniam falsam, ut Ecclesiasticam obtendunt, qui in administratione Sacramentorum falsa adhibent, qui etiam nūm ritibus L. V. utuntur, puta circumcissione, purificatione & aliis. Talis erat cultus ille act. 14. . . . Quo viri Lycaöniæ Paulum & Barnabam ut Deos venerabantur; *Cultus superflus* est, quando quis privatâ devotione aliquid cæremoniis legitimis admiscet, idque præter Ecclesiæ morem. v. g. omnis ille cultus, quem aliqui Sacerdotes in celebratione Missæ, præter Ecclesiæ rubricas adjungunt, v. g. osculando pedem Calicis post Elevationem dimissi, &c. De quibus agam de Missæ Sacrificio. Talis erat cultus Canonikorū Lugdunensium, qui privatâ auctoritate Festum conceptionis immaculatæ instituerant, quos reprehendit S. Bernard. de quo factò diximus alibi agendo de cultu D. Virginis.

Quid Sacrilegium.

Dicendum 2. His adjungi solet sacrilegium & tentatio Dei. *Sacrilegium* est inhonoratio rei sacræ, ut sacra est. Hinc personæ sacræ injuriam facere, aut loco sacro, *Sacrilegium* est, & ultra peccatum injuriæ, peccatum *Sacrilegii* complectitur: Idem est, de omni alio peccato rei sacræ ut tali admissò, ut omnis immunditia personæ sacræ, aut abusus rei sacræ aut loci sacri: Gravitas autem ejus ex eo considerari poterit, ex graviore vel leviori irreverentiâ

Dep

Deo aut rebus sacris inustâ, quæ in Deum reducere censetur. Ubi & hoc notari potest, quod quandoque peccetur peccato sacrilegii per omissionem, quatenus illa est causa irreverentiæ, v. g. si ob negligentiam sacristæ quis inferat manus injustas aut violentas in vasa sacra, calices, &c.

Dicendum ultimò, *Tentatio Dei* est, quando quis sine justa causa experimentum capit divinæ sapientiæ, providentiæ aut alterius attributi divini. *Quid tentatio Dei,* Malitia ejus in eo sita est, quod sine causa à Deo opus aliquod extraordinarium expectetur, in quo gravis est irreverentia, cum nostrum non sit sine causa, divina arcana scrutari. Ad hanc Deitentationem reducuntur *Purgationes vulgares*, per ferrum candens, per aquas, &c. Cum insolita à Deo sine causa expectentur. Aliud est si causa justa adsit, ut si Dei jussu tale experimentum capiatur, ut quondam præcepit Achaz Isaïæ 7. ut peteret à Deo signum (future liberationis) siue in Profundum inferni, siue in excelsum supra,

S E C T I O IV.

De Pietate, Observantia, & Obedientia.

DICENDUM primò, *Pietas* aliquando sumitur pro devotione, aliquando pro misericordia, pro-*Quid Pietas,* priè tamen est virtus, quâ debitum obsequium parentibus reddimus. Sicut enim Deo debetur cultus summus, quia Principium est omnium & ultimus finis: Ita & parentibus debetur cultus & obsequium eo quod sint Principium ortûs nostri. *Parentes* comprehendunt hic Patriam, Consanguineos, Uxores, &c. Quatenus illis aut nobis conjuncti sunt, & educationi nostræ intenti. Ex quo patet, quod objectum *cui* pietatis; sint parentes; Objectum *quod*, sit cultus illis debitus; ratio formalis sit debitum pa-

rentibus, ideo enim illis impendimus obsequia, quia illis sunt debita. Recordandum enim, ut ait Sapiens Eccli. 7. quoniam nisi per illos nati non fuisset, unde retribuendum illis, sicuti & illi nobis. Sicut autem *Qui honorat Patrem suum, vita vivet longiore*, ut idem ait c. 3. ita & *Maledictus qui non honorat Patrem suum & Matrem, & dices omnis Populus amen.* Deut. 27. Deinde, *qui affligit patrem, & fugat Matrem, ignominiosus est, & infelix.* Prov. 19. Hinc, si Parentes sint in gravi, aut extremâ necessitate, & filius illis succurrere possit, non potest ingredi religionem, multò minus proficere, cum obligatio pietatis hic sit juris divini naturalis, quæ longè prævallet operibus consilii. Ulterius tenentur filii obedire parentibus in omnibus, aut ut ait Apost. ac Colof. 3. *Per omnia*, supple quæ honesta sunt, nam aliàs obedire oportet magis Deo, quàm hominibus, act. 5. supple quoque, obediendum esse in iis, quæ ad curam paternam pertinent: In variis enim filius est sui proprii juris, v. g. in deligendo vitæ statu, etsi parentes in hoc negotio consulere conveniat. Si verò parentes quoad religionis ingressum sint irrationabiliter inuiti, habet locum illud Hieronymi Epist. ad Heliod. *Licet Sparso crine & scissis vestibus ubera quibus te nutrieras, mater ostendat: Licet in limine pater jaceas: Per calcatum perge patrem, siccis oculis ad vexillum crucis evola: Solum pietatis genus est, in hac re esse crudelem.* Oggarrit hic Erasmus in colloquio Eubuli & Catharinæ, & dicit, quòd natura dicet, Deus approbet, Paulus horretur; leges humanæ sanciant ut filii obediant parentibus, illi autem se subducant ab autoritate parentum optimorum, ut pro vero patre se dedant fictitio, & pro vera matre adsciscant alienam, aut potius pro parentibus sibi Dominos ac Dominas adsciscant. *Inventum est*, ait, *sub pratextu religionis novum servitutis genus: Nihil ibi licebit, nisi ex præscripto, quidquid obvenerit tibi accrescit. Si quo pedem moveris, retraberis à fuga, perinde quasi*

In quibus
filii de-
beant pa-
rentibus
obedire.

*quasi parentem veneno necaveris. Quoque sit evidentior servitus; commutant vestem, quam dederunt parentes, & ad exemplum priscum eorum, qui olim essent servos mercati, commutant nomen in Baptismo inditum, ac pro Petro vel Joanne, vocant Franciscum sive Dominicum. Ita versipellis iste. Verum ut paucis expediam, quidem verum est, quod natura dicet, Deus approbet, &c. Honorem parentibus esse debitum, sed honor ille & ejus obligatio suos habet terminos, puta, nisi in contrarium vocet pater Cælestis. Sic Apostolus ait ad Hæb. 12. *Patres carnis nostræ eruditores & castigatores habuimus & reverebamur eos: nonne multo magis obtemperabimus patri spirituum?* Quod verò addat, religionem esse servitutem, mera est calumnia, uti & alia quæ adjungit animo nimium ergo religionem præoccupato: solum attendat, quod servire Deo sit regnare, in qua servitute utinam mansisset. Quomodo parentes in aggressu Matrimonii sint consulendi, dicam de Matrimonio.*

Ex quibus omnibus manifestè colligitur, quâ censurâ digni sint, qui docere audent, *Licetum esse absolvere desiderio cupere mortem patris, non quidem ut matrem patris, sed ut bonum cupientis: item hanc: Licetum est filio gaudere de patricidio parentis à se in ebrietate perpetrato, propter ingentes divitias inde ex hereditate consecutas: Quas pro suo merito jam nuper condemnavit Sanctissimus Pater Innocentius XI.*

Filius ante diem patris inquit in annos.

Dicendum 2. *Observantia* est virtus, quæ debitum honorem defert illis, qui nos gubernant, v. g. Magistratui, Principi Patriæ, Monachus Abbati, &c. Sapientes iudem & Sanctitate eminentes hæc virtus respicit, quatenus ratione excellentiæ, & aptitudinis ad nos gubernandum, cultus illis debetur. Unde docet S. Thomas hic, quod objectum cui observantiæ, sit Principium illud quod nos vel actu vel potentia gubernat. Prout autem motivum observantiæ est varium, puta religiosum, Sanctum, &c. diversa solet statui observantia, puta Religiosa, supernaturalis, politica, &c.

Quid obedientia.

Dicendum 3. *Obedientia* est virtus, quæ facit illud, quod præceptum est: alia est formalis, alia materialis: *Formalis* est, quæ facit præceptum, quia præceptum est; *Materialis*, quæ solum ponit actum præcepti. Pari modo dividi potest inobedientia in

Quid inobedientia formalis.

materiale & formalem. *Materialis* est transgressio cujuscunque præcepti: *Formalis* quando transgreditur quis præceptum, ea intentione ut illud violet, & quia præceptum est, quæ de se est peccatum mortale, cum qui spernit superiores debitos, Deum spernat, & omnis potestas à Deo sit. Alia de Religiosa obedientia videri possunt de statu Religioso.

S E C T I O V.

De Gratitude & Veritate.

Quid gratitudo.

DICENDUM primò. *Gratitudo* est virtus, quæ respicit debitum, ortum ex beneficio, ut eidem satisfaciatur. Ex dato namque beneficio nascitur obligatio gratitudinis in alio, unde habet axioma; *beneficium accipere, est libertatem vendere*, eo quod per beneficium inducatur debitum satisfaciendi. Unde ante omnes benefactores, gratitudo debetur Deo, quia ut ait S. August. in Soliloq. c. 18. *Sicut nulla est hora vel punctus, quo tuo beneficio non utor, sic nulla debes esse hora, quâ te non habeam ante oculos.* Scilicet ut quidpiam pro omnibus beneficiis rependam. Hoc qui maturè perpendit, noscet liquidò, tantâ compensatione Deum dignum esse, ut omnia opera ad ejus gloriam referantur, ex quo proveniunt, ut à principio & autore.

Officia gratitudinis.

Dicendum 2. Officia gratitudinis recensentur: 1. beneficium agnoscere, ejusque benigna acceptatio, nam ut ait Seneca l. 2. de benef. c. 24. *Qui grate beneficium accipit, primam ejus pensionem solvit.* 2. Laudare & gratias agere: 3. Retribuere suo loco & tempore.

tempore. Unde Philosophus præfatus l. 3. c. 1. & ex eo S. Thomas 2. 2. q. 107. a. 1. *Ingratus est, qui beneficium accepisse se negat. Ingratus est, qui dissimulat: ingratus est, qui non reddit: ingratus est omnium, qui oblitus est. Illi enim, si non solvunt, tamen debent, & exat apud nos vestigium certè meritorum: & aliquando ad referendam gratiam converti ex aliqua causâ possunt, si illos pudor admonuerit. Ex quibus patet, quinam sit gradus ingratitudinis: 1. Non conari beneficium reddere: rarò vel numquam gratias reddere: rarò vel numquam de beneficiis cogitare: malum pro bono reddere; beneficia negare vel extenuare, imò aliquando loco maleficii æstimare. Porro ingratitudo alia est formalis, alia materialis. *Formalis est, quando beneficium animus contemnitur, ne quis videatur alteri ex beneficio debitus: estque hæc ingratitudo peccatum mortale ex genere suo, cum contemptus animi benevoli & sinistra interpretatio benefactoris, non sit minus malum, quam sit iudicium temerarium; imò illud involvit: imò hoc contemptu magis offenduntur, quam iudicio temerario. Materialis est, quando sine tali contemptu omittitur debitum gratitudinis, aut committitur aliquid adversus benefactorem. hujus vii deformitatem horrent ipsa animalia bruta, cum teste Seneca l. 1. c. 3. de benef. Officia etiam bestię sentiunt, nec ullum tam immansuetum animal est, quod non mitiget cura, & in amorem sui vertat Leonum ora. Unde D. Thomas ingratum scelestum nuncupat, adducens illud Pauli 2. Timoth. 3. parentibus non obedientes, dicuntur ingrati, Scelesti. Et rectè Philosophus dictus l. 3. c. 1. de Beneficiis, Non referre beneficiis gratiam, & est turpe & apud omnes habetur, ut tale.**

Dicendum 3. *Veritas est virtus, quæ procurat ut in scriptura, verbis, aliisque signis sit veritas, id est conformitas iudicii aut signi, ad rem iudicatam, aut significatam. Hæc etsi rara in terris, eximia tamen est virtus: adeò ut Christus se veritatem nominet Joan. 14.*

14. & Esdras 3. dicat: *Super omnia vincit veritas*, nam ut ait Apost. ad Philip. 4. *Nihil possumus contra veritatem*: & quid miri, cum Deus sit veritas, & si Deus *pro nobis*; quis contra nos? Rom 8. Virtus hæc maximè decet viros Ecclesiasticos, cum exodi 27. solemniter summi Sacerdotis in pectore inscriptum erat, *Veritas & veritas*. Sicuti autem nihil ita necessarium, ita nihil magis in mundo inusitatum: *Non est veritas*...: *in terra*, ait Oseas 4. plerique veritatem in iniustitiâ continent: quæris causam? odium veritas parit, adulatio amicos, veritas inimicos. Ego, ait Apost. Gal. 4. *Inimicus vobis factus sum, verum dicens vobis*. Et Amos 5. *Odio habuerunt corripientem*. Hinc ut illi Isaïæ 30. promissu clamant: *Loquimini nobis placencia*; Verum si hominibus placerem, Christi servus non essem ait Apost.

Quid mendacium quid simulatio.

Mendacium triplex.

Dicendum 4. Mendacium veritati adversum, est: locutio contra mentem. *Simulatio* est mendacium in gestu. Famosè mendacium dividitur in officiosum, jocosum & perniciosum. *Officiosum* est, quod causâ utilitatis prodit: *jocosum*, quod causâ voluptatis: *Perniciosum* est, quod alteri injustè nocet, quod nocuum mentum, si sit grave erit peccatum mortale, cum graviter lædat charitatem. De hoc ait sapient. c. 1. *Os, quod mentitur, occidit animam*: & Psalm. 5. *Perdes omnes, qui loquuntur mendacium*: & rursus Prov. 12. *Abominatio est Domino, labia mendacia*.

Quale sit peccatum mentiri.

Dicendum 5. Mendacium jocosum aut officiosum de se sunt solum veniale peccatum, cum inordinatio in mendacio secundum se, non ita graviter lædat aliquem: numquam tamen simile mendacium proferre licet, etiam ad gravissimum damnum advertendum, quod olim licitum docuerunt Origines & alii, quos abundè refutat S. August. l. priore de mendacio c. 5. 6. 7. & sequentibus. Idem docet Innoc. III. capt. superior de usura, ubi ait: *Scripturam Sacram prohibere, ne quis etiam pro alterius vitâ servandâ mentiatur*. Unde patet mendacium esse intrinsecè malum, quod signis abutantur, & turpe sit & rationi difforme, quod ratio

tio & loquela discordent, & quòd lingua negat, animus affirmet aut contra. Potest tamen quis loqui falsum, & tamen non mentiri, si, quod revera falsum est, bonâ fide putet quis esse verum, & ut tale illud enuntiat.

Dicendum 6. Restrângere mentaliter, est artificia-
liter mentiri. Pro cuius pleniori intelligentia præno-
tandum est, quòd aliquando sit restrictio purè men-
talis: aliquando non purè talis, sed quòd aliquando
circumstantiæ externæ cum illa consignent: purè
mentalis est purum & putum mendacium: Ratio il-
lius est hæc: quòd tota oratio, quâ parte significat,
sit mendax. Non enim significat secundum partem
quam restringit, utpote occultam, sed solum juxta
partem exterius manifestatam, quæ falsa est & men-
dax, cum non sit conformis menti loquentis.

*Restrictio
mentalis
est menda-
cium.*

*Restrictio
mentalis
pura &
non pura.*

Objiciunt varii, quòd nemo teneatur alteri totam
suam mentem explicare, sed potest partem reticere:
Deinde loquens non intendit id solum, quod foris so-
nat, proferre, sed ut illud interiùs restricto est con-
iunctum. Imò illius exemplum est in Christo, qui
Joan. 7. Dicebat amicis suis se non ascendere ad
festum, ubi tamen postea ascendit. Ad quæ Resp.
quòd etsi non teneatur quis alteri mentem suam ex-
plicare, tamen teneatur non mentiri, prout ille fa-
cit, uti mox ostendi. Deinde etsi loquens illud in-
tendat, per hoc nihil mutatur in communi signorum
significatione, quæ talem habent, prout foris pro-
lata sonant. Unde restrictio illa nihil confert ad si-
gnificationem. Quòd verò de Christo opponunt, usu
venit hic quod ante mox notavimus: non enim ibi erat
nuda & pura mentalis restrictio, sed circumstantiæ
adjunctæ satis mentem exterius manifestabant & con-
significabant tale esse, quale erat in mente. Petebant
etenim amici à Christo, ut publicè & miracula patra-
turus veniret ad festum in Jerusalem, Christus respon-
dit ad mentem illorum petentium, se non adscende-
re ita; ad diem festum hunc, etsi priyatim postea ad-
scen-

scenderet. Idem est, de eo, quando agit de ignorantia diei ultimi, quem nec se nosse dicit Matt. 24. cum subintelligat, & satis indicet, se non nosse eum ut legatus. Sic confessarius, dicit se nescire aliquid; quod tamen scit ex confessione, cum circumstantia confessarii id satis innuat, sic debere intelligi, quod dicitur. Gravis tamen est error illorum, qui casum hunc confessarii, titulo superioritatis sibi usurpant & vendicant, dum dicunt, etiam superiores posse restringere mentaliter, dum eosdem de aliquibus conveniunt subditi, & negare illud, quod tale esse dignoscunt; non enim illis censetur inesse talis titulus, sicut inest confessario, imò contrarius, cum candor & sinceritas in superiore per quam fiat necessaria, ad subditorum regimen. Nec inde miserabilis superiorum redditur conditio, sed necessaria ad regendum statuitur obligatio: nihil enim ita subditos conciliat, quam superiorum fidelitas & animi candor: & ex adverso, nihil ita eos alienat, quam duplicitas superiorum.

*Superior;
maximè
candor con
venit.*

Obijciunt ulterius, quòd mentiri sit ire contra mentem, sed restringens purè mentaliter non ita contra mentem cum illud in mente habeat. Resp. ita talis contra mentem, quatenus verba illius menti non concordant, dum aliud foris sonat, & aliud intus reticetur. Nec dici potest, talem non intendere mentiri, cum intentio illa sit inefficax, uti intentio non nocendi, & interim ponendo voluntariè nocivam causam. Unde patet, quo jure dixit quidam aliàs non ita scrupulosus: *Restriktionen mentales tollunt humanam societatem, & tamquam pestifera damnanda sunt, quoniam semel admessa, aperiunt omni mendacio & omni perjurio viam, & tota differentia in eo erit, ut quod heri vocabatur mendacium, naturam & malitiam non mutet, sed nomen; ita ut hodie jubeatur restrictio mentalis nominari; quod est virus condire saccharo, & scelus specie virtutis colorare.* Vide dicta de juramento.

Concludo monito Eminentiss. Card. Bonæ manu-
duct.

ingerit, sed advenientia constanter fert: non appetit formidabilia, sed spernit, ait præfatus Card. ibidem c. 28.

*Motiva
fortitudi-
nis.*

*Fortitudo
Christia-
na.*

Ad hanc virtutem perquam opportunum est, seria consideratio obligationis Christianæ, quæ omni humano respectui præponderare debet; Deinde, quàm vana sint hujus mundi terribamenta & pericula, quibus constans animus facillè resistit. Eamdem virtutem adjuvat Dei Charitas, quæ omnia alleviat, & flocci facit, ut Christum lucrificiat: hæc enim est propria fortitudini Christianæ, imò si desit, Christiana non est, sed gentilis, sed pagana: juxta illud Arausiacani Can. 17. *Fortitudinem gentium mundana cupiditas, fortitudinem Christianorum Dei charitas facit.*

Denique mala reputat timiditas mundana, quæ vera mala non sunt, neque formidanda, quod & in ipsâ morte verum est, quod tamen inter terribilia est terribilissimum: hæc enim cum certissima sit, stultè timeatur: nec mala est, quæ malorum debet esse finis, & initium beatitudinis: constat hoc in fortitudine Christianâ, dilectioni Dei conjunctâ, quæ secura de præmio & Coronâ justitiæ, cupit dissolvi & esse cum Christo.

*Quid
magnani-
mitas.*

Dicendum 2. Ex hac fortitudine oritur magnanimitas, quæ est virtus, quæ in omni virtutum genere ad opera magna & heroïca inclinât. Magna autem & ardua est omnis & sola virtus. Ejus officia sunt, quæ adfert Card. Bona appositè ad rem nostram libro citato cap. 29. dum ita ait: *Magnus animus ad magna semper aspirat, eaque omnia velut minuta contemnit, quæ pro maximis vulgus optat. Opera quidem efficit, quæ multo honore sint digna: sed ipsum honorem & denegatum non ambit, & spernit oblatum, nisi aliter exigant Dei honor & obedientia: nihil ad ostentationem, omnia ad conscientiam refert: rectèque facti non ex populi sermone mercedem, sed ex facto petit. In edito sicut semper, excelsus, insuperabilis, par sibi in omni rerum statu, nec locis altioribus se ingerit, contentus magnitudine suâ..... nihil est, quod ipsum terreat, aut inturvet. Se proferri & spectari vult, non vanitatis studio, sed attento*

*Actum
magnani-
mitatis.*

attento gradu, in quo degit, & Dei Donis, quibus refulget. & rursus: Cum viris mediocribus & infimis modestum se ac moderatum exhibet: coram principibus & opulentis non se projicit, nec adulatur, nec eorum potentiam suam opprimi sinis libertatem. Quæ odio vel amore digna sunt, aperte odit, aperte amat. Quæque palam dici vel fieri debent, liberè loquitur & operatur, quia nihil timet aut sperat. Ecce hucusque veram magnanimiti effigiem.

Dicendum 3. Fortitudini repugnat timiditas seu ignavia, quod excedat, aliquid timendo: potest ali-
Quid ignavia & timiditas.

quando esse peccatum mortale, si ex timore mundano, Deus mortaliter offendatur. Repugnat itidem intimiditas in timendo deficiens, adeo ut, quæ revera timenda sunt, contemnat neque reformidet. Sic impius, cum in profundum venerit, contemnit peccatam impietati constitutam, imò ipsum infernum.

Magnanimitati repugnat præsumptio, ambitio, & inanis gloria. *Præsumptio* est, quando quis ni-
Quid præsumptio.

mium viribus suis fidit: potest esse peccatum mortale, si annexam habeat injuriam gravem alterius, aut sui ipsius malum grave. *Ambitio* est inordinatus
Quid ambitio.

honoris appetitus, *Qui amant primos recubitus in cæ-*
nis & primas cathedras in Synagogis, & salutationes in
foro, & vocari ab hominibus Rabbi; Ut de Phariseis
 & Scribis ait Salvator Matth. 23. *Inanis gloria*, est
Quid inanis gloria.

cupiditas vanæ gloriæ, estque vitium capitale, ex quo oriuntur juxta D. Greg. inobedientia, jactantia, hypocrisis, contentiones, pertinaciæ, discordiæ & novitatum præsumptio. Est aliquando peccatum mortale, si v. g. quis inanem gloriam captet ex facto mortaliter malo, v. g. magia: si verò ex industria aut viribus operis inanem gloriam quærat, erit veniale.

Magnanimitati quoque opponitur timiditas seu pusillanimitas, quâ quis omnia nimis magna &
Quid pusillanimitas.

ardua judicat, nec vires suas satis considerat. Aliquando potest quoque esse peccatum mortale, quan-

do quis expusillanimitate Deum mortaliter offendit ; nolens ea facere & aggredi , ad quæ sub mortali tenetur.

SECTIO II.

Quid sit temperantia , & in quo sita.

*Quid
temperan-
tia.*

DICENDUM primò. *Temperantia* est virtus refræ-
nans ac temperans appetitum in his quæ maxi-
mè alliciunt , quæ sunt objecta Tactus & Gustus.
His ergo delectationibus & illecebris modum impo-
nit temperantia , ne magis sumat aut eis indulgeat ,
quam ratio recta exigit , nec solum in externo eo-
rumdem usu , sed & in interno appetitu , ut illud
appetat , quod , quando , & quare & quantum est
appetendum. Unde temperantiam rectè describit S.
Prosper l. 3. de vita contempl. c. 19. ubi ita loquitur : *Temperantia temperantem facit , abstinentem ,
parcum , sobrium , moderatum , pudicum , tacitum , se-
rium , verecundum. Hæc virtus si in animo habitat , li-
bidades frænat , affectus temperat , desideria Sancta mul-
tiplicat , vitiosa castigat , omnia intra nos confusa ordi-
nat , ordinata corroborat , cogitationes pravæ removet ,
inserit sanctas , ignem libidinosæ voluptatis extinguit , ani-
mæ teporem desiderio futuræ remunerationis accendit ,
&c.*

*Alius
tempe-
rantia.*

*Regula
temperan-
tia.*

Regulam temperantiæ dat nobis S. August. l. de
moribus Eccl. c. 21. ubi ait : *Habet vir temperans in
huiusmodi rebus mortalibus & fluentibus vitæ regulam
utroque testamento firmatam , ut eorum nihil diligit , ni-
hil per se appetendum putet , sed ad vitæ huius-atque of-
ficioꝝ necessitatem , quantum satis est , usurpet , uten-
tis modestia , non amantis affectu.*

Ex hac S. Augustini regula sequitur 1. Tantum
de iis , quæ ad Gustum aut Tactum spectant , esse as-
sumendum , quantum necessarium est ad vitæ &
offi-

officiorum intertentionem : sub qua necessitate comprehendipotest convenientia & utilitas, id est illud, sine quo non ita competenter possumus vivere.

Sequitur 2. Quòd non liceat voluptates sensuum ^{Voluptates non licet ob se appetere.} per se appetere, nec per se amare, sed solum nos iis posse uti. Clarius illud alibi proponit idem doctor, ut l. 1. c. 21. de Doctr. Christiana, ubi ita ait : *In his omnibus rebus, illæ tantum sunt, quibus fruendum est, quas æternas atque incommutabiles commemoravimus : cæteris autem utendum est, ut ad illarum perfruitionem pervenire possimus : Quid autem frui importet, alibi sæpè declarat, scilicet Esse amore iuherere alicui rei propter se ipsam.* Unde hæc est dilectio, quam inhibet Apost. & Evang. Joan. 2. dicens : *Nolite diligere Mundum, neque ea, quæ in Mundo sunt,* id est propter se diligere. Cui illud consonat, Quod habet Apost. 2. cor. 1. *In carne,* ait, *ambulantes :* & rursus *utendum esse hoc mundo, tamquam non utamur,* Id est transitoriis transitoriè utendum esse. Hinc idem S. Præsul periculum intemperantiæ in edendo & bibendo agnoscens ait l. 1. confes. c. 33. *Hoc me docuisti, ut quemadmodum medicamenta, sic alimenta sumpturus accederem.* Rationem huius dat ibidem, dum subdit : *Cum enim salus sit causa edendi & bibendi, adjungit se tamquam pedissequa periculosa jucunditas, & plerumque præire conatur, ut ejus causâ fiat, quod salutis causâ me facere dico vel volo.* Audi & D. Greg. l. 30. mor. c. 19. *Sciendum est,* ait, *quia sic voluptas sub necessitate se palliat, ut vix eam perfectus quisque discernat.* Nam dum solvi debitum necessitas petit, voluptas explere desiderium suppetit, & tanquàm securiùs gulam præceps rapit, quanquàm honesto necessitatis nomine explendæ se contegit. Sæpè igitur, quæ necessitas petit, & quid voluptas suppetit, ignoratur, atque ideo, dum quasi concivi parimus, ad prælium hostem nutrimus. Vide de hac re plura dicta de charitate sui ipsius sect. 6. & dicenda de Matrimonio, ubi probabo nec quidem licitè propter se moderatè appeti posse voluptatem.

Dicen-

Intemperantia.

Dicendum 2. Opponitur temperantiæ vitium intemperantiæ, quod est excessus in concupiscendis vel fruendis delectationibus. Vitium hoc est hominem maximè dedecens ac brutale, quæ prona tellurem spectant, & infimis inhærent, cùm homini Deus os sublime dederit, cælumque tueri iusserit, & erectos ad sidera tollere vultus, ut ait Poëta. Vocatur itidem vitium *puerile*, cùm concupiscentia præceps ruat, nisi fræno temperantiæ, ut Pædagogo, ab excessu temperetur & arceatur.

Est vitium puerile.

SECTIO III.

De Abstinencia & Sobrietate.

Quid abstinencia.

DICENDUM primò. *Abstinencia* est virtus, quæ delectationes esculentorum moderatur, eis præscribens debitum modum, tempus & quantitatem, ne nimia esculentorum sumptio valetudini corporis aut animæ noceat, aut obfit.

Quid Sobrietas.

Sobrietas autem ut est virtus specialis, est illa, quæ affectum & usum potionis inebriare valentis, debitè moderatur. Virtus hæc eo est magis necessaria, quo potus magis ablandiat, nam teste sapiente prov. 23. *Vinum ingreditur blandè, sed in novissimò mordebit ut coluber.* Per quam tamen necessaria est iis, qui castitati student, nam idèò rectè Apostolus admonet ad Eph. 5. *Nolite inebriari vino, in quo est luxuria:* & prov. 20. *Luxuriosa res, vinum.*

Quid gula.

Dicendum 2. Abstinentiæ opponitur gula, sobrietati ebrietas. *Gula* verò est vitium, quod in esculentis debitum modum excedit. Fieri autem solet præcipuè

Quot modis fiat.

5. modis, contentis hoc versu: *Præproperè, lautè, nimis, ardentè, studiosè.* *Præproperè* est indebito tempore cibos sumendo: *Lautè*, idest pretiosiores cibos sumendo, quàm statui conveniat. *Nimis*, idest plus quàm natura exigit. *Ardentè* est voraciter & avidè edendo. Denique

nique *Studiosè*, idest *delicatè & exquisitè* cibos *con-*
diendo, aliàs non manducaturus. Potest autem gula
esse peccatum mortale, si ob excessum in cibo, Deum
mortaliter offendant, ut sunt illi, *Quorum Deus venter*
est, ut ait Apost. ad Philip. 3. Itidem, si notabiliter
obsit valetudini, cùm plures occiderit gula, quam
gladius: Denique, si sit gràve scandalum ex gula,
&c.

Dicendum 3. *Ebrietas* est excessus in potu, usque *Quid sit*
Ebrietas
ad violentam usûs rationis privationem. Causat verò
ebrietas privationem rationis, eo quòd potus nimius,
causet vapores cerebrum obvolventes & obnubilantes,
ex quo deinde ratio sopitur. Est hoc vitium peccatum
mortale, cùm teste Scripturâ prov. 23. Illi vix, il-
lius Patri vix, illi rixæ, illi foveæ illi sine causa vulnera,
illi suffusio oculorum, qui commorantur in vino, &
student calicibus epotandis. Et rursus Isaïæ 5. *Ita qui*
potentes estis ad bibendum vinum, & viri fortes ad miscen-
dam ebrietatem. Denique 1. cor. 6. ebriosi à Regno
Dei ab Apostolo excluduntur.

Porro, malitia hujus vitii in eo sita est, quòd quis se *Malitia*
Ebrietatis
voluntariè privet violentè usu rationis, & brutis simi-
lem efficiat, proximam utendi ratione potestatem au-
ferens, adeo ut etiam vigil eâ uti non possit, quo pa-
cto à sommo differt ebrietas. Accedit, quòd plurima
mala secum trahat ebrietas, familiæ afflictiones, frau-
des, luxuriam, iras, corporis morbos innumeros,
quòd reddat hominem ad necessaria officia inutilem,
hominem bestialem faciat, mores ejus planè absur-
dos, & scurriles, secreta pandat, juxta illud prov.
31. *Nullum secretum, ubi regnat ebrietas:* Denique tot
mala secum adfert ebrietas ut dicat Hieron. in c. 1. ad
Titum ad illud, *Non v. nolentum: longum est ire per singu-*
la, insanias, quas ebrietas suggerit, explicare.

Quærunť aliqui, si ebrietas adeo grave crimen, un-
de alib sit tam frequens, nec multi æstimetur, quale
nomen apud Italos & alios habent Belgæ. Ad quod
responderi potest, in diversis Regnis, diversa vitia

prædominari, & licet in se magna, tamen ut vilia reputari. Hoc autem oritur ex inclinatione multorum circa eadem vitia, quâ fit, ut ortâ consuetudine, etiam gravissima scelera reputentur quasi nulla, juxta illud S. August. enchiridii 80. *Peccata, quamvis magna & horrenda, cum in consuetudinem venerint, aut parva aut nulla esse creduntur.* Accedit, quod ebrietas aut saltem ejus periculum, quale est in commestationibus & compositionibus, alibi credatur esse medium maximè opportunum ad fovendam amicitiam, quâ ratione ebrietatis gravitas alibi non ita ponderatur.

Speciale tamen hoc vitium est in superioribus Sacerdotibus & Religiosis, & uti ait Chrysologus Serm. 26. *Ebrietas in alio crimen, in Sacerdote sacrilegium.* Hinc in variis Conciliis ebrietas rigidissimè inhibetur Clericis, & signanter in Concilio Lateran. can. 15. Agathensi can. 41. ubi expressè vetatur Clericis, alios in conviviis ad bibendum incitare. Imò author quidam nomine Portel tomo 2. respons. moral. casu 35. docet, quod Religiosus qui sæpè cum sæcularium scandalo sese inebriat, nec admonitus resipiscit, nec speretur emendatio, possit ob hoc privari habitu & à Religione expelli tamquam incorrigibilis. Quæret aliquis, quibus mediis possit superari ebrietas. Respondet Hefelius c. 196. in decal. duobus potissimùm modis illud posse fieri, primo fugiendo ejus occasiones, puta computationes ebriosorum, juxta, illud prov. 23. *Noli esse in conviviis potatorum.* Secundo, frequenter rogando à Deo donum temperantiæ & sobrietatis. Aliud tamen remedium suggerit S. Aug. Serm. 231. ubi ait: *Qui se de hoc malo desiderat liberare, quomodo sibi intervallo dierum potum addendo, ad ebrietatis tenebras pervenit: ita Paulatim subtrahendo, ad sobrietatis lucem redeat.* Hoc remedium aliquando de ebrioso fecisse sobrium audivimus. Quamvis & hoc fatendum sit, quod ipsa ebrietas suo usu vires addat, & ad se ipsam inflammet, & ut ait S. Basiliius homiliâ contra ebriet. quod ebrietas ebrios ardentes & semper bibendi cupido-

diores

diōres reddat : cujus ratio est , quòd vinum & alii potus hepar accendant , fauces exsiccent , sitim adaugeant , & consequenter ebriosi sitis ipso potu non extinguatur aut refocilletur , sed ad potum magis magisque inflammetur.

Dicendum 4. Mala quæ quis in ebrietate committit , etsi non sint voluntaria in se , sunt tamen aliquando voluntaria in causa : quod fit , si quis prævidere poterat & debebat , talia mala ex ebrietate tamquam causa esse secutura , eo quòd sæpè expertus sit se in ebrietate solitum esse illa perpetrare : aliud esset , si ne quidem in causa talia essent voluntaria , cùm voluntarium aliquod ad peccatum sit planè requisitum.

Dicendum 5. Provocare mutuo ad æquales hau-
Provo-
catio ad
æquales
haustum.
 stus excedentes debitum modum , est peccatum mortale , si adsit interpretativa saltem intentio se aut alios inebriandi. Audi S. Ambros. mores aliquorum ita describentem lib. de Elia Jejun c. 13. *Primò minoribus poculis , velut velitari pugna præluditur : Verùm hæc non sobrietatis est species , sed disciplina bibendi , ut irriterent suum. ubi ergo recalere coeperint , poscunt majoribus poculis , sævor inardescit. at ubi consummata fuerint epula , putes jam esse surgendum : Tunc de integro potum instaurant suum , & cùm consumma-
 verint , tunc inchoare se dicunt , tunc deferuntur phiala , tunc maximi crateres , quasi instrumenta bellorum : Ac ne immoderatum hoc arbitreris , mensura proponitur , certatur sub iudice , sub lege decernitur. Ecce consummatam descriptionem convivii Ebriosorum hujus corrupti sæculi. De his pulchrè etiam S. Aug. Serm. 231. *Majora , ait , pocula providentur , certâ bibendi lege contenditur , qui poterit vincere , meretur laudem ex crimine. Sed illi , qui tales esse volunt , miserabiliter se excusare conantur dicentes : Ingratum habeo amicum meum , si quoties illum ad convivium vocavero , potum ei quantum voluerit , non dederò. Et non sit tibi amicus , qui te Deo vult facere inimicum , qui & tuus & suus est inimicus , si te , & alium inebriaveris , habebis hominem**

amicum, habebis Deum inimicum. Imò addit alibi hac de causa idem S. Præful serm. 232. *Etiam si ad hoc veniretur, ut tibi diceretur, aut bibas aut morieris, melius erat, ut caro tua sobria occideretur, quam per ebrietatem anima moreretur.*

Circa dictum S. Augustini locum scribit Lessius, Augustinum ibi docere, potius moriendum esse quam se inebriandum, tunc solum, quando alter premeret ad inebriandum in contemptum sobrietatis & virtutis: Item etiam S. Patrem loqui de eo, qui quidem prius ab alio est pressus, postea tamen se sua sponte inebriat, non verò de illo, qui esset in periculo vitæ, nisi se inebriaret. Verum infundatè: Nihil enim in dicto loco vel contextu apparet, quod primam restrictionem subindicat. Deinde, expressè agit de eo, qui à viro potente premittitur, & ideò putat se à peccato excusari, quòd se inebriaverit, ac deinde ponit expressè hunc casum, dictis verbis, etiam si ad hoc veniretur, &c. Ubi expressè docet, mortem potiùs esse subeundam, quam etiam in tali periculo animam ebrietate occidere. Unde meritò quispiam subdit hic dicens: *Hæc doctrina Augustini in re morali & Christianâ authoritatis irrefragabilis, movere debuisset Lessium, ne in novam illam doctrinam sine ulla authoritate irruisset. Dicit quidem ita secum sentire multos viros doctos in universitate Lovanien-si consultos, sed Wiggers publicus & ipse in eadem universitate per multos annos professor, testatur illam doctrinam numquam in Scholis Academicis fuisse defensam aut probatam.* Ita ille.

Doctrina autem illa erat, quòd liceret se inebriare ad vitandam mortem, quòd dicta S. Augustini sententia expressè negat. & ratio est clara, quòd non sint facienda mala, ut eveniant bona, ergo nec licet se inebriare ad evadendam mortem: Dicit quidem prædictus author, quòd liceat sumere potum largiorem, etiam ad privationem usus rationis, ex præscripto medici, quando id necessarium est ad curationem

rationem morbi: Ergo & idem licebit ad mandatum Tyranni ad evadendam mortem. Ad quod Resp. N. C. eo quòd potus ille ex præscripto medici abundantior, non censeatur esse nimius respectu talis personæ, in ordine ad finem talis sumptionis, qui est conservatio corporis: Adeòque actus ille sumptionis non est immoderatus, nec contra virtutem temperantiæ, uti est actus alter, quo se quis ad mandatum tyranni inebriat, nec per se ad finem ad quem inebriatio hîc conducit, ordinatur. Neque dici potest, quòd aliqua sint licita, etsi solùm per accidens ordinentur ad finem bonum: Quæ de se sunt illicita, v. g. abscindere manum ad mandatum Tyranni aliàs illaturi mortem: Quia etiam eo dato (quod tamen negamus alibi) magna est disparitas in casu nostro, eo quòd juxta naturæ dictamen pars exponenda sit periculo pro toto, adeòque pars illa eo casu censeatur graviter obesse toti, id est corpori, pro cuius salute pars est amittenda. Inebriatio verò non solùm obest corpori, sed & animæ, & per se dedecet naturam rationalem quàm talem: Unde illa inebriatio non exiit iliam malitiam, quia adhibetur pro conservatione totius, sicut nec fornicatio redderetur licita, si adhiberetur ad evadendam mortem à Tyranno intentatam.

Dicendum 6. Quando nam verò quis censendus sit ebrius, variant authores: Aliqui docere non erubescunt, eum nondum existimandum esse ebrium, qui currum advenientem niteretur evitare, etsi præ crapulâ non posset. Certè magnum nondum sopitæ rationis argumentum, quod & bestia sine ulla difficultate posset. Unde meritò talis opinio rejicitur ut exotica. Eodem jure rejicitur illa, quæ docet eum nondum esse ebrium, qui pedibus vacillans, oculis duplicia cernens, linguâ orbatus, cui omnia gyrari videntur, imò si usque ad vomitum sese ingurgitet, si tamen sciat postridiè, quid fecerit. Certè permulti à criminibus in ebrietate commissis

*Quando-
nam quis
sit ebrius.*

non excusarentur, cum probè norint postridie, quid antea commiserint, etsi ex ebrietate subsidium quærant. Unde generali regulâ illud definire difficile quidem est, sed tamen hoc pro certo est: Quòd si quis ita præ crapula sit constitutus, ut censeatur usu rationis destitutus, etsi non pro toto, tamen censerì posset ebrius. Unde notari potest, posse dari in ebrietate varios gradus, prout quis magis vel minùs usu rationis privatur. Magnum tamen ebrietatis signum est, si quis fecerit in ebrietate talia, quæ extra ebrietatem numquam solitus erat facere: si nescierit quomodo domum redierit, si sit planè incapax ad officia sua ordinaria exequenda.

*Comedere & bibere usque ad sati-
etatem obso-
letum volu-
ptatem,* Dicendum denique, hanc, *Comedere aut bibere usque ad satietatem, ob solam voluptatem non est peccatum, modo non obsit valetudini, quia licet potest appetitus naturalis suis actibus frui*, satis epicureorum Doctrinæ affinem, jam condemnavit pro merito Innocentius XI. quo destruitur unà fundamentum aliorum, quo volunt licitum esse delectationem sensualem propter se appetere.

SECTIO IV.

De Jejunio Ecclesiastico.

*Quid Je-
junium.*

DICENDUM primò, Jejunium *Ecclesiasticum*, quod distingui solet, contra *naturale*, quod est abstinentia ab esca & potu, unde qui nihil sumpserunt dicuntur *jejuni*, est Religiosa observantia abstinendi a cibo ejusque certa qualitate, ad Dei cultum & hominis mortificationem assumpta. Hinc S. Leo serm. 4. de quadrag. ait *Jejunium purificandis animis atque corporibus sacratius institutum. Qualitates* verò cibi interdixtæ sunt pro variis regnis variæ & diversæ. Alibi omnia lacticia & carnes & ova interdiciuntur, alibi ea vel aliqua ex illis permittuntur, idque exceptis certis diebus, quibus ab omni illa cibi qualitate est

*Qualitas
cibi.*

est abstinendum, prout praxis habet hîc in Belgio.

Tempus autem refectionis esse solet hora undecima, & omnes subsequentes, etiam ad vespeream, ita tamen, ut sola unica in die habeatur refectio. Si tamen sit aliqua causa legitima, posset citius illud tempus præveniri, v. g. si esset iter agendum, &c. *Tempus refectionis.*

Dicendum 2. Jejunium veterum Christianorum, etiam involvebat abstinentiam à vino, prout colligitur ex Clemente Rom. 1. 5. constitut. Apost. ubi ita loquitur: *Abstine*te his diebus vino & carne. Et S. Cyrillo Hieros. Cathec. 4. *Jejunamus*, ait, à vino, & carnibus abstinemus. Sic etiam S. August. serm. 64. de temp. qui (ait,) *abstinemus* nos à carnibus, quibus aliis diebus licet: qui nos abstinemus à vino, quo moderatè uti licet. Postmodum tamen, sumptio potûs non violavit jejunium Ecclesiasticum, sed solum carnis; cujus ratio secundum aliquos est illa, quod vinum non suppeditet tantam materiam libidinis: etsi enim sit satis calefactivum, non tamen secum adfert magnam materiam, & cito transiit ejus efficacia. Verum enim vero, etsi sumptio potûs extra horam refectionis jejunium non violet, illud tamen ex parte submergit, quapropter peccant ii, qui computationibus largioribus indulgent diebus jejunii, eo quod Ecclesiæ ordinationi non satisfaciant, quæ præcipit actum abstinentiæ, quæ aliquando magis violatur computatione, quam modico esu carniû. *Potus sumptio.*

Dicendum 3. Etsi in primitivâ Ecclesiâ resectio jejunii soleret solum fieri post occasum solis, in cujus signum in quadragesimâ vespere fiunt ante meridiem; usu tamen Ecclesiæ indulta est collatiuncula ad vespeream: ad hanc quid permissum sit, variè altercantur. Hoc in primis verum puto, non ita de qualitate cibi non prohibita esse hîc disputandum, quam de quantitate: quæ etsi non ita Mathematicè mensurari queat, tamen illa dici potest hîc esse permissa, quæ aliquali confortationi naturæ subservit, non verò plenæ refectioni, qualis est jentaculum aut merenda. *Tempus refectionis.*

Excusatio à jejunio. aiam Dicendum 4. Excusant à jejunio, ætas, labor, infirmitas & paupertas. *Ætas* usque ad annum 21. & ab anno ætatis 60. primis indulgetur non jejunare ob accretionem necessariam, posterioribus, ob senectutem & obligationem vires conservandi; maximè, cum senectus ipsa morbus sit. *Morbus.* Morbus est infirmitas talis aut ejus periculum, quæ cum jejunio est incompatibilis: quæ etiam excusantur nutrientes & utero gestantes, idque ob detrimentum prolis. *Paupertas,* quando quis mendicato vivens, edere debet, dum cibos habet. *Labor,* qui sit talis, ut absque detrimento corporis, aut ejus periculo stare nequeat cum jejunio. Labor hîc tam considerandus est, ex parte spirituali, quam corporali, quatenus labor spiritualis subinde magis consumit spiritus vitales, quam labor corporalis: neque ita enervatur, qui corporaliter laborat, quam qui studendo, prælegendo, concionando, &c. spiritualiter laborat. His annumerari solet *ratio itineris*: alii quatuor ad hoc leucas requirunt, alii plures: ego generali regula hoc determinarem, quod ratio itineris tum excusat, quando suscipitur taleiter, sive pedes, sive equo, sive curru, sive navi, quod cum jejunio sine damno corporis aut ejus periculo non posset sustineri. Hoc autem quandonam sit, prudentia Christiana disjudicet.

Quæret aliquis, an etiam senes robusti sexagenarii eximantur à jejunio: respondent varii quod non, eo quod dispensatio jejunii quoad sexagenarios, solum sit propter defectum naturæ, qui defectus in robustis illis cessat, & consequenter dispensatio. Alii tamen verius docere videntur, omnes omnino sexagenarios à jejunio liberari, eo quod robur senum sit valdè inconstans & fallax, cui proinde per cibum debet provideri: deinde, natura senum semper ad interitum tendit & deficit, adeoque eget adminiculo cibi frequentioris, ut huic quoque naturæ defectui provideatur, tam præsentis quam instanti seu futuro.

Aliqui

Aliqui tamen non solum sexagenarias feminas excusant, sed & quinquagenarias: ratio eorum est, quod feminæ & citius accrescant & adolescant, quam mares, & consequenter citius decrescant, deficiente in feminis citius calore, quam in viris: adeoque indigent crebriori cibo refici feminæ quinquagenariæ, uti ob eandem rationem indigent viri sexagenarii. Hanc sententiam ob dictas rationes probabilem speculativè indicat Sanchez de Matrim. l. 7. disp. 32. num. 17. Etsi eam in praxi consulere non audeat, quia forte eam primus discussit: communior enim opinio, à qua non licet sine sufficienti fundamento recedere, absolute & indiscriminatim docet tam viros quam feminas sexagenarias solum eximi à lege, jejunii, cui proinde in praxi est adhærendum.

Quæret aliquis, an Religiosi professi teneantur jejunare ante annum 21. & post 60. Respondent aliqui ad prius quod non, eo quod regula non videatur esse arctioris vinculi, quam lex Ecclesiæ, quæ ejusmodi à jejunio eximit. Alii tamen verissimè docent, etiam ejusmodi ætatis Religiosos teneri ad jejunandum: quod intellige, tam de jejuniis Ecclesiæ generalibus, quam de jejuniis sui Ordinis: ratio autem hujus est illa, quod ad hoc sese voluntariè adstrinxerint voto per professionem, adeo ut sicut teneretur ad jejunium adolescens 16. annorum, si ad jejunandum se voto adstrinxisset; ita & Religiosus ante 21. Professus.

Ad posterius verò, verius doceri videtur, senes illos sexagenarios non teneri ad jejunium tam Ecclesiasticum, quam sui ordinis. Ratio ejus est, quod jejunia Religiosorum, sequantur naturam jejunii Ecclesiæ, quod non obligat ejus ætatis personas: adeoque nec jejunium sui Ordinis obligat ejusmodi senes. Dicit aliquis, quod etsi jejunium Ecclesiæ non obliget adolescentes ante annum 21. tamen Religiosos professos talis ætatis obligat juxta mox antedicta: ergo etiam jejunium Ordinis potest obligare sexage-

sexagenarios, etsi jejunium Ecclesiæ eos non obliget. Resp. Quod Religiosus ante annum 21. teneatur jejunare, illud est vi voti, uti est dictum: & quamquam aliquis se possit obligare voto ad, jejunandum etiam ultra annum 60., tamen contrarium est præsumendum de intentione Religiosorum, qui censentur se obligare solum usque ad ætatem senilem; neque iterum dici potest, quod idem præsumendum sit de Religioso juvene, puta quod ille etiam velit se solum obligare, ut alios adolescentes ad jejunandum, eo quod Religiosus juvenis per Professionem censetur cedere indulgentiæ datæ juventuti ad non jejunandum, ad quod supponitur satis aptus, ut ad alia Religionis onera: Religiosus verò senex, supponitur ex communi defectu ætatis impotens ad jejunandum, adeoque non tenetur ad jejunium, nec censetur sese ultra eam ætatem velle obligare.

Quæret aliquis, quis possit dispensare in lege jejunii. Resp. certum est posse Episcopum, cui illud de jure competit. Potest itidem in ea lege dispensare & Parochus, uti habet praxis, non enim solet adiri Episcopus, sed Parochus. Verum quidem est, quod illud de jure non competat Parocho, sed solum ex consuetudine quæ dedit illi jurisdictionem, quod consuetudo facere potest, maximè quoad casus frequentiores. Deinde justum est, quod in illam jurisdictionem consentiant Episcopi, eo quod aliàs esset onus intolerabile semper recurrere in hoc casu ad superiorem.

Potest itidem in lege jejunii dispensare Prælatus Regularis cum suis Religiosis, eo quod Prælatus ille habeat jurisdictionem quasi Episcopalem in suos subditos, unde sicut potest eorum vota relaxare, sic & jejunia Ecclesiastica. Ita D. Thom. 2. 2. q. 147. a. 6. & alii communiter.

Dicendum 5.^o Ex dictis in materia de legibus, constat peregrinos teneri legibus locorum per quæ transcunt; ita quoque tenentur eorundem locorum jejunia

nia

nia observare, usu fidelium hanc obligationem inducente, & ab Ecclesia approbata. Vide dicta loco citato.

S E C T I O V.

De Luxuria, ejusque speciebus.

DICENDUM primò. *Luxuria* est omnis inordinatus excessus in re venereâ: est de se peccatum mortale, cùm *Luxuria*, inter opera carnis ab Apostolo numerata, regno Dei excludatur Gal. 5. Ex hoc vitio varia alia nascuntur crimina, ut turpiloquia, scurrilitas, cæcitas mentis, amor sui, odium Dei, &c. species ejus sunt numero 6. fornicatio, stuprum, raptus, adulterium, incestus & vitium contra naturam. Alii addunt sacrilegium, quod alii ad adulterium reducunt. Alii quoque addunt luxuriam inter maritatos, ut Bonaventura.

Fornicatio est copula illicita soluti cum solutâ. Est hæc peccatum mortale, idque non ideo, quia inhibita, sed ideo inhibita quia per se, sive intrinsecè mala. Quod sit mortale, patet ex S. Scriptura, quæ fornicarios Dei regno excludit 1. Cor. 6. & Gal. 5. ad Eph. 5. Quod verò sit per se mala, probant alii ex eo quòd sit contra bonum prolis, tam concipiendæ, quam educandæ: verùm quia hoc à multa fornicatione abesse potest, meliorem dant alii ejusdem rationem, quòd Deus inhibeat usum seminis extra legitimum Matrimonium, quod in omni fornicatione reperire est. Quòd verò sit intrinsecè mala, jam pridem declaravit Pontifex Innoc. XI. condemnando hanc sequentem: *Tam clarum videtur, fornicationem secundum se nullam involvere malitiam, & solum esse malam, quia interdicta, ut contrarium omnino rationi dissonum videatur.*

Stuprum est violatio virginittis injuriosa. Injuria illa

illa censetur adesse, si importunis precibus virgo quasi ad copulam cogitur: quando ad eam metu gravi adigitur, quando vi vel fraude, &c. Ad quid teneatur virginis stuprator, vide dicta de restitutione.

Raptus. *Raptus* est quando persona aliqua libidinis causa vi abducitur. Vitium hoc, uti præcedens, ultra malitiam luxuriæ, habet malitiam injuriæ gravis, adeoque illa confessario est necessariò aperienda. Gravioribus verò pœnis plectuntur raptores, de quibus videri potest Conc. Trid. sess. 24. c. 6. de reform. Matrim.

Adulterium. *Adulterium* quasi ad alienum thorum, est alieni Thorii violatio. Nolite errare, neque fornicarii, neque adulteri, neque molles regnum Dei possidebunt, ait Apost. 1. cor. 5. Deinde præter malitiam simplicis fornicationis, continet injuriam gravem in conjugem, neque hic facultatem dare potest concumbendi, neque juri suo cedere, quominus alter cum sua comparte concumbens non committat verum adulterium, unde meritò damnata est hæc propositio subsequens: *Copula cum conjugata, consentiente marito, non est adulterium, adeoque sufficit in confessione dicere, se esse fornicatum.* Ad quid teneatur adulter & adultera dictum est etiam agendo de restitutione.

Incestus. *Incestus* est congressus cum consanguinea, vel affine usque ad 4. gradum. Est hoc vitium adulterio gravius, nam ut ait S. Aug. de adult. conjug. *adulterii malum vincit fornicationem: vincitur autem ab incestu.* Hinc pœna mortis in V. L. fuit illis indicta, qui turpitudinem illorum revelabant, & tantum scelus committebant.

Vitium contra naturam. *Vitium contra naturam* est coitus contra naturam ejus exercitus: natura autem ejus exigit, ut ex eo possit concipi proles, adeoque sit conjunctio duorum diversi sexus, fiat modo & in vase debito; hinc dividi solet in sodomiam, bestialitatem & pollutionem sive molliem.

Sodomia. *Sodomia* est coitus libidinosus in vase à natura ad generationem non ordinato. Crimen hoc est gravissimum,

finum, ob quod urbes & cives sunt divina irâ, igne combusti: Genes. 19. de his & Apostolus Rom. 1. ita ait: *Propterea tradidit illos Deus in passiones ignominiae; nam fœminæ eorum immutaverunt naturalem usum, in eum qui est contra naturam. Similiter autem & masculi relicto naturali usu fœminæ, exarserunt in desideriis suis in invicem, masculi in masculos turpitudinem operantes, & mercedem, quam oportuit, erroris sui in semetipsis recipientes.*

Beslialitas est coitus hominis cum bruto. *Qui cum jumento & pecore colerit, morte moriatur, pecus quoque occidite*, ait script. levit. 20. quam execranda sint hæc scelera, ostendunt pœnæ civiles.

Pollutio seu *mollities* est libidinosa seminis effusio extra vas naturale ad generationem ordinatum; debet autem, ut sit peccatum, esse voluntaria in se, vel in causa: si verò ex occasione alicujus functionis debita oriatur, neque ullo modo in eam delectando consentit, v. g. si quis eam patitur confessiones excipiendo, studendo in hac materia, curando partes impudicas alterius sexûs; non censetur esse voluntaria, sed solum permixta. Notandum verò dari pollutionem similitudinariam, siue fluxus seminis siue potius humoris semini similis, quæ non habet rationem nec culpam veræ pollutionis, & in viris, materiis his intentis facillè stillat. Ex dictis de fornicatione & mutilatione constat pollutionem esse intrinsecè malam, unde rursus hæc ab Innocentio XI. damnata: *Mollities jure naturæ prohibita non est: unde si Deus eam non interdixisset, sæpè esset bona & aliquando obligatoria sub mortali.*

*Pollutio
similitu-
dinaria.*

Sacrilegium est violatio rei sacræ per actum venereum, puta cum persona aut abusu rei sacræ, in loco sacro, nisi necessitas hic excuset, ut dum conjuges ratione militiæ aut belli in templo conclusi incurrerent periculum incontinentiæ. Alii docent, si etiam sine causâ, copula in loco sacro habita, sit occulta, non esse sacrilegium; verùm contrarium est verius, nec ideo violatur, quia aliquid sit publicum: sed quòd irreverentia loco sacro irrogetur.

Sacrilegiũ

S E C T I O. VII.

*De aliis ad luxuriæ vitium pertinentibus.**Oscula.*

DICENDUM primò, Oscula, si fiant more Patriæ in adventu aut discessu amicorum, causâ fovendæ amicitiae & honestatis, aut causâ honoris, quomodo filii osculantur parentes, Magdalena pedes Salvatoris, & Apost. 1. Thess. 5. dicit, *Salutate omnes in osculo sancto*, non sunt peccatum, nisi adsit periculum luxuriæ. Si verò hæc aut alia quæcumque oscula dentur ex affectu libidinoso, aut cum morali periculo similis delectationis, erunt peccata mortalia. Hinc si oscula causâ honestatis data, postea in decursu sint causa talis delectationis aut periculi ejusdem, ab iisdem prorsus erit abstinendum. Si verò ex tactû manus v. g. percipiatur sola delectatio tactûs, quæ ex tactu rei amabilis oriri solet, non ausim in universum talia peccati mortalis condemnare. Pro cuius intelligentia notandum est, verius videri, in materia luxuriæ dari posse parvitatem materiæ, uti mox probabo. Quo posito, etsi tactus illi ordinati sint ad affectus libidinosos promovendos, tamen sicut non obstante tali periculo, causâ amoris & honestatis dari possunt oscula, sic etiam etsi delectationem in parte sensitivâ solum excipient, non ita ardentem, ut sit periculum morale consensûs ulterioris venerei, sed ad summum periculum ejus valde remotum, ratione cuius non est damnandus ejusmodi tactus semper peccati mortalis. Constabit hoc plenius ex dicendis.

Tactus inhonestus.

Dicendum 2. Tactus partium inhonestarum causâ medicandi aut alterius necessitatis in se aut aliâ admisus aut commissus, omni culpâ vacat, etsi aliquando per accidens turpis commotio in parte sensuali concurrat, modo consensus absit. Unde dicta intellige
de

de tali tactu secundum se considerato. Si verò affectu libidinoso tactus ille fiat, indubiè est peccatum mortale, cum per se ad libidinem tendat. Imò, si sit tactus partis honestæ, v. g. manûs aut pressio pedis, & ex tali intentione & affectu similia prodeant, erunt peccata mortalia, etsi de se sint honesta, ratione affectûs libidinosi, ex quo procedunt.

Idem pariformiter dicendum est de aspectu partium inhonestarum, qui si fiat causa justæ necessitatis, vacat culpâ: si verò fiat causâ libidinis & ex affectu libidinoso, ut dum invicem ad libidinem fixis aspectibus inflammant, aut per aspectus illos voluntariè se, aut alios periculo libidinis objiciunt, peccata sunt mortalia, nam oculi sunt in amore duces, & aliquando deprædantur animam, ut dicitur Thren. 3. Et aliquando oculi sunt pleni adulterii 2. Petri 2.

Aspectus actus libidinosi mulieris cum viro, ob periculum libidinis, est peccatum mortale, si aspectui tali quis inhæreat, etsi ex sola curiositate, cum curiositas illa, in libidinem plerumque transeat. Hinc parentes, qui in conspectu puerorum aut domesticorum concumbere non erubescunt, peccant mortaliter, dando & cauſando adſpicientibus periculum morale libidinis. Si verò sit adſpectus coitus brutalis, non ita statim est peccatum mortale, maximè si fiat ex curiositate, & si periculum luxuriæ absit, cum ex natura sua non ita proximè creet periculum libidinis. Hoc tamen hîc notatum velim praxim apud rusticos esse detestandam, quâ puellas passim cum vaccis ad taurum destinant, ut à tauro concipiant, non sine periculo affectûs libidinosi puellarum ex aspectu talis coitus.

Dicendum 3, Peccant mortaliter qui componunt caniones inhonestas, cum vix fieri possit, quin sint causa libidinis in alio, vel seipsis. Qui verò eas cantant, non ita statim condemnandi sunt simili peccati, sed prudenter videndum, an cantando tam sibi,

Adſpectus inhonestus,

Aspectus actus libidinosi.

Cantantes impudicas cantilenas

bi, quam audientibus non creaverint morale periculum libidinis, quo casu fortiretur cantilena effectum turpiloquii: Aliud esset si ex vanitate aut levitate, illas cantarent, quo casu, si absit omne periculum libidinis, non erit peccatum mortale eas decantare.

*Pingentes
picturas in
honestas.*

Peccant quoque mortaliter, pictores, & alii artifices, qui pingunt vel fingunt picturas aut statuas inhonestas, cum vix fieri possit, quin sint causa libidinis aliquorum adspicientium.

Chorea.

Dicendum 4. Excusant *Aliqui rusticos, qui in diebus Festis ducunt choreas, modo fiant post Missam: Tum quia otio aliàs vacarent, quod pejus esset: Tum quia sunt pro more Regionis, & coram aliis publicè, idèdque magna ex parte aufertur libidinis occasio: Tum denique, quia videntur conciliatrices omnis benevolentiae inter adolescentes & puellas, unde sapius contrahuntur matrimonia inter illos. Tollendi tamen sunt abusus, si qui misceantur, & medestia procuranda, quoad ejus fieri potest: Ita fere quispiam Theologus.*

*Chorea
an sint li-
cita*

Verum, etsi choreas ducere aliquando sit honestum & laudabile, uti constat exodi 15. 2. Reg. 6. tamen assero, plerumque tales choreas modernas & computationes ad cerevisiam (ut vocant) vix excusari posse à peccato. Pro quo notandum est, conditiones liciti chori à Theologis poni, ut prima sit, ut fiat chorus inter personas competentes, cum religiosi ob scandalum ab hoc prohibeantur. 2. Ut omnis gesticulatio libidinosa evitetur. 3. Ut sit intentio solius recreationis honestae. 4. Ne, qui se fragilem sentit, iis se immisceat. His positis, rogo animos non præoccupatos, an promiscuè tales conditiones adsint? An animo indulgendi genii, aut fovendae libidinis eo divertant? certè effectum declarant quotidianæ experientiae. Notum est Confessariis, & aliis animarum rectoribus, ejusmodi conventiones esse luxuriæ scholas, & mutuae libidinis fornaces: probat id praxis continua. Nec hic ab alio officit

officit prætenſa excuſatio, quod aliàs otio vacarent, quod matrimonia conciliarent, &c. Non enim bonus finis malo medio debet aut poteſt intendi, nec ideo otio vacare debent, ſed habent, quod honeſtè agant aut recreationis cauſâ ludendo, aut alio ſeſe diverſendo. Unde rectè quiſpiam definit choreas modernas, eſſe circulum, cujus centrum Diabolus, circumferentia omnes Angeli ejus. Idem & majori jure aſſeres de conventibus & converſationibus ut vocant, in civitatibus inter juvenulas & adoleſcentes, in quibus luxuria præſidet, prodigalitas aſſidet, & gula ancillatur, maximè cùm jam inolevit nefarius quarumdã ornatus, de quo ſtatim. Denique, raro exiſtimo, qui ad conventicula ejusmodi convenerunt, quin, ſi candidè confiteri velint, cogentur aſſerere, periculo libidinis sæpè ſeſe hoc pacto expoſuiſſe.

*Definitio
chorea.*

Converſationes.

Dicendum 5. Peccant mortaliter puellæ ornando ſe laſciyè, uti faciunt, quæ media ex parte oſtendant nuda ubera, aut ſolum transparenti materiâ obtegunt. Ratio eſt, quòd, uti oſtendimus, peccent mortaliter, qui pingunt picturas inhoneſtas, ergo magis illæ, quæ non in figurâ, ſed reipsâ, membra ad libidinem inflammantia aliorum aſpectui voluntariè obijciunt: Unde peccant peccato quoque ſcandali, uti de ſcandalo agendo demonſtravi, & earum falſos prætextus diſſolvi, quæ revidenda relinquo. Hoc ſolum addo, quod & mortalis damnandæ ſint, etſi nullâ libidinoſâ Intentione ſeſe ornarent, ornatus enim, ut ait D. Thom. *Non intentio provocat ad libidinem.* Audi & D. Hieron. Epift. ad Euſtoch. *Si vir vel mulier ſe ornaverit, & vultus hominum ad ſe provocaverit, etſi nullum inde ſequatur damnum, judicium tamen patietur æternum, quia venenum attulit, ſi fuiſſet, qui biberet.* Rem noſtram plenè confirmat D. Dionyſ. Carthuſ. indirectorio vitæ nobilium art. 14. ubi ait: *Quod in præſato ornatu ſuperfluo & veſtitu pompatico ſcandalifativo conſiſtat peccatum mortale, nam ſancti Patres & glorioſi Illuſtriſſimique Doctores, contra ornatum ſuperfluum & excluſivum, curioſum*

*Ornatus
laſcivus.*

superfluumque vestitum tam rigore non scriberent nisi in eis mortalem culpam existere judicassent : venialia quippe peccata talem reprehensionem & condemnationem non promerentur. Optandum esset, si vestitus ab 100. annis usitatus resumeretur, qui quam fuerit honestus, tabulæ illius temporis probè ostendunt. Concludo cum Tertul. de velandis virg. oro te sive mater, sive soror, sive filia, secundum annorum nomina dixerim, vela caput. Si mater propter filios, si soror propter fratres, si filia propter patres, omnes in te atates periclitantur

SECTIO VII.

An in materiâ Luxuriæ detur parvitas materiæ.

Item

An detur ignorantia invincibilis fornicationis pollutionis, &c.

DICENDUM primò, Sunt, qui contendunt in materiâ luxuriæ dari parvitatem materiæ. Ratio illorum est, quòd fieri possit, quòd materia luxuriæ disponat quidem aliquo modo ad libidinem, sed non multum, nec adeò propinquè, ut eâ ratione ob periculum, incurratur peccatum mortale; prout accidere posset in pressione manus aut pedis leviori, saltem quoad homines hujus climatis. Verum quidem est, dicunt illi, quòd in hâc materiâ adeò lubricâ præstet proponere strictius, quam laxius; Verùm ultrà hæc præstat verius. Neque hîc obedientiam opponi sinunt, quia excepto eo, quòd doctrina debeat esse libera, nec restricta, nisi veritatis: Tamen in decreto P. Aquavivæ Soc. JESU Gener. satis famoso, hoc specialiter notari volunt, quòd dicat IN RE VENEREA exiguum voluptatem quæsitam, non excusandam à mortali. Ubi & suis subditis strictè prohi-

prohibet contrarium docere tamquam probabile. Hic inquam, notari volunt to, *In re venerèa*, quod idem significat, quod perfecta libido, vel ejusdem morale periculum: Quo sensu etiam intelligenda est declaratio Card. (si quæ sit approbata à Clemente) 8. de eadem causa, quæ docet, non dari parvitatem materiæ in re venerèa. Aliàs enim mortalis semper argui deberet, qui ex levi voluptate tangit puellæ manum, premit digitum, pedem, &c. Sine ullâ ulteriori intentione libidinosâ, quod communi Theologorum sensui repugnat. Idem dic de levi aspectu. Ità quidem illi. Dictæ sententiæ subscribit Illustrissimus Malderus urbis nostræ Episc. 1. 2. q. 74. a. 10. utens dictâ ratione ultimâ, pro suâ confirmatione, & addens, quod non appareat ratio, quare hic non possit excusare levitas materiæ à mortali, sicut in aliis peccatis: prudentissimè tamen concludit, utramque sententiam esse saltem speculativè probabilem: *Nam moraliter loquendo*, ait, *posterior* (Scil. affirmans) *Non videtur satis secunda in praxi, ideoque non expedire eâ uti, præsertim ante factum propter pondus nos circumstantis peccati: quo efficitur, ut non faciliè in hoc genere moderamen aliquod servetur, quin subsit majoris culpæ periculum: qui autem amat periculum, peribit in illo.* Ità Illustrissimus, Liberius Caramuël in Reg. S. Bened. disp. 68. dicit se numquam intelligere potuisse sententiam negantem parvitatem materiæ in hoc casu, neque se ausurum eandem contra mediocriter doctos defendere: additque eam se vidisse aliquoties defendi, sed numquam benè. Undè concludit dicens: *Dico igitur dari lascivas actiones, quæ sint leves.* Et allatis variis pro hac sua sententiâ rationibus longius quæsitis, sibi objicit & ait: *Diana vir doctissimus edidit resolutiones benignissimas: nihilominus p. 3. tract. 5. resolut. 1. putat esse periculosum asserere dari in re venerèa parvam & levem quantitatem.* Et respondet his verbis: *Ingenium Dianæ veneror, ejus industriâ multas opiniones evasisse probabiles, quæ antea non erant, invidus sit, qui non affirmet. Cæterum, ait*

est unus Doctor: Nec ipsius, nec Tanneri, Castri, Basilii Pontii, Lessii, Rebellii & Aquavivæ auctoritas tanta est, ut ob illam contraria pars non judicetur probabilior, & si rationem consulamus, certa. Deinde; si quære-
re placeat ab eodem, quæ hic debeat censerî materia parva, ita respondet: *Aliqui asserunt manuum le-
vem contactum, pedis impulsum, osculum & similia, su-
blato ulteriori periculo, non esse gravia. Ego à delectatio-
nis quantitate, culpæ magnitudinem melior, & ex meis
principiis sic Philosophor. Illa delectatio, quæ octies ma-
ior sufficeret semen decidere, est gravis, & mortaliter
peccaminosa: Quæcumque eâ minor, est levis. Patet,
quia ex meis principiis quæ superius efficacissimè probavi,
completi operis octava pars, est materia minima peccati
gravis: Ergo delectatio, quæ est minor octavâ parte de-
lectationis completa (ni aliud periculum subsit) erit cul-
pa venialis. Denique, si quæras ab eodem, Utrum
in re venerêa debeat admitti etiam materia nulla, nempe
quæ physicè sit aliquid, sed prudentum opinione nihil;
Resp. affirmativè: Quia commotio modica, quamdiu in-
sensibilis manet, verè & realiter commotio venerea est:
Sed sicuti nec leviter sensibilis est, ita nec leviter pecca-
minosa. Ità Lobkowitz.*

Verùm doctrina data in praxi est parùm tuta: Et
quidquid fortè sit nimium speculationi indulgendo,
hoc interim certum sit pro praxi, hanc ab Alexan-
dro VII. proscriptam esse numero 40. *Est probabi-
lis opinio, quæ dicit tantum esse veniale osculum habitum
ob delectationem Carnalem & sensibilem, quæ ex osculo
oritur, secluso periculo consensus ulterioris & pollutionis.*
Neque ideo mox mortalis condemnandi sunt, qui
leviter puellæ manum tangunt, premunt digitum,
&c. Cum illud non sit quid carnale & sensibile,
puta aliquid veneri, aut ad libidinem semper dispo-
nat propinquè, etsi in osculis subesse soleat majus
eiusdem periculum. Posset enim & illud solum esse
sensibile, nec tamen carnale, quale solum prohibe-
tur haberi pro veniali. Denique, cum in moralibus
non

non attendenda sit ita speculatio, quam praxis, vel quid fieri soleat; Hinc jure pro praxi & damnata est prædicta propositio; & secuta æquè ac verissima est sententia negans ratione periculi imminetis etsi de cætero, speculationi insistendo, posset aliter contingere.

Pro pleniori tamen intelligentiâ notari posset, diversitatem hanc opinandi, ex eo ortam fuisse, quòd non omnes accipiant eodem modo to *Venerèe* & *Carnale*, adèd ut his aliquæ delectationes dicantur esse carnales & veneræ, quæ tales non sunt aliis, ad quam respectivè acceptionem intelligenda sunt, si quando dicitur, quòd in materiâ luxuriæ non detur parvitas materiæ, vel detur: Prout etiam sectione 7. diximus, videri verius illam dari.

Ad 2. dicendum juxtà principia à nobis in 1. 2. data, non posse dari ignorantiam invincibilem juris naturæ nec consequenter fornicationis aut pollutionis, quam probavimus esse contrà naturæ legem in ante dictis. Deinde, hoc addunt, etiam alii huic nostræ doctrinæ repugnantes, ejusmodi ignorantiam vix esse posse invincibilem in pagis & urbibus Christianis, ubi debita viget illorum instructio: Quo fit ut quando de iisdem rogati, dicunt se illis actibus nihil mali attentasse aut suspicatos esse, non facile credendum sit, cum vix dubium, quin in commissione eorundem aliquem malitiæ scrupulum senserint, aut conscientie remorsum. Cum ergo fornicatio sit contrà jus naturæ, dicente Soto l. 5. de jure & just. c. 3. a. 3. *Dicere fornicationem non esse contrà jus naturæ, error est hæresi proximus.* Sequitur ejusdem non dari invincibilem ignorantiam. Item dicendum est contrà inauditam Caramuelis sententiam dicentis Theol. mor. num. 1603. *Si Deus molliem non interdixisset, numquam esset mala, sæpè esset bona, & aliquando obligatoria sub mortali.* Et iterum: *Si mollietates esset mala secundum se, de ipsius malitia hominibus constare deberet.* Cum enim & illa sit

contra jus naturæ , prout docet S. Augustinus l. 3. confess. c. 8. dicens , *Flagitia , quæ sunt contra naturam ubique ac semper detestanda esse atque punienda , qualia , ait , sodomitarum fuerunt ; cum eadem natura , cujus Deus est author , libidinis perversitate polluantur : Sequitur , nec pollutionis dari posse ignorantiam invincibilem . Hinc jam oritur gravis quæstio , pro qua sit*

S E C T I O VIII.

An teneantur iterare confessiones illi , qui ob ignorantiam se de pollutionibus & similibus antea non accusaverant.

CASUM hunc proponit Diana p. 3. tract. 4. de sacramentis resolut. 108. *quidam puer usque ad 13. annum non se accusavit de ordinariis pollutionibus , quas faciebat , sciens postea hoc esse peccatum mortale , dubitatum fuit à multis Confessariis , an teneatur repetere omnes confessiones . Et ipse quidem respondit negativè , ex illo ipsius fundamento , quòd possit dari ignorantia invincibilis pollutionis , quod non sit peccatum mortale . Idem tenent & alii , qui etiam nobiscum sentiunt non dari ignorantiam invincibilem juris naturæ , ut Gerson , Baslæus , & alii . Et quidem Navarrus in C. fratres de pœnit. distinc. 5. num. 32. addit , hujus dicti rationem , neminem , quem meminerit , reddidisse ; quæ illi videtur esse illa , quod , quæ ignorantia non reddit actum peccandi involuntarium , possit reddere ommissionem illius confitendi involuntariam . Et in manuali V. Confessio c. 9. num. 15. indè concludit : quòd consequenter pueri vel puellæ , qui grandiores facti novè agnoscunt esse peccatum mortale , quod aliàs omiserunt confiteri , ignorantes illud esse tale , non tenentur iterare confessionem eorum , quæ confessi fuerunt . Posterior*

verò V. Confessio VI. num. 6. ita subdit: *qui aliquod peccatum mortale ex ignorantia vincibili mortaliter prætermisit in confessione explicare, putans non esse mortale, quamvis, quando peccatum perpetratum est, non fuerit ille excusatus à peccato mortali, excusatur tamen ab iteranda confessione, & satisfacit repetendo peccata in confessione prætermissa.* Ratio est, quia ignorantia illa, quamvis vincibilis fuerit respectu actus peccati, potest esse in vincibilis respectu omissionis in confessione. Unde excusantur pueri & puellæ &c. In quâ quidem quæstione hoc certum est, pro majori securitate consulendum esse similibus, ut confessionem instituant generalem. Ad quod si induci nequeant, satis fundatam existimo doctrinam, & sufficere, si eadem peccata omissa, ut alia omissa clavibus subjiciant, ob rationem mox ante datam. Addit D. Havermanstyro. tr. 1. c. 8. §. 14. præsumendum esse de divinâ bonitate, eam non velle tam strictè conscientias constringere quoad confessiones. Quare si alibi dari possit Sacramentum validum & informe, maximè hoc fieret in hoc dicto casu.

Idem quoad ignorata ignorantia vincibili juris divini, quæ non sūt mortaliter mala, tenet eximius D. Sylvius 3. p. q. 9. art. 2. quæsito 4. ubi ait: *quia ergo pueri, qui grandiores facti agnoscunt aliquod esse peccatum mortale, quod aliàs omiserunt confiteri, ignorantes illud esse tale: supponuntur probabilem ignorantiam habuisse: ideo non tenentur iterare confessionem eorum, quæ prim fuerunt confessi.* Quia licet ignorantia legis divinæ non excusaverit eos à peccato, pollutionis v. g. furti & similium: excusavit tamen, ne peccarent id non confitendo. Cùm ergo ob crassiores ignorantie juris naturæ tenebras, aliquando possit peccari solùm venialiter, cum ignorantia illa subindè excuset à tanto etsi non à toto: possit conformiter concludi pro casu nostro, ex datâ doctrinâ Sylvi, quòd etsi ignorantia illa non excusaverit aliquem à peccato pollutionis v. g. excusaverit tamen, ne peccarent id non

confitendo. Ut ut sit, certum est quòd loco suprà citato de se fatetur Diana, quòd sententia negans iterandam confessionem, in praxi liberet Confessarios à multis laboribus & perplexitatibus.

Hoc quoque hic notari posset, infundatam esse pro datâ sententiâ rationem, quòd scilicet non debeamus confiteri id, quòd in juventute fecimus, ignorantes esse peccatum: eò quòd ad peccandum debeamus habere notitiâ malitiæ, dum rem committimus, neq; sufficiat postea intelligere, quòd esset malum. Licet enim juxta dicta, opinio illa negans sit satis fundata: infundata tamen est dicta ejus ratio, proveniens ex infundato fundamento: quòd ad peccandum requiratur actualis advertentia malitiæ, quòd alibi in 1. 2. rejecimus.

A P P E N D I X.

An meretricia publica possint permitti in Republicâ Christianâ.

NOLIM hîc condemnare ullos Christianos Principes, qui meretricia publica in suis civitatibus permittunt, sed solum ostendere, quid de jure divino, & juxtâ rectum ordinem fieri expediat. Et inprimis certum est, nihil sectariis nostris itâ commune esse, quam hâc de causâ condemnare & convitari Principes & Respublicas Christianas, & præcipuè ipsum summum Pontificem, quòd meretricia Romæ permittat. Nec tantum sectarii, sed & quidam Catholici idem attentarunt, inter quos liberior in hâc causâ fuit quidam Claudius Spencæus Parisinus, & alii plurimi hanc permissionem in Republicâ Christiana condemnantes.

Primò quidem, quòd meretricia sint jure divino interdicta Deut. 23. ubi dicitur: *Non erit meretrix de filiabus Israël, nec scortator de filiis Israël.* Unde dictus
 Spen-

Spencæus: *hujus*, ait, *permissionis nos non semel puduit Christianam scilicet Rempubicam eo carere non posse, quod tamdiu hoc est annis plusquam 1500. non admisit Moysaica.* Addens eam Judæorum esse legem in hunc usque diem, quod nulla scorta permittant. Hanc illorum legem confirmat Orig l. 4. contra Celsum dicens: nullæ fuere meretrices juventutis pestes in eorum Republicâ. Et Clemens l. 3. Strom: & alii docent apud eos capitale fuisse meretricari. Secundò eadem damnant SS. Patres: Hieron. Epistolâ ad Oceannum itâ scribit: *Cæsarem non Christum, Papianum non Paulum, viris impudicitia fræna laxare & lupanaria permittere.*

S. August l. 2. civit. c. 20. lupanaria numerat inter illicita, ac pessimam dicit Rempubicam, *Ubi abundant publica scorta.* Deinde ex eodem S. Patre dicitur cap. nubendi 27. q. 1. *Fornicatio autem nulli impune conceditur.* Lactantius autem l. 6. c. 23. dicit lupanaria esse investa à dæmone.

Tertiò, eadem damnant innumera eaque gravissima mala, quæ ex tali scortatione proveniunt. Primò, quòd meretrices iram Dei provocent, ut patet Deut. 22. quòd apostatare faciant sapientes: quòd per easdem propagatio generis humani impediatur, unde fit, quòd innumeri honesta matrimonia inire detrectent, dum hâc viâ suæ concupiscentiæ possunt mederi: quâ vel solâ ratione videtur permissio meretricum contraria legi naturali, dum est contra finem à naturâ constitutum, ne liceret congregi, nisi ob susceptionem, aut propagationem prolis, quem meretrices impediunt, ut mox ostendi.

His & aliis rationibus convicti, plurimi Christiani Principes, meretrices proscripserunt, uti fecit S. Ludovicus Parisiis Philippus. IV. Hispaniarum Rex: & anno 1624. Dux Lotharingæ. Imò præclarè S. Pius V. Romæ meretrices interdixit, contra populi Romani voluntatem & reclamationem. Sic & nuper Urbem nostram ab eodem scandalo & malo liberavit Nobiliss. & Ampliss. D. D. Alexander della Faille, Urbis

Urbis nostræ Prætor, &c. quod tamen aliis suis prædecessoribus judicabatur factu esse impossibile : quo facto, unâ Urbem nostram sui maximè obstrinxit.

Nec solum id à Principibus Christianis, sed & ab ethnicis & infidelibus idem est statutum : teste Phylarcho, apud Gios meretrices non sunt permissæ. Teste Petro Martyre l. de novo orbe, meretrices plectuntur morte in insulâ Palmariâ. Periander Rex apud Corintos meretrices undâ submersit, teste Heraclid : de politiis, de politia Corinthiorum.

Unum est illudque præcipuum, quod permissio illa absolutè sit necessaria, ad præcavenda gravissima mala, puta vagas libidines, adulteria &c. juxta illud D. August. *Aufer meretrices de rebus humanis, turba-veris omnia libidinibus.* Idem etiam docet S. Thom. 2. 2. q. 10. a. 11. Et de regimine Princip. l. 4. c. 14. ubi ait : *tolle cloacam & replebis fæcore totum Palatium; tolle meretrices de mundo & replebis ipsum sodomia.* Ad quod Respondent aliqui, hâc permissione vagas libidines non evitari, sed potius inflammari, uti clarè patet in eis Urbibus, ubi lupanaria permittuntur. Ratio hujus est, quod una libido inflammet aliam, cum sit insatiabilis; undè semper alios & alios modos excogitat, quibus fatietur, nec ullis finibus se cohibet aut consistit. Undè S. Hieron. contra Jovinian. ait, libidinem post copiam esse inopem, nec ipso usu extingui, sed immoderatus ac vehementius inflammari.

Quod autem communiter obijcitur ex S. Augustino, notant varii, illud in eo non reperiri, maximè cum S. August. meretricia condemnet, uti vidimus : quia tamen à S. Thoma adfertur, & approbatur, responderi potest; quod ad mala graviora præcavenda aliqua minora possint permitti, non quidem ea mala approbando, sed non puniendo & Dei judicio eadem relinquendo. Hoc tamen sincerè notandum est, sæpè timorem gravioris mali esse in-

fun-

fundatum, qua ratione nec ipsa permissio, quæ illius mali evitandi causa adhibetur, licita est, sed condemnanda.

Addunt tamen varii, quòd ubi meretrices permittuntur, aliqua pœnalia illis debeant injungi, in signum quod solum permittantur, non approbentur: v. g. quod debeant habitare in loco Urbis viliori, ab honestioribus locis possint expelli, non possint vehi rhedis, si discedant sine pœnitentia ex hac vita, sepeliantur sepulturâ asini, uti fit Romæ, ubi similes sepeliuntur extra Urbis muros in loco ad hoc constructo, vulgo *muro torto*.

Ex dictis omnibus manifestè liquet summâ curâ ac diligentîâ, quoad fieri potest, huic malo esse obviandum, tum ut scandala tollantur, tum ut ira Dei & vindicta evitetur, quæ per meretrices provocatur.

NOMINI TUO DOMINE DA GLORIAM.


696
696

PR



1
1
1
1
1

1



I N D E X
PRÆCIPUARUM RERUM
ET VERBORUM,
TOMI SECUNDI,

A.

- A**BEATUM residentia. [348.](#)
Abortus quomodo vetitus. [247.](#)
Abstinencia quid sit. [448.](#)
Accusatio debita. [323.](#) Qui non possint accu-
sare. *ibid.*
Acedia quid & quale peccatum. [191.](#) Ejus remedia. *ibid.*
Advocatorum obligatio. [327.](#) & seq.
Ambitio quid sit. [445.](#)
Apostoli quomodo dici possint Ecclesiæ fundamenta. [56.](#)
Asscuratio quid & quæ ad eam requisita. [313.](#)

B.

- B**ELLUM quando licitum. [176.](#) Quare aliquando ab
Ecclesia taxatur. [177.](#) Quæ requirantur ut liceat. *ibid.*
& seq. Potest bellum esse utrimque justum. [179.](#) Quæ
sint in bello observanda. [179.](#) Bellantium peccata. [180.](#)
Quibus liceat bellare. [175.](#) & seq.
Beneficium quid sit & quoduplex. [333.](#) & seq. *debent da-*
ri dignioribus. [335.](#) Beneficiorum patroni quomodo pec-
cent. [336.](#) In beneficiato quæ sint requisita. [337.](#) & seq.
Beneficiorum pluralitas semper in Ecclesiâ fuit invisa.
[339.](#) & seq. Beneficiatorum residentia. [347.](#) Benefici-
collatio ab Episcopo solum confirmato an hic valeat. [350.](#)
Bene-

INDEX RERUM

- Beneficiorum permutatio quando sit simoniaca.* [359.](#)
Beneficiarius Religiosus verè manet pauper, & quid de suis fructibus possit disponere. [206.](#)
Beneficiarius Clericus quomodo sit Dominus suorum fructuum. [212.](#) & seq.
Bonorum cessio quomodo excuset à restitutione. [238.](#)
Breviarii obligatio. [373.](#) & seq.

C.

- C** *AMBIVM* quid & quotuplex. [305.](#) & seq. *Campso-*
rian liceat aliquid recipere ultra sortem. [306.](#) *Cam-*
pforum peccata. *ibid.*
Cantus Ecclesiastici origo & ordo. [375.](#) *Ejus utilitas.* [377.](#)
Est moderandus. *ibid.*
Castratio est illicita. [251.](#) *Illà non medetur libidini.* *ibid.*
Census quid & quotuplex. [307.](#) *An & quomodo licet.* *ibid.*
Charitas quid & quotuplex. [109.](#) & seq. *Charitatis obje-*
cta. [111.](#) & seq. *Charitas augeri potest & minui.* [113.](#)
Peccatum mort. destruit charitatem, & quomodo. [114.](#)
Quenam charitas per se justificet. *ibid.* *Sine charitate.*
nulla est virtus. [116.](#) & seq. *Amor sui quis malus.* [118.](#)
Clericorum sustentatio quæ sit debita. [343.](#)
Compensatio occulta an & quomodo sit licita. [261.](#)
Commodatum quid sit. [291.](#)
Confessarius an teneatur restituere in defectu penitentis.
[234.](#) & seq. *Quomodo agere debeat cum reo.* [328.](#)
Coöperatio ad furtum varia. [262.](#) & seq. *Coöperantes illi*
quo ordine debeant restituere. [266.](#)
Concilium quid sit. [66.](#) *Quæ ad generale Conc. requisita.* [67.](#)
Quomodo sit infallibile. [68.](#) *Est infra Pontificem.* [69.](#)
Correptio fraterna quid sit. [157.](#) *Est in præcepto.* [158.](#) *Ejus*
materia. *ibid.* *Qui possint corripere, & debent & qui-*
nam corripere. [158.](#) *Quæ ad illam fini requisita.* [161.](#) &
seq. *Corrumpendi ordo.* [163.](#) *Intentio corripendi.* [167.](#)
Contentio quid sit. [192.](#) *Quando sit peccatum mortale.* [193.](#)
Coniunctio quid sit. [273.](#)
Contractus quid sit, quomodo perficitur, quotuplex. [283.](#)

Ex metu factus. [284.](#) Qui possint revocari. [285.](#) Qui possint contrahere. [286.](#)
Convitiium quid sit. [280.](#)

D.

DECIMÆ quid sint, & quotuplices. [382.](#) Debentur ex iustitiâ. [383.](#) Quo jure sint debita. [384.](#) Qui dare, quibus, quando & quomodo dari debeant. [387.](#) & seq. Quomodo exigendæ. [392.](#) Decimas defraudantium pœnæ & solventium præmia. [394.](#) & seq.

Depositiū quid sit. [290.](#)

Detractio quid sit, quot modis fiat [273.](#) Quotuplex sit. [274.](#) Quale peccatum ibid. Detrahens coram uno an peccet. ibid. Varii modi detrahendi. [276.](#) & seq. detrahentem audiens an peccet, [279.](#) Quid si detrahentem non impediatur. ibid.

Desperatio in quo sita, [105.](#) Potest esse sine infidelitate. [106.](#) Quâ ratione fiat desperatio. [106.](#) est peccatum mortale. ib.

Deus mentiri non potest. [14.](#) in Deo idem est, dicere falsum & mentiri. ibid. An possit infundere habitum erroneum, & inducere in errorem. [15.](#) an possit uti signis de se falsis. [16.](#)

Dignitas secularis an possit vendi. [331.](#)

Dilectio proximi [121.](#) Dilectio inimici est præcepta. [128.](#) Quomodo sint diligendi. [129.](#) Dilectio Dei quando, & quomodo obliget. [133.](#) Debet diligere super omnia etiam intensivè. [137.](#)

Discordia quid. [192.](#) Potest esse bona. ibid.

Dispensatio Papæ in pluralitate beneficiorum quid valeat. [342.](#)

Dominium quid & quotuplex. [201.](#) Ejus subjectum. [203.](#) Qui possint esse Domini capaces. ibid. & seq. Objecta Domini. [219.](#)

Donatio inter vivos & mortis causâ quæ sit. [288.](#)

Donum consilii quid sit. [197.](#)

Dubia an debeant interpretari in partem meliorem. [316.](#)

Duellum quid & quotuplex. [187.](#) Quomodo prohibeatur.

187. Quo casu possit esse licitum. **188.** Duellantium pœ-
næ. **189.**

E.

ERIETAS, quid & quando. **449.** & **453.**
Ecclesia quid & quotuplex. **71.** Quinam sint in Eccle-
sia. **72.** & **73.** Ecclesiæ proprietates. **75.** & seq. In
quo sita sit Ecclesiæ indefectibilitas. **77.** Ecclesiæ claves
immediatè datæ sunt S. Petro. **56.** Claves illæ sunt du-
plices. **57.** Descendunt ad Pontifices. *ibid.* Ecclesiæ à vi
belli sunt liberæ. **182.**

Eleëmofyna quid & quotuplex. **140.** Est præcepta, & quo
jure. *ibid.* & seq. Fructus Eleëmofynæ **142.** De quibus
danda sit. *ibid.* Quæ censeantur esse superflua. **143.** Quan-
do danda sit. **144.** & seq. Qui eam dare debeant. **146.**
Eleëmofynarum communium dispensatio propriè est Eccle-
siastica. **149.** Quibus danda. **150.** An dari possit de in-
justè acquisitis. **155.** Quâ intentione dari debeat. **156.**

Elocatio quid sit. **291.**

Emptio quid sit. **288.** Quando liceat rem emere minoris ju-
sto. **289.** Quæ sint requisita ad debitam emptionem. *ibid.*
Non licet emere vilius ob anticipatam, nec vendere carius
ob dilatatam solutionem. *ibid.*

Episcopatum an liceat appetere. **345.**

Error in contrahitu quid valeat. **284.**

F.

FAMA quid sit. **275.** An liceat sese infamare. **277.**
Fides quid sit **1.** varia ejus divisio. **2.** & **3.** est ex
gratiâ. *ibid.* Item ex libero arbitrio. **4.** non omnium est
fides. *ibid.* Quomodo sit in nostrâ potestate. **5.** ad fidem
requiritur pia voluntatis affectio. *ibid.* Illa non est nisi
charitas. **6.** Sine illâ fides esse non potest. *ibid.* Fides
latè dicta quid sit. **7.** fides illa non est fides. **8.** quid sit
fidei objectum formale. **10.** quomodo ad fidem spectet
authoritas Ecclesiæ. **12.** objectum fidei de se est obscu-
rum. **18.** potest fides esse cum clarâ cognitione. *ibid.* &
seq.

ET VERBORUM.

seq. Res fidei debent esse evidenter credibiles. 19. Fides debet esse simplex & prudens. 20. Ad fidem non sufficit probabilitas. *ibid.* Fides est certior omnibus scientiis. 25. Fides semper fuit eadem. 27. Fidei Symbolum. 29. quæ fides sit ad salutem necessaria. 31. & seq. Fidei præceptum quando obliget. 42. an sola fides ad salutem sufficiat. 44. & seq. Quæ fides meritoria. 46. Fidei externæ præceptum. 47. & seq. Quando obliget. 50. & seq. Subjecta fidei. 52.

Fidejussio quid sit. 313. Qui possint fidejubere. 314.

Fornicatio quid, & ejus malitia. 459.

Fortitudo quid sit. 443. Fortitudo Christiana quæ. 444.

Furtum quid sit. 258. Quale peccatum. 259. Ejus materie quantitas. *ibid.*

Furti minorum, quale peccatum. *ibid.* fur retinendo continuo peccat. 230.

G.

GRATITUDO quid, & ejus officia. 438.

Gula quid & quot modis fiat. 448.

H.

HÆREDES qui possint insitui. 310. Qui ex hereditari. *ibid.*

Hæresis quid, & adeam quid requiratur. 79. An, & in quibus liceat cum Hæreticis communicare. 82. & seq.

Hæreticorum libri quomodo vitandi. 86. & seq. An liceat cum hæreticis disputare. 90. An liceat ab iis accipere Sacramenta. 92. Ab hæresi qui possint absolvere. 93.

Hypotheca quid. 314.

Horæ Canonica quid, & quot sint. 366. Earundem tempus. 367. Quomodo recitanda. *ibid.* in eis legendis distrahi quale peccatum. 368. Quinam ad illas legendas sint obligati. 369. An etiam Moniales professæ extrâ chorum. 371. & seq. Quanam excusent à recitatione horarum. 378.

Tom. II.

Hh

JÉ.

I.

JEJUNIUM quid importet. [454.](#) & seq. Quanam ab illo excusent. [456.](#)

Ignorantia invincibilis fornicationis & pollutionis an possit dari. [469.](#) An qui ex ignorantia sese de iisdem non accusaverunt, teneantur confessiones suas iterare. [470.](#) & seq.

Improperium quid sit. [280](#)

Infidelitas quid & quotuplex. [79.](#) Dubius infide est infidelis. [80.](#)

Injuria quid sit. [228.](#) An possit fieri volenti. *ibid.* Pendet aliquando ab intentione. [229.](#)

Injustitia quid sit. [228.](#)

Invidia quid sit. [191.](#) Invidia vicinorum mercatorum quale peccatum. [192.](#) Irrisio quid sit. [280.](#)

Inquisitio quid, & quotuplex. [318.](#)

Judicium temerarium quid, & quale peccatum. [315.](#)

Judicium credibilitatis quid, & quale sit. [21.](#) Quid requiratur ad debitum judicium. [317.](#) Judicium officium & obligatio [318.](#) Judex se debet legibus conformare. [321.](#)

Judex simul & advocatus esse non potest. *ibid.* Non potest sequi minus probabile. *ibid.* Quid agat in causa equali. *ibid.* Quid agat cum reo probato nocente, quem privata scientia cognoscit innocentem. [322.](#)

Jus quid sit, & quotuplex. [201.](#)

Juramentum quid & quotuplex. [421.](#) Jurandi consuetudo quale peccatum. [422.](#) Jurantes dubium quomodo peccent. [423.](#) A juramento absit restrictio mentalis. *ibid.* Jurare cum animo non jurandi, an liceat. [424.](#)

Juramenti divisio [425.](#) Juramenti interpretatio. [426.](#) Obligatio juramenti multum pendet à mente jurantis. [426.](#) quando juramentum desinit. [427.](#)

L.

LIBELLATICI qui sint. [50.](#)

Lombardi an, & quomodo liciti. [302.](#) & seq.

Ludus quid, & an sit licitus. [312.](#)

Luxuria quid, & quotuplex. [459.](#) & seq. In Luxuria an detur materiae parvitas. [466.](#) & seq.

MA.

M.

MAGIA quid sit. [431.](#) *Includit pactum cum demone.* [432.](#)

Magister Novitiorum, qualis esse debeat. [419.](#)

Magnanimitas quid sit. [444.](#) *Ejus actus.* *ibid.*

Maleficium quid & quotuplex. [433.](#)

Meretricia publica an possint permitti in republicâ Christianâ [472.](#)

Meus gravis & levis. [285.](#)

Mendacium quid & quotuplex. [440.](#) *Mentalis restrictio est mendacium artificiosum.* [441.](#)

Missarum reductio. [349.](#)

Montium pietatis origo, ratio, & an liciti. [297.](#) & seq.

Mutuum quid sit [292.](#) & seq.

N.

NECCESSITAS medii & præcepti quæ. [30.](#)

Negotiatio quid & an sit licita. [311.](#) *Interdicitur Clericis.* [312.](#)

O.

OBEDIENTIA quid. [438.](#)

Observantia quid. [437.](#)

Occisio est generaliter venia. [240.](#) *Quando permissa.* *ibid.*

Licita est pro defensione vitæ. [241.](#) *Non tamen pro de-*

fensione bonorum. [243.](#) *Nec pro defensione pudicitie.*

244. *Nec pro defensione honoris.* [245.](#) *Occidere tyran-*

num an liceat. [242.](#) *An liceat innocentem.* [246.](#) *Occidere*

seipsum non licet. [248.](#) *Licet permittere se occidi.* [249.](#)

Mutilare quando sit licitum. [250.](#) & seq.

Odium quid, & quotuplex. [189.](#) *Odio haberi potest Deus.*

[190.](#) *Odium illud est omnium peccatorum gravissimum.*

ibid. *Odium proximi est mortale.* *ibid.*

Oratio quid, & quid ad eam requiratur. [363.](#) *Ejus divisio.*

ibid. *Orationis necessitas, & quando obliget.* [365.](#) *quid,*

cui, & à quo sit orandum. [379.](#) *Quomodo oratio fiat in*

peccatum. [380.](#) *Quare oratio sæpè careat suo effectu.* [381.](#)

INDEX RERUM

Ubi orandum. [382](#). Orationis fructus. *ibid.*
 Oscula an, & quæ sint prohibita. [462](#).

P.

PACTUM nudum quid sit. [282](#).

Paupertas Religiosa quæ. [403](#). Quomodo violetur & quando cesset. [403](#). & seq.

Personarum acceptio quid, & quale peccatum. [330](#).

S. Petrus Romæ fundavit Ecclesiam. [58](#).

Pietas quid sit. [435](#).

Pignus quid sit. [314](#). Quæ possint oppignorari. [315](#).

Pontifex vicarius Christi. [55](#). Licet ad eum appellare ex toto orbe. [59](#). Ut caput Ecclesiæ est omnino infallibilis, non tamen ut persona privata. [60](#). Quando censeatur definire ex cathedra. *ibid.* Potest errare in quæstionibus facti. [61](#). & seq. Est infallibilis in canonizatione SS. [62](#). Pontificem modernum esse verum Pontificem, non est de fide. [62](#). & seq. Pontifex ut persona publica nequit esse Hæreticus, bene tamen ut privata. [64](#). Nullus à fide defecit. [65](#). Pontificis est convocare Concilia generalia. [67](#). Iisdem præsidere. *ibid.* Pontifex est supra Concilium generale. [69](#). quomodo Pontifex teneatur Concilio generali [71](#).

Præmonstratenses sunt capaces beneficiorum Ecclesiasticorum tam secularium quam regularium, etiam sine speciali dispensatione. [334](#).

Precarium, quid sit. [232](#).

Præscriptio quid sit. [223](#). Quid ad eam requiritur. [224](#). An valeat in foro conscientie. *ibid.*

Præsumptio quid & quod simplex. [107](#). Quale peccatum *ibid.* Quæ præsumptio destruat speciem. [108](#).

Probatio vulgaris quid sit. [432](#).

Pretium rei quod simplex. [289](#).

Professio Religiosa quid exigit. [420](#).

Promissio quid, & quando obliget. [287](#). Quid ad eam requiratur. [288](#).

Proximi qui sint. [121](#). Quomodo diligendi. [120](#). Dilectio pro-

IN VERBORUM.

proximi non potest esse sine dilectione Dei. [122](#). Debent diligere affectu interno. [123](#). Ordo diligendi proximos [126](#). Prudentia quid, ejus actus proprii. [193](#). Judicium ejus est practicum ibid. Quis sit absolute prudens. ibid. Non potest ei subesse falsum. [196](#). Ejus partes ibid. Prudentia carnis. [197](#). Quid imprudentia. ibid. Publicum, an liceat alibi infamare. [275](#). Quotuplex sit publicum. ibid.

R.

RELIGIO quid sit. [361](#). Debet esse ex amore. [362](#). Quotuplex sit. ibid. Religiosus status quid sit. [402](#). Ejus essentia. ibid. Quis sit perfectior. [403](#). Ejus solemnitas unde sit. ibid. Religiosorum vota. ibid. Quae paupertas sit perfectior. [405](#). An sit eadem in omnibus ordinibus. [407](#). Religiosorum peculia omnia an & quomodo sint licita. [207](#). & seq. Religiosorum contractus an valeant. [416](#). Religiosa obedientia. [417](#). Religiosa castitas. [418](#). Religio subsistit pietate & doctrina. [419](#). Represaliae quid sint, & quid ad illas requiratur. [183](#). Restitutio quid sit. [230](#). Ex qua culpa debet restituere. ibid. Oritur obligatio ejus aliquando ex contractu. [231](#). Quando contrahitur ex vi officii. [233](#). Quae excusent à restitutione. [236](#). & seq. Restitutio ex homicidio vel mutilatione. [252](#). Restitutio pro stupro. [255](#). & seq. Pro adulterio. [257](#). Restitutio rei furtivae. [267](#). & seq. De quibus, & cui facienda restitutio. [270](#). & seq. Restitutio sumae quos, & quomodo obliget. [281](#). Restituere quando debeat religiosus ob violatam paupertatem. [414](#). Revelatio quid sit [11](#). Illa movet nos ad credendum. ibid. Ejus divisio. [12](#). & seq. Revelatio privata saepe fallit. [17](#). Reus quando possit subjici torturae. [320](#). Rogatus legitime debet sincere respondere. [325](#). An possit fugere ex carcere. [326](#).

S.

SACRILEGIUM quid. [434.](#)

Scandalum quid & quotuplex. [167.](#) Est peccatum speciale. [168.](#) Permittendi scandali pretextus varii refutantur. [173.](#) & seq.

Schisma quid. [193.](#) Potest esse sine hæresi. ibi. potest esse tam à membris quam à capite. ibid. Ejus gravitas. ibid.

Signa credibilitatis in fide, in quo sint sita. [22.](#) & seq.

Simonia quid sit & quotuplex. [352.](#) Ejus malitia in quo sita.

[353.](#) An detur Simonia juris humani ibid. Quandoque committatur. ibid. Etiam est aliquando simonia, dum spirituale datur pro spirituali. [354.](#) An sit simoniacum accipere aliquid pro labore actionis sacræ, pro Doctrinâ Theologicâ, catechisticâ, &c. [355.](#) Quomodo sit simoniacum aliquid accipere pro ingressu Religionis. [356.](#) & seq. Simoniace accepta quomodo restituenda. [360.](#) Simoniacorum pœnæ. ibid.

Spes quid sit [95.](#) Non potest esse sine amore. [96.](#) Debet esse certa. [97.](#) Spes humana est fallax. [98.](#) Spei objectum materiale & formale. ibid. & [99.](#) In quo liceat sperare. [100.](#) Subjecta spei. ibid. & seq. Præceptum spei quandoque obliget. [102.](#)

Sponsio quid. [313.](#)

Sobrietas quid sit. [448.](#)

Societatis contractus. [312.](#)

Subsannatio quid sit. [280.](#)

Suspicio mala quid sit, & quale peccatum. [316.](#)

Sufurratio quid sit. [280.](#)

Superstitio quid & quotuplex. [428.](#) & seq.

T.

TEMPERANTIA quid, ejus actus & regula. [446.](#)

Tentatio Dei quid sit. [435.](#)

Testamentum quid [308.](#) Quid ad illud requiratur. ibid. Testamentorum solemnitas ad quid. [318.](#) Qui possint testari. [309.](#) Qui possint conficere testamenta. [310.](#) Testamentum, cum conditione turpi, quid valeat. [311.](#)

Testa-

ET VERBORUM.

Testamenti executor quid debeat. ibid.

Testis idoneus quis sit. 323. Testandi obligatio. 324.

Timiditas quid sit. 445.

Timor quid & quatuorplex. 103. Servilis timor utilis est, non tamen est donum Spiritus Sancti. 104. Timor mundanus est malus & quare. 105.

Tortura qui non possint subijci. 320. Qui possint saepius torqueri. 320.

V.

VECTIGALIMUM impositio. 331. *Ejus causa. 332. Eadem defraudantes quomodo peccent. 333.*

Venatio quomodo licita & illicita. 221. & seq.

Veritas divina quid significet. 10.

Veritas quid sit 439. Quam digna sit & rara. ibid.

Virtus Cardinalis quid & quatuorplex. 194.

Votum quid sit 396. Quid ad illud requiritur. ibid. & seq.

Voti materia. 397. Ejus obligatio. ibid. Vovere qui possint. 398. Voti permutatio, dispensatio desitio, &c. 399.

& seq. Votum castitatis in saeculo quid valeat. 401.

Usus fructus quid sit. 225. Usus juris & facti. ibid. Usus juris an distinguatur à dominio, maxime in rebus unico usu consumptibilibus. 226. & seq.

Usura quid sit & quatuorplex. 292. Numquam est licita & quare. 293. Quando fiat usura. ibid. An ratione periculi pecuniae liceat aliquid recipere. 294.

F I N I S.



Errata secundi tomī sic corrige.

- folio 9. lineā 18. *fides lege fidei donum.*
fol. 24. l. 30. August. *lege Ambros.*
fol. 48. l. 8. exercitium *lege exercitum.*
fol. 76. l. 36. sectæ *lege sectas.*
fol. 82. l. 5. fecit *lege ferit.*
fol. 90. l. 5. quilibet *lege à quolibet.*
fol. 227. l. 14. Et sana *lege Cæsena.*
fol. 239. l. 22. restitutionem *lege vestitutionem.*
fol. 247. l. 35. vitam *lege vivam.*
fol. 269. l. 5. dele *sed perperam.*
fol. 276. l. 11. alteri revelari. *lege alteri ulterius reve-*
lari.
fol. 289. quas. *lege quam.*
fol. 291. l. 31. cominando *lege commodato.*
fol. 294. l. 27. ut *lege &*
fol. 301. l. 25. Lovaniensibus *lege à DD. Loy.*
fol. 304. l. 13. libri *lege liberi.*
fol. 303. l. 27. quem *lege quam.*
fol. 309. l. 5. pactibus *lege partibus.*
fol. 316. l. 35. dele *iis.*
fol. 320. l. 28. & 30. iudicia *lege indicia.*
fol. 321. l. 15. abjucare *lege adjudicare.*
fol. 327. l. 17. probilitate *lege probabilitate.*
fol. 334. l. 20. simplicium *lege regularium.*
fol. 344. l. 30. ultimò *lege ulterius.*
fol. 425. l. 26. si *lege sit.*
fol. 440. l. 31. advertendum *lege avertendum.*
fol. 456. l. 3. indulgetur *lege indulgetur.*
fol. 461. l. 20. & 21. fluxus *lege fluxum & similis lege*
similem.

Cetera minora per se facile lector corrigit.

5-1

